


O A'OA'OGA FA'AFA'ATA'OTO A KERISO



Tusia e E.G. White

Ua Fa'a-Samoaina

Fa'atomuaga

O *A'oa'oga Fa'afa'ata'oto a Keriso* sa tusia e E.G. White (Elena Uaita) ma na muā'i lolomiina i le tausaga e 1900 i le gagana fa'a-Peretania e le fale lomitusi o le Pacific Press Publishing Comapny. O le autū o matā'upu o fa'ata'oto a Keriso - o le ala sa Ia fa'aalia ai le malamalamaga fa'aleagaga e ala i fa'ata'ita'iga mai fa'agaoioiga masani o le olaga o aso faiso'o. E fa'avae i luga o le Afioga a le Atua, e fa'atotonugalemū le Fa'aola, ma o ōna matā'upu e fa'asui olaga ua ta'ita'iina ai se to'atele i se malamalama'aga o le malō o le lagi.

Sa tu'u mai e Keriso, le A'oa'o Sili Āna a'oa'oga a o femalagaa'i ma Ōna so'o i atumauga ma vanu o Palesitina, po o le malōlō i autafa o le sami po o vaitafe ma vaitūloto. Na Ia fa'afeso'ota'i 'upu moni fa'aleagaga ma gaoioiga po o mea e tutupu o aso ta'itasi, fa'apei o galuega a leoleo mamoe, o ē kamuta ma 'au fai fale, o lē galue i le 'ele'ele po o le lūlū saito, o le tagata faimalaga po o lē galue i le tausiga o le aiga. O mea e masani ai ua Ia so'ofa'atasi ma manatunatuga e moni ma matagofie - mafauauga i le alofa mutimutivale o le Atua mo i tatou, o le fa'aaloaloga e tatau mo Ia, ma le agalelei o le tasi i le tasi. O nei a'oa'oga mai le tomai fa'alelagi ma 'upu moni tauletino ua faia mo lo tatou lelei. Ia 'avea ma ta'iala a o tatou aga'i pea i le malō ua saunia e le Fa'aola mo ē talitonu ma usita'i iā te Ia.

Mo le Faitau Tusi

O lenei tusiga ua fa'a-Samoaina, ua fa'avasegaina ōna vaega e fa'atatau i o latou matā'upu, ma o a'oa'oga ua atina'e ma fa'amatalaina i tala fa'afa'atusa. E fa'atumulia lenei tusi e ma'atāua o le 'upu moni, ma e talitonu o le a tu'u atu ai i le faitau tusi se malamalamaga e sili o na manino mai le olaga masani o aso faiso'o.

I lona naunau e fa'aaogā nei a'oa'oga tāua i su'esu'ega o le soifuāga o Keriso, sa amata ai ona galue le ali'i faife'au o Tini Inu Lam Yuen e fa'aliliuina lenei tusi i le gagana Samoa i le tausaga e 1979. Sa fa'aauau ina ia uma ona fa'aliliu ma tu'ufa'atasia lenei galuega tāua e Abbie Leala Watt ma fa'atonuina fa'aSamoa e Florence Tupito Voigt i le tausaga e 2020.

O lo'o fa'aaogāina lenei tusiga e fai ma fa'avae mo fa'asologa o su'esu'ega fa'ale-Tusi Pa'ia, e aofia ai tausaga o le soifuāga galue o Keriso a o i le lalolagi. O le fa'amoemoe ia faia fa'ata'ita'iga ma lesona ua tu'u mai i lenei lomiga ia maua ai se fa'amalamalamaga fou i olaga o tagata mai a latou fa'agaoioiga i si'osi'omaga 'ese'ese i aso ta'itasi. Ia 'avea a'oa'oga ma fetalaiga a le A'oa'o Sili o se fa'amalosi'aga a o tatou su'esu'e pea i Lana Afioga.

Fa'aliliu ma le Fa'atonu

FA'ASINO MATĀ'UPU

1. O le Pogai na A'oa'o Atu ai Keriso i Fa'ata'oto	5
2. O le Lūlū Saito	9
3. Tupu A'e i le Mana o le Atua	20
4. A'oa'oga Mai le Titania	23
5. "E Pei o le Fua o le Sinapi"	25
6. Fatu o le Poto	27
7. "E Fa'apei o le Mea Fa'afefete"	31
8. 'Oa ua Nātia	34
9. O le Penina Tautele	39
10. O le 'Upega	42
11. O Mea Fou ma Mea ua Tuai	43
12. Talosaga Mai e Avatu	48
13. Tagata Tapua'i e To'alua	53
14. Mana o le Tatalo: "E Lē Tauia e le Atua Lana 'Au Filifilia?"	59
15. "E Talia e Lenei Tagata o Ē Agasala"	66
16. "Na Lēiloa a e ua Toe Maua"	71
17. "Ia Fa'asao i Lenei Fo'i Tausaga"	76
18. "Ia Ō Atu i Āla ma Magāāla"	79
19. O le Fua o le Fa'amagaloga	86
20. O le Mea na Maua a e ua Lēiloa	90
21. "O le Vanu Tele ua Toe Fa'aleleia"	93
22. O 'Upu ma le Fa'agaoioiga	98
23. O le Tovine a Le Ali'i	104

24. Aunoa ma se 'Ofu o le Tausama'aga	112
25. O Taleni	117
26. Fai Uō Ona o 'Oa a le Amiolētonu	133
27. "O Ai Lo'u Tuā'oi"	137
28. O le Tau'i o le Alofa Tunoa	142
29. E Fa'afetaia'i i le Fa'ato'āfaiavā	148

O le Pogai na A'oa'o Atu ai Keriso i Fa'ata'oto

Matā'upu 1

I le a'oa'o atu i fa'ata'oto, o le fa'avae lava e tasi na va'aia o fa'aaogā e Keriso e pei o Lana lava galuega i le lalolagi. Ina ia tatou iloa lelei Lona uiga fa'ale-Atua ma le soifuāga, sa Ia 'aveina lo tatou uiga moni ma mau fa'atasi ma i tatou. O Lona itu Atua sa fa'aalia i le aigā tagata; o le mamalu e lē mava'aia i le tino tagata e va'aia. Na mafai ona a'oa'o o tagata mea e lē o iloa mai mea o lo'o iloa; o mea fa'alelagi na fa'ailoa mai mea i le lalolagi; sa fa'aalitinoina le Atua i le foliga o tagata. O lea sa fa'apea ona a'oa'o atu Keriso; o mea e lē o iloa, ua fa'amalamalamaina e ala i mea e iloa; o 'upu moni fa'aleagaga e ala i mea fa'alelalolagi ma mea e masani i ai tagata.

Ua ta'u mai i le Afioga a le Atua, "Ua fetalai atu Iesu i ia mea uma i le motu o tagata i fa'ata'oto;...ina ia taunu'u ai le 'upu a le perofeta, ua fa'apea mai, 'Ou te tautala atu i fa'ata'oto; Ou te ta'u atu mea na lilo talu ona fa'avaeina le lalolagi'" (Mataio 13:34, 35). E ala mai mea o le natura mea fa'aleagaga; o mea o le foafoāga ma mea e tutupu i olaga o Lana 'au fa'alogologo sa so'ofa'atasi ma 'upu moni o tusitusiga pa'ia. O lea, e mai mea na foafoaina e o'o i le malō fa'aleagaga, o fa'ata'oto a Keriso e so'ofa'atasi e le maea o le 'upu moni o lo'o fa'atasi ai le tagata ma le Atua, o le lalolagi ma le lagi.

I Āna a'oa'oga mai mea o le foafoāga, sa fetalai Keriso fa'ata'oto i mea na faia e Ōna lava 'a'ao, ma mea e i ai uiga lelei ma le mana na Ia tu'u i ai. I lo latou tulaga e ato'atoa, o mea uma na foafoaina sa fa'aalia ai le finagalo o le Atua. Iā Atamu ma Eva i lo la aiga i Etena, o le foafoāga sa fa'atumulia i le malamalama o le Atua, tumu i fa'atonuga fa'ale-Atua. O le poto sa fa'ailoa i mata ma taliaina i totonu o le loto; sa feso'ota'i ma le Atua i Āna galuega na faia. Ina ua soli tulafono a le Silisili 'Ese e Atamu ma Eva, sa mavae 'ese le pupula mai fofoga o le Atua na fa'aalia mai Āna foafoāga. Ua fa'aleagaina nei le lalolagi e le agasala. E ui i le tulaga pagaātia ua i ai nei, a e o lo'o tumau pea le matagofie. E le'i tineia ato'atoa e le Atua Āna a'oa'oga fa'afa'atusa; auā e moni lava, o lo'o fa'amatalaina e mea na faia Lē na foafoaina mea uma.

I le taimi o Iesu, o nei a'oa'oga sa lē fa'aaogāina. Ua lē iloa e le tagata ona fa'ailoa le Atua i Āna galuega. Ua nenefu foliga o mea sa foafoaina e le tulaga agasala o le aigā tagata; ua lē fa'aalitinoina le Atua, o Āna galuega ua 'avea ma pupuni e lilo ai o Ia. Ua tele ina tapua'i ma au'auna tagata i mea na faia a e lē o Lē na foafoaina mea uma. O tagata "ua tapua'i ma au'auna i mea na faia, a ua tu'u o Ia na na faia." Ua fa'apea fo'i tagata fa'apaupau, "ua fa'avaleleaina i latou i le taumasalosalogā, ua fa'apōuliuligia fo'i o latou loto vālea" (Roma 1:25, 21). I Isara'elu, o a'oa'oga a tagata ua suia a'oa'oga a le Atua. Ua lē na o mea na faia ua fa'atāua, a e o sauniga ma taulaga ma le Afioga Pa'ia - o mea na aumaia e fa'aalia ai le Atua - ua matuā fa'aaogā sesē, ma ua 'avea ma auala ua lilo ai o Ia. Ua sa'ili nei Keriso e 'ave'ese mea o lo'o fa'anenefu ai le 'upu moni. O le 'ie pupuni ua tapunia ai e le agasala le matagofie o le foafoāga, na Ia afio mai e to'esea ma aumai ai se va'aiga o le pupula fa'aleagaga na faia mea ia fa'aātaina. O Āna fetalai na tu'u ai a'oa'oga o mea na faia fa'apea ma le Tusi Pa'ia i se va'aiga fou, ma faia i latou o se fa'aaliga fou.

Na 'oto e Iesu le lili matagofie ma tu'u i lima o le fanau ma le 'au talavou; ma a o latou va'ava'ai i Ōna ia lava fofoga talavou, o lo'o pupula i le fa'atasi ai o Lona Tamā, sa Ia tu'u atu le a'oa'oga, "Ia outou mafaufau i le lautalotalo o le vao, pe fa'apefea ona tupu; latou te lē galulue, latou te lē milo fo'i; a e 'Ou te fai atu iā te outou, o Solomona ma lona matagofie tele na lē ofu o ia pei o le tasi o nā mea." Ona fa'aopoopo atu lea o le ta'utinoga ma le a'oa'oga tāua, "Afai e fa'apea ona fa'aofuina e le Atua le vao o le fanua, e ola mai i le asō, a e lafoina a taeao i le ogāumu; e lē sili ea ona Ia fa'aofuina o outou e fa'atuatua itiiti?" (Mataio 6:28-30).

I le lauga i luga o le mauga o nei 'upu na fetalai atu ai i isi fa'atasi ma le fanau laiti ma talavou. Sa Ia fetalai i le motu o tagata, o tamā ma tinā o lo'o tumu i le popole ma fa'afitauli, o lo'o tigāina ona o fa'amoemoe lē taunu'u ma le fa'anoanoa. Ua fa'aauau atu e Iesu, "O lenei, 'aua ne'i outou popole, ma fa'apea ane, 'Ni ā mea tatou te 'a'ai ai, ni ā fo'i mea tatou te inu ai, ma ni ā fo'i mea tatou te 'o'ofu ai?' Auā o mea uma ia ua sa'ili e nu'u 'ese. Auā ua silafia e lo outou Tamā o i le lagi e aogā ia mea uma iā te outou." Ua fa'aloaloa atu Ōna 'a'ao i le motu o tagata o lo'o si'osi'omia o Ia, ma fa'apea atu, "A ia outou

mua'i sa'ili le malō o le Atua ma Lana amiotonu, ona fa'aopoopoina atu lea o ia mea uma iā te outou" (Mataio 6:31-33).

O le mea lea, sa fa'amalamalama e Keriso le fe'au na Ia tu'uina atu i le lautalotalo ma mutia o le fanua. Ua naunau o Ia ia tatou faitau i uiga o fugāla'au ma lau uma o le mutia; auā o Āna afioga e tumu i fa'amalosia'aga ma fa'amaoniga o le tāua o le fa'atuatua i le Atua.

E matuā lautele le silafaga a Keriso i le 'upu moni, e fa'apea le lautele o Āna a'oa'oga, ua Ia fa'aaogā ai tulaga uma o le foafoāga e fa'amalamalama ai le 'upu moni. O va'aiga e fa'amaui e mata i aso ta'itasi e so'ofa'atasi i latou uma ma 'upu moni fa'aleagaga, o lea ua fa'aofuina mea uma o le foafoāga ma fa'ata'oto a le Matai.

I le amataga o Lana galuega, sa fetalai Iesu i 'upu faigofie ina ia maua e tagata le 'upu moni e 'avea ai i latou o ē malamalama i le fa'aolataga. A e peitai i le tele o loto, sa le'i ola ni a'a, ma ua vave ona toe tō'esea. Ua fa'apea mai o Ia, "O le mea 'Ou te tautala atu ai iā te i latou i fa'ata'oto, auā o lo latou va'ai latou te lē va'ai ai, o lo latou fa'alogofa fo'i latou te lē fa'alogofa ai, pe lagona. Ua taunu'u ai le valo'aga a Isaia,...Auā ua mafafaga loto o lenei nu'u, ma ua fa'alogofatā o latou taliga i fa'alogofa, ua moe'i'ini fo'i o latou mata" (Mataio 13:13-15).

E fa'anaunau Iesu ia fa'afaga le agaga su'esu'e. E sa'ili o Ia e fa'ate'ia ē o fa'atamala, ia tu'u le 'upu moni i o latou loto. O a'oa'oga fa'afa'ata'oto sa mana'omia, ma na fia fa'alogologo i ai, ma fa'atāua, e lē na o luitaia a e fa'apea tagata mai i isi atunu'u. Na leai se isi itu'aiga auala e a'oa'o atu ai sa sili atu le aogā. Pe ana naunau Lana 'au fa'alogologo e iloa mea fa'aleagaga, atonu latou te malamalama ai i Āna afioga; auā sa naunau pea o Ia e fa'amalamalama iā i latou ia mea.

E i ai 'upu moni a Keriso e tu'uina atu i tagata a e sa latou le'i sauni e talia pe e malamalama fo'i i ai. O lenei fo'i le mafua'aga sa Ia a'oa'o atu ai i fa'ata'oto. I Lona feso'ota'i atu o Āna a'oa'oga ma mea 'ese'ese e tutupu i le olaga, po o tulaga o mea na foafoaina, sa Ia tosina mai ai o latou mafaufau ma fa'aulu atu i o latou loto. Mulimuli ane, a o latou va'ava'ai i mea masani sa fa'amalamalamaina ai Āna a'oa'oga, ona latou mantua lea o fetalaiga a le A'oa'o mai le lagi. I mafaufau sa fa'aavanoaina mo le Agaga Pa'ia, ma fa'asolo mai lava le malamalama i le tāua o a'oa'oga a le Fa'aola. O mea na lilo ua tauau ina manino, ma o mea sa faigatā ona iloa, ua fa'amaonia.

Sa sa'ili pea e Iesu se ala i loto uma. E ala i le fa'aaogāina o fa'amalamalamaga 'ese'ese, sa Ia tu'u atu le 'upu moni i ōna la'asaga 'ese'ese ma na fa'ataūanau atu i loto o le 'au fa'alogologo. Sa fa'afuina i latou i a'oa'oga ofoofogia mai o latou si'osi'omaga ma mea e feagai ai i le olaga o aso ta'itasi. E le'i i ai se isi na fa'alogofa i le Fa'aola ma lagona o lo'o galo po'o fa'atalalē iā i latou. O le tagata e aupito maulalo, o ē aupito agasala, na lagona i Āna a'oa'oga se si'ufoga e tigālofa ma le agamalū ua fetalai atu iā te i latou.

Ma e i ai se isi mafua'aga sa a'oa'o atu ai Ia i fa'ata'oto. Sa fa'atasi ai i le motu o tagata na fa'apotopoto atu iā te Ia faitaulaga ma a'oa'o, o tusi'upu ma ta'ita'i, o le 'au Herotitia ma toea'ina, o ē fiafia i le lalolagi, ē manatu fa'apito, fa'ailoga tagata, tagata fiasili, ma ē naunau ia maua se mea e molia ma tete'e ai iā te Ia. O le 'au taupulepule sa mulimuli i Ōna tulaga'a'ao i aso ta'itasi, ina ia tau pu'e mai i Ōna lafofoga sina 'upu ia mafai ai ona molia o Ia ina ia ta'usalaina ai, ma ia fa'afilemū e fa'avavau Lē o lo'o fa'atosina mai le lalolagi iā te Ia. Na malamalama le Fa'aola i uiga o nei tagata, ma sa Ia tu'uina atu le 'upu moni i se ala e lē mafai ai e i latou ona maua se mea o le a molia ai Ia i luma o le Fono Faitulafono.

I Āna fa'ata'oto sa Ia a'oa'i atu i le fa'afiaamiotonu ma galuega leaga a i latou o i tulaga mauauluga, i se gagana fa'afa'atusa e ufiufi le 'upu moni auā ana fa'aleo sa'o atu le latou faiga leaga, manū latou te lē fa'alogofa i Āna fetalaiga, ma o le a fa'avave ai fo'i ona fa'ai'uina Lana galuega. A o Ia 'alo'ese mai le 'au taulamalama, sa Ia ta'u manino atu le 'upu moni na fa'aalia ai le sesē, ma o ē loto fa'amaoni sa latou maua mea aogā mai Āna a'oa'oga. O le poto fa'ale-Atua, o le alofa tunoa e lē gata, na fa'amanino e ala i mea na foafoaina e le Atua. E ala i le natura ma mea e tutupu o le olaga, o mea ia sa a'oa'oina ai tagata e le Atua. "O Āna mea e lē va'aia talu ona faia o le lalolagi, e va'aia lava...i mea na faia, o Lona mana fa'avavau lava lea, ma Lona Atua..." (Roma 1:20).

O a'oa'oga fa'afa'ata'oto a le Fa'aola, e fa'ailoa ai po o le ā le fa'avae o "a'oa'oga mauauluga" moni. Atonu ua tatala mai e Keriso i tagata mea moni loloto tau i le poto maoa'e. Atonu ua Ia tatala mea lilo na alu le tele o tausaga o galue ma su'esu'eina ina ia mafai ona ūlu i ai. Atonu sa Ia faia ni fautuāga i tusitusiga a ē popoto e mafai ai ni su'esu'ega e manatunatu i ai, ma fa'atupu ai le fausia o mea fou e lata i

le taimi o le i'uga. A e peita'i e Na te le'i faia fa'apea. E le'i i ai se fetalaiga e fa'amalie ai le uiga fiaailoa, pe o le fa'amalieina o le uiga fiasili o le tagata e ala i le tatalaina o faitoto'a ta'uta'ua fa'alelalolagi. Mai Āna a'oa'oga uma, sa aumaia e Keriso le mafaufau o le tagata ia feso'ota'i ma le finagalo e leai se i'uga. Na te le'i fa'atunuina tagata ia su'esu'e manatu fa'aletagata e fa'atautu i le Atua, o Lana a'fioga, po o Āna galuega. Sa Ia a'oa'o i latou ia iloa o Ia ua fa'aalitinoina i Āna galuega, i Āna fetalaiga, ma e ala i Lona finagalo.

E le'i fa'aaogā e Keriso na o ni manatu e lē mautinoa, a e o mea e mana'omia mo le atina'e o le amio, mo le fa'alauteleina o le mafaufau o le tagata ina ia iloa le Atua, ma fa'atele lona aogā e mafai ai ona faia o mea e lelei. Na Ia fa'ailoa atu i tagata nei 'upu moni e fa'atautu i le tulaga e ta'ita'iina ai le olaga, ma ia taofimau ai le ola e fa'avavau.

O Keriso sa ta'ita'i i le a'oa'oina o Isara'elu. E fa'atautu i poloa'iga ma sauniga a le Ali'i, sa Ia fetalai, "Ia e matuā a'oa'o so'o ai lau fanau, ma ia e tautalatala a'i, pe a e nofo i lou fale, pe a e savali fo'i i le ala, pe a e ta'oto, pe a e tula'i fo'i. Ia e fusi ai e fai ma fa'ailoga i lou lima, e avea fo'i ma pale i le vā o ou mata. Ia e tusi ai fo'i i pou o lou fale, atoa ma ou puipui" (Teuterenome 6:7-9). I Āna ia lava a'oa'oga sa Ia fa'aali atu pe fa'apefea ona fa'ataunu'uina o lenei poloa'iga - e fa'apefea ona fa'ailoa atu tulafono ma ta'iala o le malō o le Atua ina ia fa'aalia ai lo latou matagofie ma le tāua. Ina o a'oa'oina e le Atua Isara'elu e 'avea o Ōna sui fa'apitoa, sa Ia avatu iā i latou o mea e nonofo ai i luga o atumauga ma lalo i vanu. I o latou olaga i aiga ma sauniga fa'aleagaga, sa feso'ota'i pea i latou ma mea uma o le foafoāga atoa ma le a'fioga a le Atua. Sa fa'apea ona a'oa'o e Keriso Ōna so'o i autafa o le vaituloto, i luga o le mauga, i totonu o fanua ma togāla'au, i nofoāga e mafai ai ona latou va'ava'ai i mea sa Ia fa'aogā e fa'amalamalama ai Āna a'oa'oga. A o a'oa'oina i latou e fa'atautu i le uiga o Keriso, sa fa'aaogāina lo latou malamalama e 'au'aumea fa'atasi ai ma Ia i le galuega.

O lea, e ala i mea o le foafoāga, ua tatau ona tatou iloa lelei Lē na faia mea uma. O le tusi o le natura o se a'oga e sili atu le tāua, e ao iā i tatou ona fa'aaogā fa'atasi ma le Afioga Pa'ia e a'oa'o atu ai nisi e fa'atautu i Lana amio, ma toe ta'ita'i mai ai mamoe ua lē iloa i le lotoā a le Atua. A o su'esu'e fa'atautu i le galuega a le Atua, o le a fa'asusuina e le Agaga Pa'ia le 'upu moni i le mafaufau. O le suiga e lē o'o mai ona ua mafaufauina; peita'i vaganā ua pogisā tele le mafaufau ua lē iloa ai le Atua, o mata ua fa'anefu ua lē va'aia ai o Ia, o taliga ua lē mafai ona lagona Lona si'ufofoga, o le a pu'emaia le uiga loloto, ma o 'upu moni matagofie fa'aleagaga o le a'fioga pa'ia o le a fa'amauiina i le loto.

I nei a'oa'oga ua aumai sa'o mai mea na foafoaina, e faigofie ma ato'atoa ma e maoa'e le tāua. E mana'omia uma le a'oa'oga ia maua mai le puna; o lo'o i ai le matagofie o se foafoāga e ta'ita'i 'ese ai le agaga mai agasala ma tu'inaanu fa'alelalolagi, a e tepataula'i i le ato'atoa, filemū, ma le Atua. E tele le taimi ua fa'atunuina ai mafaufau o le fanau a'oga i manatunatuga ma taumatematega a tagata, ua ta'ua o fa'avae ma su'esu'ega ma le poto maoa'e; a e ua tatau ona toe ta'ita'i mai ia feso'ota'i ma uiga moni o le foafoāga. Ia a'oa'oina i latou e tasi le Atua o le foafoāga ma le Kerisiano. Ia a'oa'oina i latou ia va'aia le ō gatasitasi o mea o le natura ma le fa'aleagaga. Ia faia mea uma e tagofia e lima ma va'aia i o latou mata ia 'avea o se a'oa'oga i le atina'eina o le amio. O le a fa'amalosia ai le malosi fa'alemaufau, atina'e ai le amio, ma fa'aeaina ai i le olaga atoa.

O le fa'amoemoe i le a'oa'o atu a Keriso i fa'ata'oto e ō gatasi ma le fa'atāuina o le Sapati. Sa tu'uina e le Atua i tagata le fa'amanatuina o Lona mana foafoa, ina ia latou iloa Ia i galuega a Ōna 'a'ao. O le Sapati e ta'u mai ai ia tatou va'aia i Āna galuega le mamalu o Lē na faia mea uma, o le ala lea ua tu'u fa'atasi ai e Iesu Āna a'oa'oga ofoofogia i le va'aiga matagofie o mea na Ia foafoaina. O lea la, i le aso malōlō pa'ia, e tatau iā i tatou ona su'esu'ina fe'au na tu'uina e le Atua mo i tatou i mea o le foafoāga. E tatau ona tatou su'esu'eina fa'ata'oto i mea na Ia a'oa'o atu ai, i laufanua ma togāla'au, avanoa i fafo i lalo o la'au, i fa'ato'aga fugāla'au ma fanua lafulemū. A o tatou i ai i totonu o Āna foafoāga, o le a fa'atasi ai ma Keriso, ma Ia fetalai mai i o tatou loto e uiga i Lona filemū ma le alofa tunoa mo i tatou.

Ua so'ofa'atasi e Iesu Āna a'oa'oga ma le vaiaso o galuega, a e fa'apea ma le aso malōlō, o le Sapati lea. Na te avatu le poto mo lē e suōtosina le 'ele'ele ma totō le fatu. I le suaina ma le totōina, o le teuteuina ma le selesese, o lo'o Ia a'oa'o mai iā i tatou ia va'ai i le fa'amalamalamaina o Lana galuega o le alofa tunoa i totonu o le loto. So'o se galuega aogā ma so'o se feso'ota'iga o le olaga, o lo'o Ia naunau ia tatou sa'ili ia maua ai se a'oa'oga o le 'upu moni fa'aleagaga. O le a lē alu ai lo tatou taimi e galue mo i tatou lava a e fa'agalo ai le Atua; o le a fa'amanatu mai pea iā i tatou lo tatou Fa'aola ma Lē na faia i tatou.

O le manatu fa'atatau i le Atua o le a pei o se maea auro i a tatou gaoioiga uma i le aiga ma galuega i fafo atu. O le mamalu o Ōna fofoga o le a toe fa'aalia mai i Āna foafoāga, ma o le a tatou maua pea a'oa'oga fou o le 'upu moni fa'alelagi, ma tatou tupu a'e ai i le fa'atusa o Lona uiga ato'atoa. O lea, o i tatou o le a "a'oa'oina uma lava e le Ali'i" (Isaia 54:13); ma o le a tatou i ai i le mea ua vala'auina ai tatou, ma o le a tatou "nofo pea i luma o le Atua" (I Korinito 7:24).

Ua Alu Atu le Lūlū Saito e Totō

Matā'upu 2

E fa'avaeina nei ulua'i a'oa'oga e fā i le Mataio 13:1-9, 18-23; Mareko 4:1-20; Luka 8:4-15.

O le fa'ata'oto i le lūlū saito, na fa'amalamalama ai e Keriso mea o le mālō o le lagi, ma le galuega a Lē galue fanua mo tagata. E pei o le lūlū saito i le fanua, Na Ia afio mai ina ia fa'asalalauina le saito o le tala moni mai le lagi. Ma o a'oa'oga o Āna fa'ata'oto lava ia, o le fatu lea o 'upu moni tāua o Lona alofa tunoa na lūlūina ai. Talu ai ona o le faigofie o le fa'ata'oto i le lūlū saito e le'i fa'ataunu'uina e pei ona tatau ai. Mai le fatu na lūlūina i le 'ele'ele, e fa'apea ona naunau ia ta'ita'iina o tatou mafau'au i le fatu o le tala lelei, O lona fa'asalalauina e i'u i le fa'afo'isia o le tagata ina ia toe fa'amaoni i le Atua. O Ia lea na aumaia le fa'ata'oto i le fatu itiiti o le Tupu o le lagi; ma o le tulafono lava lea e tasi e pulea ai le lūlūina o fatu i le lalolagi, e pulea ai le lūlūina o fatu o le 'upu moni.

I autafa o le Sami o Kalilaia na fa'apotopoto mai ai tagata ina ia va'ai ma fa'alologologo ia Iesu - o ē na sagisagi mai ma lo latou naunau tele. Na i ai ē mama'i, o lo'o ta'o'oto i ē latou moega, o lo'o fa'atalitali ia fa'ailoa atu o latou mana'oga i Ōna luma. O le pule na tu'uina mai Lona Tamā na te fa'amālōlō ai le ōi o le fanau agasala a tagata, ua Ia a'oa'i atu nei i fa'ama'i, ma Ia fa'asalalau atu i Ōna autafa le ola, o le mālōlōina, ma le filemū.

A o fa'ato'ateleina mai pea le motu o tagata, na latou feta'omi mai ia Keriso se'ia o'o ina leai se avanoa mo i latou uma. Ōna Ia fetalai atu lea se 'upu i tagata fai faiva o lo'o i ē latou va'a. Sa Ia maliu atu i le va'a o lo'o fa'atali e ave o Ia i le isi itu o le vai, ma Ia fetalai atu loa i Ōna so'o ina ia latou tūlei 'ese le va'a mai le lau'ele'ele. Na Ia fetalai atu loa i le motu o tagata o lo'o i autafa o le vai.

I tafatafa o le vai o lo'o ta'atia mai ai le lau'ele'ele laugatasi o Kenesereta, o tua atu o lo'o i ai mea maupu'epu'e, ma i luga o mea maupu'epu'e ma le fanua laugatasi o lo'o tau fai galulue ai ē lūlū saito ma ē selesese saito, o lē tasi o lo'o lūlū saito a o le isi o lo'o selesese le ulua'i saito. Ua silasila atu Iesu i lea va'aiga, ona fetalai atu lea, "Fa'auta, o le tagata lūlū saito, ua alu atu ia e lūlū ai le saito. Ua ia lūlū saito, ona pa'ū lea isi i auala, ona ē ane lea o manu felelei, ua 'a'ai ai, ua pa'ū fo'i isi i le mea papa, e itiiti lava le 'ele'ele sa i ai, ona tupu lise lea ia, auā o le 'ele'ele ina itiiti. Ua alu a'e le lā, ua velasia ai, ona magumagu ai lea, ona ua leai ni a'a. Ua pa'ū fo'i isi i le vao tuitui, ua tutupu a'e le vao tuitui, ona fetina'iina ai lea, e le'i fua mai lava. A ua pa'ū isi i le 'ele'ele lelei, ua tutupu a'e, ma tupu tele, ua fua mai, e ta'itolu sefulu i nisi, e ta'iono sefulu i nisi, a e ta'i selau i nisi" (Mareko 4:3-8).

E le'i malamalama tagata o Ōna taimi i le galuega a Keriso. O le ala na afio mai ai e lē talafeagai ma mea na latou fa'amoemoe i ai. O le Ali'i o Iesu o le fa'avae lea o le itu tau tamao'aiga uma o le fa'a-Iutaia. O le matagofie o sauniga e fa'ale-Atua le taunu'uga. Na fuafuaina ia a'oa'o ai tagata i le taimi e afio mai ai Lē ua tofia, lea e fa'asino i ai nei sauniga uma. A o Iutaia ua fa'atāuina le faiga o sauniga a e ua lē iloa i la latou va'ai lo latou uiga moni. O tū ma masani, o 'uputu'u ma tulafono a tagata ua nātia ai mai iā te i latou a'oa'oga na finagalo le Atua ia fa'aalia iā i latou. O nei 'upu ma talatu'u na a'oa'o ua 'avea ma fa'alavelave i lo latou malamalama i le fa'atinoina o le tapua'iga moni. Ma ina ua o'o mai Lē moni i le peresona o Keriso, latou te le'i iloa o Ia le taunu'uga o ā latou sauniga fai ata. Na latou tete'e i le moni, a e taofi mau iā latou mea fai ata ma sauniga lē aogā. Ua afio mai le Alo o le Atua, a o latou fa'aauau pea ona fesili mo se fa'ailoga. O le fe'au, "Inā salamō ia outou; auā ua latalata mai le mālō o le lagi," na latou taliina e fia vā'ai i se vavega (Mataio 3:2). O le tala lelei iā Keriso o le mea na fai ma fa'alavelave iā i latou auā na latou manana'o i ni fa'ailoga a e lē o se Fa'aola. Na latou manana'o ia fa'amaonia e le Mesia Āna 'upu e ala i ni fa'atinoga ofoofogia o le manumālō, ia fa'avae ai Lona mālō i fa'atafunaga o mālō o le lalolagi. O lenei fa'amoemoega na tali e Keriso i le fa'ata'oto i le lūlū saito. E lē o le malosi o se 'au tau, e lē o le fa'asauā ma le fa'amalosi e manumālō ai le mālō o le Atua, a e o le totōina o ta'iala fou i loto o tagata.

“O lē lūlū saito lelei, o le Atali'i lea o le tagata.” Ua afio mai Keriso, e lē o se tupu, a e o le lūlū saito; e lē o le fa'ato'ilaloina o mālō, a e o le lūlūina o le fatu; e lē o le fa'asino o ē mulimuli iā te Ia i le manumālō fa'ale-lalolagi, ma le ta'uta'ua i mālō, a e o le seleselega ia fa'aputu ina ua mavae le galuega na faia ma le 'onosa'i i totonu o faigatā ma fa'amoemoega lē taulau.

Na iloa e le 'au Faresaio le uiga o le fa'ata'oto a Keriso, peita'i latou te le'i taliaina le a'oa'oga. Na latou fa'atagā lē malamalama i ai. O le to'atele o le motu o tagata na a'afia ai, e tele na'uā mea lilo e uiga i lenei a'oa'o fou, o Āna 'upu e fa'agae'etia ai o latou loto a e 'o'ona tele le lē taunu'u o o latou fa'anaunauga. O le 'au so'o fo'i na lē malamalama i latou i le fa'ata'oto a e na fafagu ai lo latou fia iloa; na latou ō atu ai iā Iesu ina ua na'o i latou ma fesili i ai mo se fa'amalamalamaga.

O le fa'anaunauga lea na finagalo Keriso ia fafaguina, ina ia mafai ona tu'uina atu iā i latou le fa'atonuga mautinoa. Na ia fa'amalamalama le fa'ata'oto iā i latou, e pei fo'i ona Ia fa'amalamalamaina Lana 'upu iā i latou uma o ē sa'ili iā te Ia ma le fa'amaoni i o latou loto. O ē latou te su'esu'e le afioga a le Atua ma o latou loto e tatalaina i le fa'apupulaina e le Agaga Pa'ia, e lē tumau i latou i le pouliuli i le uiga o le 'upu. “Ai se tasi e fia fai Lona finagalo, e iloa ai e ia le matā'upu, pe mai le Atua, pe 'Ou te tautala fua lava A'u” (Ioane 7:17). O i latou uma e ō mai iā Keriso ma le fia malamalama atili i le 'upu moni e latou te maua lava. Na te fa'ailoa iā i latou mea lilo o le mālō o le lagi, ma mea lilo e malamalama i ai le loto e naunau e fia iloa le 'upu moni. E sulugia i le malamalama o le lagi le malumalu o le loto. Ma o le a fa'ailoa fo'i i nisi e pei ona susulu mālosi le lamepa i le auala pogisā.

“O le tagata lūlū saito, ua alu atu ia e lūlū ai saito.” I le itu i Sasa'e, na tele le vevesi ma le lē to'afilemū, sa lamatia i sauāga, o tagata na mau i 'a'ai nofo 'olo, ma o tagata fai fa'ato'aga na ō atu i tua o le 'a'ai i aso ta'itasi e fai ai a latou fa'ato'aga. E fa'apea fo'i Keriso, o le lūlū saito. Na Ia tu'ua le saogalemū ma le filemū, o le matagofie o Lona aiga na fa'atasi ai ma Lona Tamā a o le'i i ai le lalolagi, na tu'ua Lona tulaga i le nofoali'i o le atulaulau. Na Ia maliu atu, o le tagata puapuagātia ma fa'aosoosoina; tu'ua to'atasi na'o Ia, e lūlū ma loimata, ina ia fa'asūsūina i Lona toto le fatu o le ola mo le lalolagi ua lē iloa.

E fa'apei fo'i Āna 'au'auna ia fa'apea ona latou ō atu e lūlū pe afai e vala'auina e 'avea ma ē lūlū le fatu o le 'upu moni. Na vala'auina Aperamo, “Ia tu'ua e oe o lou nu'u, ma le aiga o lou tamā, a e alu atu i se nu'u 'Ou te fa'asino atu ai ia te oe” (Kenese 12:1). “Na ia alu fo'i e le'i iloa po o fea a alu i ai” (Eperu 11:8). E pei fo'i o le aposetolo o Paulo, a o tatalo i le malumalu i Ierusalem, na o'o mai le fe'au mai le Atua. “Alu ia; auā o A'u, 'Ou te auina atu oe i nu'u 'ese e mamao” (Galuega 22:21). E fa'apea i latou ua vala'auina ia so'ofa'atasi ma Keriso, e ao ona tu'ua mea uma, a e mulimuli atu ia te Ia. O ē na 'au'aumea fa'atasi muamua e ao ina motusia feso'ota'iga, o fuafuāga o le olaga ua sui, ua loto malie e tu'u 'ese atu fa'amoemoega mo le olaga nei. I le galue ma loimata, o le a nofo loa i le si'osi'omaga e lē māsani ai, e ala i le taulaga ofo, e tataua ona lūlūina ai le fatu o le ola mo se lalolagi ua lē iloa.

“O le lūlū saito e lūlūina le upu.” Na afio mai Keriso ia lūlūina le 'upu moni i le lalolagi. Talu mai le taimi na pa'ū ai le tagata, na lūlūina lava e Satani fatu o le mea sesē. O le pepelo na ia mua'i maua ai ma pulea le tagata, ma o lo'o ia galue pea ia fa'ato'ilaloina le mālō o le Atua i le lalolagi ma ia aumai pea tagata i lalo ifo o lana pule. O le lūlū saito mai le lagi e maualuga a'e. O Keriso na afio mai ia lūlūina fatu o le 'upu moni. O Ia na tula'i i taupulega a le Atua, o Lē na afio i le totonugalemū o le malumalu, o Lē soifua e fa'avavau, e mafai ona aumaia i tagata ta'iala mamā o le 'upu moni. Talu mai lava le pa'ū o le tagata, o Keriso na aveia pea o Lē na fa'ailoa mai le 'upu moni i le lalolagi. E ala ia te Ia o le fatu e 'ato'atoa ma fa'amaoni “o le afioga a le Atua lea ua ola ma ua tumau e o'o i le fa'avavau,” ua fa'afeso'ota'i mai i tagata (I Peteru 1:23). I le folafolaga muamua lea na fetalai mai i ō tatou ulua'i mātua ina ua pa'ū i Etena, o Keriso na Ia lūlū le fatu o le tala lelei. Peita'i e ala i Lana galuega ma Lana 'au'aunaga a'o fa'atasi ma tagata, na fa'avaeina ai o le fa'ata'oto i le lūlū saito e i ai lona fa'atatau fa'apitoa.

O le afioga a le Atua o le fatu. O fatu ta'itasi e i ai le ta'iala o le ola. I totonu o lo'o afifi ai le ola. E fa'apea foi ona i ai le ola i le afioga a le Atua. Ua fetalai mai Keriso, “O 'upu 'Ou te fai atu ia te outou, o le Agaga ia, o le ola fo'i ia” (Ioane 6:63). “O lē fa'alogi mai i La'u upu, ma talitonu ia te Ia na auina mai A'u, ua iā te ia le ola e fa'avavau” (Ioane 5:24). I fa'atonuga uma ma folafolaga uma o le afioga a le Atua e mālosi, o le soifua o le Atua, lea e fa'ataunu'uina ai le fa'atonuga ma fa'amaonia ai le folafolaga. O lē e talia le 'upu e ala i le fa'atuatua e maua e ia le ola lava lea ma le amio a le Atua.

O fatu uma e fua mai i le itu'aiga o la'au e i ai. Ia lūlūina le fatu i le tulaga sa'o e tatau ona totōina ai, ona ola mai ai lea o lona ola i le la'au. A talia i totonu o le loto e ala i le fa'atuatua le fua o le fa'amaoni ma le lelei 'ato'atoa o le fatu o le afioga a le Atua, o le a fua mai ai le amio ma le olaga e fa'apei o le uiga ma le soifuāga o le Atua.

O a'oa'o o Isara'elu, latou te le'i lūlūina le fatu o le afioga a le Atua. O le galuega a Keriso o le a'oa'o o le 'upu moni na iloga lelei lava le 'ese'esega mai le 'au a'oa'o o Ōna taimi. Na latou tumau i 'upu tu'u, o mata'upu, ma mafaufauga o tagata. O le tele o mea na a'oa'oina ma tusia e fa'ataui i le 'upu, na latou suia ai le 'upu lava ia. O a latou a'oa'oga e le'i i ai se mana e fafagu ai le agaga. O le autū o a'oa'oga a Keriso ma Āna lauga o le afioga a le Atua. Na Ia tali atu i ē na fesiligia o Ia i le tali e malamalama gofie, "Ua tusia," "O le ā ua fai mai ai Tusi? O le ā lau faitau?" I avanoa uma, pe afai ua fafagu le fia iloa po o le uō po o le fili fo'i, na Ia lūlūina le fatu o le 'upu. O Ia lea o le Ala, le 'Upu Moni, ma le Ola. O Ia le 'Upu o lo'o soifua, e fa'asino i afioga a le Atua, na fetalai atu, "o Tusi fo'i ia o lo'o molimau ia te A'u." Ua "amata mai ia Mose atoa ma le 'au perofeta uma." Na Ia tatala i Ōna so'o "o mea ua tusia ia te Ia i Tusi uma" (Ioane 5:39; Luka 24:27).

O 'au'auna a Keriso e tatau fo'i ona latou faia le galuega lea e tasi. I ō tatou taimi nei, e pei o anamua, o le 'upu moni tāua o le afioga a le Atua ua tu'u i tafatafa a e suia i mafaufauga ma manatu o tagata. E to'atele le 'au faigaluega o le tala lelei ua latou lē talia le Tusi Pa'ia ato'atoa o le afioga a le Atua na tu'uina mai. O le isi tagata atamai ua tete'e i le isi vaega, a e ua fesiligia e lē tasi le isi vaega. Ua latou fa'atū la latou fa'amasinoga e sili a'e i Lana afioga; ma o ā latou a'oa'oga ua fa'avae i luga o la latou lava pule. Ua fa'aumatia le fa'amaoni o le afioga a le Atua. Ua fa'apea ai ona fa'asalalauina le fatu o le lē fa'amaoni ma o tagata ua fenumia'i ma lē iloa ai pe o le ā le mea o le a talitonu i ai. E tele talitonuga e lē tatau ona fa'atagaina le mafaufau e manatunatu i ai. I ōna pō o Keriso na tu'uina fa'amalosi e le 'au a'oa'o le tele o vaega o le afioga a le Atua iā latou lava fa'auigaina. Talu ai a'oa'oga malamalama o le afioga a le Atua ua ta'usalaina ai a latou gaoioiga, sa latou taumafai ai loa ia fa'aumatia lona mālosi. O le mea lava lenā o lo'o faia fo'i i aso nei. O le afioga a le Atua ua fai ia foliga mai e fa'alilolilo ma e lē malamalama i ai ma fai ai ma 'alofaga e solia ai pea Lana tulafono. Na a'oa'i malosi Keriso e fa'ataui i ia gaoioiga i nā ona po a'o i ai o Ia i le lalolagi. Na Ia a'oa'o o le afioga a le Atua e ao ina malamalama ai tagata. Na Ia fa'asino i le afioga a le Atua o le pule e lē fesiligia, ma e ao fo'i ona tatou faia fa'apea. O le Tusi Pa'ia e tatau ona fa'ailoa atu o le afioga a le Atua Silisili 'Ese, o le fa'ai'uga o finauga uma ma o le fa'avae o le fa'atuatua.

Ua fāoa le mana o le Tusi Pa'ia, ma o le i'uga ua va'aia ai le fa'amaulaloina o le tulaga o le olaga fa'aleagaga. I lauga mai le tele o pulela'a i aso nei, ua lē fa'aalitinoina le matagofie o le fa'aleagaga e fafagu ai le loto fuaia ifo ma aumai ai le ola i le agaga. Ua lē mafai ona fa'apea mai le 'au fa'alologologo, "E le'i mu ea o tā loto i totonu iā te i ta'ua, ina ua fetalai o Ia iā te i tā'ua i le ala, ina ua fa'amatala mai fo'i e Ia o Tusi iā te i tā'ua?" (Luka 24:32). E to'atele latou o lo'o alalaga atu i le Atua soifua, o lo'o naunau atu i le mafutaga pa'ia. O mafaufauga loloto ma fa'amatalaga ua tusitusia, po o le ā lava le foliga atamai, e lē fa'amalieina ai le loto. O manatu ma fuafuāga a tagata e leai se aogā. Ia fetalai le afioga a le Atua i tagata. Se'i fa'alogologo i latou sa na o na fa'alologologo i 'upu'u ma manatu fa'aletagata ma muāgagana i le si'ufofoga o Ia Lē ōna afioga e mafai ona fa'afouina ai le agaga e o'o i le ola e fa'avavau.

O le autū e sili ona tāua iā Keriso o le fa'apelepele fa'atamā ma le tele na'uā o le alofa tunoa o le Atua; sa fa'atāua pea le pa'ia o Lona uiga ma Lana tulafono. Na Ia fa'aalia mai o Ia le Āla, le 'Upu Moni, ma le Ola. Ia 'avea ia e fai ma autū a le 'au faigaluega a Keriso. Ia tu'uina atu le 'upu moni e pei ona faia e Iesu Ia fa'afaigofie ona fa'amatalaina le tausiga o le tulafono ma le tala lelei. Ta'u i tagata le soifuāga lē manatu fa'apito ma le taulaga ofo a Keriso; o le fa'amaulaloina ma Lona maliu; o Lona toe tū ma Lona afio a'e i le lagi, po o Lana galuega fa'apuluvaga mo i latou i luma o le Atua; e fa'ataui i Lana folafolaga, "Ou te toe sau, 'Ou te talia fo'i outou ia fa'atasi ma A'u" (Ioane 14:3).

Ia lē o le talanoaina o matā'upu sesē, po o le sa'ili e fa'asagatau i ē tete'e i le 'upu moni, a e mulimuli i le fa'aa'oa'oga a Keriso. Ia fa'aolaolaina 'upu moni fou mai le fale teu'oa a le Atua i o latou olaga. "Tala'i atu le 'upu" (II Timoteo 4:2). "Lūlū saito i tafatafa o vai uma" (Isaia 32:20). "O lē ua iā te ia La'u 'upu, ia talatala atu e ia La'u 'upu ma le fa'amaoni. E tusa 'ea le 'au o saito i le fua o le saito? O lo'o fetalai mai ai Ieova" (Jeremia 23:28). "O afioga uma a le Atua, ua se ario ua te'a ma le otaota

ia;...‘Aua e te fa'aopoopo se 'upu i Āna afioga; ne'i a'oa'i atu o Ia iā te 'oe, ona ta'upepeloina ai lea o 'oe’ (Fa'ata'oto 30:5, 6).

“O le lūlū saito na lūlū le upu.” Ua tu'uina mai iinei le ta'iala tāua e ao ina fa'avaeina ai galuega uma o a'oa'oga. “O le fatu o le afioga lea a le Atua.” A o le tele o a'oga i ō tatou aso nei ua tu'u i autafa le afioga a le Atua. O isi matā'upu ua tumu ai le mafaufau. O le a'oa'oina o tusitala lē talitonu ua tele na'uā le taimi ua fa'aalu ai i totonu o a'oa'oga. O manatu lē talitonu ua lalagaina fa'atasi ma matā'upu ua i totonu o tusi a'oga. O su'esu'ega fa'asaienisi ua ta'ita'i sesēina ai, auā o mea fou ua maua ua fa'auiga'eseina ma ua fa'aleagaina ai. Ua fa'atusatusa le afioga a le Atua ma a'oa'oga fa'apea o le saienisi, ma ua fai ai e foliga mai ua lē mautinoa ma ua lē fa'atuatua. Ua fa'apea ai ona totōina fatu o le masalosalo i mafaufau o le 'au talavou, ma a o'o i taimi o fa'aosoosoga ua ēa a'e loa ia uiga. Pe afai ua lē iloa le fa'atuatua i le afioga a le Atua, o le a leai se ta'ita'i mo le agaga, ma o le a leai se mea e malu ai. O le a tosina le 'au talavou i 'auala e ta'ita'i 'ese ai i latou mai le Atua ma le ola e fa'avavau.

O mafaufauga ia ua tupu tele ai le amioleaga i lo tatou lalolagi i ōna po nei. Afai e tu'u 'ese i tafatafa le afioga a le Atua, o lona mana e taofi ai uiga tu'inaanu o le loto o le a te'ena. A lūlū e le tagata i le fa'ale-tino, o le a selesese le fa'aletino ma le amioleaga.

O i nei fo'i le mafua'aga o le vaivai o le mafaufau ma le lē ausia o le mālosi e tatau ona o'o i ai. I le liliu 'ese mai le afioga a le Atua a e fafaga i tusitusiga a tagata lē fa'apa'iaina, o le a lē tuputupu le mafaufau ma o le a lē o'o i le tulaga e tatau ona i ai. Ua lē tu'uina atu ia feso'ota'i ma ta'iala loloto ma lautele o le 'upu moni e fa'avavau. O le malamalama ua tau fa'afetaui i le iloa o mea e māsani ai, ma i lenei fa'amaoni i mea e mavae ua i'u ina vaivai ai, ua fa'aitiitia ai le mālosi, ma a mavae sina taimi ua lē mafai loa ona toe fa'ateleina.

O mea uma nei o le a'oa'oga sesē. O le galuega a faia'oga uma e tatau ona fa'amaui mafaufau o le 'au talavou i 'upu moni matagofie o le afioga a le Atua. O le a'oa'oga matuā mana'omia lenā mo lenei olaga ma le ola i le lumana'i. A e 'aua ne'i manatu o lenei o le a lē tatau ona a'oa'oina le saienisi, pe 'avea ma mafua'aga e maulalo ai le tapula'a o a'oa'oga. O le poto o le Atua e maua luga pei o le lagi ma lautele e pei o le atulaulau. E leai se isi mea e sili atu ona maua luga ma fa'amalosia ai tatou na i lo le su'esu'e i autū e fa'atatau i lo tatou ola e fa'avavau. Ia sa'ili le 'au talavou ia maua nei 'upu moni ua tu'uina mai e le Atua, ona fa'alauteleina ai lea o latou mafaufau ma tupu malosi i le taumafaiga. O le a aveina atu ai i latou uma e a'oa'oina o ē 'ana'ana i le 'upu i le fa'alauteleina o le mafaufau, ma maua ai e ia le tamao'aiga o le poto e lē mavae.

O le a'oa'oga ia mautū i le su'esu'eina o le Tusi Pa'ia o se fa'ata'ita'i lea o le malamalama o le fuafuāga o le fa'aolataga. O lea a'oa'oga o le a fa'afō'isia ai le fa'atua o le Atua i le agaga. E fa'amalosia ma puipua ai le mafaufau mai fa'aosoosoga, ma maua ai le mālosi o lē a'oa'o ia avea ma lē 'au'aumea fa'atasi ma Keriso i Lana galuega o le alofa tunoa i le lalolagi. E faia ai o ia o se tasi o le aiga i le lagi; ma saunia ai o ia e aofia i suli ma le 'au pa'ia i le malamalama.

A e o le faia'oga o 'upu moni pa'ia e fa'ato'ā mafai ona fa'asoa atu na'o le mea na te iloa ona sa o'o iā te ia. “O le lūlū saito na ia lūlū lana fatu.” Na a'oa'o e Keriso le 'upu moni auā o Ia le 'upu moni. O Ōna manatu, o Lana amio, o mea na tutupu i Lona soifuāga, na aofia i Āna a'oa'oga. E fa'apea fo'i Āna 'au'auna; o i latou o ē tala'i le 'upu e 'avea a latou 'upu e ala i mea na o'o iā te i latou. E tatau ona latou iloa pe fa'apefea ona latou maua le poto ma le amiotonu ma le fa'apa'iaina ma le fa'aolataga. I le tu'uina atu o le 'upu a le Atua i isi, e lē tatau ona fa'apea e pei lava e fa'apea, pe atonu e fa'apenei. Ia ao ona fa'a'ailoa atu fa'atasi ma le aposetolo o Peteu, “Auā e le'i usiusita'i i matou i tala o le vavau ua fatua ma le poto, ina ua matou fa'a'ailoa atu iā te outou le mana ma le afio mai o lo tatou Ali'i o Iesu Keriso; peita'i na matou va'ava'ai atu i Lona mamalu” (II Peteru 1:6). E tatau i 'au'auna uma a Keriso ma faia'oga uma ona mafai ona fa'apea atu fa'atasi ma le so'o pele o Ioane, “Na fa'aalia mai fo'i le ola, na matou va'ai atu, matou te molimau fo'i i ai, ma ua matou ta'u atu iā te outou le ola e fa'avavau, o lenā sa i le Tamā, a ua fa'aalia mai iā te i matou” (I Ioane 1:2).

O Le 'Ele'ele i le Auala

O le manatu aupito tāua i le fa'ata'oto i le lūlū saito e fa'atatau lea i le mea na maua mai le fatu ma le 'ele'ele na pa'ū i ai. I lenei fa'ata'oto na tusa lava ua fetalai atu Keriso i ē na fa'alologologo, E tou te lē saogalemū i lo outou tutū mai o ē faitio i La'u galuega, pe ua fa'atāua le fa'anoanoa ona o fa'amoemoega lē taunu'u talu ai e lē feagai ma o outou manatu. O le fesili aupito tāua iā te outou, E fa'apefea lo outou vā feagai ai ma le fe'au? O lo outou talia po o le te'ena e fa'atatau i ai lo outou i'uga e fa'avavau.

O le fa'amalamalamaina o le fatu na pa'ū i le auala, na la fetalai atu ai, “O i latou ia i le auala e lūlūina ai le 'upu; a latou fa'alogo ai, ona alu ane loa lea o Satani ma ave'eseina le 'upu na lūlūina i ō latou loto. O ia lenā na maua le fatu i le auala.”

O le fatu na lūlūina i le auala e fa'atusa i le 'upu a le Atua a'o pa'ū i le loto o lē e lē manatunatu i 'upu e fa'alogo ai. E pei o le auala e malō, e soli e tagata ma mea ola, e fa'apea le loto ua avea ma auala e solia e tagata fegāsoloa'i, o ōna fa'afiafiāga ma agasala. Ua matuā a'afia i fuafuāga o le alofa fa'apito ma tu'inaanu leaga, o le agaga o le a "loto fatu i le pepelo o le agasala" (Eperu 3:13). Ua lē lagona ma ua gagase i le itū fa'aleagaga. Ua fa'alogo tagata i le 'upu a e ua lē malamalama i ai. Ua latou lē iloa e fa'atatau iā i latou. Ua latou lē iloa mea o lo'o latou mana'omia pe o le pagātia o lo'o i ai. Latou te lē lagona le alofa o Keriso, a e ua la'a 'ese mai le fe'au o le alofa tunoa e pei e lē o se mea e a'afia ai i latou.

A e a pei o manu lele ua sauni e 'ai i fatu i tafatafa o le auala, e fa'apenā Satani ona sauni e 'ave 'ese fatu o le 'upu moni pa'ia mai le agaga. E popole o ia ina ne'i fafagu e le afioga a le Atua le fa'atamala, ma faia ai se aogā i le loto ma'a'a. O Satani ma āna agelu e fa'apotopoto i nofoāga o lo'o tala'iina ai le tala lelei. A o taumafai agelu a le lagi e fa'atāua i loto o tagata le afioga a le Atua, o le fili fo'i ia o lo'o mataāla ia 'aue ne'i i ai se aogā o le 'upu. E tutusa lona naunau ma lona fia tau ma sui, na te taumafai ia 'aue ne'i fa'ataunu'uina le galuega a le Agaga o le Atua. A o tosina e Keriso le agaga i Lona alofa, o Satani e taumafai fo'i ia ia liliu 'ese le mafaufau o le tagata o lē ua lagona le fia sa'ili i le Fa'aola. Na te taumafai ia tosina mafaufau i mea a le lalolagi. Na te fa'aosofia le faitio, o le masalosalo ma le lē talitonu. O le gagana e filifilia e le failauga po o ōna uiga fa'aalia atonu o le a lē fiasia ai le 'au fa'alologologo, ma o le a fa'anofa tumau ai o latou mafaufau i ia uiga vaivai. O lea, o le 'upu moni e latou te mana'omia, lea na tu'uina mai e le Atua i Lona alofa iā te i latou, ua leai se uiga tāua.

E to'atele fesoasoani a Satani. O le to'atele e fa'apea o latou o Kerisiano, o lo'o latou fesoasoani i lē taufa'aosooso ina ia 'ave'esea fatu o le 'upu moni mai nisi agaga. O le to'atele o ē fa'alologologo i le tala'iina o le Afioa a le Atua o le a fai ma mea e faitio i ai i le aiga. Latou te nonofo ma fa'amasino le lauga e pei ona latou faia i 'upu o tautalaga mo a'oa'oga po o 'upu a failauga o faigā-mālō. O le fe'au e tataua ona manatunatu i ai o le afioga a le Atua ua latou lē fa'atāua pe ua tausua fo'i i ai. O le uiga o le failauga, o mafua'aga e fai ai se mea, o gaoioiga, ma amio a tagata o le 'au lotu, ua talanoa fa'alaua'i tele i ai. Ua matuā faia le fa'amasinoga, o tala fe'avea'i ma le taufa'aleaga, ma o nei mea uma o lo'o fa'alologologo i ai ē le'i liua. O le tele o taimi o nei mea e talanoa ai fo'i mātua a o fa'alologologo i ai le fanau. Ua fa'apea ona fa'aleagaina ai le fa'aaloalo i 'avefe'au a le Atua, ma lē āva ai i la latou fe'au. Ma e to'atele ua a'oa'oina ai ia lē tāua le afioga a le Atua lava ia.

O lea, i aiga o ē ta'ua o Kerisiano, e to'atele le 'au talavou ua a'oa'oina ma 'avea ma ē lē talitonu. Ma ua fesili mātua pe ai se ā ua laitiiti ai le fiasia o le fanau i le tala lelei, ma ua masalosalo i le 'upu moni o le Tusi Pa'ia. Ua latou manatunatu i le faigatā ona pā'ia o i latou i mea tonu ma le fa'aleagaga. Latou te lē iloa o ā latou lava fa'ata'ita'iga ua fa'ama'a'aina ai loto o ā latou fanau. Sa lē maua e le fatu lelei se mea e ola ai le a'a, ma ua 'ave'eseina loa e Satani.

I Mea Papa

“E fa'apea fo'i i latou na lūlūina i le mea papa, o i latou ia ua fa'alogo i le 'upu, ona talia loa lea ma le fiasia. A e peita'i ua leai ni ō latou a'a, ua fa'alētumau i latou, pe a tupu le puapuagā, po o le sauā ona o le 'upu, ona latou tausui ai lea.”

O le fatu na lūlūina i le mea papa e itiiti le 'ele'ele e i ai. Ua vave ona tupu ia, a o le a'a e lē mafai ona ati le a'a i le papa ina ia maua ai mea e aogā i lona tuputupu a'e, ma ua vave ai ona mate. E to'atele i

latou e fai a latou ta'utinoga i mea tau tapua'iga o ē fa'alologologo pei o le fatu na pa'ū i le mea papa. E pei o le 'ele'ele e ufitia ai le papa, o le manatu fa'apito o le uiga moni o le loto e ufitia ai le 'ele'ele o latou manatu ma fa'anaunauga lelei. O le alofa iā te ia lava ua lē fa'ato'ilaloina. Ua latou lē va'ai i le telē o le leaga o le agasala, ma o le loto e le'i fa'amaulalo i le iloa o le leaga o le agasala. O lenei vaega e mafai ona faigofie ona talitonu, ma foliga o ē ua liua fa'amaoni, peita'i e papa'u la latou tapua'iga.

E lē fa'apea ua vave talia le 'upu, e lē ona ua fiasia i ai, ua ala ai ona toe pa'ū 'ese. Ina ua fa'alogo Mataio i le vala'au a le Fa'aola, na ia tu'ua loa mea uma ma mulimuli iā te Ia. Afai ua latou lagona le o'o mai o le 'upu i ō latou loto, e naunau le Atua ia tatou talia loa; ma e tonu fo'i ona tatou talia ma le fiasia. “E fa'apea fo'i ona tele o le 'oli'oli i le lagi i le tagata agasala e to'atasi e salamō” (Luka 15:7). Ma e i ai fo'i le oli'oli i le agaga talitonu iā Keriso. A o i latou i le fa'ata'oto ua ta'ua ua vave ona talia le 'upu, latou te le'i faitauina po o le ā le tau. Ua latou lē manatunatu pe o le ā se mea e mana'omia mai ia te i latou ua ta'u mai e le 'upu a le Atua. Ua latou lē tu'u ina ia fa'afesāga'i ma a latou amio uma e māsani ai o le olaga, ma tu'uina atu i latou ato'atoa ia na pulea.

O a'a o le la'au e sosolo maulalo i le 'ele'ele, ma e lilo mai le va'ai le mea'ai e ola ai. E fa'apena le Kerisiano, o le tu'u fa'atasia e lē mava'aia o le agaga ma Keriso, e ala i le fa'atuatua, e fafagaina ai le ola fa'aleagaga. Peita'i o le 'au fa'alologologo i le mea papa e fa'alagolago iā i latou lava a e lē o Keriso. E fa'alagolago iā latou galuega lelei ma lagona lelei, ma e fa'amalosia i lā latou lava amiotonu. E lē malolosi i latou i la le Ali'i, ma le mana o Lona silisili 'ese. E fa'apea lē e maua'a iā te ia lava, auā e leai se feso'ota'iga ma Keriso.

O le vevela o le lā i le tau mafanafana e fa'amalosia ma matua ai le saito lelei, e fa'aumatia ai le fatu e lē loloto a'a. E fa'apea lē "ua leai ni a'a iā te ia," "ua fa'alētumau ia;" auā “pe a tupu mai le puapuagā, po o sauāga ona o le 'upu, ona tausui ai lea o ia.” E to'atele e talia le tala lelei ua manatu o se auala e sa'oloto ai mai puapuagā, a e lē o le fa'asaoina mai le agasala. Latou te fiasia mo sina taimi, auā latou te manatu o le tapua'iga o le a fa'asa'oloto ai latou mai faigatā ma tofotofoga. A o solosolo lelei le olaga mo i latou, e foliga mai o i latou o Kerisiano fa'amaoni. Peita'i e loto vaivai i lalo ifo o tofotofoga e pei o le afi. Latou te lē mafai ona tau'ave 'upu fāifāi ona o Keriso. Pe afai e fa'asino atu e le afioga a le Atua se agasala e fa'apelepele i ai, pe mana'omia le fa'afitia o ia lava po o le fai fa'ataulaga ofo, e tausui i latou. E telē se tau o le taumafai e fai se suiga matuā maoa'e i ō latou olaga. Ua latou va'ai i le taimi nei ma fa'afitāuli ma faigatā, ma galo ai mea moni mo le lumana'i. E pei o so'o na tu'ua Iesu, ua latou sauni e fa'apea mai, “O le 'upu faigata lenā; o ai se na te mafaia ona fa'alologologo i ai?” (Ioane 6:60).

E to'atele i latou o ē fa'apea latou te 'au'auna i le Atua, peita'i e leai se masaniga vāvā lalata e iloa lelei ai o Ia. O lo latou naunau e faia Lona finagalo e fa'avae i ō latou lava lagona, a e lē o le galuega loloto a le Agaga Pa'ia. O ā latou amio e lē tu'uina atu ia ō gatasi ma le tulafono a le Atua. Ua latou fa'ailoa atu ua talia Keriso o lo latou Fa'aola, peita'i latou te lē talitonu o Ia na te avatu iā i latou le mālōsi e manumālō ai iā latou agasala. E leai sa latou feso'ota'iga vāvā lalata ma le Fa'aola o lo'o soifua, ma o ā latou amio e fa'aalia mai ai fa'alētonu e maua mai mātua pe o mea na a'oa'o mai i nisi.

E 'ese le talia i se uiga lautele le ta'ita'iga a le Agaga Pa'ia, a o le isi mea o le talia o Lana galuega pei o lē a'oa'i o lo'o vala'au ina ia salamō. E to'atele i latou e lagona e lē o lelei ma le Atua, o le lagona o le pologa iā te ia lava ma le agasala, ua latou taumafai ina ia fa'afouina, a e latou te lē fa'asatauro iā i latou lava. Latou te lē tu'uina atu ato'atoa i latou i 'a'ao o Keriso, ma sa'ili le mana fa'alelagi e fai ai Lona finagalo. E latou te lē loto atu ia galuea'iina i latou ia foliga iā te Ia. O le isi uiga e latou te iloa lava lo latou lē ato'atoa, peita'i e lē tu'u 'eseina nisi o agasala. O gaoioiga sesē ta'itasi, o le a fa'amalosia ai lava le uiga moni o le manatu fa'apito i a te ia lava.

E na'o le tasi le fa'amoemoe mo nei agaga, o le iloa lea e i latou lava le fa'amaoni o fetalaiga a Keriso iā Nikotemo, “E ao ina toe fanau mai outou.” Ma “A lē toe fanau le tagata e lē mafai ona iloa e ia le mālō o le Atua” (Ioane 3:7, 3).

O le fa'apa'iaina moni e ato'atoa i le galuega a le Atua. O le tulaga moni lenā o le olaga fa'a-Kerisiano fa'amaoni. Ua ōle mai Keriso mo le fa'apa'iaina ato'atoa, mo le 'au'aunaga e lē vaevaeina. Ua Ia mana'omia le loto, mafaufau, agaga, ma le mālōsi. E lē toe tu'u fa'apelepele iā te ia lava. O ia o lē e ola mo ia lava e lē o se Kerisiano.

O le alofa e tatau ona 'avea ma ta'iala e gaoioi ai. O le alofa o le ta'iala fa'avae lea o le mālō o le Atua i le lagi ma le lalolagi, ma e tatau fo'i ona fai ma fa'avae o le amio a le Kerisiano. 'Ona pau lea o le mea e mafai ai ona tumau o ia ia mautū. Ua na o lenā e mafai ai e ia ona manumālō i tofotofoga ma fa'aosoosoga.

Ma o le alofa e fa'aalia i le taulaga ofo. O le fuafuāga o le fa'aolataga na fa'ata'atia i le taulaga ofo - o le taulaga e lautele ma loloto ma maua e lē mafai ona fuaia. O Keriso na Ia tu'uina mai mea uma mo i tatou, ma o i latou e talia Keriso o le a sauni e fai fa'ataulaga ofo mea uma ona o lō latou Fa'aola. O le manatu i Lona vi'iga ma Lona mamalu e fa'amuumua i so'o se mea.

Afai tatou te alolofa iā Iesu, o le a tatou fiafia e ola mo Ia, e avatu a tatou taulaga fa'afetai iā te Ia, e galulue fo'i mo Ia. O galuega uma o le a māmā. Ona o Ia, o le a tatou ofo atu ai e faia le galuega po o le ā le tigāina ma le faigatā. Tatou te tigāalofa fa'atasi ma Ia i le naunauta'iga mo le fa'aolataga o tagata. O le a tatou lagona fo'i le alofa naunau mo agaga fa'apei ona Ia lagonaina.

O le tapua'iga lenei a Keriso. O isi mea e lē 'ausia le tapula'a e i lalo ifo o le taua'asesē. E lē na o se a'oa'oga o le 'upu moni po o le ta'uina ua 'avea ma so'o e fa'aolaina ai se agaga. E lē 'avea i tatou e faia mo Keriso se'i vaganā ua 'avea 'ato'atoa i tatou mo Ia. O le ola fa'a'afa'afa i le olaga fa'a-Kerisiano ua avea ai tagata ma ē vaivai i le fa'amoemoe ma fefo'ifo'ia'i ai i fa'anaunaga. O taumafaiga ia 'au'auna iā te ia lava fa'apea ma Keriso, e avea ai o sē fa'alogologo a le 'ele'ele papa, ma o le a ia lē mafai ona tumau pe a o'o mai tofotofoga iā te ia.

I Totonu o Vao Talatala

"O le mea sa lūlūina i le vao tuitui, o ia lea ua fa'alogi i le 'upu, a o le loto popole i mea a lenei lalolagi, ma le pepelo o le 'oa ua fetina'iina ai le 'upu, ona lē fua mai lava lea."

O le fatu o le tala lelei e māsani ona pa'ū i le mea e i ai vao tuitui, ma afai e leai se fa'afouga i le loto o le tagata, afai o amioga tuai ma masaniga o le olaga agasala e lē lafoa'i i tua, afai e lē ave'esea uiga o Satani mai le agaga, o le seleselega o le saito o le a fetineia'i. O vao tuitui o le a ola a'e e pei o la'au na totō, ma tineia ai le saito.

O le alofa tunoa e fa'ato'ā ola lelei i le loto e sauniuni i taimi uma mo le fatu tāua o le 'upu moni. O vao tuitui o le agasala e ola i so'o se 'ele'ele; e lē mana'omia le fa'amalūlūina; a e o le alofa tunoa e tatau ona saunia lelei ma le fa'aeteete. O vao tuitui ma la'au talatala e sauni i taimi uma ia totogo a'e, ma o le galuega o le fa'amamāina e tatau ona aga'i i luma i taimi uma lava. Afai e lē tausia i lalo o le puleaga a le Atua, afai e lē faifai pea le galuega a le Agaga Pa'ia ina ia fa'aleleia ma fa'amatagofieina le amio, o le a toe fa'aalia mai lava amio māsani i le olaga. E mafai ona fa'apea mai e talitonu i le tala lelei, a e afai e lē fa'apa'iaina e le tala lelei o le a lē aogā a latou ta'utinoga. Afai latou te lē maua le manumālō i le agasala, o lona uiga o lo'o mālō pea le agasala iā te i latou. O vao tuitui na o na sala'eseina a e lē lia'iina, o le a toe tupu se'ia o'o ina ufitia ai le agaga iā i latou.

Na fa'amatala au'ili'ili e Keriso mea e mata'utia mo le agaga. E pei ona tusia e Mareko, na Ia tā'ua ai le loto popole i mea a lenei lalolagi, ma le taua'asesē o le 'oa, ma le tu'inaanau i nisi mea. O lo'o ta'ua e Luka fa'apea o mea e popole ai, o 'olua, ma mea fa'afiafia o le olaga nei. O mea ia e tineia ai le 'upu, ma le tuputupu a'e lea o le fatu fa'aleagaga. Ua gata le maua o le mea e fafaga ai mai iā Keriso, ma ua mate ai le fa'aleagaga mai le loto.

"O mea e popole ai o lenei lalolagi." E leai se vasega e sa'oloto mai le fa'aosoosoga o le popole i mea o le olaga. Mo ē matitiva, o le galue ma le lē tagolima ma le fefe i le mativa e aumai ai le atuatuva le ma avega mamafa. I ē mau'oa, e o'o mai le fefe ne'i lē iloa se mea ma le anoanoa'i o mea e popole ai. O le to'atele o ē mulimuli iā Keriso ua galo le a'oa'oga na Ia tu'uina mai e fa'ata'au i lau talotalo o le fanua. Ua latou lē talitonu i Lana tausiga faifai pea. E lē mafai ona tau'aveina e Keriso a latou avega, auā latou te lē tu'uina atu ia mea iā te Ia. O lea ua popole ai i mea o le olaga, mea sa tatau ona fa'atosina atu ai latou i le Fa'aola mo le fesoasoani ma le fa'amafanafanaga, a e ua vavae 'ese ai i latou mai iā te Ia.

O le to'atele se manū e fua tele mai i le galuega a le Atua, ua 'avea ma ē ua tosina atu i le sa'ilia o le tamao'aiga. O lo latou malosia atoa ua alu i le sa'iliga o le 'oa, ma ua lagona ai le fa'atalalē i mea fa'aleagaga. Ua fa'apea ai ona latou vavae 'ese i latou mai le Atua. Ua apoapo'iina i tatou i le Tusi Pa'ia

ia “Aua le fa’avaivai i le filigā” (Roma 12:11). E ao ina tatou galulue ina ia mafai ona avatu i lē e mana’omia mai. O Kerisiano e tataua ona galulue, e ao ina ‘au ai i fefa’afetaua’iga ma e mafai ona latou faia lea e aunoa ma le faia ai o le agasala. A e to’atele ua matuā fa’aalu uma o latou mafaufau i pisinisi ua leai ai se taimi mo le tatalo, leai se taimi mo le su’esu’eina o le Tusi Pa’ia, leai se taimi e sa’ili ma ‘au’auna ai i le Atua. E i ai taimi e o’o mai ai le lagona i le agaga o le fia o’o atu i le fa’apa’iaina ma le lagi; peita’i ua leai se taimi e liliu ‘ese ai mai le gaogaosā o le lalolagi e fa’alogologo atu ai i le matagofie ma fetalaiga ma musumusuga a le Agaga o le Atua. O mea e fa’avavau ua lē fa’atāuaina, ua fa’asili mea o le lalolagi. Ua lē mafai e le fatu o le ‘upu moni ona fua mai; auā o le ola o le agaga ua tu’uina atu e fa’aga ai vao tuitui o le fa’alelalolagi.

Ma e to’atele o lo’o galulue mo se i’uga e ‘ese lava, e pa’ū i le sesē lava lea e tasi. E latou te galulue mo le lelei o isi; o ō latou tiute e mamafa, o o latou tiute tau’ave e tele na’uā, ma ua latou fa’atagaina a latou galuega e ‘avea ma mea ua lē maua ai se taimi mo le Ali’i. O le feso’ota’iga ma le Atua e ala i le tatalo ma le su’esu’eina o Lana afioga ua lē amana’ia. Ua galo iā i latou na fetalai mai Keriso, “Auā e lē mafaia e outou ona faia o se mea e tasi pe a A’u lē i ai” (Ioane 15:5). Ua latou lē savavali fa’atasi ma Keriso, o ō latou olaga ua aunoa ma le alofa tunoa, ma o le a fa’ailoa mai le uiga fa’apito mo ia lava. Ua fa’aleagaina la latou ‘au’aunaga i le naunau i le fia sili, ma uiga so’ona fai lē matagofie o le loto fa’amaualuga. O le tasi lenei o mea lilo e sili ona to’ilalo ai i le galuega fa’a-Kerisiano. O le mea lea e lē manuia ai le taunu’uga.

“O le pepelo o le ‘oa.” O le alofa i le ‘oa e i ai le malosi fa’atosina, ma e fa’asesēina ai. O le tele o taimi o i latou e i ai le tamao’aiga o le lalolagi e galo o le Atua e aumai ai le malosi e maua ai le ‘oa. Ua latou fa’apea, “O lo’u malosi ma malosi o lo’u lima ua ‘ou maua mai ai lenei oloa” (Teuteranome 8:17). O lo latou tamao’aiga, ua lē fa’afuina ai le fa’afetai i le Atua, a ua ta’ita’iina i le fa’ane’ene’eina o ia lava. Ua lē iloa iā te i latou le lagona o lō latou fa’alagolago i le Atua ma lo latou tiute i ō latou uso ā tagata. Ua lē avea le tamao’aiga o se taleni e fa’aaogāina mo le vi’iga o le Atua ma le si’itia i luga o le fanau a tagata, ua latou va’ai i ai o se mea e ‘au’auna ai iā te i latou lava. Ua lē avea o se mea e atina’e ai uiga o le Atua, a o le ‘oa e fa’aaogā fa’apea ua atia’e ai iā te ia uiga o Satani. Ua fetina’i le fatu o le ‘upu i vao tuitui.

“Ma mea fa’afiafia o le olaga.” E i ai le mea mata’utia i fa’afiafiāga e sa’ili mo le na o le fa’amalieina ai. O amio māsani uma e a’afia ai fiafiāga e fa’avaivaia ai le malosi o le tino, e fa’anefu ai le mafaufau, pe ave’ese ai manatunatuga fa’aleagaga, “o tu’inaanau o le tino, o mea ia e tau ma le agaga” (I Peteru 2:11).

“Ma le tu’inaunau i nisi mea.” O mea ia e lē o ni agasala iā i latou lava, a e peita’i o se mea ua fa’amuumua mai i lo o le mālō o le Atua. So’o se mea e fa’atosina ‘ese ai le mafaufau mai le Atua, po o se mea e tō’esea ai le loto alofa mai iā Keriso, o le fili lea o le agaga.

A o talavou ma malosi le mafaufau ma faigofie ma vave ona tuputupu a’e, o le a tele le fa’aosoosoga ina ia sogasogā mo le lelei o ia lava, ma ia ‘au’auna mo ia lava. Afai e manuia fua’fuāga fa’alelalolagi, o le a mafai ona tosina e fa’aauau le tulaga e fa’aumatia ai le loto fua’itia ifo, ma taofia ai le fa’atatau tonu pe fa’apefea ona fa’atupuina le amio e silisili ona lelei. Pe afai e i ai ni mea e tutupu mai e lagolagoina lenei tulaga, o le tuputupu a’e o le a va’aia e aga’i i le itu e fa’asāina e le afioga a le Atua.

O lenei taimi o le olaga o ā tatou fanau, e matuā tele lava le tiute o mātua. E ao ona latou a’oa’o ia si’omia le ‘au talavou i mea e a’afia ai e lelei, mea e avatu ai iā te i latou le va’aiga e sa’o o le olaga ma le manuia moni. A e peita’i, e to’afia ni mātua ua fai fa’amuumua le sini ia mautū muamua le manuia fa’alelalolagi mō ā latou fanau. O a latou feso’ota’iga uma e filifilia ia fa’afetaui ai ma lenei fa’amoemoe. E to’atele mātua e fai ō latou aiga i ni ‘a’ai tetele ma fa’amāsani ai a latou fanau i fa’apotopotoga lauiloa. Ua fa’asi’omia i latou i a’afiāga e fa’amalosia ai le fa’alelalolagi ma le mitamitavale. I lenei si’osi’omaga ua fa’aaviluvilu ai le mafaufau ma le agaga. Ua lē iloa atu i le va’ai sini mauululuga ma le matagofie. O le avanoa e avea ai o atali’i o le Atua, o suli e fa’avavau, ua fesuia’i mo le manuia fa’alelalolagi.

E to’atele mātua ua sa’ili e si’itia le fiafia o a latou fanau i le fa’amalieina o lo latou alofa i fa’afiafiāga. E fa’atagaina i latou ia tosina i ta’aloga, ma fa’atasi ai i fa’apotopotoga o fa’afiafiāga, ma avatu iā te i latou tupe e sa’oloto ai i le fa’aaogāina mo le fa’amalieina o le tagata lava ia. O le tele o le naunau ia fa’amalieina le fiafia, o le malosi fo’i lea o lona fa’atupuina. O le mea ua fiafia i ai nei talavou o le fa’atuputeleina lea o lo a’afia i fiafiāga, ma latou o’o ai ina latou va’ai atu o le sini tāua lea o le olaga.

Ua latou amataina ona fa'avae amio māsani o le paie ma le manatu mo ia lava, ma ua matuā faigatā ai lava ona mafai ona avea i latou o ni Kerisiano mausalī.

E o'o foi i le ekalesia, e tatau ona fai ma poutū ma fa'avae o le 'upu moni, a e ua maua fo'i i le fa'amalosia o le manatu fa'apito ma fa'afiafiāga. Afai e sa'ilia tupe mo mea fa'aleagaga, o ā itu'aigā mea e tapa i ai le tele o ekalesia? O pasā, o 'aiga, o fa'aaliga, e o'o lava i se'i ma mea fa'apenā. O le tele o taimi o le nofoāga na tu'u 'ese fa'apitoa mo tapua'iga ua fa'aleagaina i 'aiga, fa'atau mai ma fa'atau atu, ma fa'afiafiāga. O le āva i le maota o le Atua ua fa'atauva'a i mafaufau o le 'au talavou. O tua'oi o le pulea e le tagata ia lava ua fa'avaivaia. O le manatu fa'apito, o le mea 'ai, o le fiafia e fa'aalialia, ua tosina i ai ma fa'amalosia a o a'afia ai.

O le sa'ilia o le fiafia ma nofoāga o fa'afiafiāga e ogātotonu i a'ai. O le tele o mātua e filifili se aiga i totonu o se 'a'ai mo ā latou fanau i le manatu ia avatu ai iā i latou le tele o avanoa, e feiloa'i i latou ma le fa'anoanoa, ma ua tuai ona salamō mai lo latou sesē mata'utia. O 'a'ai i aso nei o lo'o vave ona pei o Sotoma ma Komoro. O le tele o aso mālōlo ua fa'amalosia ai le paie. O ta'aloga—ō atu i tifaga, tu'ugā solofanua, o le pelē tupe, inu 'ava, siva—e fa'aosofia ai lagona uma ia fa'agaioia. Ua tafea atu le 'au talavou i le āu o le lauiloa ma le fiafia i ai o tagata. O i latou uma ua a'oa'oina e naunau i fa'afiafiāga ona o le fiafia, e maua mai ai ua tatala le faitoto'a i le tāfega o fa'aosoosoga. Ua latou tu'uina atu i latou lava i fa'apotopotoga o fa'afiafiāga e le'i mafaufau i ai, ma o latou sa fa'atasi ai ma i latou o ē fiafia i ai i fa'atasiga fa'apenā e maua ai i latou i a'afiāga e afāina ai le mafaufau. O le a ta'ita'iina i latou mai lea amioga i lea amioga, se'ia o'o ina lē iloa le naunau i le ola aogā ma le malosi e fa'atinoina ai. Ua ma'alili le naunau i mea tau tapua'iga; o lo latou ola fa'aleagaga ua fa'apogisāina. O uiga maua luga o le agaga ma mea uma e feso'ota'i ai le tagata ma le ola fa'aleagaga ua matuā maua lalo.

E moni e i ai nisi e mafai ona va'ai i lo latou valea ma salamō. E mafai ona fa'amagalo i latou e le Atua. Peita'i ua fa'amanu'alia o latou lava agaga, ma aumaia iā i latou lava le olaga pagātia. O le malosi e fai ai fa'ai'uga, e tatau lava ona tausia ia ma'ai ma ia mataāla ina ia iloa le 'ese'esega o le lelei ma le leaga, ua tele le afāina ma ua fa'aleagaina. Ua lē toe vave ona lagona le si'ufofoga ta'ita'i a le Agaga Pa'ia, pe malamalama i fuafuāga a Satani. O le tele o taimi i totonu o faigatā e pa'ū ai latou i fa'aosoosoga, ma ta'ita'i 'ese ai mai le Atua. O le i'uga o ō latou olaga fiafia i fa'afiafiāga o lenei lalolagi ua fa'aleagaina mo lenei lalolagi fa'apea fo'i ma le lalolagi atali.

O le popole, o le 'oa, fa'afiafiāga, e fa'aaogāina uma e Satani i le ta'aloga o le olaga mo le agaga o le tagata. Ua tu'uina mai le lapata'iga, “Aua tou te manana'o i le lalolagi, po o mea o i ai i le lalolagi. Pe afai e mana'o se tasi i le lalolagi, e lē o iā te ia le alofa i le Tamā. Auā o mea uma lava o i le lalolagi, o le tu'inaanau o le tino, ma le tu'inaanau o mata, ma le fa'alialia o lenei lalolagi, e lē mai le Tamā ia a e mai le lalolagi” (I Ioane 2:15, 16). O Ia lē e faitauina loto o tagata e pei o se tusi o fofola ua fetalai mai, “Ia outou ne'i fa'amamafaina o outou loto, ma le fa'aniniva ma le onā, ma le popole i mea o le olaga nei” (Luka 21:34). Ma o le aposetolo o Paulo na ia tusia e ala i le Agaga Pa'ia, “A o ē mana'o i le fia mau'oa, e maua i latou i le fa'aosoosoga, ma le mailei, ma tu'inaanau e tele e valea ai ma leaga ai, o mea ia e goto ai tagata i le fanoga ma le malaia. Auā o le mana'o i tupe, o le pogai lea o mea leaga uma lava; ua manana'o tele i ai nisi, ona sesē ai lava lea o i latou i le 'upu o le fa'atuatua, ua tu'ia ai ua ati i latou e i latou i puapuagā e tele” (I Timoteo 6:9, 10).

Sauniunia o le 'Ele'ele

I le fa'ata'oto o le lūlū saito, na fa'atusa ai e Keriso i'uga 'ese'ese o le lūlūga e fa'alagolago i le 'ele'ele. I vaega uma lava e tutusa le lūlū saito ma le fatu. Na Ia a'oa'o mai pe afai e lē manuia le fa'ataunu'uina o le galuega i ō tatou loto ma olaga, o le mafua'aga e maua iā i tatou lava. A o le fa'ai'uga e mafai ona tatou pulea. E moni, e lē mafai ona tatou suia i tatou lava, a e o le malosi e filifili ai e iā i tatou lava, ma e pa'ū iā i tatou ona fuafua pe o le ā le mea tatou te o'o i ai. O le 'au fa'alagolago mai tafatafa o le auala, mai 'ele'ele papa, ma le vao tuitui e mafai ona 'aia le tumau ai i inā. O lo'o sa'ili pea e le Agaga o le Atua ina ia motusia le malosi o le tu'inaanau o lo'o taofia ai tagata i mea o le lalolagi, ma fafaguina se fa'anaunau mo le 'oa e lē mavae. O le te'ena pea o le Agaga Pa'ia e avea ai tagata ma ē ua lē amana'ia pe ua fa'atamala fo'i i le afioga a le Atua. O i latou lava e pa'ū i ai le ma'a'a o le loto e fa'alavelavea ai le

fatu lelei mai le i ai o ni a'a, ma taofia ai lona ola lelei, ma o le leaga e ola tālaulau e faigatā ai lona tuputupu a'e.

O le fa'ato'aga o le loto e ao ona galuea'ina lelei. E tatau ona fa'amalū le 'ele'ele i le salamō moni mo agasala. O la'au 'o'ona a Satani e ao ona lia'i 'ese. O le 'ele'ele na ufitia i la'au tuitui e fa'ato'ā mafai ona toe maua i le galue ma le ma'elegā. Ina ia mafai ona fa'ato'ilaloina mana'oga leaga o le uiga moni fa'aletagata, e ao ina tu'uina atu taumafaiga fa'amaoni i le suafa ma le malosī o Iesu. O le Ali'i ua fetalai mai iā i tatou e ala i Lana perofeta, "Inā suatia ia lo outou fanua vaoa, 'aia fo'i ne'i lūlū a outou saito i la'au tuitui" (Jeremia 4:3). Ma toe fa'apea mai, "Ia lūlū saito mo outou ma le amiotonu, ia outou selesese mai ma le amio lelei" (Hosea 10:12). O lenei galuega ua Ia naunau ia fa'amae'a mo i tatou, ma ua Ia ōle mai ina ia tatou galulue fa'atasi ma Ia.

O ē lūlū le fatu e i ai le galuega e faia mo le saunia o loto ia talia le tala lelei. I le galuega o le 'upu ua tele na'uā le lauga atu, a e ua itiiti le galue moni o le agaga i le agaga. E mana'omia le galuega patino mo agaga ua lē iloa. O le alofa mutimutivale fa'apei o Keriso, e ao ina tatou fa'alatalata i tagata ta'ito'atasi, ma sa'ili ia fafagu lo latou fia iloa o mea tetele o le ola e fa'avavau. Atonu o latou loto e ma'a'a e pei o le auala, ma foliga mai ai e ma'imau taumafaiga e fa'ailoa atu Keriso iā te i latou, peita'i atonu e foliga e lē manuia i mafauauga o tagata, ma leai se malosī i finauga e fa'atalitonu ai, o le alofa o Keriso e fa'aalia i le galuega patino i le tagata, e mafai ona fa'amalūlūina ai le loto gaoā, ina ia mafai e le fatu o le 'upu moni ona ola ōna a'a.

E i ai le mea e fai e le lūlū saito ina ia 'aia ne'i fetineia'i le fatu i le vao tuitui pe mate ona o le leai o se 'ele'ele. I le amataina o le olaga fa'a-Kerisiano o tagata talitonu uma e tatau ona a'oa'oina i ōna ta'iala fa'avae. E ao ina a'oa'oina e lē na o na fa'aolaina o ia e ala i le taulaga ofo a Keriso, a e tatau ona avea le soifuāga o Keriso mona olaga ma le amio a Keriso e faia ma āna amio. Ia a'oa'oina i latou uma ina ia tau'ave avega ma fa'afitia le tosina atu i uiga fa'aletagata. Ia a'oa'oina i latou i le manuia o le galulue mo Keriso, ma mulimuli iā te Ia i le fa'afitia o ia lava, ma onosa'i i faigatā pei o fitafita lelei. Ia a'oa'oina i latou ia fa'atuatua i Lona alofa ma lafoa'i atu iā te Ia mea latou te popole ai. Ia latou tofo i le 'oli'oli o le maua o agaga mo Ia. I lo latou alofa ma le fiafia i ē ua lē iloa, o le a latou lē toe va'ai iā i latou lava. O fiafiāga o le lalolagi o le a leai so latou malosī e tosina ai ma ōna avega e fa'aloto vaivai ai. O le suōtosina o le tala lelei o le a faia lona galuega. O le a suatia le fanua vaoā. E lē na ona sala 'ese o vao tuitui, a e o le a lia'i 'ese ma o latou a'a.

I le 'Ele'ele Lelei

O le lūlū saito e lē o taimi uma e fetai ai ma fa'amoemoega e lē taunu'u. O le fatu na pa'ū i le 'ele'ele lelei na fetalai mai le Fa'aola, "O i latou ia ē na fa'alogi i le 'upu, ma tauti i ai ma le loto ua fa'amaoni ma le lelei, ona fua mai ai lea ma le 'onosa'i" (Luka 8:15).

O le "loto lelei ma le fa'amaoni" lea e tautala i ai le fa'ata'oto e lē o se loto e aunoa ma le agasala, auā o le tala lelei e tatau ona laugaina mo ē ua lē iloa. Na fetalai mai Keriso, "Na 'Ou lē sau e vala'au i ē amiotonu, a o ē agasala ina ia latou salamō." O ia e i ai le loto fa'amaoni e gaua'i i le galuega a le Agaga Pa'ia. Na te ta'utino lona nofo sala, ma lagona le mana'omia o le alofa tunoa o le Atua. E i ai le naunau fa'amaoni ia iloa le 'upu moni, ina ia usiusita'i i ai. O le loto lelei o le loto e talitonu, o le a i ai le fa'atuatua i le afioga a le Atua. A aunoa ma le fa'atuatua e lē mafai ona talia le 'upu moni, "Auā e tatau i lē alu atu i le Atua ona talitonu o lo'o soifua o Ia, o Ia fo'i na te tauia mai o ē matuā sa'ili iā te Ia" (Eperu 11:6).

O Faresaio i aso o Keriso na pupuni o latou mata ina ne'i latou va'ai, ma o latou taliga ne'i latou lagona; o le mea lea ua lē o'o ai le 'upu moni i ō latou loto. Na latou mafatia i le fa'asalaga o le tau'i ona o lo latou loto malie i lo latou fa'atalalē ma lo latou tauaso na latou filifili i ai. Peita'i o Keriso na a'oa'o Lona 'au so'o ina ia tatala o latou mafauau i fa'atonuga ma ia sauni e talitonu. Na Ia fa'ailoa le fa'amanuiāga i ō latou luga auā ua latou va'ai ma fa'alogi ma latou talitonu ai.

O lē fa'alogologo o le 'ele'ele lelei, e talia le 'upu, "ua lē talia e outou o le 'upu a tagata, a e peita'i o le 'upu a le Atua" (I Tesalonia 2:13). Na o lē talia le Tusi Pa'ia o le si'ufofoga o le Atua o lo'o fetalai mai iā te ia lava, o le tagata a'oa'oina moni lenā. E gatete o ia i le 'upu; auā mo ia o lea lava le ola moni.

E tatala lona malamalama ma lona loto e talia ai. O ia tagata fa'alologologo e aofia ai Konelio ma ana uō, o ē na fai atu i le aposetolo o Peteru, “O lenei, o lo'o iinei i matou uma lava i luma o le Atua e fa'alologologo atu i mea uma lava ua poloa'i mai ai le Atua ia tē oe” (Galuega 10:33).

O le iloa o le 'upu moni e lē fa'alagolago i le malosi o le potu, a e o le mamā o le mafua'aga, o le faigofie o le naunauta'i ma fa'alagolago i le fa'atuatua. Mo i latou o ē loto maulalo e sa'ili mo le ta'ita'iga fa'alelagi, e fa'alatalata i ai agelu a le Atua. O le Agaga Pa'ia e tu'uina mai ia tatalaina iā te i latou le tamao'aiga o mea tāua o le 'upu moni. O ē fa'alologologo o le 'ele'ele lelei, e fa'alogo i le 'upu, ma tausī i ai. O Satani ma ana 'au leaga uma, latou te lē mafai ona 'ave'esea.

E lē lava le na o na fa'alogo ma faitau i le afioga a le Atua. O lē e naunau ia maua se manuia mai le Tusi Pa'ia e tatau ona manatunatu loloto i 'upu moni ua tu'uina atu iā te ia. E ala i le naunau e fa'alogo ma tatalo, e ao ina a'oa'o le uiga o le 'upu moni, ma matuā inu loloto i afioga pa'ia.

Ua fa'ailoa mai e le Atua ia fa'atumu le mafaufau i manatu tāua, manatu mamā. E naunau o Ia ia manatunatu i Lona alofa tunoa, ia su'esu'e i le galuega ofoofogia o le galuega tele o le fa'aolataga. Ona manino atili ai lea la tatou va'ai i le 'upu moni, e maualuga, e pa'ia, o lo tatou naunau i le loto mamā ma le manino o le mafaufau. O le agaga e nofo i le si'osi'omaga o mafaufauga pa'ia o le a suia i le feso'ota'i ma le Atua e ala i le su'esu'eina o le Tusi Pa'ia.

“Ma fua mai.” O i latou ia ua fa'alogo ma fua mai fua o le usiusita'i. O le afioga a le Atua, ua talia i le loto, o le a fa'aalia i galuega lelei. O lona taunu'uga o le a va'aia i le amio ma le olaga fa'a-Kerisiano. Na fetalai Keriso e fa'atatau iā te Ia lava, “Ou te fiafia e fai Lou finagalo; o lo'o i totonu lava iā te A'u Lau tulafono” (Salamo 40:8). “Ou te lē usiusita'i i Lo'u lava loto, a o le finagalo o le Tamā, o Lē na 'auina mai A'u” (Ioane 5:30). O lo'o toe fa'apea mai fo'i le Tusi Pa'ia, “O lē fa'apea o lo'o tumau iā te Ia, e tatau ona savali o lenā tagata fa'apei ona savali o Ia” (I Ioane 2:16).

O le afioga a le Atua e masani ona fetai'a ma uiga tu'u fa'asolo mai mātua ma amio na a'oa'oina ma masaniga o le olaga. Peita'i o lē fa'alogo i le fatu na pa'ū i le eleele lelei, e talia le 'upu i ōna tulaga ma tu'utu'uga uma, ma fa'aa'oa'o e aumaia ai ia gaua'i i le afioga a le Atua. I lana va'ai i fa'ato'aga a tagata e lē tumau, o le tagata e sesē e goto ifo i le tulaga lē tāua pe afai e fa'atusatusa ma le afioga a le Atua e leai se gata'aga. I le agaga atoa, i le fa'amoemoe e lē vaeluaina, na te sa'ilia le ola e fa'avavau, ma o le tau na te lē faitauina, o sauāga, po o le oti, e usiusita'i pea o ia i le 'upu moni.

Na te fua mai fo'i fua “ma le onosa'i.” E leai se tasi e talia le afioga a le Atua e fa'aagafua mai faigatā ma tofotofoga; peita'i a o'o mai puapuagā, o le Kerisiano moni e lē maua i le lē to'afilemū, loto masalosalo, pe leai fo'i se fa'amoemoe. E ui ina tatou lē iloa atu le i'uga mautinoa o mea e tutupu mai, pe malamalama i mafua'aga o le finagalo o le Atua, e lē tatau ona lafoa'i lo tatou fa'amoemoe. Ia manatua le alofa fa'apalepale o le Ali'i, e tatau ona tatou lafoa'i atu mea uma tatou te popole ai iā te Ia, ma fa'atalitali atu i Lana fa'aolataga ma le onosa'i.

O totonu o faigatā e fa'amalosia ai le ola fa'aleagaga. O le tau'aveina o tofotofoga ma le onosa'i e fausia a'e ai le amio e mausalī, e tāua ma matagofie i le fa'aleagaga. O le fua ato'atoa o le fa'atuatua, agamalū, ma le alofa ua matua lelei i totonugalemū o ao o le afā ma le pouliuli.

“E fa'atali lē galue fanua i le fua aogā o le 'ele'ele, e fa'atalitali i ai, se'ia maua le uāga muamua ma le uāga mulimuli” (Iakopo 5:7). E fa'apea fo'i le Kerisiano e tatau ona fa'atali ma le onosa'i mo le afioga a le Atua ia fua mai i lona olaga. Tatou te tatalo pea mo mea alofa a le Agaga Pa'ia, e galue le Atua ia talia a tatou tatalo i le tu'uina o i tatou i tulaga e fa'atupuina ai nei fua; a e tatou te lē malamalama i Āna fuafuāga e foliga e lē mautinoa, ma fa'anoanoa tele ai. Peita'i e leai se isi e fa'aleleia nei tulaga vaganā ua ui atu i le gaioiga o le tuputupu a'e ma le fua mai. O la tatou vaega o le talia le afioga a le Atua ma taofi mau i ai, tu'uina atu ato'atoa i tatou i Lana pule, ma fa'ataunu'u ai Āna fuafuāga iā i tatou.

“Afai e alofa mai se tasi iā te A'u,” o le fetalaiaga lea a Keriso, “e tausia e ia La'u upu, e alofa fo'i Lo'u Tamā ia te ia, e ō mai fo'i i Ma'ua iā te ia” (Ioane 14:23). O le malosi e sili atu, o le mafaufau e 'ato'atoa o le a i luga o i tatou, auā ua i ai le feso'ota'iga ola ma le puna o le malosi e lē mavae. O lo tatou ola fa'aleagaga o le a aumaia i tatou e 'avea fa'atagata o taua iā Iesu Keriso. O le a tatou lē toe ola i le olaga e masani ai o le alofa fa'apito, a o Keriso o le a soifua i totonu o i tatou. O Lana amio o le a fa'aalia i ō tatou uiga. O inā o le a tatou fua ai i fua o le Agaga Pa'ia - e ta'i tolusefulu i nisi, a e ta'i onosefulu i nisi, e ta'iselau fo'i i nisi.”

"Muamua Ōna Lau, Ona Fuga Mai Lea"

Matā'upu 3

O lenei matā'upu e fa'avae i luga o le Mareko 4:26-29.

E tele na'uā fesili e fa'ata'au i le fa'ata'oto o le lūlū saito. O le to'atele o le 'au fa'alologologo na latou maua mai ai le talitonuga o le a lē fa'atūina e Keriso se malō fa'alelalolagi, ma e to'atele ua tupu tele ai le fiailoa ma le fenumia'i. Ua silasila Keriso i lo latou tulaga lē mautonu, ma la fa'aaogā nisi fa'amalamalamaga, a e sa ia taumafai atili ia fa'aliliu 'ese o latou loto mai le fa'amoemoe i se malō fa'alelalolagi ina ia fa'asaga i le galuega a le alofa tunoa o le Atua i le agaga.

"Ua ia fetalai atu fo'i, O le malō o le Atua ua fa'apei o le tagata ua na lūlūina saito i le 'ele'ele. Ua moe fo'i o ia i le pō, ma ala i le ao; a ua totago a'e le saito, ma tutupu, ua na lē iloa pe na fa'a'apefa ia; auā ua tupu fua ia i le 'ele'ele; e muamua ōna lau, ona o'o lea i lona fuga mai, mulimuli ane fo'i ua i ai saito matua. A afu le saito, ona selesele loa lea, auā ua o'o i ōna pō e selesele ai."

O le tagata fai fa'ato'aga e "tu'u atu lana sele saito, auā ua o'o mai le seleselega," e lē o se isi a'o Keriso. O la lea i le aso tele o le gata'aga o le a seleseleina le seleselega o le lalolagi. A o lē lūlū le fatu e fa'atusa i ai i latou e galulue e sui ai Keriso. O le fatu ua ta'u mai "e totago ma tutupu a'e, a e na te lē iloa pe fa'a'apefa," ma e lē moni lenā mea i le Ālo o le Atua. O Keriso e lē tofā a e leoleoina Ōna tagata i le po ma le ao. E Na te silafia pe fa'a'apefa ona ola le fatu.

O le fa'ata'oto i le fatu e fa'aalia ai o le Atua o lo'o galue pea i olaga o mea na la foafoa. O le fatu lava ia o lo'o i ai le ta'iala o le ola, o le ta'iala na tu'uina i ai e le Atua lava ia, a e leai sona malosi e ola ai pe afai e tu'ua na o ia. E i ai le vaega a le tagata e faia e fesoasoani i le tupu a'e o le fatu. E tatau ona ia suōtosina ma fa'aleleia le 'ele'ele ma lūlū le fatu. E ao ona ia suatia le 'ele'ele. A e i ai le mea e gata ai le mea na te mafaia. E leai se malosi po o se poto o i le tagata e mafai ona aumai ai le ola i le fatu. Ia tu'uina atu e le tagata lona malosi i le mea e gata ai, a e ao lava ona fa'alagolago i le feso'ota'iga o le totōina ma le seleselega ma Lē e i ai Lona ia lava mana ofoofogia.

E i ai le ola i le fatu, e i ai le malosi i le 'ele'ele, a e ana leai le mana lea e fa'agaoioi i le ao ma le po, o le fatu o le a leai se mea e maua mai ai. O le timu e ao ona 'auina mai e fa'asūsū ai le 'ele'ele matūtū, o le lā e ao ina o'o mai lona mafanafana, o le uila e ao ona o'o atu i le fatu o lo'o tanumia. O le ola na tu'uina mai e Lē na foafoa, e na o la lea e mafai ona ola mai. O fatu uma e ola mai ma la'au uma e tutupu a'e, ona o le mana o le Atua. "Auā e pei ona fa'atupuina e le lau'ele'ele lona fua, e pei ona fa'atupuina fo'i e le fa'ato'aga mea ua totō ai, e fa'apea lava ona fa'atuputina e le Ali'i o Ieova o le amiotonu ma le vi'iga i luma o nu'u uma" (Isaia 6:11).

E pei o mea o le foafoāga, e fa'apea fo'i le lūlūga fa'aleagaga; o le a'oa'o o le 'upu moni e ao ona sa'ili'ili e saunia le 'ele'ele o le loto, e tatau ona lūlūina le fatu, peita'i ona pau le malosi e mafai ai ona ola, e mai le Atua. E i ai le mea e lē o'o i ai le taumafaiga fa'aletagata. E ui ina tatau ona tatou tala'iina le 'upu, e lē mafai e i tatou ona tu'uina atu le malosi e lagaina ai le agaga, ma māfua ai ona tupu a'e le amiotonu ma le vi'iga. I le laugaina o le 'upu e ao ina i ai le galuega a le vaega e sili a'e i lo so'o se malosi fa'aletagata. E na o le mana o le Agaga Pa'ia e mafai ai ona fa'afouina le loto e o'o atu ai i le ola e fa'avavau. O le matā'upu lenā na taumafai Keriso ina ia a'oa'o i Lona 'au soo. Na la a'oa'o e leai se mea o iā te i latou e mafai ona manuia ai a latou taumafaiga, a e na o le mana fai vavega o le Atua e manuia ai fo'i Āna lava afioga.

O le galuega a lē lūlū saito o le galuega o le fa'atuatua. O le mea lilo o le fa'atupuina a'e o le fatu e lē mafai ona malamalama i ai. Peita'i e i ai lona fa'atuatua'aga i vaega e faia e le Atua e māfua ai ona ola lauolaola la'au. O le lūlūina o lana fatu i le 'ele'ele, e foliga mai ua ia lafoa'i le fatu tāua atonu sa mafai ona fafaga ai lona aiga. Peita'i ua ia faia lea tulaga o le tu'uina atu o se mea e fiafia ai i le taimi nei mo se mea e sili atu e maua mai ai. Na foliga ua ia lafoa'i le fatu, a e fa'amoemoe e fa'aputu mai ai le seleselega tele. E fa'apea 'au'auna a Keriso, e fa'amoemoe i se seleselega mai le fatu na latou totō.

O le fatu lelei atonu o se taimi e lē iloa i totonu o le loto ma'alili, alofa fa'apito, ma fa'alelalolagi, e leai ni foliga o ni fa'ailoga va'aia o lo'o ola ona a'a; peita'i, a o mānava le Agaga o le Atua i le loto, o le fatu na lilo ua totogo a'e, ma mulimuli ane ua fua mai i le vi'iga o le Atua. I la tatou galuega i le olaga e tatou te lē iloa po o le fea e manuia, po oinei, po o inā. E lē o se fesili lenā e tali e i tatou. E tataua ona fai la tatou galuega, ma tu'u i le Atua le fa'ai'uga. "I le taeao ia e lūlū ai au saito, 'aia fo'i le mapu lou lima i le afiafi" (Failauga 11:6). O le feagaiga a le Atua ua fa'ailoa mai ai "O aso uma o le tausaga e lē toe utuvā ai, o tausaga e lūlū ai ma tausaga e selesese ai" (Kenese 8:22). O le talitonu o le fai fa'ato'aga i lenei folafolaga na ia galuea'iina ma lūlūina ai le saito. E lē tataua ona itiiti ifo lo tatou talitonu ma le mautinoa i le galuega i le itu fa'aleagaga o le lūlū. "E fa'apea foi La'u 'upu e alu atu ai Lo'u gutu, e lē fo'i fua iā te A'u; a e peita'i e faia le mea 'Ou te loto i ai, e manuia fo'i i le mea 'Ou te 'auina atu i ai" (Isaia 55:11). E fa'apea fo'i ma "O lē alu atu ma tagi fano, o lo'o 'ave le saito e lūlū, e fo'i mai lava ia ma le 'alaga fīafīa, o lo'o au mai ana fusi saito" (Salamo 126:6).

O le totogo a'e o le fatu e fa'asino i le amataga o le olaga fa'aleagaga, ma le tuputupu a'e o le la'au o le fa'atusa o le olaola matagofie o le ola fa'aleagaga. E pei o le uiga moni o mea na foafoa, e fa'apea le alofa tunoa, e lē mafai ona ola e aunoa ma le tuputupu a'e. O le la'au a lē tupu ua mate. E pei ona lē leoa ma e lē mafai ona va'aia, peita'i o lo'o alualu a'e pea, e fa'apea le tuputupu a'e o le olaga fa'aleagaga. I tulaga uma o le tuputupu a'e o lē tatou olaga atonu e ato'atoa; a e afai e fa'ataunu'uina fuafuāga a le Atua mo i tatou, o le a fa'aauau pea le aga'i i luma. O le fa'apa'iaina, o le galuega o le olaga atoa. A o fa'ateleina o tatou avanoa, o le a fa'alauteleina fo'i lo tatou iloa, ma fa'aopoopo fo'i lo tatou malamalama. O le a maua lo tatou malosi mo le tiute tau'ave, ma o lo tatou tulaga ua matua, o le a fa'atatau i o tatou avanoa.

O le la'au e maua le mea e ola ai mai le Atua. E sosolo maulalo ōna a'a i le 'ele'ele. E maua le lā, o le sau, ma le timu. Na te maua le mea e mana'omia mai le 'ea. E fa'apea le Kerisiano ia ola i le galulue fa'atasi ma 'au a le lagi. E tatou te lagona lo tatou lē mafaia o se mea, e ao ina fa'aleleia uma avanoa ua tu'uina mai iā te i tatou ia maua ai se poto e sili atu. E pei ona sosolo le a'a o le la'au i le 'ele'ele, ia fa'apea ona maulalo le sosolo o lē tatou a'a iā Keriso. E pei ona maua mai e le la'au le lā, le sau, ma le timu, ia fa'apea ona tatala o tatou loto i le Agaga Pa'ia. O le galuega e ao ina faia, "E lē o le fitafita, e lē o le malosi, a o Lo'u Agaga, ua fetalai mai ai Ieova o 'au" (Sakaria 4:6). Afai e taula'i ō tatou mafau'au iā Keriso, o le a Ia afi'o mai iā te i tatou "e pei o le timu mulimuli ma le timu muamua i le 'ele'ele" (Hosea 6:3). E pei o le Lā o le Amiotonu, e tula'i mai, "e i ai fo'i le mea e mālōlō ai i Ōna 'apa'au" (Malaki 4:2). Tatou te ola "e pei o le susana." "E toe ola mai i latou e pei o saito, e fua mai e pei o le vine" (Hosea 14:5, 7). E ala i le fa'alagolago e lē aunoa iā Keriso o lo tatou lava Fa'aola, o le a tatou tutupu a'e iā te Ia i mea uma lava, o Ia lo tatou ta'ita'i.

O le saito e tupu "e muamua ona lau, ona o'o lea i lona fuga mai, mulimuli ane fo'i ua i ai saito matua." O le mea e tausisi i ai le fai fa'ato'aga i le lūlūina o le fatu ma le tulaga e tāua mo le fatu ua ola o le maua mai lea o le saito. E naunau ia maua areto mo e fia 'a'ai, ma fatu mo seleselega i le lumana'i. E fa'apenā le Lūlū saito mai le lagi, na Ia silasila atu mo se seleselega o le tau'i o Lana galuega ma le taulaga ofo. O Keriso o lo'o sa'ili ina ia atagia mai o Ia i loto o tagata, Na te faia lea e ala iā i latou o ē talitonu iā te Ia. O le autū o le olaga fa'a-Kerisiano o le fua mai lea - o le toe fa'aalia o le amio a Keriso i lē e talitonu, ina ia toe fa'aalia fo'i i olaga o nisi.

E lē totogo, tupu, pe fua mai fo'i le la'au mo ia lava, a e ia "tupu mai saito i lē lūlū ma mea e 'ai i lē 'ai" (Isaia 55:10). O lea e leai se tasi e ola mo ia lava. O le Kerisiano i le lalolagi, o le sui o Keriso mo le lavea'iina o agaga.

E lē mafai ona tupu pe fua i le olaga e manatu mo ia lava. Afai ua e taliaina Keriso o lou Fa'aola, e te fa'agalo 'oe lava, ma taumafai e fesoasoani atu i nisi. Talanoa i le alofa o Keriso, ta'u atu Lona lelei. Ia fai uma tiute i taimi e tu'uina mai ai. Ia tau'ave avega a agaga i lou loto, ma e faia mea uma e te mafai i lou malosi e sa'ili ma fa'aola ē ua lē iloa. A o e maua le Agaga o Keriso—o le Agaga o le lē alofa fa'apito ma galue mo isi—o le a e tupu ma fua mai. O fua lelei o le Agaga o le a fa'ailoa i lau amio. O le a fa'ateleina lou fa'atuatua, o le a loloto lou talitonu, o lou alofa o le a 'ato'atoa. O le a fa'ateleina le atagia o fofoga o Keriso i mea uma e mamā, ta'uleleia, ma matagofie.

A o le fua o le Agaga o le alofa, o le 'oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā...." (Kalatia 5:22, 23). O le fua lea e lē mavae, a e maua mai ai isi fua o le seleselega e o'o i le fa'avavau.

"A afu le saito, ona selesele loa lea, auā ua o'o i ōna pō e selesele ai" (Mareko 4:29). O Keriso o lo'o fa'atali ma le naunau mo le fa'aalia o Ia i Lana ekalesia. Pe afai e fa'aalia le 'ato'atoa o le uiga o Keriso i Ōna tagata, o le a afio mai loa o Ia ina ia 'aveina i latou mo Ia lava.

O le avanoa o Kerisiano ta'ito'atasi e lē na ona va'ai atu a e ia fa'ata'alise le afio mai o lo tatou Ali'i o Iesu Keriso. (II Peteru 3:12, margin). Pe a na fai o i latou uma o ē tala'i Lona suafa e fua mai mo Lona mamalu, se manū e vave ona lūlūina le fatu o le tala lelei i le lalolagi atoa. E vave fo'i ona matua le seleselega tele mulimuli, ma o le a afio mai Keriso e fa'aputuina le saito tāua.

O A'oa'oga Mai Titania

Matā'upu 4

Fa'avacina lenei Matā'upu i le Mataio 13:24-30, 37-43.

"Ua sauni atu e Ia le tasi fa'ata'oto ia te i latou, ua fa'apea atu, 'Ua fa'atusaina le malō o le lagi i le tagata ua lūlūina le saito lelei i lona fanua; ua momoe tagata, ona alu ane ai lea o lē ua ita mai iā te ia, ua na lūlūina le titania i totonu o le saito, ona alu 'ese ai lea o ia. Ua totogo a'e le saito, ma fua mai, ona iloa ai lea o le titania."

"O le fanua," na fetalai atu ai Keriso, "o le lalolagi." A e ao ina tatou malamalama o lea e fa'ailoa mai le uiga i le ekalesia a Keriso i le lalolagi. O le fa'ata'oto o le fa'amatalaga e fa'atatau i le mālō o le Atua. O Lana galuega o le fa'aolataga o tagata, ma o lenei galuega e fa'ataunu'uina e ala i le ekalesia. E moni, o le Agaga Pa'ia ua afio atu i le lalolagi atoa, ma i so'o se mea o lo'o Ia faagaoioia loto o tagata; peita'i o totonu o le ekalesia e ao ina tatou tutupu ma matua ai mo le falesaito o le Atua.

"O lē lūlū le saito lelei, o le Atali'i lea o le tagata....O le saito lelei, o tagata ia o le mālō; a o le titania, o le fanua ia a lē ua leaga." O le fatu lelei e fa'asino i ai i latou o lo'o fanua mai i le afioga a le Atua, o le 'upu moni. O titania e fa'atua i ai le vaega o fua po o ē fa'atinoina le mea e lē sa'o, o ta'iala sesē. "O lē ua ita mai na na lūlūina ia mea, o le ti'apolo lea." E lē o le Atua po o Āna agelu na latou lūlūina se fatu e tupu mai ai se titania. O titania e masani lava ona lūlūina e Satani, o le fili o le Atua ma tagata.

I le itū i Sasa'e, o tagata e masani ona tau i sui i sona fili i le fa'asalalauina i lona fanua fou fa'ato'a uma ona lūlūina ai le saito se fatu o se vao e matuā 'ona ma leaga, a o tupu a'e e foliga lava i le saito. O le ola fa'atasi a'e ma le saito, o le a afāina ai le fa'ato'aga ma aumai ai fa'afitāuli ma le lē manuia i lē e ona le fa'ato'aga. E fa'apenā ona aumai e Satani, le fili o Keriso āna fatu leaga ma fa'asalalau i totonu o le saito lelei o le mālō. O fua o lana lūlūga na te tu'ua'i i le Ālo o le Atua. O le aumaia i totonu o le ekalesia i latou o ē tau'ave le suafa o Keriso a o latou fa'afitia Lana amio, e mǎfua ai ona lē fa'amamaluina le Atua, ua fa'auiga sesē le galuega o le fa'aolataga, ma o le a fa'aumatia ai agaga.

O 'au'auna a Keriso e fa'anoanoa a o latou va'aia le sa'o ma le sesē o fefiloi i totonu o le ekalesia. Ua latou naunau ia faia se mea e fa'amamāina ai le ekalesia. E pei o 'au'auna a le matai, ua latou sauni e vele'ese titania. A e ua fetalai atu Keriso iā te i latou, "'Aua; ina ne'i outou lia'i ma le saito pe a outou vele 'ese le titania. Tu'u ia, ia tupu lua pea se'ia o'o i le seleselega" (Mataio 13:29, 30).

O Keriso na malamalama ona Ia a'oa'o i latou ē o lo'o faia pea le agasala fa'aaliali e ao ina vavae 'ese mai le ekalesia; peita'i na te le'i tu'uina mai ia i tatou le galuega o le fa'amasinoina o amio ma mafua'aga e fai se mea. E silafia lelei fo'i e Ia o tatou uiga moni ma ua lē tu'uina mai lea galuega iā i tatou. Pe afai tatou te taumafai e liā'i 'ese i luga mai le ekalesia i latou e fa'apea o Kerisiano fa'afoliga, e mautinoa o le a tatou fai mea sesē. O le tele o taimi ua tatou faa'atatauina i latou nei o ē ua leai se fa'amoemoe, a e o latou ia o lo'o tosina mai e Keriso iā te Ia. Pe ana tatou fa'afeagai ma nei agaga e tusa ma a tatou fa'amasinoga lē ato'atoa, atonu o le a tinea ai lo latou toe fa'amoemoe. E to'atele i latou e manatu o latou o Kerisiano, a e mulimuli ane e māmāsagia ina ua fuatia. E to'atele o le a i le lagi o ē na fa'apea o latou tua'oi e lē taitai ulufale i ai. O tagata e fa'amasino i le va'ai mai fafo, a o le Atua e fa'amasino i le loto. O titania ma le saito e tu'u ia tupu lua pea se'ia o'o i le seleselega, ma o le seleselega o le fa'ai'uga lea o le tapunia o le alofa tunoa.

E i ai fo'i i fetalai a le Fa'aola le tasi a'oa'oga, o le lesone i le onosa'i ma le alofa fa'apalepale. E pei ona fili fa'atasi a'a o titania ma a'a o le saito lelei, e fa'apea fo'i uso fa'afoliga i le ekalesia e mafai ona so'o fa'atasi ma so'o moni. O uiga moni o ē talitonu fa'afoliga e lē aliali ato'atoa. Pe afai e vavae'eseina i latou mai le ekalesia, e i ai nisi atonu o le a fa'atausui, i latou a na leai sia mea semanū e tumau pea ma mausalī.

O le a'oa'oga o lenei fa'ata'oto e fa'amalamalama ai le Atua i Lona feagai ai ma tagata ma agelu. O Satani lē tau fa'asesē. Ina ua ia agasala i le lagi, e o'o lava i agelu fa'amaoni na le'i malamalama ato'atoa

i lana amio. O le mea lea e le'i fa'aumatia ai e le Atua Satani i le taimi lava lenā. Pe a na faia fa'apea, se manū o le a lē va'aia e agelu pa'ia le amiotonu ma le alofa o le Atua. O le masalosalo i le agalelei o le Atua se manū o le a pei o le fatu leaga e maua mai ai fua o'ona o le agasala ma le malaia. O lea na fa'asaoina ai le pogai o le amioleaga, ia tuputupu pea lana amio. Mo augātupulaga, o lo'o tau'ave pea ma le onosa'i e le Atua le tigā i Lona silasila ifo i le galuega a le amioleaga. Ua Ia tu'uina mai le Mea Alofa silisili o Kalevario, i lo o le fa'aosoosoina o se tasi i taufa'asesē a le ti'apolo taufa'aleaga; auā e lē mafai ona liā'i 'ese titania e aunoa ma le mata'utia o le liā'i fa'atasi ai ma le saito tāua. Ma o le a fa'aapefea ona tatou lē fa'apalepale i o tatou uso ā tagata e pei ona faia e le Ali'i o le lagi ma le lalolagi iā Satani?

E leai se aiā a le lalolagi e masalosalo ai i le 'upu moni o le fa'a-Kerisiano auā e i ai tagata e lē tataua ona i ai i le ekalesia, e lē tataua fo'i ona loto vaivai ona o uso lē fa'amaoni. Na fa'aapefea le ulua'i ekalesia? O Anania ma Safaira na fa'atasi atu i le 'au so'o. O Tema na ia tu'ulafoa'i Paulo, sa faitauina fa'atasi ma ē talitonu. O Iuta le Sekara na faitauina fa'atasi ma le 'au aposetolo. O le Fa'aola e lē finagalo ia lē iloa se agaga e tasi; o Lona vā feagai ai ma Iuta na tusia ia fa'aalia ai Lona onosa'i faifai pea mo tagata i ō latou uiga fouvale; ma ua Ia fetalai mai ia fa'apea fo'i ona tatou onosa'i e pei ona Ia faia. Na Ia fetalai mai o le a maua fo'i uso fa'afoliga i le ekalesia se'ia o'o i le taimi o le i'uga.

E ui lava ina lapata'i mai Keriso, a e o tagata ua manatu e liā'i'eseina titania. Ina ia fa'asala i latou ua fa'apea o tagata leaga, o le ekalesia ua sa'ili le fesoasoani mai pulega fa'ale-mālō. O i latou e 'ese o latou manatu mai talitonuga fa'avae na falepuipua, sauāina, ma fasiotia, a e māfua mai i tagata na fa'apea mai o lo'o latou faia nei gaoioiga i lalo ifo o le pule a Keriso. Peita'i o le agaga o Satani, e lē o le Agaga o Keriso, na faia ai ia tulaga. O le auala lea a Satani lava ia e aumaia ai le lalolagi i lalo ifo o lana pule. Ua ia fa'aailoa atu le Atua i se auala sesē e ui atu i le ekalesia, ma le auala na latou faia fa'apea o tagata nei e fouvale.

E lē o le fa'amasino ma le fa'asala o isi, a e o le loto maulalo ma le lē fa'atuatua e le tagata o ia lava, o le a'oaoga lenā o le fa'ata'oto a Keriso. E lē o fatu uma na lūlūina i le fanua o fatu lelei. O le mea moni, e fa'amaonia e lē o tagata uma o lo'o i le ekalesia o Kerisiano.

O titania e tai tutusa ma saito a o lanumeamata le tutupu a'e, a e ina ua pa'e mai mo le seleselega, o vao e leai se aogā e lē tutusa ma le saito ua lolo'u ona o le mamafa o fatu saito ua matua. O ē agasala e fa'afoliga e amiotonu, e fefilo'i mo se taimi ma ē mulimuli fa'amaoni iā Keriso, ma e foliga mai o Kerisiano e fa'asesēina ai le to'atele; a e i le seleselega o le lalolagi, o le a iloa le lē tutusa o le lelei ma le leaga. Ona fa'aalia ai lea o ē na ona fa'atasi ai i le ekalesia, peita'i latou te le'i fa'atasi ai iā Keriso.

E fa'atagaina pea titania e ola fa'atasi ma le saito, e maua uma lava avanoa mo le lā ma le timu; a e o le taimi o le seleselega o na "toe iloa lea e 'ese'ese lē amiotonu ma lē amio leaga; e 'ese lē ua 'au'auna i le Atua, ma lē ua lē 'au'auna ia te Ia" (Malaki 3:18). O Keriso lava ia o le a faia le fa'ai'uga po o ai e tataua ona nofo fa'atasi ma le aiga i le lagi. Na te fa'amasino tagata ta'ito'atasi e tusa ma āna 'upu ma āna galuega. O lē o le a na o 'upu, e leai se mamafa i le fua fa'atautau. O le amio e maua ai le i'uga e fa'avavau.

E lē fa'asino aga'i i luma e le Fa'aola se taimi o le a 'avea uma ai titania o saito. O le saito ma le titania e tutupu fa'atasi se'ia o'o i le seleselega, i le gata'aga o le lalolagi. Ona fusifusi ai lea o titania ina ia susunuina, ma le saito e fa'aputu i le mea e teu ai saito a le Atua. "Ona pupula ai lea o ē amiotonu e pei o le lā i le mālō o lo latou Tamā." Ma o le a "a'uina atu e le Atali'i o le tagata Āna agelu, latou te fa'apotopotoina nai Lona mālō mea uma e tausuai ai ma ē amio leaga. E lafoina i latou i totonu o le ogāumu 'a'asa; e i ai le tagiauē ma le lilivau o nifo" (Mataio 13:43, 42).

"E Pei o le Fua o le Sinapi"

Matā'upu 5

O lenei mata'upu e fa'avae i le Mataio 13:31, 32; Mareko 4:30-32; Luka 13:18, 19.

I le motu o tagata sa fa'alogologo i a'oa'oga a Keriso, e to'atele le 'au Faresaio sa fa'atasi ai. Sa latou vā'ai atu ma le fa'asiasia i le to'aitiiti o i latou o lo'o fa'ailoa mai o Iesu o le Mesia. Sa tu'u fesilisili lava latou pe fa'a'apefa na mafai ona fa'acaina Isara'elu i se tulaga maoa'e e lenei a'oa'o lē taualoa. E leai se 'oa, pule, pe mamalu, a e fa'a'apefa ona la fa'avacina o lea malō fou? Sa faitauina e Keriso o latou mafauauga ma ua tali atu.

"E tusa le malō o le Atua i ni ā? 'Ou te fa'atusaina i ni ā?" I malō fa'alelalolagi e leai se mea e mafai ona fa'aaogā mo se fa'ata'oto. E leai se mafutaga e mafai ona gafatia se fa'a'ailoga mo Ia. "E tusa ia ma le fua o le sinapi," ua Ia fa'apea mai ai, "ua 'ave e le tasi tagata, ma lafo i lona fanua; ua tupu, ua 'avea ma la'au; ua momoe fo'i manu felelei i ōna lā" (Luka 13:18, 19).

O le la'au e tupu mai le fatu e ala i le tatala mai o le ta'iala o le ola na tu'u i ai e le Atua. O lona tupu a'e e lē fa'alagolago i le malosi fa'aletagata; e fa'apea fo'i le malō o Keriso. O se foafoāga fou; o ta'iala mo lona tuputupu a'e e fa'afeagai ma latou e pulea malō o lenei lalolagi. O malō fa'alelalolagi e manumalō ona e fai fa'amalosi; e malosi le pule a lo latou malō e ala i taua; a e peita'i o Lē e fa'atūina le malo fou, o le Ali'i ia o le filemū. E fa'ailoa e le Agaga Pa'ia malō fa'alelalolagi i lalo o le fa'a'ailoga o le manu fe'ai; a o Keriso o Ia o le "Tama'i Mamoe a le Atua, e Na te 'ave'esea le agasala a le lalolagi" (Ioane 1:29). I le fuafuāga o Lona malō, e lē fa'aaogāina se pule fa'amalosi ia 'u'una'iina le loto fuatiaifo. Sa va'ava'ai Iutaia i le malō o le Atua ina ia fa'atūina fa'apei o malō o le lalolagi. Ina ia si'itia le tulaga o le amiotonu, sa latou fa'aaogāina fuafuaga mai fafo, o fuafuāga fa'atogafiti. A e peita'i sa tu'uina i ai e Keriso se ta'iala, o le 'upu moni ma le amiotonu, ma Ia fa'alēaogā fuafuāga sesē.

A o fetalai mai Iesu i lenei fa'ata'oto, o lo'o silasila atu o Ia i le la'au o le sinapi, o lo'o agiagia ōna lālā i le matagi. O manu felelei o lo'o pepese, malōlō, ma felelei solo ai; a e o lenei la'au tele sa amata mai i se fatu e sili ona la'ititi i fatu uma. Sa muamua ona tuputupu a'e se moemoe, a e na malosi lona ola a'e, ona tupu lea se'ia o'o i lona tulaga maua luga tele ua i ai nei. E fa'apea le malō o Keriso, mai lona amataga e foliga e tulaga maua lalo ma e lē tāua; ma a fa'atusaina i malō fa'alelalolagi, e foliga mai e aupito fa'atauva'a iā i latou uma. Sa fa'atauemu ta'ita'i o le lalolagi i le fa'ailoa atu o Keriso o le Tupu. A o le 'upu moni na tu'uina i Ōna so'o o le malō o le tala lelei sa maua i ai se soifuāga fa'aleAtua. Ma sa fa'apea ona vave lona tupu a'e, na lautele lona salalau. Ina ua fetalai Keriso i lenei fa'ata'oto, na to'aitiiti nai tagata galulue mai Kalilaia na fai ma sui o le malō fou. O lo latou tulaga maua lalo, na to'aitiiti i latou, o le mafua'aga lea sa fa'apea a tagata ia 'aua le fia feso'ota'i atu i ia tagata faifaiva lē a'oa'oina o lo'o mulimuli i a Iesu. A e peita'i, o le fatu o le fua o le sinapi na tupu olaola a'e ma mafola atu ōna lālā i le lalolagi atoa. Pe a fa'aumatia malō fa'alelalolagi na fa'atumuina loto o tagata i o latou mamalu, a e o le a tumau pea le malō o Keriso, o se malō e mata'utia ma e lē gata Lona malosi.

O le galuega a le alofa tunoa i le loto e itiiti i lona amataga. E fai mai se 'upu, e fa'asusulu se 'ave malamalama i le agaga, o se mea e fai ma fa'amalosia'u i le amataga o le olaga fou; ma o ai e mafai ona fuatia lona i'uga?

E lē na o le tupu a'e o le malō o Keriso o lo'o fa'amalamalamaina i le fa'ata'oto o le fua o le sinapi, a e o lo'o fai mai fo'i ina ua toe fetalai mai i a'oa'oga mai la'asaga uma o lona tuputupu a'e. Mo Lana ekalesia i augātupulaga uma, e i ai se 'upu moni fa'apitoa a le Atua ma se galuega fa'apitoa. O le 'upu moni o lo'o lilo mai ē popoto ma le fa'autauta i mea fa'alelalolagi o lo'o fa'aalia i le uiga e pei o le tamaitiiti ma loto maua lalo. E mana'omia le tagata e fai fa'ataulaga ofo, ma e i ai fa'afitauli e tatau ona manumalō ai. I le amataga sa to'aitiiti ē na fautua mo i latou. Sa te'ena ma manatu fa'atauva'a i a i latou ta'ita'i o le malō ma se ekalesia sa mulimuli i manatu o le lalolagi. Se'i va'ai iā Ioane le Papatiso, o lē na muamua mai iā Keriso, o lo'o tū to'atasi na o ia e a'oa'i atu i le malō o Iutaia ona o le mitamitavale ma le fa'amuumua o a latou tū e masani ai. Ia va'ai i ē sa muā'i tau'ave le tala lelei i malō o Europa. E lē lauiloa,

e foliga e leai se fa'amoemoe o le galuega a Paulo ma Sila, o ni fai fale'ie a o malaga ma a latou uō i le va'a i Teroa mo Filipi. Se'i va'ai iā Paulo ina ua matua, o lo'o saisaia i filifili a o tala'i atu Keriso i le maota o le 'au Kaisara. Se'i va'ai i faigānu'u o tagata pologa ma tagata fai fa'ato'aga i fete'ena'iga ma le fa'apaupau o le malō tele o Roma. Ia silasila i a Matini Luteru a o tū e tete'e le ekalesia mata'utia lea e tū mai o le galuega aupito maoa'e o le poto fa'alelalolagi. Ia iloa o ia a o tula'i ma 'u'umau le Afioga a le Atua e tete'e i le tupu ma le pope, ma fa'apea atu, "O lenei ua 'ou tula'i atu; e leai se isi mea ou te mafaia. O le Atua o lo'u fesoasoani." Ia silasila i a Ioane Ueselē a o tala'i atu Keriso ma Lana amiotonu i le taimi o le malosi o tū masani, o agafa'aletino, ma le mulilua. Se'i va'ai fo'i i se tasi o lo'o mafatia i fa'anoanoāga o le lalolagi fa'apaupau, o lo'o ōle mai mo se avanoa e aumai ai iā i latou le fe'au o le alofa a Keriso. Ia fa'alogo i le tali mai le ekalesia: "Ia e nofo i lalo, 'oe le talavou. Pe a finagalo le Atua e liua le fa'apaupau, e Na te faia lava lea a e lē mana'omia lau fesoasoani po o a'u fo'i."

O ta'ita'i lauiloa o mea fa'aleagaga i lenei tupulaga sa fai vi'iga ma fausia mea e fa'amanatu o i latou na totōina le 'upu moni i taimi ua mavae. E lē o to'atele ea ua fultua mai i lenei galuega e solia i lalo le tuputupu a'e mai le fatu lava ia e tasi i ōna pō nei? Sa toe fa'aleo mai se tali tuai e fa'apea, "Ua matou iloa na fetalai mai le Atua iā Mose; a o lenā tagata, matou te lē iloa pe mai fea ia" (**Ioane 9:29**). E fa'apei o tupulaga ua mavae, ua maua fo'i 'upu moni fa'apitoa mo lenei taimi, e lē mai pule o le ekalesia, a e o ali'i ma tama'ita'i e lē'i a'oa'oina po ua maoa'e tele le popoto ua lē mafai ai ona talitonu i le Afioga a le Atua.

"Ia outou manatunatu i lo outou vala'auina;...e lē to'atele o ē popoto e tusa ma le manatu o lenei lalolagi, e lē to'atele faipule, e lē to'atele ali'i; a e ua filifilia e le Atua mea vālea a le lalolagi, ina ia fa'amāina ē popoto, ma mea vaivai a le lalolagi ua filifilia ia e le Atua e fa'amāina ai mea malolosi. Ua filifilia e le Atua mea maulalo ma le fa'atauva'a i le lalolagi, e o'o i mea e leai, ina ia lafotūina mea o i ai" (I Korinito 1:26-28); "ina ia lē i ai lo outou fa'atuatua i le poto o tagata, a o le mana o le Atua" (I Korinito 2:5).

Ma i lenei tupulaga mulimuli, o le fa'ata'oto o le fua o le sinapi e tatau ona 'ausia se fa'ailoga ma se taunu'uga manumalō. O le fatu itiiti o le a 'avea o se la'au tele. O le fe'au mulimuli o lapata'iga ma le alofa tunoa e tatau ona o'o i "malō ma itu'aiga ma gagana 'ese'ese" (Fa'aaliga 14:6-14), "ia maua ai se nu'u mo Lona suafa" (Galuega 15:14; Fa'aaliga 18:1). Ma o le a fa'amalamalamaina le lalolagi atoa i Lona mamalu.

O Isi A'oa'oga Mai le Totōina o le Fatu

Matā'upu 6

Mai le galuega o le totōina o fatu ma le tuputupu a'e o le la'au mai le fatu, o le a maua ai a'oa'oga tāua mo le aiga ma le a'oga. Ia a'oa'oina le fanau ma talavou e iloa le galuega a sui o le lagi i mea na foafoaina, ma o le a mafai ai e i latou ona maua fa'amanuiāga e lē mava'aia e ala i le fa'atuatua. A o latou malamalama i galuega ofoofogia a le Atua e saunia ai mea e mana'omia mo Lona aiga, ma pe fa'aapefa ona 'au'aumea fa'atasi ma Ia, o le a fa'amalosia ai lo latou fa'atuatua i le Atua, ma o le a iloa atili ai Lona mana i o latou olaga o aso ta'itasi.

Na faia e le Atua le fatu, fa'apei ona Ia faia le lalolagi, e ala i Lona fetalai atu. E ala i Lana fetalai sa Ia tu'u ane i ai le malosi e tupu ai ma ola tele. Sa Ia fetalai atu, "Ona tupu mai lea i le 'ele'ele le vaomu'a ma le la'au afu e fua mai, e ta'itasi ma lona uiga, ma le la'au e 'aina ōna fua, e iā te ia lava ōna fatu, e ta'itasi ma lona uiga; i le ua fa'apea lava....Ua silasila atu i ai le Atua, ua lelei" (Kenese 1:11, 12). O lea le fetalai o lo'o mafua ai le tuputupu a'e o le fatu. O fatu uma e oso a'e ona lau lanulau'ava i le lā o lo'o ta'u mai ai le mana galue ofoofogia o lea 'upu ua fetalai ai o Ia, o Lē "na fetalai ane ona i ai lava lea," ma o Lē "na tulei mai Lana Afoga, ona tū mai lava lea" (Salamo 33:9).

Sa a'oa'o e Keriso Ōna so'o e tatalo, "Ia foa'i mai iā te i matou i le aso nei a matou mea 'ai e tatau ma le aso." Ona fa'asino lea i fugalā'au ma tu'u atu le fa'amalosi'aga, "Afai e fa'apea ona fa'aofuina e le Atua le vao o le fanua,... e lē sili ea ona fa'aofuina o outou?" (Mataio 6:11, 30). O lo'o galue fa'aaaua pea Keriso e tali lenei tatalo, ma ia fa'amautinoa ua taunu'u Lana folafolaga. O lo'o i ai se mana e lē mava'aia e galue pea fa'apei o se 'au'auna a se tagata e fafaga ma fa'aofu o ia. E to'atele le 'au faigaluega a lo tatou Ali'i e tausia fatu na lafoa'i i fafo, a e ua 'avea ma la'au ola. Ma Na te aumaia mea uma e mana'omia ia ato'atoa ai le seleselega. Ua fa'apea mai le fatupese o le Salamo i ni 'upu matagofie lava, "Ua e asiasi i le lau'ele'ele, ma e fa'asūsūina lava; ua e fa'alafulemūteleina ai; o le vaitafe o le Atua ua tumu i le vai; ua e saunia a latou saito ina ua fa'apea ona e sauni i ai. Ua e fa'asūsūteleina ona atu pue; e fa'atafe ifo le ua i ōna utu; ua e fa'amalūlū ai i le uāga; e te fa'aolalaina fo'i ōna moemoe. Ua e fa'ae'e i le tausaga le paleali'i o Lou agalelei; o Ōu ala ua tautulu ai mea lololo" (Salamo 65:9-11).

O mea uma e i le lalolagi e i lalo o le pule a le Atua. O tulafono o mea na foafoaina latou te usiusita'i lava i ai. O mea uma e tautala mai ma o gaoioiga uma e faia le finagalo o Lē na faia mea uma. O āo ma le susulu o le lā, o le sau ma le timu, matagi ma afā, e i lalo uma o le silafaga a le Atua, ma e gaua'i ato'atoa ma usiusita'i i Āna poloa'iga. O le usita'i i le tulafono a le Atua o lo'o totogo a'e ai le saito o i le 'ele'ele, "e muamua ōna lau, ona o'o lea i lona fua mai, mulimuli ane fo'i ua i ai saito matua" (Mareko 4:28). O nei mea e fa'atupu e le Ali'i i o latou lava tau e tatau ai auā e latou te lē te'ena Āna gaoioiga. Pe fa'amata eao le tagata, na faia i le fa'atusa o le Atua ma tu'u i ai le mafaufau lelei ma le gagana, a e na o ia o le a leai se agaga fia fa'afetai mo Āna meaalofoa ma lē usita'i i Lona finagalo? O le a na o le tagata mafaufau ea o le a mafua ai le fenumia'i i lo tatou lalolagi?

I mea uma e fa'atatau i le tausiga o le tagata e va'aia ai le loto gatasitasi o le taumafaiga fa'ale-Atua ma fa'aletagata. E lē mafai ona i ai se seleselega vaganā ua galue ai le vaega a le lima o le tagata i le totōina o le fatu. A e a leai le 'au galulue e aumaia e le Atua e galuea'iina le susulu o le lā ma le timu, o le sau ma le āo, o le a lē fa'ateleina. O lea e fa'apea fo'i i so'o se taumafaiga fa'ale galuega, ma i so'o se vaega o su'esu'ega ma le poto maoa'e. E fa'apea fo'i i mea fa'aleagaga, i le fausia o le amio, ma fausia so'o se galuega fa'a-Kerisiano. E i ai la tatou vaega e fai, a e tatau iā i tatou ona maua le mana fa'ale-Atua e so'ofa'atasi ma tatou, a leai o le a lē aogā a tatou taumafaiga.

So'o se taimi e fa'ataunu'u ai e le tagata se mea, pe o le fa'aleagaga pe o mea fa'alelalolagi, e tatau ona ia manatua e mafaia ia mea uma i le 'au'aumea fa'atasi ma Lē na faia o ia. E matuā mana'omia tele ona tatou iloa e tatou te fa'alagolago i le Atua. Ua tele le talitonu i le tagata; tele le fa'atuatua ina o mea e faia e tagata. Ua la'ititi tele le fa'atuatua i le mana e finagalo le Atua e tu'uina mai. "O le 'au faigaluega i tatou fa'atasi ma le Atua" (I Korinito 3:9). E matuā tulaga maulalo le vaega e faia e tagata; a e peita'i pe a i ai se

so'otaga o ia ma le itū Atua o Keriso, e na te mafai ona faia o mea uma e ala i le malosi e tu'uina mai e Keriso.

O le tuputupu mālie a'e o le la'au mai le fatu o se a'oa'oga fa'afa'ata'oto lea i le a'oa'oina o le tamaitiiti. E i ai le "lau muamua, ona o'o lea i lona fuga mai, mulimuli ane ua i ai saito matua." O Lē na tu'uina mai lenei fa'ata'oto sa Ia faia fo'i le fatu itiiti, tu'u i ai mea e matuā tāua, ma aumaia tulafono e pulea lona tuputupu a'e. O 'upu moni o lo'o a'oa'oina i le fa'ata'oto sa fa'aalia i Lona ia lava soifuāga. I Lona itu tagata ma Lona itu Atua, sa Ia mulimuli i la'asaga fa'aleagaga uma e fa'ata'oto i le tupu a'e e pei ona fa'aalia e le la'au, e pei ona Ia naunau ia faia fo'i e talavou. E ui o Ia o le Mamalu o le lagi, o le Tupu mamalu, a e sa Ia afio mai o se tama meamea i Petele'ema, ma sa Ia fai ma sui, mo sina taimi lava, o le pepe e mana'omia le tausiga a lona tinā. A o tamaitiiti sa Ia faia galuega a se tamaitiiti usita'i. Sa Ia tautala ma faia galuega e tatau ma le poto fa'atamaitiiti a e lē o se tagata matua; sa fa'aaloalo i Ōna mātua ma usita'i i fa'atonuga i uiga fia fesoasoani e tatau ma le mea e mafai e le tamaitiiti. A e i la'asaga uma o Lona tuputupu a'e, o Ia sa 'ato'atoa, ma le uiga mamalu o se soifuāga e lē agasala. Ua ta'ua mai Afioga Pa'ia e fa'ata'oto i le tupu a'e a o tamaitiiti, "Ua tupu le tama ma ua malosi lona loto, ua tumu i le poto; ua iā te Ia fo'i le alofa o la Atua." I Lona talavou, ua tusia fo'i, "Ua tupu le poto ma le tino o Iesu, ua alofagia o Ia e le Atua atoa ma tagata" (Luka 2:40, 52).

Ua ta'ua mai iinei le galuega a mātua ma faia'oga. E tatau ona latou tausisi le a'oa'oina ina ia saunia le amio o le talavou mo la'asaga uma o lo latou olaga, ia fa'ailoa ai le matagofie o le uiga moni e tatau i lea taimi, ia mafola mai i le uiga moni fa'apei o la'au i le fa'ato'aga.

O fanau ia e sili le matagofie o latou uiga moni, ma e le'i afāina i nisi mea. E lē tatau ona faia fa'apitoa i latou, ma a'oa'oina i mea e lē tatau o lo'o tautala ai. Ia 'aua le fa'amalosia le uiga fa'alialia, e fa'avi'ivi'i ona o lo latou foliga, a latou 'upu, po o mea e faia. E lē tatau ona fa'aaogā lavalava e taugata pe fa'alialia ai. O le a fa'amalosia ai e ia mea le mitamita vale, ma fafaguina ai le mata'u a loto o a latou uō.

E tatau ona a'oa'oina le fanau laiti i mea e faigofie pei o le ola fa'atamaitiiti. E tatau iā i latou ona fa'afiafiaina i mea e laiti, o tiute e oso ai le fia fesoasoani, ma fiafiāga ma gaoioiga e tatau mo latou tausaga. O le tali fa'atamaitiiti i le lau o le fa'ata'oto, ma le uiga o le lau, e fa'apitoa le matagofie. E lē tatau ona fa'amalosia le fanau ia matutua vave a e le'i sauni, a e ia tumau pea le uiga ma amio matagofie o tausaga muamua.

Atonu o le a 'avea le fanau laiti o Kerisiano, ona o a latou mea na faia e tatau ma o latou tausaga. Ona pau lea o le mea e mana'omia e le Atua mai iā i latou. E mana'omia e a'oa'oina i latou i mea fa'aleagaga; ma e tatau i mātua ona tu'u i ai so'o se avanoa ina ia fausia le amio e fa'atusaina i le amio a Keriso.

I le tulafono a le Atua mo Lana foafoāga, o la'asaga uma e fa'asolosolo ma le mautinoa, e leai se mea e fa'alētonu. O le seleselega o le a molimau pe na fa'apefea le lūlūga. O le tagata faigaluega pa'i o le a ta'uleagaina e ala i lana galuega, ma o le a molimau lava le seleselega e tete'e iā te ia. E fa'apea i mea fa'aleagaga. O le 'au faigaluega ta'ito'atasi o le a fuatia i le fa'ai'uga o lana galuega. O le i'uga o lana galuega, pe na ma'elegā pe pa'i, e fa'aalia i le seleselega. E fa'apea fo'i ona filifili i le fa'ai'uga mo le ola e fa'avavau.

O fatu uma e totōina, o le a aumai ai se itu'aiga seleselega; e fa'apea fo'i le olaga o le tagata. E mana'omia ona tatou totōina fatu o le agalelei, fa'apalepale, ma le alofa; auā e tatou te selesele ai mea e tatou te lūlūina. O uiga uma e i ai le alofa fa'apito o le tagata iā te ia lava, manatu e na o ia lava, ta'uleleia o ia lava, o le faia o mea e fa'amalie ai ia lava, o le a aumaia fo'i se seleselega e fa'apea lava. O le tagata e ola mo ia lava, o lo'o lūlū fa'aletino, ma o le fa'aletino o le a selesele ai le leaga.

E lē fa'aumatiaina e le Atua se tagata. O tagata uma e fa'aumatiaina o le a faia lea e ia lava iā te ia. So'o se tagata e fa'alēaogāina apoapoa'iga o le loto fuatioifo, e lūlūina fatu o le lē talitonu, ma e mautinoa o le a maua mai se seleselega. E ala i le tete'e o le mua'i lapata'iga mai le Atua, sa lūlūina e Farao fatu o le finauvale, ma sa ia selesele mai le finauvale. E le'i 'u'una'ia o ia e le Atua ia lē talitonu. O le fatu o le lē talitonu sa ia lūlūina ma na maua ai se seleselega o le lē talitonu. O lea, ina ua fa'aauau pea lona tete'e, se'ia o'o ina ua ia va'aia lona lau'ele'ele ua fa'aleagaina, o le tino oti o lona atali'i ulumatua, ma ulumatua uma o lona aiga ma aiga uma i lona malō, se'ia o'o ina tanumia e le sami āna solofanua ma kariota ma āna 'au tau. O lona tala fa'asolopito o se fa'amalamalamaga o le moni o 'upu, "Auā o le mea e lūlūina e le

tagata, o le mea lava lea e seleseleina mai ai e ia" (Kalatia 6:7). Pe ana iloa e tagata lenei mea, atonu o le a fa'aeteete po o le ā le fatu o le a latou totōina.

A o aumaia se seleselega mai fatu sa lūlūina, ma o le a toe totōina nisi mai lenā seleselega, o le a fa'atelele atu fo'i lenā seleselega. I lo tatou vā feāloa'i ma isi, e fa'amaoni lenei tulafono. o gaoioiga uma, o 'upu uma, o se fatu lea o le a fua mai. So'o se uiga agalelei, o le usita'i, po o le fa'afitia e le tagata o ia lava, o le a toe maua ai ia uiga i isi, ma o le a fa'atelele lava. O gaoioiga uma mai le matau'a, o le taufa'aleaga, po o le fevaevaea'i, o ni fatu ia o le a tupu a'e i "se ā'a 'o'ona" (Eperu 12:15), e to'atele o le a fa'aleagaina ai. Ma e to'afia le "to'atele" o i latou o le a 'a'afia ai! O lea, o le lūlūina o le lelei ma le leaga o le a alualu pea mo se taimi, ma o'o i le fa'avavau.

O le uiga foa'i i mea fa'aleagaga ma le fa'alelalolagi o lo'o a'oa'oina i lesona o le lūlūina o fatu. Ua fa'apea mai le Ali'i, "Amu'ia outou o ē lūlūina saito i tafatafa o vai uma" (Isaia 32:20). "O La'u lenei e fai atu, 'O lē ua itiiti āna saito e lūlū, e itiiti fo'i āna e selesele mai; a o lē ua tele āna e lūlū, e tele fo'i āna e selesele mai'" (II Korinito 9:6). O le uiga o le lūlūina i autafa o vai uma, o le tu'uina mai pea lava lea o meaaloa a le Atua. O lona uiga e tu'uina mai i so'o se mea e i ai le mafuaga a le Atua pe o lo'o mana'omia la tatou fesoasoani e le fanau a tagata. E lē fa'auina lea i le mativa, auā o lē lūlū o le a fa'ateleleina āna seleselega. E fa'apea i latou o ē fa'amaoni e fa'asoa atu meaaloa a le Atua. E ala i le fa'asoa atu, o le a fa'ateleleina ai a latou fa'amanuiāga. Ua folafola mai e le Atua e Na te aumai pea ina ia latou tu'u atu pea fo'i. "Ia outou foa'i atu, e foa'iina mai ai iā te outou; e foa'i mai e i latou i lo outou lava 'ie pulupulu le fua lelei, e lolomi ma lūlūina, e tumu ma solo i tua. Auā o le fua tou te fuaina atu ai, e fuaina mai ai iā te outou" (Luka 6:38).

Ma e tele atu fo'i mea o lo'o aofia i le lūlūina ma le seleseleina. A o tatou fa'asoa atu manuia fa'aleola nei a le Atua, o fa'amaoniga o lo tatou alofa ma le tigāaloa, o le a fafaguina i lē o le a maua nei mea le fia fa'afetai i le Atua. O le a saunia le 'ele'ele o le loto e talia fatu o le 'upu moni fa'aleagaga. Ma o Ia e galuea'iina fatu i lē lūlū saito o le a fa'atupuina le fatu ia ola ma fua mai fua e o'o ai i le ola e fa'avavau.

E ala i le lafoina o le fatu i le 'ele'ele, ua fa'asino mai ai e Keriso le taulaga ofo, o Ia lava lea mo le togiolaina o i tatou. E pei ona Ia fetalai mai, "Afai e lē pa'ū le fua o le saito i le 'ele'ele ma pala ai, e tumau pea o le mea e tasi; a e afai e pala, ona fua tele mai ai lea" (Ioane 12:24). E fa'apea fo'i le maliu o Keriso, o le a i'u ina fua mai ai mo le malō o le Atua. E tusa ai ma le tulafono o le malō o la'au, o le ola o le a mafua mai i Lona maliu.

O i latou uma e fua mai fua a o galulue fa'atasi ma Keriso, e tatau ona mua'i pa'ū'ū i le 'ele'ele ma pala ai. O le ola e tatau ona lafoina i le lua o mana'oga o le lalolagi. E tatau ona fa'aumatia le alofa fa'apito, ma le manatu iā te 'oe lava; a e o le tulafono o le fia tu'u atu fa'ataulaga 'oe lava, o le tulafono lea mo le fa'asaoina o 'oe lava ia. O le fatu e tanumia i le 'ele'ele e maua mai ai fua ma o le a toe totōina fo'i, ma o le a fa'ateleleina ai ma le seleselega. E lafo'eseina e le fai fa'ato'aga ana fatu ina ia fa'asaoina ai. E fa'apea i le olaga o le tagata, a tu'u atu ona ola ai lea. O le ola o le a fa'asaoina o le ola lea e tu'uina atu ma le fialia e 'au'auna ai i le Atua ma tagata. O i latou e tu'u atu fa'ataulaga o latou ola i lenei lalolagi ona o le suafa o Keriso, o le a fa'atuma lea mo le ola e fa'avavau.

E pala le fatu ina ia toe ola mai ai, ma o lenei le lesona e a'oa'oina ai i tatou fa'atatau i le toe tū a'e. O i latou uma o ē alolofa i le Atua o le a toe ola i le Etena o i lugā. Ua fetalai mai le Atua e fa'atatau i le tino o le tagata o lo'o ta'oto i le tu'ugamau, "E lūlūina ma le pala, e toe fa'atūina mai ma le lē pala; e lūlūina ma le matagā, e toe fa'atūina mai ma le matagofie; e lūlūina ma le vaivai, e toe fa'atū mai ma le malosi" (I Korinito 15:42, 43).

E i ai lesona o lo'o a'oa'oina mai e fa'ata'oto i mea ola o le foafoāga e i ai le lūlū saito ma le fatu. A o taumafai mātua ma faia'oga e a'oa'o nei lesona i le fanau, e tatau ona fa'aaogā a'oa'oga o mea lava e masani ai mo lenei galuega. E tatau ona tu'u i le fanau le galuega o le saunia o le 'ele'ele ma totō le fatu. A o faia le galuega, e mafai e le faia'oga po o le mātua ona fa'amatala iā i latou e uiga i le fa'ato'aga o le loto e totōina ai le fatu lelei pe leaga; ma ona e tatau le saunia o le fa'ato'aga mo le totōina o le fatu, e tatau fo'i fa'apea ona saunia o le loto mo le fatu o le 'upu moni. E pei ona lafoina le fatu i le 'ele'ele, ia a'oa'o iā i latou le lesona o le maliu o Keriso; ma e pei o le tupu a'e o le lau, e mafai fo'i ona a'oa'o i latou i le lesona

o le 'upu moni o le toe tū. A o tuputupu a'e le la'au, ia fa'aaauau pea le fa'atusaina o le tupu a'e o le fatu na totōina ma le tupu a'e fa'aleagaga.

E tatau ona a'oa'oina le talavou i le auala lava lea. Ia a'oa'oina e sauni le 'ele'ele. O itu'aiga a'oa'oga e galuea'iina fa'apenei, e matuā lelei tele, ia feso'ota'i ma a'oga uma, o le 'ele'ele mo le galuea'iina. O le 'ele'ele fa'apenā, e fa'apei o le fale a'oga lava lea a le Atua. Ia va'ai i mea uma o le foafoāga o se tusi a'oga e tatau ona a'oa'oina ai Lana fanau, ma o le a maua mai ai le poto e fa'atatau i mea o le agaga.

E maua pea a'oa'oga mai le fa'amalūina o le 'ele'ele, i le pulea lelei ma le fa'amalōlōina o le 'ele'ele. E leai se tasi e mafaufau e nofoia se fasi 'ele'ele e le'i saunia lelei, e fa'amoemoe o le a maua loa se seleselega. O le fa'amaoni, to'aga, ma le galue ma le filigā e mana'omia i le galuea'iina o le 'ele'ele e saunia ai mo le totōina o le fatu. E fa'apea fo'i le galuega fa'aleagaga i le loto o le tagata. O i latou e fa'amanuiaina e ala i le fa'amalūina o le 'ele'ele e tatau ona ō atu ma le Afioa a le Atua i o latou loto. O le a latou iloa ai le 'ele'ele o le loto ua galuea'iina e ala i le fa'amalūina ma le galuega a le Agaga Pa'ia. Vaganā ua matuā faia se galuega tele i le 'ele'ele, o le a leai se seleselega. E fa'apea fo'i i le 'ele'ele o le loto: E tatau ona galue le Agaga o le Atua e fa'amamā ma ia pulea lelei a e le'i mafai ona aumaia i luma fua mo le vi'iga o le Atua.

O le a lē mafai ona fua mai e le 'ele'ele ni ōna 'oa pe a galuea'iina a e le'i mafaufau ma fuafua lelei. E mana'omia le galue ma le filigā i aso ta'itasi, e tatau ona fa'amalū so'o ma ia loloto ina ia 'aia le tupu a'e vao e fa'aaogāina mea'ai mo fatu lelei e totōina. O ē galuea'iina le 'ele'ele ma totōina fatu, e sauni fo'i latou mo le seleselega. Ia leai se tasi e tū i le fanua ma le fa'anoanoa ona o fa'amoemoe ua lē taunu'u.

O le a fa'amanuiaina e le Ali'i i latou o ē galulue i le fanua, ma maua a'oa'oga mai mea o le foafoāga. I le galuea'iina o le 'ele'ele e lē iloa e le tagata galue po o ā 'oloa o le a i ōna luma. Pe afai na te lē fiafia i fa'atonuga mai ē na galulue ai ma fa'amatalaga na tu'u mai ē popoto, a e ia tatau iā te ia ona talia ma fa'aputu a'oa'oga e maua mo ia lava. O se vaega lenei o lana a'oa'oga. O le galuea'iina ma le tausiga o le 'ele'ele o le a 'avea o se a'oa'oga mo le agaga.

O Lē e pogai ai le tupu a'e o le fatu, e tausia i le ao ma le pō, e tu'u i ai le mana e tuputupu a'e ai, o le Pule o lo tatou ola, o le Tupu o le lagi, ma o Ia e pulea le tausiga ma Na aumaia mea uma e mana'omia e Lana fanau. A o totōina e le fai fa'ato'aga le fatu e tausia ai lo tatou ola fa'alelallagi, o le Lūlūsaito Fa'aleagaga o le a totōina i o tatou loto le fatu o le a tupu a'e ma fua mai mo le ola e fa'avavau

"E Fa'apei o le Mea Fa'afefete"

Matā'upu 7

Fa'avaeina lenei matā'upu i luga o le Mataio 13:33; Luka 13:20, 21.

Sa to'atele tagata a'oa'oina ma ē tulaga maualuga na ō ane e fa'alologologo i le Perofeta o Kalilaia. E i ai nisi o latou ia na va'ava'ai ane ma le fia iloa i le motu o tagata o lo'o fa'apotopoto ma ua si'omia Keriso a o Ia a'oa'o atu i talane o le sami. I lenei motu o tagata sa fa'atasi ai ē mai vasega 'ese'ese uma o le mafutaga. Sa i ai ē matitiva, ē lē a'oa'oina, o tagata 'aisi, o le faomea ua fa'aali mai ona foliga le ta'usalaia, o ē pipili, o le fa'amaumau mea, o le fa'atau 'olua ma tagata tu'inaanu i mea fa'afiafia, o ē maualuga ma le maulalo, o le mau'oa ma le mativa, ua fa'aofiofi atu mo se mea e tū pe nofo ai ia lagona fetalaiga a Keriso. A o vā'ai atu nei tagata a'oa'oina i se fa'apotopotoga uiga 'ese, sa fesili ane iā i latou lava ia, "O le malo o le Atua e aofia ai ea nei itu'aiga tagata?"

Ua toe fetalai atu le Fa'aola i se tasi fa'ata'oto, "E tusa le malō o le lagi ma le mea fa'afefete, na 'ave e le fafine, ma tu'u i totonu o le falaoa e tolu tumu, ua o'o ina fa'afefeteina uma ai" (Mataio 13:33).

I tagata Iutaia, o le fefete sa fa'aogā i nisi taimi e pei o se fa'ailoga o le agasala. I le taimi o le Paseka sa fa'atonuina tagata e tu'u'ese uma mea fa'afefete mai o latou fale e pei ona tu'u'ese agasala mai o latou loto. Sa lapata'i Keriso i Ōna so'o, "Ia outou matuā 'alo 'ese i le mea fa'afefete a le 'au Faresaio, o le pepelo lea" (Luka 12:1). Sa tautala fo'i Paulo e fa'ataui i "le mea fa'afefete o le loto leaga ma le amio leaga" (I Korinito 5:8). A e peita'i, i le fa'ata'oto a le Fa'aola, sa fa'aogāina le fefete e fa'asino i le malō o le lagi. O lea e fa'amalamalamaina ai le fegaoiia'i ma le taliaina o le mana o le alofa tunoa o le Atua.

E leai se tasi ua matuā leaga lava, leai se isi ua pa'ū maulalo lava o le a lē mafai ona galuea'iina e lenei mana. Iā i latou uma o ē o le a gaua'i atu i le Agaga Pa'ia, o le a tu'uina i ai se ta'iala fou o le olaga; o le a toe fa'afouina i le aigā tagata le fa'atusa o le Atua na lē iloa.

E lē mafai e le tagata ona fa'afouina ia lava e ala i le faia o mea e loto ia i ai. E leai se mana o iā te ia e mafai ona suia ai o ia. O le fefete - o se mea mai fafo - e tataui ona tu'uina i le mea'ai a e le'i o'o i le tulaga e maua ai se suiga e mana'omia. O lea, e tataui ona maua e le tagata agasala le alofa tunoa o le Atua a e le'i mafai ona feagai lelei o ia mo le malō mamalu. O aganu'u ma a'oa'oga uma e aumaia e le lalolagi o le a lē mafai ona suia se tagata ua fa'amaulaloina ona o le agasala i se tagata o le lagi. O le malosia fa'afouina e tataui ona sau mai le Atua. E na o le Agaga Pa'ia e mafai ona aumaia le suiga. O i latou o ē o le a fa'asaoia, e tulaga maualuga pe maulalo, mau'oa pe o le mativa, e tataui ona gaua'i atu i le galuea'iina e lenei mana.

E fa'apei o le fefete, pe a fa'afefiloi ma le falaoa mata, e galue mai totonu e aga'i i fafo, e fa'apea fo'i le alofa tunoa o le Atua ona galue e fa'afouina le loto ma suia ai le olaga. E lē na o se suiga mai fafo o le a lava lea e aumaia ai i tatou ia ō gatasi ma le Atua. E to'atele o lo'o taumafai e sui e ala i le fa'asa'oina o lenei ma lenā o masaniga leaga, ma ua latou fa'amoemoe i lenei ala e 'avea ai ma Kerisiano, a e peita'i, o lo'o sesē le mea e amata mai ai. O la tatou mua'i galuega o le loto lea.

O le ta'u mai e fa'atuatua ma fa'apea o lo'o i ai le 'upu moni i le agaga, e 'ese'ese mea ia e lua. E lē lava le na o le fai mai e iloa le 'upu moni. Atonu e iā te i tatou lenei mea, a e peita'i e lē o suia le uiga o o tatou mafaufauga. E tataui ona liua ma ia fa'apa'iaina le loto.

O le tagata e taumafai e tausi poloa'iga a le Atua ona o se lagona e tataui ona faia o lea mea - o le mea e mana'omia na te faia - o le a lē mafai ona maua se fiafia i le usiusita'i. O lona uiga e lē usita'i o ia. Pe a fa'atatauina mea e mana'omia e le Atua o se avega ona e fa'alavelavea ai mana'oga fa'aletagata, tatou te iloa ai o lea olaga e lē o se olaga Kerisiano. O le usita'i moni e fa'ailoa mai ai le galuea'iina o se ta'iala mai totonu o le loto o le tagata. E tupu mai le fiafia i le amiotonu, ma alofa i le tulafono a le Atua. O le 'a'ano o amiotonu uma lava o le fa'amaoni lea i lo tatou Fa'aola. O le a ta'ita'iina ai i tatou e faia le mea sa'o ona e tonu - ona o le fai mea sa'o ma tataui e fiafia i ai le Atua.

O le 'upu moni o le liliuina o le loto e ala i le Agaga Pa'ia o lo'o fa'aalia i fetalaiaga a Keriso iā Nikotemo, "E moni, e moni, 'Ou te fai atu iā te 'oe, a lē toe fanau le tagata, e lē mafai ona iloa e ia o le malō o le Atua....O lē ua fanau mai i la le tino, o le tino lea; o lē ua fanau mai fo'i la le Agaga, o le agaga lea. 'Aua e te ofo auā na 'Ou fai atu iā te 'oe, 'E ao ina toe fanau mai outou.' E agi le matagi i le mea e loto i ai o ia, e te fa'alogofa fo'i i lona agi, a e te lē iloa le mea na sau ai, ma le mea e alu i ai; e fa'apea i latou uma o ē fanau mai e le Agaga" (Ioane 3:3-8).

Ua fa'apea Paulo i lana tusitusiga e ala mai le Agaga Pa'ia, "A o le Atua, ua i ai le faula'i o le alofa, ona o Lona lava alofa tele na la alofa mai ai iā i tatou, a o oti lava tatou i amio leaga, ua Na fa'aola mai iā i tatou fa'atasi ma Keriso; (o le alofa tunoa ua fa'aolaina ai outou); ua Na toe fa'atutū fa'atasi mai fo'i ma fa'anonofa fa'atasi i tatou ma Keriso Iesu i mea o i le lagi; ina ia fa'aalia i tupulaga atali le silisili 'ese o le faula'i o Lona alofa tunoa, i le agalelei mai iā te i tatou, iā Keriso Iesu. Auā o le alofa tunoa ua fa'aolaina ai outou i le fa'atuatua; e lē mai iā te outou fo'i lea, a o le mea ua foa'iina mai e le Atua" (Efeso 2:4-8).

E galue mai totonu o le falaoa le fefete ina ia fa'afefeteina ai le mea atoa; e fa'apea le fefete o le 'upu moni ona galue fa'alilolilo, galue filemū, galue pea lava e fa'aliliuina le agaga. O naunauta'iga masani e fa'amalūlūina ma fa'ato'ilaloina; a o mafaufauga fou, o lagona fou, o fuafuāga fou e totōina. E fa'atūina se tapula'a fou o le amio - o le soifuāga lea o Keriso. E suia le mafaufau; ma e fa'afuina le lagona mo gaoioiga fou. O le a lē tu'uina i le tagata le tomā e fou, a e o le agava'a o lo'o iā te ia ua fa'apa'iaina. E fa'afuina le loto fuatiaifo; o i tatou uma ua tu'uina mai i ai uiga ma le amio e mafai ai ona tatou galulue mo le Atua.

Ua faia so'o le fesili, Aiseā e to'atele ai ua fai mai latou te talitonu i le Afioga a le Atua, o ē e lē va'aia ai se suiga i 'upu e tautala ai, i le agaga, ma le amio? Aiseā e to'atele ai ē e matuā lē lavatia onosa'i i ē tete'e atu i a latou fuafuāga ma fa'amoemoega, o ē fa'aalia ai se loto ita e matuā lē pa'ia lava, ma o 'upu e fa'a'ono'ono, e mamafa, ma e fa'atigā? E va'aia i o latou olaga le manatu fa'apito iā i latou lava, o le fa'alēmafaufau ona e mana'o i mea mo latou lava, o se loto ita ma 'upu e fai fa'avavave, o lea e va'aia fo'i i olaga o tagata o le lalolagi. O lo'o i a i latou le mitamita vale, e naunau ma gaua'i i masaniga, o uiga masesei, e pei e latou te le'i iloa lava le 'upu moni, pe e le'i i ai se avanoa e galueai'ina ai lea i le olaga. O latou uiga moni ma masaniga e faia ai le leaga e le'i gaua'i atu i le mana e liua ai. Ua fa'aalia i o latou olaga e lē o i ai le alofa tunoa o Keriso, ma le lē talitonu i Lona mana e suia ai le amio.

"O lenei, e tupu le faatuatua i le taugologologo atu, o le taugologologo atu foi o i le afioga a le Atua lea" (Roma 10:17). O le Afioga a le Atua o se sui ofoofogia i le suiga o le amio. Sa tatalo Keriso, "Ia e fa'apa'iaina i latou i le 'upu moni; o Lau afioga o le 'upu moni lea" (Ioane 17:17). Pe a su'esu'e ma usiusita'i i ai, ona galue lea o le afioga a le Atua i le loto, e fa'ato'ilaloina ai uiga uma e lē pa'ia. O le a afio mai le Agaga Pa'ia e ta'usala le agasala, ma o le fa'atuatua e alu a'e mai le loto o le a galue e ala i le alofa o Keriso, e fa'afuina i tatou i le tino, agaga, ma le loto i Lona ia lava fa'atua. O le a mafai e le Atua ona fa'aaogāina i tatou e faia Lona finagalo. O le malosi ua tu'u mai iā i tatou e galue mai totonu i fafo, o le a ta'ita'iina i tatou e fa'asoa atu i isi le 'upu moni na tu'uina mai iā te i tatou fo'i.

O 'upu moni a le afioga a le Atua e fa'afeagai ma le mea e mana'omia tele i le olaga o le tagata - o le liliuina o le agaga e ala i le fa'atuatua. O nei ta'iala mao'e e lē tataua ona manatu i ai ua mamā tele ma pa'ia mo le olaga o aso ta'itasi. O 'upu moni lava ia e taunu'u i le lagi ma fa'asino le ala i le ola e fa'avavau, a e matuā mana'omia le 'a'afiāga o ia mea ia lalaga fa'atasi i le olaga o le tagata. E tataua ona aofia i totonu o mea tetele uma ma mea iti uma fo'i o le olaga.

A talia i totonu o le loto, o le fefete o le 'upu moni o le a pulea fa'anaunauga, fa'amamāina manatunatuga, ma fa'asuamalie le amio. E fa'amatalaina vaega o le mafaufau ma le malosi o le agaga; e fa'alauteleina le malosi ia mafai ona lagona, ia loto alofa.

O le tagata ua ulu i ai lenei ta'iala e fa'atatauina e le lalolagi o se mea lilo. A o le tagata e loto fa'apito, e mana'o tupe, e ola ia puipua mo na o ia lava ma āna 'olola, o fa'amamāluga, ma tu'inaanau o lenei lalolagi. Na te lē iloa mai lana fa'atatau le lalolagi e fa'avavau; a e peita'i, o lē mulimuli iā Keriso o le a leai se manatu i ai i nei mea uma. O le a galue o ia mo lona Ali'i ma te'ena ia lava, ina ia mafai e ia ona fesoasoani i le galuega tele o le fa'asaoina o agaga e lē o iā Keriso ma ē lē o i ai se fa'amoemoe i le lalolagi. O lea itu'aiga tagata e lē o malamalama i ai le lalolagi; auā o lo'o tumau i lana va'ai mea moni

fa'alegata'aga. Ua i lona loto le alofa o Keriso ma Lona mana fa'aola. O lenei alofa e pulea isi manatunatuga uma, ma o le a si'itia i luga lē e iā te ia lea uiga, mai le 'a'afiāga a le pule leaga o le lalolagi.

E tatau ona i ai se suiga e fa'apa'iaina ai i le Afioga a le Atua i a tatou feso'ota'iga ma tagata uma o le aigā tagata. E lē aumaia e le fefete o le 'upu moni se agaga fia fa'atauvā, o le mana'o e fiasili, o le naunau ia muamua i mea uma. E moni o le alofa e mai le lagi e lē fa'apito pe fesuisuia'i; e lē fa'alagolago i vi'iga mai tagata. O le loto o lē ua maua le alofa tunoa o le Atua e tumu ma ua taumasuasua le alofa mo le Atua ma i latou na maliu ai Keriso. E lē mana'omia e le tagata ia lauiloa o ia. E lē o alofa ia i isi ona ua alofa ma fiasia mai latou iā te ia, ona ua latou iloa āna mea lelei, a e ona o i latou uma na fa'atauina e Keriso i Lona toto. Afai o ōna mafaufauga, 'upu, po o amioga ua fa'amatala sesē ma lē malamalama i ai, na te lē fa'atausuāi, a e na te fa'aali pea lona uiga lelei. E agalelei o ia, e fa'autauta, e manatu maulalo iā te ia lava, a e tumu i le fa'amoemoe, o taimi uma e talitonu i le alofa tunoa ma le alofa mutimutivale o le Atua.

Ua fa'atauānau mai le aposetolo, "A e pei ona pa'ia o Ia na vala'auina outou, ia fa'apea fo'i outou ona pa'ia i a outou amio uma; auā ua tusia, Ia pa'ia outou, auā o A'u nei e pa'ia lava A'u" (I Peteru 1:15, 16). O le alofa tunoa o Keriso e pulea le lotoita ma le leo. O lana galuega o le a va'aia i le uiga fa'aaloalo ma le fa'atatau fa'apalepale e fa'aailoa mai le tasi uso i le isi uso i 'upu alofa mo le fa'amalosi'au. E fa'atasi ai se agelu i le aiga; o le ola e mātāvaina se manogi suamalie e alu a'e ai i le Atua pei o se meamanogi pa'ia. E fa'atinoina le alofa i le agalelei, uiga tusa'afia, onosa'i, ma le fa'apalepale.

O foliga e suia. O le loto e mau ai Keriso o le a susulu atu i fofoga o i latou o ē alolofa iā te Ia ma e tausia Āna poloa'iga. O le 'upu moni o lo'o tusia ai; o lo'o fa'aalia mai ai le filemū o le lagi. E fa'aailoa mai se agamalū e masani ai, e sili atu i lo le alofa fa'aletagata.

O le fefete o le 'upu moni e galuea'iina se suiga i le tagata atoa, e fa'amatagofie le mea e pa'a'ā, fa'amalū le lauleaga, o le a limafoa'i lē e loto fa'apito iā te ia lava. E ala mai ia mea, o le a fufuluina mea e lē mamā, e fa'amamāina i le toto o le Tama'i Mamoe. E ala i le mana fa'aola, e aumaia mea uma o i le mafaufau ma le agaga ma le malosi ia ō gatasi ma le soifuāga fa'aAtua. O le a i ai le so'otaga, o le tagata ma lona uiga moni fa'aletagata ma le fa'aleagaga. O le a fa'amamaluina Keriso i le aupito sili ona maoa'e ma le ato'atoa o Lana amio. A o faia nei suiga, o le a vivi'i agelu, ma o le Atua ma Keriso ua fa'afiafiaina ona o agaga na faia i le fa'atusa pa'ia.

'Oa ua Nātia

Matā'upu 8

Fa'avae lenei matā'upu i le Mataio 13:44.

"E tusa fo'i le malō o le lagi i le 'oa ua natia i le fanua; ua iloa e le tasi, ona nanā ai lea e ia; ua alu fo'i ma le fiafia, ma fa'atau atu ana mea uma, i le fa'atau a'i mai lea fanua."

I taimi anamua, o le masani a tagata e nātia a latou 'oloa i le 'ele'ele. Sa tele fo'i tagata gāoi ma faomea. Ma o so'o se taimi e sui ai le pule'aga o le malō, e fa'amamafaina le taulagatotogi fa'amalosia tagata mau'oa. E lē gata i lea, o lea malō e fa'aauau pea le faigatā o osofa'iga fa'afuase'i mai isi 'autau. O le mea e tupu, e taumafai lava ē mau'oa e fa'asao a latou 'oloa, ma e manatu latou o le 'ele'ele o se nofoāga saogalemū. Peita'i e tele fo'i taimi e galo ai le mea tonu sa natia ai; atonu fo'i ua maliu lē ōna le 'oa, ua falepuipua, pe ua fa'aanu'u ma ua 'ave'esea mai lona nu'u ma lana 'oloa, ma o mea sa ia taumafai e fa'asao ua tu'uina mo se tasi e mulimuli mai ma na maua. I le taimi o Keriso, e ta'atele lava 'oa e maua a'e i lau'ele'ele tu'ulafoa'i - o tupe, auro ma ario.

E totagi e le pule tagata e galulue i le fanua, ma a o saunia le 'ele'ele ona maua a'e lea o 'oa na tanumia. Ina ua maua lenei 'oa, ua va'ai lenei tagata galue i se 'oloa ua i ōna lima. Sa ia toe natia le 'oa, toe fo'i i lona aiga, ma fa'atau atu ana mea uma lava ina ia mafai ai ona ia fa'atau le fanua o lo'o i ai le 'oloa. E le'i malamalama lona aiga ma ōna tua'oi, ona e foliga mai e leai se tāua o lea 'ele'ele lē amana'ia. A e peita'i e iloa e la lea tagata le mea e tatau ona ia faia; pe a i lona igoa le fanua, ua ia tausisi loa e sa'ili vaega uma o le fanua se'ia maua le 'oa sa ia fa'asao.

Ua fa'amalamalama mai i lenei fa'ata'oto le tāua o le 'oa fa'alelagi, ma le taumafaiga e tatau ona fai ia maua ai. O le tagata na mauaina le 'oa i le fanua sa sauni ia e tu'u 'ese atu āna mea uma, ua sauni e galue ma'elegā ina ia maua 'oa o lo'o natia. E fa'apea lē ua maua le 'oa fa'alelagi, o le a ia galue ma le filigā ma sauni e tu'u uma le malosia ina ia maua le 'oloa o le 'upu moni.

O le fanua sa i ai le 'oa i le fa'ata'oto e fa'asino lea i le Afioga Pa'ia. Ma o le tala lelei, o le 'oa lea. E lē o fa'atumuina le 'ele'ele i ālāauro ma mea tāua e fa'apei o le Afioga a le Atua.

E Fa'apefea ona Nātia

E fa'apea o le 'oa o le tala lelei ua natia. Ona o le manatu fa'afiapoto o le tagata i la latou lava fa'atatau, o i latou ua fa'afefeteina e ala i le a'oa'oina o mafaufauga lē aogā, ua lē iloa ai le matagofie ma le mamalu ma le mea lilo o le fuafuāga o le fa'aolataga. E to'atele e i ai mata, a e latou te lē va'ai; o i ai o latou taliga, a e lē lagona e latou se mea; e i ai le poto iā i latou, a e peita'i latou te lē malamalama i le 'oa ua nātia.

Atonu e savali se tagata i luga o se mea o lo'o nātia ai le 'oa; atonu e mana'omia e malōlō ia i lalo o se la'au, a e lē o iloa e ia o lo'o nātia se 'oloa i lalo o ōna ā'a. Sa fa'apea tagata Iutaia; e fa'apei o se 'oloa auro, sa tu'uina i tagata Eperu e tausia le 'upu moni. O le tamā'o'aiga o Iutaia, na tau'aveina le suafoa o le Lagi, ma na fa'atūina e Keriso lava ia. O 'upu moni ofoofogia o le fa'aolataga ua ufitia e fa'atusa ma fa'ailoga; a e ina ua afio mai Keriso, e le'i iloa e Iutaia o Ia Lē sa fa'asino i ai ia fa'ailoga uma. Sa i o latou lima le Afioga a le Atua; peita'i o 'uputu'u na tu'ufa'asolo mai augātupulaga, ma le fa'aliliuina fa'aletagata o ia Afioga Pa'ia, ua nātia ai mai iā i latou le 'upu moni pei ona i ai iā Iesu. Ua lē iloa le tāua fa'aleagaga o nei tusitusiga pa'ia. Sa tatalaina mo i latou le fale e tu'u ai 'oloa o mea uma e aupito sili ona tāua, a e na latou lē iloa.

E lē nātia e le Atua Āna 'upu moni mai tagata; a e ona e ala i a latou lava gaoioiga, ua latou fa'anefuina ai ia mea mo i latou lava. Sa tu'uina e Keriso i tagata Iutaia ni fa'amaoniga e tele fa'atatau iā te Ia o le Mesia; a e o Āna a'oa'oga sa mana'omia ai ia matuā suia o latou olaga. Na latou va'ai pe afai e latou te talia Keriso, e tatau i a i latou ona tu'u 'ese o 'uputu'u ma fa'avae ua pele iā i latou, o le loto

fa'apito, o tū ma masani e lē pa'ia. E mana'omia ia faia se suiga ina ia maua ai le 'upu moni e fa'avavau ma e lē mafai ona suia. O le mea lea sa lē mafai e i latou ona talia fa'amaoniga e matuā manino lava ua tu'uina mai e le Atua ina ia fa'amausalī ai le fa'atuatua iā Keriso. Ua latou ta'u mai e talitonu i le Feagaiga Tuai o le Afioga Pa'ia, a e latou te tete'e e talia le molimau o lo'o i ai e fa'ataata i le soifuāga ma le amio a Keriso. Ua fefefe i latou i suia o latou taofi, ina ne'i liua ai ma una'ia e tu'u 'ese fa'amalosī o latou manatu ua mautū. O le 'oa o le tala lelei, o le Āla, o le 'Upu moni, ma le Ola, o lo'o fa'atasi pea ma i latou, a e peita'i ua latou te'ena le meaalofo aupito sili ua mafai ona tu'uina mai e le lagi.

"E to'atele ali'i ua talitonu iā te Ia; a e le'i ta'u atu ai, ona o le 'au Faresaio, ne'i tulia i latou i le sunako" (Ioane 12:42). Sa i ai i le 'au ta'ita'i se to'atele ua talitonu; sa mautinoa e latou o Iesu o le Alo o le Atua; a e peita'i, sa lē talafeagai ona ta'u atu Ia ma o latou fa'anaunauga fa'afiasili. E le'i iā i latou le fa'atuatua semanū e latou te maua ai le 'oa fa'alelagi. Sa latou sa'ili le 'oa fa'alelalolagi.

O ōna pō nei fo'i o lo'o sa'ili ma le naunauta'i e tagata 'oa fa'alelalolagi. O latou mafaufau ua fa'atumulua i le loto fa'apito ma manatu fiasili. Ua latou fa'amuamua masaniga, o 'uputu'u, ma mana'oga a tagata i luga a'e o mea e mana'omia mo le Atua, ona o le tu'inanau ia maua 'oloa, o tulaga mamalu, ma le pule fa'alelalolagi. O lea ua fa'alilo ai mai iā i latou 'oa o Lana Afioga.

"E lē talia e le tagata fa'aletino o mea a le Agaga o le Atua; auā o mea valea ia iā te ia, na te lē mafai fo'i ona iloa, auā e fa'amasinoina fa'aleagaga" (I Korinito 2:14).

"Afai fo'i ua ufitia la matou tala lelei, ua ufitia ia i ē ua fano; ua fa'atauasoina manatu o i latou o ē lē talitonu e lē atua o le lalolagi nei, ina ne'i pupula atu iā te i latou le malamalama o le tala lelei i le mamalu o Keriso, ua tusa o ia ma le Atua" (II Korinito 4:3, 4).

O le Tāua o le 'Oloa

Ua silasila atu le Fa'aola ua tosina tagata ia maua mea e tele, a e ua lē iloa i la latou va'ai mea moni e fa'avavau. Sa Ia fa'asaga loa e fa'asa'o lenei leaga; ma na Ia sa'ili e lepeti i lalo mea fa'atauva'a e fa'atosina ua fa'aumatia ai le agaga. Na si'i a'e Lona si'ufofoga ma fetalai atu, "Se ā le aogā i le tagata pe afai na te maua le lalolagi uma, a e maumau lona ola? Se ā fo'i se mea e avatu e le tagata e togiola a'i lona ola?" (Mataio 16:26). Ua Ia tu'u atu i luma o le fanau a tagata ua pa'ū le lalolagi matagofie lava a e ua lē iloa i la latou va'ai, ina ia latou mata'i ai mea moni e fa'avavau. Ua Ia avatu i latou i le faitoto'a a Lē e leai se gata'aga, ua fa'apupulaina i le mamalu e lē mafa'amatalaina o le Atua, ma fa'aali atu iā i latou le 'oloa o lo'o i ai i inā.

O le tau o lenei 'oa e maualuga atu i so'o se auro po o ario. O 'oloa uma o le lalolagi e lē mafai ona fa'atusatusa i ai. "Ua fai mai le moana, E lē o i ai lea iā te a'u; ua fai mai fo'i le sami, E lē o iā te a'u. E lē taulia i auro lelei, e lē fuatia atu fo'i ario e fa'atau a'i. E lē fa'atatauina i auro mai Ofeira, po o le soama tāua, po o le safaira. E lē fa'atusatusa i ai auro ma ma'a tioata; e lē fesuia'iina fo'i i teugāauro lelei. E lē ta'ua ramuta ma le kapesa, auā a maua le poto e sili lea i penina" (Iopu 28:14-18).

O le 'oa lenei e maua i le Afioga a le Atua; o le Tusi Pa'ia o le tusi a'oga lea a le Atua, le A'oa'o aupito sili. O le fa'avae o le poto maoa'e moni e i ai i totonu o le Tusi Pa'ia. O vaega uma fa'ataata i le poto e maua e ala i le sa'ilia o le Afioga a le Atua. Ma o le mea e aupito sili i luga o isi mea uma, e maua ai le poto maoa'e e aupito i maualuga, o le tala lea o le fa'aolataga. O le Tusi Pa'ia se fanua lea o lo'o i ai le 'oa a Keriso.

O le a'oa'oga maualuga moni e maua mai lea e ala i le su'esu'eina ma le usita'i i le Afioga a le Atua. A e a tu'u 'ese le Afioga a le Atua ona o tusi o le a lē ta'ita'iina ai i le Atua ma le malō o le lagi, o le a'oa'oga e maua o se fa'auga lē sa'o o le igoa.

E tele 'upu moni o'foofogia i mea na foafoaina; o le lalolagi, o le sami, ma le vā nimonimo e tumu i 'upu moni. O ia mea o a tatou faia'oga ia. E fa'a'iloa mai i leo o mea na foafoaina lesone o le poto fa'alelagi ma 'upu moni e fa'avavau. Peita'i e lē malamalama i ai le tagata ua pa'ū. Ua fa'anenefu e le agasala lana va'ai, ma ua na lē mafai e ia lava ona fa'amatala mea o le foafoāga a e aunoa ma le tu'u fa'asili i luga a'e o le Atua. E lē mafai e a'oa'oga e tu'usa'o atu ona fa'aofia i mafaufau o i latou o ē ua te'ena le Afioga a le Atua. E o'o mai lea taimi, o a'oa'oga tāua ua matuā fa'augasesē ma ua fa'alilili 'ese ai le mafaufau mai Lē na faia mea uma.

O le to'atele ua manatu latou o le poto o le tagata ua sili atu le maualuga i lo le poto a le A'oa'o pa'ia, ma o le tusi a'oga a le Atua ua fa'apea o se mea ua tuai, ua mamae, ma ua leai se aogā. A e peita'i o i latou ua toe fa'aolaola e ala i le Agaga Pa'ia, e lē manatu latou fa'apea. Latou te va'aia se 'oa e lē mafa'atauina, ma ua naunau e fa'atau atu mea uma ina ia fa'atau mai ai le fanua lea o lo'o i ai le 'oa. O le a lē mana'o i tusi mai tusitala lauiloa, a e latou te filifili i le afioga a Ia Lē e aupito sili ma se A'oa'o aupito maoa'e i le lalolagi, o Lē sa tu'u atu Lona soifua mo i tatou, ma e ala iā te Ia o le a mafai ai ona tatou maua le ola e fa'avavau.

O I'uga o le lē Amana'ia o le 'Oloa

O lo'o galue pea Satani i mafaufau o tagata, e ta'ita'iina i latou e manatu e mafai ona maua le poto ofoofogia a o vavae 'ese mai le Atua. E ala i le mafaufauga taufa'asesē, sa ia ta'ita'i Atamu ma Eva e masalosaloale i afioga a le Atua, ma na aumaia se manatu na ta'ita'iina ai la'ua i le lē usita'i. Ma o lo'o fa'aaogā uiga taufa'asesē i ōna pō nei fa'apei ona ia faia i Etena. O faia'oga e fa'afefiloia'i manatu mai tusitala fa'apaupau ma a'oa'oga o lo'o latou tu'uina atu, o le a totōina ai i mafaufau o talavou manatunatuga e ta'ita'i ai latou ia lē talitonu i le Atua ma soli Lana tulafono. Latou te lē iloa le mea o lo'o latou faia; latou te lē iloa fo'i po o le ā le i'uga o a latou galuega.

Atonu e a'oa'oina le talavou o le asō e fa'asolo mai vasega maulalo se'i o'o i a'oga maualuga ma le kolisi. Atonu e galue ma le filigā ma fa'aaogā uma lona malosi ia maua le poto. A e peita'i, pe a lē iloa e ia le Atua, vaganā ua ia usita'i ma tausi tulafono e pulea ai lona tagata, o le a fa'aumatia ia e ia lava. E ala i masaniga sesē, o le a leai sona malosi e fiafia ai ia lava; o le a lē mafai ona pulea ia lava. E lē mafai ona fa'aaogā lona mafaufau e fa'atatau i mea e afāina ai ia lava. O le a so'onafai ma lē fa'autauta i le tausia lelei o le mafaufau ma le tino. O le a fa'aleagaina ia lava e ala i masaniga lē taupulea. E lē mafai ona ia maua se fiafia; ona o lona fa'atamala e fa'aaogā ta'iala e mamā ma malōlō lelei ai, o le a tu'u atu ai ia i lalo o le pulega a amioga masani e 'ave'ese ai lona to'afilemū. O ōna tausaga na su'esu'e ai ua fa'alēaogā, auā ua ia fa'aumatia ia lava. Ua ia fa'aaogā sesē le malosi o lona tino ma le mafaufau, ma ua fa'aleagaina le malumalu o le tino. Ua fa'aleagaina ia mo lenei olaga ma le ola o i lumana'i. Ina ua ia maua le poto fa'alelalolagi, sa ia manatu o le a maua ai se 'oa, a e ina ua ia tu'u 'ese lana Tusi Pa'ia, sa ia tu'u 'esea fo'i se 'oa e sili atu le tāua i lo se isi lava mea.

Sa'iliga o le 'Oloa

Ia tatou su'esu'e pea i le Afioga a le Atua. E tatau ona tatou a'oa'o a tatou fanau i 'upu moni o lo'o maua ai i totonu. O se 'oa lava lea e lē uma; a e ua lē maua e tagata lenei 'oloa ona e latou te lē o sa'ilia se'iloga ua i o latou lima. E to'atele ua malilie i le taumatemate e fa'atatau i le 'upu moni. Ua fiafia lava i latou i galuega e faia na o fafo, ma ua lē tāua o lo'o iā i latou mea uma lava e mana'omia. Latou te talitonu o le 'upu moni e maua mai isi, ua fa'apaiē a e ua lē galue ma le fa'amaoni ma le filigā e pei ona tu'uina mai e le 'upu, ia 'eli le 'ele'ele mo 'oa o lo'o nātia ai. O mea e faia e tagata e lē fa'atuatuaina, ma e mata'utia; auā ua latou tu'u le tagata i le tulaga e tatau ona i ai le Atua. Ua latou tu'u 'upu a tagata i le mea e tatau ona i ai le "Auā ua fetalai mai le Ali'i."

O Keriso o le 'upu moni. O Āna afioga o 'upu moni, ma e loloto le tāua i lo se foliga o iloa mai fafo. O fetalaiiga uma a Keriso e i ai le tāua i tua atu o va'aiga e lē fa'afoliga. O mafaufau e fa'ate'ia e le Agaga Pa'ia o le a iloa le tāua o nei afioga. Latou te malamalama i ma'atāua o le 'upu moni, e ui ina foliga mai o nei mea o 'oa ua nātia.

O manatunatuga ma matematega fa'aletagata o le a lē mafai ai lava ona aumaia se malamalamaga i le Afioga a le Atua. O i latou e malamalama i le poto maoa'e ua fa'apea o fa'amatalaga ia e mana'omia e tatalaina ai le 'oloa o le poto ma e puipuia ai le ekalesia mai talitonuga sesē. A e peita'i o fa'amatalaga ia o lo'o aumaia manatu sesē ma talitonuga lē tatau. O lo'o taumafai pea tagata e fa'amatala mea ua latou manatu e faigatā o afioga pa'ia; a e o le tele o taimi o a latou taumafaiga ua na o le atili pouliuli ai mea o lo'o latou taumafai e fa'amanino.

Sa manatu le 'au faitaulaga ma Faresaio o lo'o latou faia mea tetele ona o latou o a'oa'o, e tu'u a latou lava fa'aliliuga i le Afioga a le Atua; a e na fetalai Keriso fa'atatau iā i latou, "Ua outou lē iloa 'upu o Tusi, ma le mana o le Atua" (Mareko 12:24). Sa Ia molia i latou ma ta'usalaina i lo "latou fai ma matā'upu o poloa'iga a tagata" (Mareko 7:7). E ui o latou faiaa'oga o afioga a le Atua, e ui ina e tatau iā i latou ona malamalama i Lana afioga, a e latou te lē o faia. Ua fa'atauasoina e Satani o latou mata ia lē mafai ai ona latou iloa lona tāua moni.

O lea le galuega a le to'atele i aso nei. E tele ekalesia o lo'o pa'ū ai i lenei agasala. E i ai le faigatā, se faigatā mata'utia lava, fa'apea o le a faia fo'i e tagata e tatau ona popoto o nei aso, e pei ona faia e a'oa'o Iutaia. E latou te fa'aliliu sesē fetalai pa'ia, ma ua aumaia ai se fa'afitauli i agaga o lo'o si'omia e le pogisā ona o lo latou fa'aaogā sesē 'upu moni a le Atua.

E lē mana'omia e faitauina le Afioga a le Atua i se malamalama itiiti lava o 'uputu'u po o manatu tau matemate fa'aletagata. E pei o tatou taumafai e tu'u atu le malamalama i le lā mai se sulu, o le a fa'apea ona tatou fa'amatalaina le Afioga Pa'ia e ala i 'uputu'u fa'aletagata po o ata fa'alemafaufau. O Afioga Pa'ia a le Atua e lē mana'omia sulu malamalama mai le lalolagi e fa'atāuaina ai ōna mamalu. O ia o le malamalama lava lea - o le mamalu o le Atua ua fa'aalia, ma o isi uma malamalama e lē lava le susulu.

A e tatau ona su'esu'e fa'amaoni ma iloilo loloto. E lē mafai ona tauia le paiē i manatunatuga ma'ati ma le manino o le 'upu moni. E lē mafai ona maua se fa'amanuiāga i le lalolagi a e aunoa ma taumafaiga e fa'amaoni, faia ma le onosa'i ma le filigā. Pe afai e fa'amanuiaina galuega a le tagata, e tatau iā i latou ona i ai le uiga ma'elegā e fai ai ma le fa'atuatua e va'aia ai le fa'ataunu'uina. Ma e lē mafai ona tatou fa'amoemoe ia maua le poto fa'aleagaga e aunoa ma le galue fa'amaoni. O i latou o ē naunau e maua 'oa o le 'upu moni e tatau ona 'eli le 'ele'ele fa'apei o le tagata galue e 'eli le fanua mo 'oloo o lo'o nātia ai. E mana'omia tagata uma, talavou pe matua, ia lē na o le faitau o le Afioga a le Atua, a e ia su'esu'e i ai ma le loto fa'amaoni ato'atoa, ia tatalo ma sa'ili mo le 'upu moni e pei o sa'iliga mo 'oloo o lo'o nātia. O ē o le a faia fa'apea e tauia i latou, auā o le a fa'avaveina e Keriso lo latou malamalama.

E fa'alagolago lo latou fa'aolataga i le iloa o le 'upu moni o lo'o i le Afioga Pa'ia; e finagalo le Atua ia tatau ona tatou maua ia mea. Ia sa'ili la 'ia ma le loto filigā o mea tāua o le Tusi Pa'ia; ia matuā su'esu'e i ai e pei ona sa'ili o auro mai le 'ele'ele. Ia 'aia lava ne'i tu'ua lenei sa'iliga se'ia e fa'amautū lou vā ma le Atua ma Lona finagalo e fa'atatau iā te 'oe. Ua fetalai Keriso, "O mea uma fo'i tou te ōle atu ai i Lo'u igoa, 'Ou te faia lava, ina ia vi'ia le Tamā ona o le Atali'i. Afai tou te ōle atu i se mea i Lo'i igoa, 'Ou te faia lava" (Ioane 14:13, 14).

O tagata e i ai taleni ma e fa'afiaamitonu e latou te va'aia vaega o tulaga moni o le ola e fa'avavau, a e o le tele o taimi e lē malamalama i ai, ona o mea e va'aia e fa'anenefuina e le mamalu o mea e lē o mava'aia. O le tagata e manuia le sa'iliga o le 'oloo o lo'o nātia e tatau ona maua le tapula'a o lana taumafaiga i lo mea o lenei lalolagi. O lona ma'elegā ma ōna agava'a uma e tatau ona fa'apa'iaina mo le sa'iliga.

Ona o le lē usita'i ua tapunia ai nei le faitoto'a i le tele o le poto sa tatau ona mauaina mai le Afioga Pa'ia. O le malamalama o le usiusita'i lea i poloa'iga a le Atua. E lē tatau ona suia le Tusi Pa'ia ia fa'afetaui ma le mataū'a ma manatu fa'aitū'au o tagata. E mafai ona malamalama i ai na o i latou o ē o lo'o sa'ili ma le loto maua mo se poto i le 'upu moni e tatau ona latou usita'i i ai.

E te fesili ea, O le ā le mea e tatau ona 'ou faia ina ia 'ou ola ai? E tatau iā te 'oe ona tu'u 'ese ōu taofi na mua'i fa'avae, ma ōu manatu na fa'afauina mai le tasi tupulaga i le tasi tupulaga. Pe afai ua e sa'ilia le Afioga a le Atua e fa'amaonia ai ōu lava manatu, o le a lē mafai ona e taunu'u i le mea moni. A e ia e sa'ili ina ia e iloa ai po o le ā le fetalai a le Ali'i. Pe afai ua o'o mai se fa'amaoniga a o e sa'ili, pe a e va'ai e lē o ō gatasi ōu manatu ma le 'upu moni, ia 'aia le fa'auigaseseina le 'upu moni ina ia tusa ai ma lou talitonuga, a e ia talia le malamalama ua tu'u mai. Ia tatala lou mafaufau ma lou loto ia e iloa ai mea ofoofogia mai le Afioga a le Atua.

Pe a fa'atuatua o Keriso o le Fa'aola o le lalolagi, o le a mana'omia e fa'ailoa o le poto manino e pulea e le loto e mafai ona malamalama ma malie i le 'oa fa'alelagi. O lenei fa'atuatua e lē mafai ona tu'u 'ese'eseina mai le salamō ma le amio ua suia. O le uiga o le i ai o le fa'atuatua o le maua ma le talia lea o le 'oloo o le tala lelei, atoa ma tulaga uma e tusai ma mea ua tu'uina mai.

"A lē toe fanau le tagata, e lē mafai ona iloa e ia le malō o le Atua" (Ioane 3:3). Atonu o le a ia taumate ma tau va'ai fa'alemafaufau, a e a lē aunoa ma mata o le fa'atuatua e na te lē mafai ona va'aia le 'oloa. Sa tu'uina e Keriso Lona soifua ina ia fa'amautū ai lenei 'oa e lē mafa'atusaina mo i tatou; a e peita'i a leai se toe fa'afouga e ala i le fa'atuatua i Lona toto, o le a leai se fa'amagaloina o agasala, leai se 'oa mo so'o se agaga o le a malaia.

Tatou te mana'omia le fa'amalamalamaga a le Agaga Pa'ia ina ia iloa ai 'upu moni o i le Afioga a le Atua. E lē va'aia mea matagofie o le foafoāga se'ia i ai le lā, e alu 'ese ai le pogisā, a e lofia ai latou i lona malamalama. E fa'apea 'oloa o i le Afioga a le Atua ona lē aogā se'ia fa'aalia i latou e ala i 'ave pupula o le Lā o le Amiotonu.

O le a auina mai le lagi le Agaga Pa'ia, e ala i le agalelei o le alofa e lē gata mai, e Na te 'ave mea a le Atua ma fa'aali i agaga uma e matuā fa'atuatua ato'atoa iā Keriso. E ala i Lona mana, e mana'omia 'upu moni ona e fa'alagolago i ai le fa'aolataga o le agaga ua fa'amauiina i le mafaufau, ma ua matuā manino lava le ala o le ola e lē tatau ona toe fa'asesēina ai. A o tatou su'esu'e i le Tusi Pa'ia, ia tatau ona tatou tatalo mo le malamalama o le Agaga Pa'ia o le Atua ina ia susulu i luga o Lana afioga, ina ia mafai ai ona tatou va'aia ma talia fiafia ai ōna 'oloa tāua.

O le Tau i o le Sa'iliga

Ia lē manatu se tasi e lē o toe i ai se isi malamalama e mafai ona latou maua. Atonu e mafai ona fuatia le loloto o le poto fa'aletagata; e mafai fo'i ona pulea galuega a tagata tusitala; a e peita'i e lē mafai lava ona maua ai se tali e fa'atatau i le Atua, auā e mao'e, loloto ma e lautele. E i ai le gata'aga i tua atu o mea uma e mafai ona tatou malamalama i ai. Ua tatou va'aia na o se sulu vaivai o le mamalu fa'aAtua ma le tulaga e lē gata o le malamalama ma le poto; o lo'o tatou galulue pea i fafo o le puna'eli mo ma'atāua, a e o le 'oa e i lalo ifo, o le tau i mo lē o le a 'eli maualalo mo lea mea. E tatau ona 'eli ma fa'agoto ia loloto le pou i le lua, o le a tauia i se 'oa e matuā matagofie lava. E ala i le fa'atuatua moni, o le poto fa'aleagaga o le a 'avea ma poto fa'aletagata.

E lē mafai e se tasi ona sa'ili le Afioga a le Atua i le agaga o Keriso a e lē tauia. Pe afai e loto malie le tagata a'oa'oina ia a'oa'oina e pei o le tamaititi, pe a gau'i ato'atoa i le Atua, ona ia maua lea o le 'upu moni mai Lana afioga. Pe a usiusita'i le tagata, o le a ia malamalama i le fuafuāga o le malō o le Atua. O le a tatala mai e le lagi ōna afeafe o le alofa tunoa ma le mamalu mo su'esu'ega. O tagata ola o le a matuā 'ese atu mai le tulaga o lo'o i ai nei, auā e ala i a latou sa'iliga o puna o le 'upu moni o le a fa'aeaina ia āloa'ia ai i latou. O le mea lilo o le fa'aolataga, o le liu tinotagata o Keriso, o Lana taulaga mo le leleiga, manū o le a lē fa'apei ona i ai nei, e fa'alēmanino i o tatou mafaufau. Semanū o le a lē na o na sili atu le malamalama i ai, a e o le a aupito sili atu fo'i le manino ma o le a fa'aaogā tonu.

I Lana tatalo i le Tamā, sa tu'u ai e Keriso i le lalolagi se a'oa'oga ia tatau ona tusia i le mafaufau ma le agaga. Sa fetalai ai o Ia, "O le ola e fa'avavau fo'i lenei, ia latou iloa 'Oe le Atua moni e to'atasi, atoa ma Lē ua e 'auina mai, o Iesu Keriso lea" (Ioane 17:3). O lenei le a'oa'oga moni; e tu'u mai ai le mana. O le poto tau fa'ata'ita'i o le Atua ma Iesu Keriso na Ia 'auina mai, e fesuia'i ai le tagata i le fa'atusa o le Atua. E tu'u atu ai i le tagata e pule ia e ia lava, ma ia aumai le pulega o una'iga ma tu'inanau uma mai uiga maualalo fa'aletino i le mana e maua luga a'e o le mafaufau. Ona 'avea lea o ia o se atali'i o le Atua ma suli moni o le lagi. O le a aumaia o ia i se mafutaga ma le finagalo o Lē e fa'avavau, ma tatala mai iā te ia 'oa tautele uma o le atulaulau.

O le iloa o le Atua o le poto lea e maua mai le sa'ili'ili o le Afioga a le Atua. Ma o lenei 'oa e mafai ona maua e agaga uma o ē o le a tu'u atu mea uma ina ia maua mai ai.

"Afai lava e te vala'au atu i le atamai, ma e leo tele atu i le fa'autauta; afai e te sa'ili'ili iā te ia, e pei ona sa'ili'ili i le ario; afai e te su'esu'e i ai, pei ona su'esu'e i le 'oloa lilo; ona e lagona ai lea o le mata'ū iā Ieova, ma e maua ai le poto i le Atua" (Fa'ata'oto 2:3-5).

O le Penina

Matā'upu 9

Fa'avae i luga o le Mataio 13:45, 46.

Ua fa'atusa e lo tatou Fa'aola fa'amanuiāga o le alofa e togiolaina ai i se penina e tāua tele. Ua Ia fa'amalamalamaina Lana a'oa'oga e ala i le fa'ata'oto i le sa'ilia o penina lelei e le tagata fa'atau'oa, o lē ina "ua iloa e ia le tasi penina tau tele, ona alu lea o ia, ua fa'atau atu ana mea uma, i le fa'atau a'i mai" (Mataio 13:46). O Keriso o le penina tau tele lava Ia. O lo'o aofia uma iā te Ia mamalu o le Tamā, o le atoāga o le Aigā Atua. O Ia o le malamalama o le mamalu o le Tamā ma le fa'atusa ua fa'aalitino i Lona itu tagata. O le mamalu o tulaga o le Atua e fa'aalia i Lana amio. O itulau uma o Lana Afioga Pa'ia ua pupula i Lona malamalama. O le amiotonu o Keriso e fa'apei o se penina e mamā, e leai se pona, leai se fa'alētonu. E lē mafai e le tagata ona faia se gaoioiga e fa'alelei atili ai le meaalofo aupito tāua a le Atua. E leai se ila. E iā Keriso o lo'o "nātia ai 'oa uma o le poto ma le malamalama" (Kolose 2:3). O Ia "ua 'avea ai mo tatou poto mai le Atua, o le amiotonu fo'i, ma le pa'ia, ma le fa'aolataga" (I Korinito 1:30). O mea uma e mafai ona fa'amalieina mana'oga ma fa'anaunauga o le agaga o le tagata, mo lenei lalolagi ma lea o lo'o i lumana'i, e maua lava lea iā Keriso. O lo tatou Fa'aola o le penina e tautele lea, pe a fa'atusatusa i isi mea uma e leai se aogā.

O Keriso "Ua maliu mai o Ia i Lona lava nu'u, a e le'i talia o Ia e Ōna lava tagata" (Ioane 1:11). Sa fa'asusulu mai le malamalama o le Atua i le pouliuli o le lalolagi, ma "e le'i talia e le pouliuli" (Ioane 1:5). A e le'i fa'apea o i latou uma sa tete'e i le meaalofo a le lagi. O le tagata fa'atau'oa i le fa'ata'oto sa fa'asino lea i se vasega o ē na moni lo latou fa'anaunau i le 'upu moni. I malō 'ese'ese sa i ai tagata e fa'amaoni ma mafaufau lelei, o ē na sa'ili'ili tusitusiga ma mea o le poto salalau ma talitonuga o le lalolagi fa'apaupau mo se 'oa o le agaga o le a mafai ona latou maua. A e o tagata Iutaia sa i ai ē na sa'ili mo mea latou te lē o maua. Latou te le'i malilie i se fa'atuatuāga e tusa ai ma le tulafono tumau, a e sa naunau mo se mea e fa'aleagaga ma ia fa'agae'etia ai le loto. O so'o filifilia a Keriso sa i ai latou i le vasega mulimuli, a e o Konelio ma le eunuka Aitiupe e i le vasega muamua. Sa latou tatalo ma le fa'anaunau mo le malamalama mai le lagi; ma ina ua fa'aalia Keriso iā i latou, sa latou talia Ia ma le fiafia.

O le penina i le fa'ata'oto e le'i fa'asino lea i se meaalofo. Sa fa'atauina mai e le tagata fa'atau'oa i le tau o mea uma sa iā te ia. E to'atele e fesiligia le uiga o lenei mea, auā e fa'asino le Afioga Pa'ia iā Keriso o se meaalofo. O Ia o le meaalofo, a e mo na o i latou o ē tu'u atu ma le ato'atoa i latou uma, le agaga, tino ma le mafaufau iā te Ia e leai se mea e taofia. E tatau ona tu'u atu i tatou iā Keriso, ia ola i se olaga e usita'i ma le loto malie i mea uma o lo'o Ia mana'omia. O tatou ato'atoa, o taleni ma agava'a uma o lo'o iā i tatou, e ā le Atua ia, e fa'apa'iaina mo Lana galuega. O lea la pe a tatou tu'u atu ato'atoa tatou uma iā te Ia, o Keriso, ma 'oa uma o le lagi, o le a Ia tu'u mai o Ia lava iā i tatou. Ua tatou maua loa le penina tau tele.

O le fa'aolataga o se meaalofo e maua fua, a e peita'i o se mea e tatau ona fa'atau mai ma toe fa'atau atu. I le maketi e pulea e le alofa tunoa fa'aleagaga, e fa'asino le penina tāua i se mea e fa'atau fua mai ma e leai se tau. I lenei fale e fa'atau ai 'oloa, e mafai e tagata uma ona maua mai ai 'oloa o le lagi. E matala le fale teu'oa o le 'upu moni mo tagata uma. Sa fetalai le Ali'i, "Fa'auta, ua 'Ou tu'uina atu i ou luma le faitoto'a ua avanoa, e leai fo'i se na te mafai ona punitia" (Fa'aaliga 3:8). E leai se o leoleoina le ala i lea faitoto'a, a e o lo'o fa'alogoina leo mai totonu o le faitoto'a o fa'apea mai, Sau ia. O le si'ufoga o le Fa'aola o lo'o vala'au fa'atauānu mai ma le alofa mutimutivale iā i tatou, "'Ou te fai atu ai iā te 'oe, ia e fa'atau atu iā te A'u le auro ua fa'amamāina i le afi, ina ia e tamāo'aiga ai" (Fa'aaliga 3:18).

O le tala lelei ia Keriso o se fa'amanuiāga e mafai ona maua e tagata uma. E mafai lava e le tagata mativa, fa'apea fo'i ē mau'oa ona fa'atauina le fa'aolataga; auā e lē mafai ona fa'amautūina lea tulaga e so'o se 'oa fa'alelalolagi. E maua mai e ala i le filifili e usiusita'i, e ala fo'i i le tu'uina o i tatou lava iā Keriso e fai ma mo Ia ua Ia fa'atauina. E lē mafai e a'oa'oga, tusa po o le ā le maualuga o le vasega, ona aumai le tagata ia latalata i le Atua. O le 'au Faresaio sa fa'amanuiaina i mea uma fa'alelalolagi ma le fa'aleagaga,

ma ua latou fa'apea mai ai ma se loto mitamitavale, "O i matou e mau'oa, ma ua fa'ateleina a matou mea, matou te lē o mana'omia nisi mea;" a e peita'i latou ua matuā " pagātia, mativa, ma tauaso, ma lē lavalavā" (Fa'aaliga 3:17). Sa ōfo mai e Keriso iā te i latou le penina tau tele; a e ona o le fa'amauualuga na latou lē taliaina, ona Ia fetalai atu ai lea iā te i latou, "E muamua atu telona ma fafine talitane iā te outou i le malō o le Atua" (Mataio 21:31).

E lē mafai e tatou ona faia se mea ia maua ai le fa'aolataga, a e tatau ona tatou sa'ili i ai ma le filigā ma le taumafai malosi ia pei o le a tatou lafoa'i mea uma se'ia maua. Ia tatau iā i tatou ona sa'ili le penina tau tele, a e ia lē sa'ilia i fale'olua fa'alelalolagi po o auala fa'alelalolagi. O le tau e mana'omia e lē o auro po o ario, auā e ā le Atua ia mea. Ia tu'u 'ese manatu o le a e maua le fa'aolataga mai manuia fa'alelalolagi pe fa'aleagaga. O lo'o vala'au mai le Atua mo lou usiusita'i e faia i le loto malie. Ua Ia ōle mai ia e tu'u 'ese āu agasala. O lea ua fa'apea mai ai Ia, "O lē manumalō 'Ou te avatua iā te ia ma te nonofo fa'atasi ma A'u i Lo'u nofoāli'i, e pei o A'u fo'i ona 'Ou manumalō, ua ma nonofo fo'i fa'atasi ma Lo'u Tamā i Lona nofoāli'i" (Fa'aaliga 3:21).

E i ai lava ē foliga mai o lo'o latou sa'ili'ili pea mo le penina fa'alelagi. A e peita'i latou te lē o tu'u 'ese atoa o latou masaniga sesē. E lē o fa'aumatia e latou o latou lava uiga e masani ai ina ia mafai ai ona soifua Keriso i totonu iā i latou, o lea ua ala ai ona latou lē maua le penina tāua. Latou te le'i fa'ato'ilaloina mana'oga lē pa'ia ma lo latou tu'inaanau i mea fa'afiafia fa'alelalolagi. Ua latou lē aveina le satauro ma mulimuli iā Keriso i le ala o le fa'afitia o ia lava, ma tu'uina atu ia fa'ataulaga. O le toeitiiti Kerisiano, a e le'i ato'atoa, e foliga mai ua latou lata atu lava i le malō o le lagi, peita'i e lē mafai ona latou ulufale i ai. O le toeitiiti a e lē o fa'aolaina ato'atoa, o lona uiga, e lē o le toeitiiti a e o le a malaia ato'atoa.

O le fa'ata'oto i le tagata fa'atau'oa o lo'o sa'ili penina lelei e lua a'oa'oga tāua: e fa'atatau e lē na o tagata o lo'o sa'ili le malō o le lagi, a e o Keriso fo'i o lo'o sa'ili'ili Lona tofi ua lē iloa. O Keriso, le tagata fa'atau'oa fa'alelagi o lo'o sa'ili penina lelei, ua Ia silafia i le aigātagata ua lē iloa Lana penina tau tele. Ua Ia silasila i le tagata, ua to'ilalo ma fa'aleagaina e le agasala, e ao ona mafai iā te ia ona togiola. O loto sa 'avea ma laufanua na faia ai le taua ma Satani, ma ua fa'asaoia e ala i le mana o le alofa, e sili atu le tāua i le Fa'aola i lo o i latou o ē le'i pa'ū'ū. E lē i silasila le Atua i luga o le aigātagata, o ē inosia ma e lē tāua; ua Ia silasila i ai e ala iā Keriso, ua silafia le tulaga o le a i ai e ala i le alofa togiola. O lea ua Ia tu'ufa'atasi ai 'oa uma o le atulaulau, ma ua fa'ata'atia atu i le ōfo ina ia fa'atau mai ai le penina. Ma ina ua maua mai e Iesu, sa toe tu'u i Lona Ia lava paleāli'i. "E fai i latou ma ma'a o le paleāli'i; o lo'o si'itia i luga i latou i Lona lau'ele'ele (Sakaria 9:16). "E fai fo'i i latou Ma'u 'olua tāua, ua fetalai mai ai le Ali'i o 'au, i le aso ua 'Ou tofia" (Malaki 3:17).

O Keriso o le penina tāua, ma o lo tatou manuia pe a tatou maua lenei 'oa fa'alelagi, o le autū lea e tatou te mana'omia ia tumau i ai. O le Agaga Pa'ia e fa'aalia i tagata le matuā tāua o le penina lelei. O le taimi o le mana o le Agaga Pa'ia, o le taimi lea e lagona fa'apitoa ia sa'ili ma maua ai le meaalofo fa'alelagi. I ōna pō o Keriso e to'atele na fa'alogi i le tala lelei, a e o latou mafaufau sa fa'apogisāina e a'oa'oga sesē, ma sa latou lē iloa ai le A'oa'o lotomaulalo o Kalilaia, o Ia o Lē na auina mai e le Atua. A e peita'i ina ua mavae le afio a'e o Keriso, o Lona nofoia o Lona malō e fai ma fautua, na fa'aalia e ala i le liligiina mai o le Agaga Pa'ia.

Sa tu'uina mai le Agaga Pa'ia i le aso Penetekoso. Na fa'ailoa e i latou na molimau iā Keriso le mana o le Fa'aola ua toe tū. Na ati le malamalama o le lagi i mafaufau pogisā o i latou o ē ua fa'aseseina e fili o Keriso. O lenei ua latou va'aia o Ia ua fa'aeaina e 'avea "o se Aloali'i ma se Fa'aola, ina ia tu'u iā Isara'elu le salamō moni, ma le fa'amagaloia o agasala" (Galuega 5:31). Sa latou va'aia o Ia ua si'omia e le mamalu o le lagi, ma 'oa e lē mafa'amatalaina o i Ōna 'a'ao e tu'u atu i luga o i latou uma e liliu 'ese mai a latou fouvalega. E fa'apei ona fa'aali mai e le 'au aposetolo le mamalu o le Alo e to'atasi o le Tamā, na liua ai agaga e tolu afe. Sa fa'ailoa ai iā i latou lava lo latou tulaga, e 'ele'elea ma le agasala, ma o Keriso la latou uō ma le Fa'aola. Na si'itia a'e Keriso, ma ua fa'amamaluina, e ala i le mana o le Agaga Pa'ia sa tumau i luga o tagata. E ala i le fa'atuatua, sa va'aia o Ia e nei tagata talitonu, o Lē na tau'ave le fa'alumaina, sa mafatia, ma maluu ai ina ia lē fano se tasi a e ia maua le ola e fa'avavau. O le fa'aaliga o Keriso e ala i le Agaga Pa'ia ua aumaia iā i latou se lagona ua iloa Lona mana ma le mamalu, ma ua latou sisi'i atu iā te Ia i le fa'atuatua o latou lima, ma fa'apea atu, "Ua 'ou talitonu."

Ua 'a'ave tala fiafia e fa'atatau i le Fa'aola ua toe tū a'e, ma ua salalau i tululiga uma o le lalolagi o lo'o ainā. O le ekalesia ua va'aia motu o tagata ua liliu mai itū 'ese'ese uma, ma o ē talitonu ua toe liua mai. Ua 'au fa'atasi tagata agasala ma Kerisiano i le sa'iliga o le penina tau tele. Ua fa'ataunu'uina le valo'aga, O ē vaivai o le a "pei o Tavita," ma le aiga o Tavita "e pei o le agelu a le Ali'i" (Sakaria 12:8). O tagata Kerisiano uma o le a va'aia i lona uso le uiga fa'aleAtua o le agalelei ma le alofa. E tasi le uiga e manumalō; tasi le faiga e tu'u'esea ai uma isi, ua ō gatasi uma loto. E pau le mana'oga o le 'au fa'atuatua o le fa'aali atu o le uiga o Keriso ua amio i ai, ma ia galue mo le fa'ateleina o Lona malō. "Ua tasi lava le loto ma le manatu o ē fa'atuatua uma lava....Ua molitino atu e le 'au aposetolo ma le mana tele i le toe tū mai o le Ali'i o Iesu; ua alofateleina fo'i i latou uma" (Galuega 3:32, 33). "Ua fa'aopoopoina i le ekalesia e le Ali'i i aso fai so'o o ē ua fa'aolaina" (Galuega 2:47). Sa fa'agaoioiina e le Agaga o Keriso le fa'apotopotoga atoa, auā ua latou maua le penina tau tele.

O nei va'aiga o le a toe fa'aalia, ma o le a i ai se mana e tele atu. O le liligi ifo o le Agaga Pa'ia i le aso Penetekoso, o le uāga muamua lea; a e o le uāga mulimuli, o le a telē atu. O lo'o fa'atali pea le Agaga Pa'ia i o tatou mana'oga ma le taliaina. A o le a toe fa'aalia fo'i Keriso i Lona ato'atoa e ala i le mana o le Agaga Pa'ia. O le a iloa manino e tagata le aogā o le penina tāua, ma o le a latou fa'apea atu fa'atasi ma le aposetolo o Paulo, "O mea uma sa aogā iā te a'u, ua 'ou manatu ua lē aogā ia mea ona o Keriso. O lenei fo'i, e moni lava, o lo'u manatu ua lē aogā mea uma lava ona o le silisili 'ese o le poto i la Keriso Iesu lo'u Ali'i" (Filipi 3:7, 8).

O le A'upega

Matā'upu 10

Fa'avae le matā'upu i le Mataio 13:47-50.

O le 'upega "ua lafo i le vai, ua maua ai i'a 'ese'ese uma. Ua tumu ona latou toso a'e lea i le matāfaga, ua nonofo ma fafao i'a lelei i ola, a o i'a leaga ua lafoa'i. E fa'apea fo'i i le gata'aga o le lalolagi; e o atu le 'au agelu e vavae 'ese i ē amio leaga ma ē amiotonu, ona latou lafoina lea ia te i latou i le ogāumu 'a'asa, e i ai le tagiauē ma le lilivau o nifo" (Mataio 13:48-50).

O le lafoina o le upega, o le tala'i atu lea o le tala lelei. E fa'apotopoto mai ai o ē lelei ma ē leaga i le ekalesia.

Pe a fa'ai'uina le fe'au o le tala lelei, o le a fa'ataunu'uina ai loa le galuega a le fa'amasinoga o le tu'u 'ese'eseina. Sa silafia e Keriso o lo'o i ai uso e lē fa'amaoni i le ekalesia ma na latou fa'ai sesēina le 'upu moni ina ia ta'uleagaina ai. Ua 'inosia le 'upu moni e le lalolagi ona o olaga ua lē augatasi o Kerisiano fa'a'foliga. E to'atele fo'i Kerisiano ua mafua ai le tau tūta'ia a o latou va'ai atu i le tele o ē tau'ave le suafa o Keriso a e lē o pulea olaga e Lona Agaga. Ona o nei tagata fai agasala o lo'o i ai pea i totonu o le ekalesia, ua manatu ai nisi o lo'o fa'atagaina a latou agasala e le Atua. O lea ua 'ave'esea ai e Keriso le 'ie pupuni mai le lumana'i ma ua vala'au tagata uma ia va'ai ma iloa atu auā o le amio, a e lē o le tulaga, o le a filifilia le i'uga o le tagata.

O fa'ata'oto ia e lua o le titania ma le 'upega ua a'oa'o manino mai ai e leai se taimi o le a liliu uma ai ē amioleaga i le Atua. O le a ola fa'atasi pea le saito ma titania se'ia o'o i le seleselega. O i'a lelei ma i'a leaga e toso fa'atasi i le pa'umatū mo le tu'u 'ese'eseina mulimuli.

E toe fa'amanatu atu, o nei fa'ata'oto o lo'o a'oa'o mai ai o le a leai se taimi mo se olaga fa'ata'ita'i pe a ua mae'a le fa'amasinoga. Pe a ua fa'ai'uina le galuega o le tala lelei, o le a mulimuli mai loa le tu'u 'ese'eseina o le lelei ma le leaga, ma o le i'uga o vasega ta'itasi e lē toe suia e fa'avavau.

E lē naunau le Atua e fa'aumatia se tagata e to'atasi lava. "O lo'o fetalai mai le Ali'i le Atua, 'Ou te ola A'u, 'Ou te lē fiafia lava i le oti o lē amioleaga, a ia liliu mai lē amio leaga mai lona ala, ma ola ai; liliu ia outou, inā liliu 'ese ia i o outou ala leaga; auā pe se ā ea le mea tou te fia oti ai" (Esekielu 33:11). I le taimi atoa o fa'ata'ita'iga o lo'o tauānau mai pea Lona Agaga ina ia talia e tagata le meaalofo o le ola. E na o i latou o ē te'ena Lana ōlega o le a i'u i le malaia. Ua fetalai mai le Atua e tatau ona fa'aumatia le agasala ona ua fa'aleagaina ai le atulaulau. O i latou uma la e 'u'umau i le agasala o le a fa'aumatia fa'atasi ai.

"O Mea Tuai ma Mea Fou"

Matā'upu 11

O lenei matā'upu e fa'avae i luga o le Mataio 13:52.

A o a'oa'o atu e Keriso le motu o tagata, sa Ia a'oa'o atu fo'i Ōna 'au so'o mo le galuega o le a latou faia i le taimi o i lumana'i. I Āna a'oa'oga uma sa i ai fo'i ma lesona mo i latou. Ina ua mae'a ona tu'uina atu o le fa'ata'oto i le 'upega, na fetalai atu Ia iā te i latou, "Ua outou malamalama i nei mea uma?" O la latou tali mai, "Ioe, le Ali'i e." I se isi fa'ata'oto, sa Ia fa'atū mai i o latou luma lo latou tiute tau'ave e fa'ata'au i 'upu moni na latou maua. Na Ia fa'apea mai, "O lenei, o tusi'upu uma o ē ua a'oa'oina i le malō o le lagi, e tusa i latou ma le matai o le aiga, ua aumai mea fou ma mea tuai mai lona fale'olua" (Mataio 13:52).

O 'olua na maua e le fa'ata'u'oa na te le'i teuina, a e ua aumai ia i ai se so'otaga ma isi. Ma ona sa fa'aaogāina, ua fa'atupu tele ai fo'i le 'oa. Sa i lea matai mea tāua e tuai ma mea fou fo'i. O lea sa a'oa'o atu Keriso e fa'ata'au i le 'upu moni ua tu'u i Ōna so'o e tatau ona fa'asoa atu i le lalolagi. Ma a o tu'u atu le malamalama o le 'upu moni, o le a fa'atuputele ai fo'i le iloa.

O i latou uma e talia le fe'au o le tala lelei i o latou loto, o le a naunau fo'i e tala'i atu. E tatau ona fa'a'ailoa atu le alofa o Keriso na tupu mai le lagi. O i latou ua tau'ave Keriso o le a ta'u atu la'asaga uma i le ta'ita'iga a le Agaga Pa'ia - lo latou fia 'a'ai ma le fia inu i le malamalama o le Atua ma Iesu Keriso sa Ia 'auina mai, le fa'ataunu'uiga o la latou sa'iliga i le Afioga a le Atua, o a latou talosaga, o le mafatiāga o le agaga, ma fetalai e Keriso iā te i latou, "Ua fa'amagaloina āu agasala." E lē o se mea e tusai le tu'u fa'alilo o ni mea fa'apea, ma o i latou o ē ua fa'atumulia i le alofa o Keriso o le a lē faia fo'i fa'apea. Ua faia i latou e le Ali'i o faleteumea mo 'upu moni pa'ia, ma o le a latou fa'anaunau ia maua fo'i e isi nei fa'amanuiāga. Ma a o latou fa'a'ailoa atu 'oa tāua o le alofa tunoa o le Atua, o le a fa'atele atili le alofa tunoa o Keriso e tu'uina i a i latou. O le a iā i latou le loto o le tamaitiiti, e faigofie ma e usita'i ma le ato'atoa. O le a fa'anaunau le agaga mo le fa'apa'iaina, ma o le a sili atu fo'i le tele o 'oa o le 'upu moni ma le alofa tunoa o le a fa'aalia iā i latou e tatau ona tu'u atu i le lalolagi.

O le fale tu'umea tele o le 'upu moni o le Afioga a le Atua lea - o le 'upu ua tusia, o le tusi o mea na foafoaina, ma le tusi e fa'ata'au i mea na faia i le feagai ai o le Atua ma le ola o le tagata. O 'oa ia e tatau ona fa'aaogā e le 'au faigaluega a Keriso. I le sa'iliga mo le 'upu moni, e tatau ona latou fa'alagolago i le Atua, a e lē o le poto fa'aletagata, auā o le poto a tagata tulaga maualuga o le valea lea i le Atua. E ala i Ōna lava ala ua filifilia, e aumai e le Atua se malamalamaga o Ia lava i so'o se tasi e sa'ili.

Pe afai e talitonu le so'o o Keriso i Lana afioga ma faia lea fa'apei ona ta'u mai, o le a leai se poto su'esu'e i le lalolagi o le foafoāga o le a lē mafai e ia ona maua ma malamalama i ai. E leai se mea faigatā, a e o le a maua lava e ia ala e tu'u atu ai le 'upu moni i isi. O tagataa'oga uma i le a'oga a Keriso o le a mafai ona maua mai le poto su'esu'e o le foafoāga le malamalama mai le fale e i ai 'oa. A o tatou manatunatu i le matagofie o le foafoāga, a o tatou su'esu'e ōna lesona i le teuina o le 'ele'ele, i le ola o la'au, i mea ofoofogia uma o i le lalolagi, ma le sami, ma le vā nimonimo, ona o'o lea iā te i tatou se va'aiga fou o le 'upu moni. Ma o mea lilo e feso'ota'i atu i faigā mea a le Atua ma tagata, o le loloto o Lona poto ma Āna fa'amasinoga e pei ona va'aia i olaga o tagata - o nei mea uma e maua i se faleteu'oa e tumu i 'olua.

A e peita'i o lo'o i ai i 'upu ua tusia, o lo'o fa'aali manino ai i le tagata ua pa'ū le malamalama e fa'ata'au i le Atua. O lenei le fale e teu ai 'oa a Keriso e lē tau sa'ilia.

O le Afioga a le Atua e aofia ai le Feagaiga Tuai o le Tusi Pa'ia fa'apea ma le Feagaiga Fou. E lē atoa le tasi pe a leai le isi. Sa fa'a'ailoa mai e Keriso o 'upu moni o le Feagaiga Tuai e matuā tāua lava fa'apei o mea o le Feagaiga Fou. O Keriso o le Fa'aola o tagata i le amataga o le lalolagi, e fa'apea fo'i Ia i ōna pō nei. A e le'i fa'ala'eia Lona itu Atua i le itu fa'aletagata ma afio mai i lo tatou lalolagi, sa tu'uina mai le tala lelei e ala iā Atamu, Setu, Enoka, Metusela, ma Noa. Na tau'aveina le fe'au e Aperamo i

Kanana ma Lota i Sotoma, ma e mai augātupulaga uma sa ta'uina mai e 'avefea'u fa'amaoni e fa'atatau i Lē o le a afio mai. O sauniga o le tausiga i fale o 'oa fa'a-Iutaia sa fa'atūina e Keriso lava ia. O Ia le fa'avae o a latou faigā taulaga ofo, o le itu'aiga o a latou tapua'iga uma fa'aleagaga. O le toto sa fa'amasa'a e fai ma taulaga ofo na fa'asino i le taulaga o le Tama'i Mamoe a le Atua. Na fa'ataunu'uina iā te Ia taulaga ofo uma.

O le fa'atinoina o Keriso i tamā mai anamua, sa tu'u mai i le fa'ailoga o le sauniga o le taulaga, e pei ona fa'aātaina i le tulafono, ma e pei ona fa'aalia mai e ala i perofeta, o 'oa ia o le Feagaiga Tuai. O Keriso i Lona soifuāga, Lona maliu, ma Lona toe tū a'e, o Keriso a o fa'aalitino o Ia e ala i le Agaga, o Ia o le 'oa o le Feagaiga Fou. O lo tatou Fa'aola, o le pupula maoa'e o le mamalu o le Tamā, o Ia o le Feagaiga Tuai ma le Feagaiga Fou.

Sa tatau ona ō atu le 'au aposetolo e molimau fa'atatau i le soifuāga o Keriso, o Lona maliu, ma Lana galuega fa'apuluvaga lea sa valo'ia e perofeta. O Keriso i Lona fa'alumaina, i Lona ato'atoaga ma Lona mamalu, i Lona alofa e lē fa'atusaina, sa tatau ona 'avea ma la latou autū. Ina ia tala'i atu le tala lelei i lona ato'atoa, sa tatau ona latou ta'u atu le Fa'aola fa'apei ona fa'aalia i Lona soifuāga ma Āna a'oa'oga, e pei ona valo'ia mai e perofeta o le Feagaiga Tuai ma e pei ona tu'u mai i fa'ailoga e ala i sauniga o faiga taulaga.

I Āna a'oa'oga sa tu'u mai ai e Keriso 'upu moni tuai na Ia fa'atūina, o 'upu moni sa Ia fetalai ai e ala i tamā anamua (pateriaka) ma perofeta; a e o lea ua Ia tu'u mai nei i o latou luga se malamalamaga fou. Ua matuā foliga 'ese o latou uiga! Ua aumaia se malamalama tele ma le tulaga fa'aleagaga e ala i Āna fa'amatalaga. Sa Ia folafola o le a sulumalamalamaina le 'au so'o e le Agaga Pa'ia, ma o le a fa'amāfolaina pea iā i latou le Afioga a le Atua. O le a mafai e i latou ona tu'u atu ōna 'upu moni i se tulaga matagofie fou.

E talu mai le mua'i folafolaga o le fa'aolataga na tu'u mai i Etena, o lo'o su'esu'eina pea e mafaufau fa'aletagata le soifuāga, o le uiga, ma le galuega fa'apuluvaga a Keriso. A e o mafaufau uma o lo'o ala mai ai le galuega a le Agaga Pa'ia ua aumaia nei matā'upu i se malamalama e fou ma e mamā. O 'upu moni o le fa'aolataga e mafai ona fa'atupu pea ma fa'alauteleina. E ui ina ua tuai, a e fou pea i latou, e fa'aali pea i lē o lo'o sa'ili mo le 'upu moni se mamalu e maualuga atu ma se mana e sili atu le malosi.

I so'o se tupulaga e i ai lava se tupuga fou o le 'upu moni, se fe'au mai le Atua i tagata o lea tupulaga. E mana'omia 'upu moni tuai uma lava; e lē tū sa'oloto le 'upu moni fou mai mea tuai, a e o le fa'amatalaina o ia mea. Se'iloga e malamalama i 'upu moni tuai fa'ato'ā mafai ona tatou manino ato'atoa i mea fou. Ina ua naunau Keriso e fa'ailoa i Ōna so'o le 'upu moni e fa'atatau i Lona toe tū, sa Ia amata mai "i a Mose atoa ma le 'au perofeta uma ma fa'amatala ai lea i Ia iā te i la'ua o mea ua tusia iā te Ia i Tusi uma" (Luka 24:27).

A e peita'i o le malamalama ua fa'asusuluina ina ua fofola mai le 'upu moni lea e fa'amamaluina ai le mea tuai. O lē e tete'e pe lē amana'ia le 'upu moni fou e lē o iā te ia le 'upu moni tuai. Mo ia, o le a ia lē iloa lona mana tāua ma o le a leai se ola.

E i ai i latou o ē ta'u mai e latou te talitonu ma a'oa'o atu 'upu moni o le Feagaiga Tuai, a e latou te tete'e i le Feagaiga Fou. A e peita'i ina ua lē talia a'oa'oga a Keriso, ua latou fa'ailoa atu o i latou e lē talitonu i mea na tautala mai ai tamā anamua ma perofeta. Sa fetalai Keriso, "Ana outou talitonu iā Mose, po ua tou talitonu mai iā te A'u, auā na tusia A'u e ia" (Ioane 5:46). O le mea lea sa leai se malosi i a latou a'oa'oga fo'i o le Feagaiga Tuai.

E fa'apea le to'atele o lo'o fai mai e talitonu ma e a'oa'o atu le tala lelei a e o lo'o i le sesē. Ua latou tu'u 'ese le Feagaiga Tuai o le Afioga a le Atua, o lea sa fetalai atu ai Keriso, "O Tusi fo'i ia o lo'o molimau iā te A'u" (Ioane 5:39). Ina ua te'ena le vaega Tuai, ua latou tete'e fo'i i le vaega Fou; o ia vaega e lua e ō fa'atasi ma o le mea atoa e lē matu'u'esea. E leai se tagata e mafai ona fa'ailoa le tulafono a le Atua e aunoa ma le tala lelei, po o le tala lelei e aunoa ma le tulafono. O le fa'atinoina o le tala lelei o le tulafono lea; ma o le tala lelei o le tatalaina lea o le tulafono. O le tulafono o le ā'a, o le tala lelei o le fugāla'au manogi ma le fua e maua mai.

O le Feagaiga Tuai e fa'amalamalamaina le Feagaiga Fou, ma e fa'apei fo'i o le Feagaiga Fou ona fa'asusulu le malamalama i luga o le Feagaiga Tuai. E fa'aalia e vaega ta'itasi le mamalu o le Atua iā

Keriso. E tu'u mai e ia vaega uma 'upu moni o le a fa'aali ai pea uiga loloto fou i le tagata e sa'ili ma le fa'amaoni.

O 'upu moni e iā Keriso ma e ala iā Keriso e lē mafai ona fuatia. O le tagata e a'oa'o i le Tusi Pa'ia e va'ai i totonu o se puna e fa'aloloto ma fa'alauteleina pea a o ia taupupula i ōna loloto. O le a lē mafai i lenei olaga ona tatou malamalama i le mea lilo o e alofa o le Atua ina ua Ia tu'uina Lona Ālo e fai ma taulaga mo a tatou agasala. O le galuega a lo tatou Fa'aola i lenei lalolagi o le a 'avea pea ma matā'upu o le a toso fa'alauteleina o tatou lotofafau. O le a taumafai pea le tagata e fa'aaogā malosi uma o le mafaufau e tau fuafua ai lenei mea lilo, a e peita'i o lona mafaufau o le a vaivai ma lē gafātia lea. O le tagata e aupito filigā e sa'ili o le a va'aia i ōna luma se sami e lē mafa'agataina ma e leai se apitāgalu.

E mafai ona maua le 'upu moni e pei ona iā Iesu, a e le'i fa'amatalaina lava. O lona maua ma le lautele ma le loloto e lē mafai ona tatou malamalama i ai. Atonu o le a tatou galuea'iina o tatou lotofafau i le mea e gata mai ai, ma tatou va'aia fa'anenefu na o tositosiga o se alofa e lē mafa'amatalaina, e maua ma le lagi, a e peita'i na punou ifo i le lalolagi ina ia lolomiina le fa'atusa o le Atua i le atoa o le aigātagata.

E mafai fo'i e i tatou ona va'ai i mea uma e mafai ona tatou tau'ave o le tigāalofa fa'ale Atua, o lea ua mafola mai i agaga ua salamō ma loto maulalo. Tatou te malamalama i le tigāalofa o le Atua e maua fa'atatau i lo tatou manino i Lana taulaga na faia mo i tatou. A o tatou sa'ili le afioga a le Atua ma le loto maulalo, o le a tatala mai mo la tatou sa'iliga le autū tāua, o le fa'aolataga lea. O le a fa'ateleina le malamalama a o tatou va'ai atu i ai, ma a o tatou naunauta'i e taofimau i ai, o le a fa'ateleina fo'i lona maua ma le loloto.

O lo tatou olaga e tatau ona fusia fa'atasi ma le soifuāga o Keriso; e tatau ona fa'atosina pea tatou mai iā te Ia, ia fa'asoa o Ia, le Areto ola na afio mai le lagi, ia aumaia mai le puna o lo'o tu'u mai pea lava pea ōna 'oloa e tele na'uā. Pe afai e tatou te fa'amuumua pea le Ali'i i o tatou luma, e fa'atagaina o tatou loto ia ō atu ma le vi'iga ma le fa'afetai iā te Ia, o le a maua pea se fa'afouina i o tatou olaga fa'aleagaga. O le a 'avea a tatou talosaga o se talanoāga ma le Atua e pei ona tatou talanoa ma se uō. O le a la fa'ailoa mai Āna mea lilo iā i tatou ta'ito'atasi. O le a tele ni taimi e lagona ai e i tatou le fiafiāga o le fa'atasi mai o Iesu. E i ai taimi o le a lagona le mafanafana i o tatou loto a o Ia fa'alatalata mai e feso'ota'i ma i tatou fa'apei ona Ia faia iā Enoka. Pe afai o lenei tonu le lagona o le a iloa e le Kerisiano, o le a va'aia loa i lona olaga se uiga faigofie, o se loto maulalo, agamalū, ma le agaga e uiga maulalo, e fa'ailoa atu ai i tagata uma e latou te feso'ota'i sa fa'atasi o ia ma Iesu ma ua na iloa o Ia.

E iā i latou o ē ua i ai i le tapua'iga a Keriso, o le a fa'aalia lea e pei o se ta'iala olaola lelei, o se managalua ola fa'aleagaga. O le a fa'atinoina le uiga fou ma le malosi ma le oli'oli o le tulaga talavou e lē mavae. O le loto e maua le Afioga a le Atua e lē pei o le vai e liu'ausa, lē pei o se tānoavai ta'e ua lēiloa uma lana 'oloatāua. A e pei o le ālia i le mauga e fa'atagaina e vaipuna e lē motu, o ōna suavai e malū ma e fa'amalieina ai lē ua vaivai, lē fia inu, ma lē ua mamafa le avega. O lenei fa'agaioiga e tu'u atu ai i a'oa'o o le 'upu moni agava'a e mana'omia e 'avea ai ma sui o Keriso. O le agaga o a'oa'oga a Keriso o le a maua ai se malosi ma le alu agatonu i ōna feso'ota'iga ma āna talosaga. O lana molimau iā Keriso o le a lē vā apiapi ma leai se ola. O le faitapua'iga o le a lē lauga pea lava pea i se matā'upu e tasi, a e o lona mafaufau o le a mātala pea mo le sulufa'amalamalama a le Agaga Pa'ia.

Sa fetalai Keriso, "O lē 'ai i Lo'u tino ma inu i Lo'u toto, ua iā te ia le ola e fa'avavau;... E fa'apei ona soifua o le Tamā ua na 'auina mai A'u, o lo'o ola fo'i A'u i le Tamā; e fa'apea fo'i o lē 'ai iā te A'u, e ola lea iā te A'u... O le agaga lea e tupu ai le ola,... o 'upu 'Ou te fai atu iā te outou, o le agaga ia, o le ola fo'i ia" (Ioane 6:54, 57, 63).

Pe a tatou 'a'ai i le tino o Keriso ma feinu i Lona toto, o le a maua le fa'avae o le ola e fa'avavau i le galuega. O le a lē toe i ai manatu ua fa'aaogā so'o; o lauga e leai se ola ua lē toe faia. Pe a toe tu'u mai 'upu moni tuai o le a va'aia i se malamalama fou. O le va'aiga fou o le 'upu moni e manino ma e malosi, o le a malamalama tagata uma i ai. O i latou o ē ua maua le avanoa e i ai i lalo o se galuega fa'apea, o le a lagona le managalua o le olaga fou pe a faigofie ona 'u'una'i ona o le pulega a le Agaga Pa'ia. O le afimū o le alofa o le Atua o le a fa'amumūina i totonu o i latou, o itūtino e mafai ai ona manino le va'aiga o le a vave ona malamalama i le matagofie ma le mamalu o le 'upu moni.

O le matai fa'amaoni o le aiga e fa'asino lea i le tagata e tataua ona fa'ata'ita'i i ai faia'oga uma a tamaiti ma talavou. Afai e na te faia ma āna 'oa le Afioga a le Atua, o le a ia aumaia pea se matagofie fou ma 'upu moni fou. Pe a fa'alagolago le faia'oga i luga o le Atua ma le tatalo, o le a afio le Agaga o Keriso i ōna luga, ma o le a galue le Atua iā te ia, e ala i le Agaga Pa'ia, i mafaufau o isi. O le a fa'atumulia e le Agaga loto ma mafaufau i le fa'amoemoe ma le lototele ma ata fa'ale-Tusi Pa'ia, ma o nei mea uma o le a fa'a'iloa atu i le talavou o lo'o ia a'oa'o.

O puna o le filemū ma le oli'oli fa'alelagi, ua tu'uina mai le agaga o le faia'oga e ala i 'upu o le Afioga Pa'ia, o le a 'avea ma vaitafe e fa'amanuiaina ai i latou uma o ē so'ofa'atasi ma Ia. O le Tusi Pa'ia o le a lē 'avea ma tusi e tau fa'a'ono'ono i le tamaitiiti a'oga. I lalo o le a'oa'o poto, o le a matuā mana'omia lava Lana Afioga. O le a pei o le areto o le ola, ma o le a lē mafai lava ona fa'apea ua tuai, ua lē toe aogā. O le a fou pea, ma o lona matagofie e fa'atosina mai ma fa'amalie ai tamaiti ma talavou. E fa'apei o le lā e susulu mai i le lalolagi, o lo'o aumaia le malamalama ma le mafanafana, a e lē mafa'avaivaia.

O le Agaga a'oa'o ma e pa'ia o le Atua, o lo'o i Lana Afioga. O le malamalama e fou ma e matuā tāua, o lo'o fa'asusuluina mai ōna laupepa uma. O lo'o fa'aalia mai ai le 'upu moni, ma o 'upu ma fuai'upu e fa'amalamalamaina ma ia tataua mo so'o se tulaga, e pei o le si'ufofoga o le Atua o lo'o fetalai mai i le agaga.

E fiafia le Agaga Pa'ia e talatalanoa ma le 'au talavou, ma ia latou maua ai 'olua matagofie o le Afioga a le Atua. O folafolaga ua tu'u mai e le A'oa'o Sili o le a fa'atosina ai lagona ma fa'gaoi le agaga e le mana fa'aleagaga. O le a tupu a'e i le mafaufau se masaniga lelei ma mea fa'aleAtua o le a puipua ai mai fa'aosoosoga.

O 'upu moni o le a fa'ateleina le tāua, ma le lautele ma le ato'atoa o le uiga lea e le'i iloa muamua. O le matagofie ma le tautele o afioga e i ai se pule fa'aliua i le mafaufau ma le amio. O le a pa'ū i luga o le loto e pei o se una'iga fa'aleagaga le malamalama o le alofa fa'alelagi.

E tupu pea le fiafia i le Afioga a le Atua pe a su'esu'e i ai. So'o se ala e aga'i i ai le tamaitiiti a'oga, o le a ia maua pea le fa'aaliga o le poto e lē mafa'agataina ma le alofa o le Atua.

E lē o atoa le malamalama i le tausiga o le tamā'o'aiga fa'alutaia. O ōna sauniga ma fa'a'iloa ua fa'amalumaluina 'upu moni e tele na'uā ma le loloto; o le tala lelei o le fa'avae lea e tatalaina ōna mea lilo. Ua fa'amatalaina ōna 'upu moni i le malamalamaga, e ala i le iloa o le fuafuāga o le fa'aolataga. E sili atu i mea ua tatou iloa, o la tatou manuia e maua pe a tatou malamalama i nei matā'upu o'foofogia, ma ia tatou manino lelei i mea loloto a le Atua. O lo'o naunautai agelu e vā'ai i mea moni ua fa'aalia i tagata o ē ua salamō o lo'o sa'ili'i le Afioga a le Atua, ma o tatalo mo le poto ia umi ma lautele ma loloto ma maua luga, e na o Ia e mafai ona tu'uina mai.

A o tatou lata atu i le fa'ai'uga o le tala fa'asolopito o lenei lalolagi, ua tataua ona fa'apitoa la tatou su'esu'eina o valo'aga e fa'atatau i aso mulimuli. E mana'omia ia tatou malamalama i 'upu moni o lo'o fa'atumulia ai le tusi mulimuli o le Feagaiga Fou o le Afioga a le Atua. Ua fa'atauasoina mata o le to'atele e Satani, ina ia mafai ai so'o se faitiōga mo le lē su'esu'e i le Tusi o Fa'aaliga. A e peita'i ua fa'a'iloa e Keriso, e ala i Lana 'au'auna o Ioane mea o le a tutupu i aso fa'ai'u, ma ua fai mai o ia, "Amu'ia lē faitau, atoa ma ē fa'alogologo i 'upu o lenei valo'aga, ma tausi i mea ua tusia ai" (Fa'aaliga 1:3).

Ua fetalai mai Keriso, "O le ola e fa'avavau fo'i lenei, ia latou iloa 'Oe le Atua moni e to'atasi, atoa ma Lē ua e 'auina mai, o Iesu Keriso lea" (Ioane 17:3). Aiseā ua tatou lē iloa ai le tāua o lenei malamalamaga? Aiseā e lē o fa'asusuluina mai ai i o tatou loto nei 'upu moni o'foofogia, o lo'o fetetemū i o tatou laugutu, ma fa'atumulia o tatou itutino ato'atoa?

Ina ua tu'u mai iā i tatou Lana afioga, ua tu'u e le Atua iā te i tatou 'upu moni uma e mana'omia mo lo tatou fa'aolataga. E afe ma afe ua tōina a'e vai mai nei vai'eli o le ola, a e lē o fa'aumaina ai le 'olua. E to'atele ua fa'amua le Ali'i i o latou luma, ma ua suia ai i Lona fa'atusa. Pe a latou tautala fa'atatau i Lona uiga, e tumu o latou agaga i le ma'elegā, latou te ta'u atu le uiga o Keriso mo i latou, ma o le ā fo'i lo latou tulaga iā Keriso. O nei tagata o lo'o sa'ili pea nei matā'upu tāua ma le pa'ia, e to'atele fo'i atonu o lo'o latou galulue e sa'ili mea lilo o le fa'aolataga.

A o tumau pea i le su'esu'eina o le soifuāga o Keriso ma le uiga o Lana galuega, o le a fa'asusulu mai 'ave o le malamalama ia matuā manino i taumafaiga uma ina ia maua le 'upu moni. So'o se sa'iliga, o le a fa'aalia ai mea e sili atu le loloto i lo o le taimi muamua na fa'amafola mai ai. O le su'esu'ega i le

fa'aliutinotagataina o Keriso, o Lana taulaga mo le fa'aleleiga ma le galuega fa'apuluvaga, o le a galuea'iina le mafaufau o le tama a'oga to'aga mo se taimi umi; ma a o tepa taula'i i le lagi ma ōna tausaga e lē mafa'agataina, o le a ia fa'apea atu, "Ua matuā silisili 'ese le mea lilo o le amio Atua" (I Timoteo 3:16).

I le gata'aga, o le a tatou iloa ai mea uma manū e mafai ona tatou malamalama i ai pe ana ua tatou maua le uiga e fa'amalamalamaina ai iinei. O matā'upu o le fa'aolataga o le a fa'aaogāina ai loto ma mafaufau ma laulaufaiva o le 'au fa'aolaina mai augātupulaga e o'o i le fa'avavau. O le a latou malamalama i 'upu moni sa naunau Keriso e fa'amatala atu i Ōna so'o, a e peita'i sa latou lē tagolima i ai ona e le'i i ai so latou fa'atuatua. O le a va'aia e fa'avavau fa'avavau lava le ato'atoa ma le mamalu o Keriso. Mo augātupulaga e lē mafa'ai'uina o le a aumaia pea e le Matai fa'amaoni mai Lana 'oa mea fou fa'apea ma mea tuai.

Talosaga Mai e Avatu

Matā'upu 12

Fa'avae lenei matā'upu i luga o le Luka 11:1-13.

Sa maua pea e Keriso fe'au mai le Tamā, ina ia Ia feso'ota'i mai ma i tatou. Ua fetalai o Ia, "O le 'upu tou te fa'alogologo i ai, e lē Sa'u lea, a o le 'upu a le Tamā ua 'auina mai A'u" (Ioane 14:24).

"O le Atali'i o le tagata e le'i sau ia au'auna mai tagata iā te Ia, a ia au'auna atu Ia" (Mataio 20:28). E lē mo Ia lava, a e peita'i e mo isi, sa Ia soifua ma mafaufau ma tatalo mo i latou.

Na Ia malii 'ese mai i taeao uma e fa'atasi ma le Atua, ina ia aumai le malamalama o le lagi i tagata. Sa Ia maua i aso ta'itasi se papatisoga fou o le Agaga Pa'ia. I le taeao pō o le aso fou sa fafaguina le Ali'i mai Lana malōlōga, ma sa fa'au'uina Lona Agaga ma Ōna laufofoga i le alofa tunoa, ina ia mafai e Ia ona tu'u atu i isi. O Āna fetalai sa tu'uina iā te Ia mai maota fa'alelagi, o afioga atonu o le a Ia fetalai ai i se taimi tataui i ē ua vaivai ma sauāina. Na fetalai o Ia, "Ua foa'i mai iā te A'u e le Ali'i le laulaufaiva o ē ua a'oa'oina, ina ia 'Ou iloa ona fa'amafanafana i se 'upu lē ua tigāina; na te fagua A'u i lea taeao ma lea taeao; na te fagua O'u taliga, ina ia 'Ou fa'alogologo e pei o ē ua a'oa'oina" (Isaia 50:4).

Sa matuā maofa so'o o Keriso ona o Āna tatalo ma Lana masani o le feso'ofa'atasi ma le Atua. O se tasi aso sa tō'esea o Ia mai iā i latou, a e sa latou maua o Ia o lo'o fai talosaga ma le fa'atauānau. E foliga Na te le'i silafia lo latou fa'atasi atu, a e sa latou fa'alogoina Lona si'ufofoga a o fa'aauau pea ona tatalo. Ina ua mae'a ona tatalo, ua ō ane Ōna so'o ma fa'apea atu, "Le Ali'i e, ia e a'oa'o mai iā te i matou e tatalo."

O Lana tali, sa fetalai atu ai Ia i le tatalo a le Ali'i, e pei ona Ia tu'u atu i le lauga i luga o le mauga.

I se tasi fa'ata'oto na Ia fa'amanino atu le lesone sa Ia naunau e a'oa'o ai i latou. Ua Ia fa'apea atu, "O ai so outou e ana le uō, e alu atu ia iā te ia i le tulua o pō, ma fai atu iā te ia, 'Sole, se'i aumai ni areto e tolugafua, a e tau'i atu; auā ua sau la'u uō iā te a'u i lana malaga, a e leai ni a'u mea e laulau atu i ai.' E tali mai o ia i totonu o le fale, ua fa'apea mai, "Aua e te fa'asoesā mai iā te a'u; ua uma ona pupuni o le faitoto'a, ua matou ta'o'oto ma la'u fanau; 'ou te lē mafai ona tula'i e avatau ma 'oe.' 'Ou te fai atu iā te outou, 'E ui lava ina lē tula'i o ia, ma avatu iā te ia, ona o ia o lana uō, a e tula'i ma avatu mea uma e mana'o ai o ia, ona o lana fa'atauānau ane" (Luka 11:5-8).

O Keriso e fa'asino i ai lenei tagata 'ai'oi o lo'o talosaga atu ina ia mafai e Ia ona toe foa'i atu. E tataui ona Ia maua le areto ina ne'i lē mafai e Ia ona avatu mea o lo'o mana'omia e le tagata malaga ua tuai mai ma ua vaivai. E ui ina e le'i mana'o lona tuā'oi e fesoasoani, o le a ia lē tu'umuli mai lana ōlega; mulimuli ane ua tauia lana tagi, ma ua fa'amanuiaina ōna mana'oga.

E tataui fo'i i le 'au so'o ona sa'ili fa'amanuiāga mai le Atua. I le fafagaina o le motu o tagata, ma i le lauga fa'atatau i le areto mai le lagi, sa tatalaina atu e Keriso iā te i latou la latou galuega e 'avea ai i latou ma Ōna sui. O i latou e tataui ona tu'uina atu le areto o le ola i tagata. O Lē na filifilia la latou galuega, na Ia silafia o le a tofotofoina lo latou fa'atuatua. O le a tele taimi e tu'uina ai i latou i tulaga e le'i taupulea, ma o le a iloa ai lo latou uiga lēlava fa'aletagata. O agaga ua fia 'a'ai i le areto o le ola o le a ō mai iā i latou, ma o le a lagona fo'i e latou le mativa ma mana'omia le fesoasoani. E tataui iā i latou ona maua mea'ai fa'aleagaga, semanū fo'i o le a leai se mea e mafai ona latou avatu. A e peita'i e lē tataui iā te i latou ona fa'aliliu 'ese se tasi e le'i fafagaina. Sa fa'asino e Keriso i latou i le pogai o mea uma. O le uō a le tagata na alu ane iā te ia mo se fa'amaliega, e tusa po o le ā le itulā o le pō, a e na te lē tuli'esea o ia. Sa leai se mea iā te ia, a e na alu o ia i se tasi o lo'o i ai le mea'ai, ma tu'u i ai lana talosaga, ma aumaia ai e le tuā'oi mea o lo'o ia mana'omia. Mata o le a lē aumaia e le Atua, o Lē na 'auina mai Āna 'au'auna e fafaga i ē o lo'o fia'a'ai, mea e mana'omia mo Lana lava galuega?

A e o le tuā'oi manatu fa'apito i le fa'ata'oto e lē o fa'asinoina lea i le uiga o le Atua. Ua tu'u mai le a'oa'oga, e lē mai le fa'atusatusaina, a e o le fa'ase'esega. O le tagata e manatu fa'apito o le a fa'atau'u le ōlega fai fa'avavevave, ina ia fa'ate'a'ese atu lē o lo'o fa'asoesā i lana malōlōga. A e peita'i e fiafia le

Atua e tu'u atu. O Ia e tumu i le agaalofa, ma o lo'o naunau pea o Ia e tali ōlega a i latou o ē ō mai iā te IA ma le fa'atuatua. Na te tu'u mai iā te i tatou ina ia mafai ona tatou 'au'auna atu ai i isi, ma o le a fa'apei i tatou o Ia.

Ua fetalai Keriso, "Ia outou ōle atu, ona foa'iina mai ai lea iā te outou; ia sa'ili, ona outou maua lea; o lē tu'itu'i, e tōina mai ai iā te ia. "Auā ai se ōle atu, e maua e ia; o lē saili fo'i, e iloa e ia; e tōina fo'i i lē tu'itu'i atu" (Mataio 7:7, 8).

Ua fa'aauau le Fa'aola, "O ai se tagata o outou pe a ole mai lona atali'i i se areto, na te avatu i ai se ma'a? A ōle mai i se i'a, na te avatu i ai se gata? O outou e leaga, afai ua iloa e outou ona avatu o mea lelei ma a outou fanau, e lē sili ea ona foa'iina mai e lo outou Tamā o i le lagi o mea lelei i ē ōle atu iā te Ia?" (Mataio 7:9-11).

Ina ia fa'amalosia lo tatou fa'atuatua i le Atua, ua a'oa'o mai Keriso iā i tatou ia tatou fa'asuafaina o Ia i se suafa fou, se suafa ua milosia ma so'otaga e sili ona pele i le loto fa'aletagata. Ua Ia tu'u mai le avanoa e ta'uina ai le Atua Silisili 'Ese, o lo tatou Tamā. O lenei suafa, e talanoa ai iā te Ia ma e fa'atatau iā te Ia, o le fa'aילוaga o lo tatou alofa ma le fa'atuatua iā te Ia, ma o se ta'utinoga o Lana fa'atatau ma le vā feāloa'i ma i tatou. Pe a tatou ōle atu mo Lana fesoasoani po o fa'amanuiāga, e pei lea o se pese mālīe i Lana fa'afofoga. Ina ne'i tatou lē manatu ua mua'i tapafua e fa'asuafaina o Ia i lea suafa, sa la ta'uta'u mai pea lava lea mea. E naunau o Ia ia tatou masani i lea suafa e fa'amatalaina ai lava Ia.

E fa'atatauina i tatou e le Atua o Lana fanau. Ua Ia fa'asaoina i tatou mai le lalolagi so'onafai ma ua filifilia i tatou e 'avea ma itutino o le aigā tupu, o atali'i ma afafine o le Tupu fa'alelagi. Ua Ia vala'au i tatou ina ia fa'atuatua iā te IA i se fa'atuatua e matuā loloto malosi i lo o le tamaitiiti i lona tamā fa'alelalolagi. E alolofa mātua i a latou fanau, a e peita'i o le alofa o le Atua e tele atu, e lautele, ma loloto atu i lō o se alofa fa'aletagata; e lē mafuatiaina. Pe afai e iloa e mātua fa'alelalolagi ona avatu meaalofo lelei i a latou fanau, o le a lē sili atu ea le tele ona tu'uina atu o le Agaga Pa'ia e lo tatou Tamā i le lagi mo i latou o ē ōle atu iā te Ia?

O a'oa'oga a Keriso e fa'atatau i le tatalo e tatau ona manatunatu i ai ma le fa'aeteete. E i ai i le tatalo le poto maoa'e fa'ale-Atua, ma o Āna fa'amalamalamaga e fa'aילוa mai ai ta'iala e mana'omia e tagata uma ina ia malamalama ai. Ua Ia fa'aalia mai ai le agaga moni o le tatalo, ua Ia a'oa'o mai ai le mana'omia o le fa'apalepale i le tu'uina atu o a tatou ōlega i le Atua, ma ta'utino mai iā i tatou fa'atatau i Lona naunau e fa'afofoga ma tali a tatou tatalo.

E lē tatau ona tatou tatalo mo se ōlega fa'apito na o mo i tatou lava, mo lo tatou lava manuia. Ia tatu ona tatou ōle atu ina ia mafai ai ona tatou toe avatu. Ia 'avea le fa'avae o le soifuāga o Keriso ma ta'iala o tatou fo'i olaga. Na fetalai Keriso fa'atatau i Ōna so'o, "'Ou te fa'apa'ia fo'i A'u e sui a'i i latou, ina ia fa'apa'iaina o i latou i le 'upu moni" (Ioane 17:19). O le alofanaunau e tasi, o le ola tu'u fa'ataulaga, o le tu'u atu lea i lalo o le ta'ita'iga mai le Afioga a le Atua, o lo'o fa'atinoina iā Keriso, ma ia va'aia i Āna 'au'auna. E lē o la tatou galuega e faia mo le lalolagi o le 'au'auna atu po o le fa'amalieina lea o tatou lava ia; e tatau ona tatou fa'amamaluina le Atua e ala i le 'au'aumea fa'atasi ma Ia e lavea'i tagata agasala. Ia tatou tatalo i le Atua mo fa'amanuiāga ina ia mafai ona tatou feso'ota'i atu i isi. E pau le tulaga e mafai ai le taofimau o se mea e talia, ona ua toe tu'u fa'asoa atu. E lē mafai ona tatou maua pea 'oa fa'alelagi a e aunoa ma le fefa'aso'ota'i atu i ē o lo'o si'omia i tatou.

O le fa'ata'oto i lē sa ōle pea lava a e na te'ena, peita'i sa le'i tu'u'esea ai e ia lana fuafuāga. E fa'apea a tatou tatalo ona foliga mai ua leai se tali vave; a e sa a'oa'o Keriso ina ia tatau ona tatou tatalo pea e lē aunoa. O le tatalo e lē o se ala ia maua ai se suiga i le Atua; a e ia tatau ona aumaia i tatou ia ō gatasi ma le Atua. Pe a tatou ōle atu iā te Ia, atonu ua Ia silafia e mana'omia ia taou sa'ili o tatou loto ma ia salamō ona o a tatou agasala. O lea Na te fa'ataga ai ia tatou feagai ma tofotofoga ma iloilogaga. Na te aumaia i tatou ia fa'amaulaloina ina ia mafai ona tatou iloa le mea o lo'o fa'alavelave i le galuea'iina o Lona Agaga Pa'ia iā i tatou.

E i ai tulaga mo le fa'ataunu'uina o folafolaga a le Atua, ma e lē mafai lava e le tatalo ona 'ave'esea le tāua o le galue. Ua fetalai mai Keriso, "Afai tou te alofa mai iā te A'u, ia outou tausī mai i A'u poloa'iga." Ma, "O lē ua iā te ia A'u poloa'iga ma tausī i ai, o ia lea e alofa mai iā te A'u; o lē e alofa mai fo'i iā te A'u, e alofaina o ia e Lo'u Tamā; 'Ou te alofa fo'i iā te ia, ma 'Ou fa'aali iā te ia" (Ioane 14:15, 21). O i latou e aumai a latou talosaga i le Atua, e tapai Āna folafolaga a e latou te lē o tausisi i tulaga na

tu'u mai, ua fa'alēmigao i le Atua. Ua latou aumaia le sua o Keriso e fai ma a latou pule'aga mo le fa'ataunu'uina o le folafolaga, a e peita'i latou te lē faia mea emafai ai ona fa'aalia le fa'atuatua iā Keriso ma le alofa iā te Ia.

E to'atele ē ua to'esea mai le tulaga o le taliaina e le Tamā, a e tatau ona tatou iloilo lelei le uiga o le fa'atuatua e fa'atatau i lo tatou tau fa'alatalata atu i le Atua. Pe afai e lē usita'i i tatou, ua tatou aumaia le pepa aitalafu e le'i totogiina ina ua lē fa'ataunu'uina tulaga e mafai ai ona maua e tatou le totogi. Ua tatou avatu i le Atua Āna folafolaga, ma talosaga ia Na fa'ataunu'uina, auā a Ia lē faia fa'apea o le a Ia lē fa'amamaluina Lona Ia lava sua.

O le folafolaga ua tu'u mai "Afai tou te tumau iā te A'u, a tumau fo'i A'u 'upu iā te outou, o mea uma lava tou te manana'o i ai, tou te ōle atu ai, ona faia lea mo outou" (Ioane 15:7). Ma na toe ta'u mai e Ioane, "O le mea fo'i lea tatou te iloa ai ua tatou iloa o Ia, pe afai tatou te tauti i Āna poloa'iga. O sē fa'apea, 'Ua 'ou iloa o Ia,' a e lē tauti e ia Āna poloa'iga, o le pepelo lava lea, e lē o i totonu iā te ia le 'upu moni. A o lē tauti i Lana Afioga, e moni, ua ato'atoa le alofa i le Atua i totonu iā te ia" (I Ioane 2:3-5).

O le tasi o fa'atonuga mulimuli a Keriso i Ōna so'o sa Ia fa'apea atu ai, "Ia outou fealofani; fa'apei ona 'Ou alofa atu iā te outou, ia fealofani fo'i outou" (Ioane 13:34). E tatau ea ona tatou usita'i i lea poloa'iga, po o lo'o tatou faia pea uiga e ma'ama'ai ma e lē fa'aalia ai Keriso? Pe afai ua tatou fa'amanu'aina pe faia se mea ua fa'amafatia ai isi, o lo tatou tiute tatau o le ta'u atu lea o a tatou sesē ma sa'ili mo se toe fa'aleleiga. O le sauniuniga lena e mana'omia ina ia mafai ona tatou ō atu i luma o le Atua i le fa'atuatua e ōle atu mo Lana fa'amanuiāga.

E i ai se isi mea ua matuā fa'atamala ai so'o ē o lo'o sa'ili atu i le Ali'i i le tatalo. O lo'o e fa'amaoni ea i lou vā ma le Atua? E ala mai le perofeta o Malaki, ua fetalai le Ali'i, "Talu mai aso o outou tamā, ua outou tete'a 'ese ai i A'u tulafono, ma outou le tauti i ai. Fo'i mai ia iā te A'u, ona 'Ou fo'i atu lea iā te outou.... A ua outou fai mai, 'Matou te fo'i atu ma ni ā?' Pe faoa e le tagata mea a le Atua? A o outou, ua outou faoa A'u mea. A ua outou fai mai, 'Ni ā ea Āu mea ua matou faoa?' Ua outou faoa mea e sefulu a'i a outou mea, atoa ma taulaga" (Malaki 3:7, 8).

Ona o Ia Lē aumaia fa'amanuiāga uma, e tatau i le Atua ona tapaina se vaega o a tatou mea totino uma. O lena Lana vaega ina ia fa'aauau pea le tala'iina o le tala lelei. Ma e ala i lena toe fa'afu'i atu i le Atua, o le a tatou fa'aalia ai le loto fa'afetai mo Āna meaalofo. A e peita'i afai tatou te taofia mai iā te Ia lea vaega e ā Ia, o le a fa'apefa ona tatou maua Āna fa'amanuiāga? Pe afai o tatou o 'au'auna tausimea fa'alalalolagi e lē fa'amaoni, e fa'apefa ona tatou manatu o le a Ia tu'u mai iā i tatou le tausiga o mea o le lagi? Atonu o lena le mea lilo o tatalo e lē o taliina. A e o le Ali'i e tele Lona alofa ma ua sauni e fa'amagalo, ua Ia fetalai mai ai, "Inā aumai mea e sefulu a'i a outou mea uma lava i le fale e tu'u ai mea, ina ia i ai mea e 'ai i Lo'u fale; ma ia outou tofotofo mai ai iā te A'u i lena mea,...pe 'Ou te lē tōina pupuni o le lagi mo outou, ma sasa'a atu le manuia mo outou, ina se'ia silisili ona tele. 'Ou te 'ai'oi atu, ona o outou, lē na te 'aina mea; na te lē fa'aumatia le fua o lo outou lau'ele'ele; e fua mai fo'i le vine i o outou fanua....E fa'a'amu'ia fo'i iā te outou e nu'u uma lava; auā e fai outou ma nu'u e mo'omia, ua fetalai mai ai Ieova o 'au" (Malaki 3:10-12).

E fa'apea lava i mea uma o lo'o mana'omia e le Atua. O Āna meaalofo uma ua Na folafola mai, a e mana'omia ia tatou usiusita'i. E ā le Atua se lagi e tumu i fa'amanuiāga mo i latou o ē o le a 'au'aumea fa'atasi ma Ia. O i latou uma e usita'i iā te Ia e mafai ona mautinoa le tapa i le fa'ataunu'uina o Āna folafolaga.

A e ia tatou fa'aali se fa'atuatua i le Atua e mautū ma e lē mafai ona fa'aliliu'esea. E tele taimi e Na te fa'atuai ona tali mai ina ia tofotofoina lo tatou fa'atuatua pe o mautinoa le uiga moni o la tatou fa'anaunauga. Ina ua tatou ōle atu fa'atatau i Lana Afioga, e tatau ona tatou talitonu i Lana folafolaga ma matuā tu'u atu a tatou talosaga ma se naunauta'i o le a lē mafai ona te'ena.

E lē o fetalai le Atua ia ōle tasi atu ona outou maua lea. Ua Ia fa'atonu mai ia tatou ōle atu, ia 'aua ne'i fa'avaivai, a e ia tatalo e lē aunoa. A tūtūmau le fa'atoga atu, o le a aumaia i lē o lo'o fai talosaga se uiga e mautū ma le fa'amaoni, ma o le a fa'ateleina le naunau ia maua mea o lo'o ia ōle atu ai. Fa'apei ona fetalai Keriso iā Mareta i le tu'ugamau o Lasalo, "Afai e te talitonu, ona e iloa lea o le mamalu o le Atua" (Ioane 11:40).

Peita'i, e to'atele ē lē o i ai se fa'atuatua ola, o le ala lea e latou te lē o mafai ai va'aia le mana o le Atua. O lo latou vaivaiga e pogai mai le lē talitonu. E sili atu lo latou talitonu i a latou lava galuega i lo o le galuea'iina o mea e le Atua mo i latou. E latou te fuafua ma faufau, a e fai sina tatalo fa'atauva'a, ma e itiiti lava se fa'atuatua moni i le Atua. Latou te manatu o lo'o tele lo latou fa'atuatua, a e na o se lagona fa'afuase'i mo lea lava taimi. Pe a lē o iloa mea o lo'o latou mana'omia, po o mea e finagalo le Atua e avatu, ona latou lē fa'amalosi lea e tu'u atu pea a latou talosaga i luma o le Ali'i.

O a tatou tatalo e tatau ona fa'amaoni ma ia tumau fa'apei o le talosaga a le uō sa fa'atauānau mo se areto i le vaeluāgapō. A tatou fa'amaoni ma taofimau i le tatou ōlega, o le a tau lata atu ai i tatou i le so'otaga fa'aleagaga ma Keriso. O le a fa'ateleina manuia tatou te maua ona ua fa'ateleina lo tatou fa'atuatua.

O la tatou vaega o le tatalo ma ia talitonu. Ia mataāla ma tatalo; mataāla ma 'au'aumea fa'atasi ma le Atua e fa'afofoga tatalo. Ia manatua "o i tatou e galulue fa'atasi ma le Atua." Ia tautala ma gaoioi ina ia ō gatasi ma a tatou tatalo. O le a iloa ai le 'ese'esega iā te 'oe pe o tofotofoga o le a fa'amaonia ai pe moni lou fa'atuatua, po o le a fa'aalia ai o āu tatalo e na o se fa'afoliga.

Pe a oso a'e fa'afitauli ma feagai 'oe ma faigatā, ia 'aia ne'i e va'ai mo se fesoasoani mai tagata. Ia fa'atuatua i le Atua i mea uma. O la tatou masani e ta'u o tatou faigatā i isi, o le a na o na fa'avaivai ai i tatou ma e lē aumaia se malosi mai iā i latou. O le a tu'u ai i o latou luga le avega o a tatou vaivaiga fa'aleagaga, e lē mafai e i latou ona fa'ate'a'esea. Ua tatou sa'ili le malosi o le tagata e fese'ea'i ma e i'uvale, a e mafai ona tatou maua le mana o le Atua e mautū ma e fa'avavau.

E lē mana'omia e te alu i tulu'iga o le lalolagi mo le poto, auā o lo'o lata mai lava le Atua. E lē o le agava'a o lo'o iā te 'oe i le taimi nei po o se isi lava taimi e te maua ai o le a tu'uina iā te 'oe le manuia, a e o mea e faia e le Ali'i mo 'oe. Tatou te mana'omia ia fa'aitiitia lo tatou talitonu i mea e mafai ona faia e le tagata, a e ia fa'ateleina le fa'atuatua i mea e faia e le Atua mo agaga uma e talitonu. E naunau o Ia ina ia e 'a'apa atu iā te Ia e ala i le fa'atuatua. O Lana fa'anaunauga ia e fa'atali ma le mautinoa mo mea tetele Na te aumaia. E naunau o Ia e tu'u iā te 'oe se malamalama e mea fa'aletino fa'apea ma le fa'aleagaga. Na te mafai ona fa'ama'ai le mafau'fau; e mafai ona avatu le fa'autauta ma le agava'a. Tu'u āu taleni i lau galuega, ia fa'atoga i le Atua mo le tomai, ma o le a Ia aumaia iā te 'oe.

Ia 'ave le afioga a le Atua e fai ma āu ta'utinoga. Na te le'i vala'auina e a 'oe ia sau iā te Ia? Ia 'aia lava ne'i fa'atagaina 'upu fa'amata'u pe fa'avaivai loto e te tautala ai. Pe afai e te faia lea mea, e tele mea o le a to'esea mai iā te 'oe. A e va'ai i mea fa'afoliga ma fa'atu'i'ese ai pe a o'o mai faigatā, ua e tu'uina mai se fa'amaoniga o se fa'atuatua vaivai ma e fa'ama'ia. Ia e tautala ma gaoioi ia fa'apea ai o lou fa'atuatua e lē mafa'ato'ilaloina. E mau'oa le Ali'i, e tele Āna 'oloa; e ā Ia le lalolagi. Ia e tepa a'e i le lagi i le fa'atuatua; tepa taula'i iā te Ia o Lē e i ai le malamalama ma le mana ma le mafa'iga.

E i le fa'atuatua moni se mana fa'aopēga, o ta'iala e matuā tumau, ma se fa'amoemoe e mautū ma e lē mafai ona fa'avaivaiina e le taimi po o le galuea'iina. "E vaivai ma tigāina tama matutua; o taulele'a fo'i e pa'u'u lava i latou. A o ē fa'atalitali i le Ali'i, e toe fa'afouina lo latou malosi; latou te si'i a'e apa'au e pei o aeto; latou te femo'ei, a e lē vaivai; latou te savavali, a e lē tigāina" (Isaia 40:30, 31).

E to'atele lava i latou o ē o lo'o naunau e fesoasoani atu i isi, a e ua manatu e lē o iā i latou se malosi fa'aleagaga po o se malamalama e avatu. Ia fa'ataga i latou e tu'u atu a latou talosaga i luma o le nofoali'i o le alofa tunoa; ma ia ōle atu mo le Agaga Pa'ia. E tūtūmau le Atua e fa'ataunu'u folafolaga uma na Ia tu'u mai. Ma lau Tusi Pa'ia i ōu lima, ia e ta'utino, Ua 'ou faia e fa'apei ona e fetalai; 'ou te tu'u atu Lau folafolaga, "Ia ōle atu ona foa'iina mai ai lea iā te outou; ia outou sa'ili, ona outou maua lea; ia outou tu'itu'i atu, ona tōina mai lea iā te outou" (Luka 11:10).

E lē tatau i a i tatou ona e na o le tatalo i le suafa o Keriso, a e ia fa'apea ma le osofa'iga a le Agaga Pa'ia. O le uiga lenei o le fa'amatalaga ua fa'apea mai ai o le Agaga "e fautua o Ia mo i tatou i le oi e lē mafai ona talatalaina." O lenei itu'aiga tatalo e fialia le Atua e tali. Pe a tatou tatalo i le suafa o Keriso ma le fa'amaoni ma le matuā fa'atauānau atu, e i ai i lea fa'atauānau se ta'utinoga mai le Atua o le a Ia tali la tatou tatalo "e fa'asilisili lava i mea tatou te ōle atu ai ma mafau'fau i ai" (Efeso 3:20).

O Ioane le so'o pele, ina ua osofia e le Agaga Pa'ia, sa tautala o ia ma le matuā manino lava i se ta'utinoga mautū, "O lenei fo'i le fa'amalosi ua tatou maua i Ōna luma, pe afai tatou te ōle atu ai i se mea e tusa ma Lona finagalo, e fa'afofoga mai o Ia iā te i tatou. Afai fo'i ua tatou iloa, e fa'afofoga mai o Ia iā te

i tatou i se mea tatou te fa'atoga atu ai, ua tatou iloa e maua e i tatou mea tatou te te fa'atoga atu ai iā te Ia" (I Ioane 5:14, 15). Ia fa'amamafa lau fa'atoga atu i le Tamā e ala i le suafa o Iesu, auā o le a fa'amamaluina e le Atua lea suafa.

O le nuanua o lo'o si'omia le nofoali'i o se ta'utinoga lea o le Atua e fa'amaoni, e lē mafesuisuia'i o Ia, e lē o se ata fo'i o se liliuga. Ua tatou agasala i Ōna luma, ma ua lē tataua iā i tatou ona maua Lona agaalofa; a e ua Ia tu'u mai i o tatou laugutu lenā ōlega ofoofogia, "'Aua e te 'ino'ino mai iā te i matou, ona o Lou suafa; 'aua e te fa'a'inosia le nofoali'i o Lou mamalu; ia e manatua, 'aua le tatalaina la tatou feagaiga ma 'Oe" (**Jeremia 14:21**). Pe a tatou ō atu iā te Ia e ta'uta'u atu lo tatou tulaga lē aogā ma le agasala, ua la ta'utino mai e Na te fa'afofoga i lo tatou tagi atu. Ua fa'amautū le mamalu o Lona nofoali'i mo le fa'ataunu'uina o Āna afioga iā te i tatou.

E fa'apei o Arona, o le fa'aailoga lea o Keriso, sa tau'aveina e lo tatou Fa'aola igoa o Ōna tagata uma i Lona loto i totonu o le mea pa'ia. O lo tatou Faitaulaga Sili e Na te silafia fetalaiga uma sa Ia fa'amalosia mai ai iā i tatou ina ia fa'atuatua. E teu pea i Lona finagalo Lana feagaiga.

O le a lē faia se faitioga, 'Aua le fa'alavelave mai; ua tapunia le faitoto'a; 'ou te lē mana'o e tatala mai. E lē toe fai mai i se isi, E lē mafai ona 'ou fesoasoani iā te 'oe. O i latou e ōle mai i le vaeluāgapō mo areto se'i fafaga ai agaga ua fia'a'ai, o le a fa'amanuiaina.

I le fa'ata'oto, o lē na ōle mai i ni areto mo le tagata 'ese, o le a maua "mea e tele pei o ia." Ma o le ā se fua o le a aumai e le Atua iā i tatou ina ia mafai ona tatou avatu ai i isi? "E fa'atatau ma le mea foa'ifuaina mai e Keriso" (Efeso 4:7). O agelu o lo'o mata'i mai ma le matuā fia faiā pe fa'apefea le faigā feagaiga a le tagata ma ōna uso ā tagata. Pe a latou va'aia se tasi o fa'atinoina le tigāalofa fa'apei o Keriso mo lē ua sesē, latou te fa'alatalata atu ma fa'amanatu i ai 'upu e tataua ona tautala ai o le a pei o le areto o le ola i lea agaga. O lea, " O Lo'u Atua e fa'a'atoa e Ia iā te outou mea uma,...e tusa ma le faula'i o Lona vi'iga iā Keriso Iesu" (Filipi 4:19). O lau molimau e moni ma fa'amaoni, o le a Ia fa'amalosia i le mana o le ola o lo'o i lumana'i. O le afioga a le Ali'i o le a i ai pea i lou gutu, o le 'upu moni ma le amiotonu.

E tataua ona matuā tatalo fa'atauānau a e tatou te le'i faia ni taumafaiga mo isi, ona e mana'omia ia tele le fa'autauta e malamalama ai i le pota maoa'e mo le lavea'iina o agaga. A e le'i feso'ota'i atu ma tagata, ia so'ofa'atasi ma Keriso. I le nofoali'i o le alofa tunoa fa'alelagi, ia maua se sauniuniga mo le 'au'auna atu i tagata.

Ia fa'atu'ia lou loto ona o le naunau atu i le Atua, mo le Atua o lo'o soifua. Ua fa'aalia mai i le soifuāga o Keriso le mea e mafai ona faia e le aigātagata pe a 'avea ma soa o le uiga fa'a-Atua. O mea uma o lo'o maua e Keriso mai i le Atua e mafai fo'i ona tatou maua. Ia tau ona ōle atu ma talia. Ia pei o le fa'atuatua e le'i vavetua o Iakopo, ma le uiga tūtūmau o Elia e le'i tu'ulafoa'ia, ia e tagolima mo 'oe lava ia mea uma na folafola mai e le Atua.

O matā'upu ofoofogia a le Atua ia fa'aulutino i lou mafaufau. Ia lalagaina lou olaga e ala i so'otaga i le soifuāga o Iesu. O Lē na fa'atonuina le malamalama ia susulu i fafo atu o le pogisā, o lo'o finagalo ia fa'asusulu atu i lou loto, ina ia tu'uina mai ai le malamalama o le iloa o le mamalu o le Atua i fofoga o Iesu Keriso. O le a aumaia e le Agaga Pa'ia mea a le Atua ma fa'aali iā te 'oe, e fa'aailoaina iā i latou o se mana ola i le loto e usiusita'i. O Keriso o le a ta'ita'iina 'oe i le faitoto'a o Lē e soifua e fa'avavau; o le a e va'aia le mamalu o lo'o i tua atu o le 'ie pupuni, ma fa'aailoa ai i tagata le ato'atoa o Ia Lē e soifua pea e fai ma puluvaga mo i tatou.

O Tagata Tapua'i e To'alua

Matā'upu 13

E fa'avae lenei matā'upu i luga o le Luka 18:9-14.

Ua fetalai atu Keriso i lenei fa'ata'oto o le Faresaio ma le telona i "ē na fa'atuatua iā te i latou fa'i ua amiotonu, a e fa'alēaogāina nisi."

Sa alu a'e le Faresaio i le malumalu e tapua'i, e lē ona ua ia lagona o ia se tagata agasala e mana'omia le fa'amagaloina, a e ona ua manatu ia o ia e amiotonu ma e naunau ia maua ni vi'iga. E manatu ia o lana tapua'iga o se mea e faia ia ōnovi'ia ai ia i le Atua. E lē gata i lea o le a tu'u atu ai i tagata ia manatu maua luga ai i lona tulaga tapua'i. O lana tapua'iga na faia ona o lona manatu fa'apito mo ia lava, ona ua naunau ia na faia se mea e fa'amalieina ai le Atua atoa ma tagata.

Ma ua tumu o ia i le faia o ōna lava ia vi'iga; o le va'aiga o ia, o lana savali, ma lana tatalo sa fa'aalia mai ai. Sa fa'a'ese mamao ia mai isi, pei e fa'apea atu, "'Aua ne'i fa'alatalata mai iā te a'u; o a'u e sili atu le pa'ia i lo o 'oe," ua ia tū ma tatalo "iā te ia lava" (**Isaia 65:5**). Sa malie lava ia iā te ia, ua manatu ia e tutusa le silafaga a le Atua ma le fa'atatau a tagata iā te ia.

Ua tatalo ia, "Le Atua e, ou te fa'afetai atu iā te 'Oe, ina ua 'ou lē pei o isi tagata, o ē faomea, o ē amioleaga, o ē mulilua, e lē pei o le lā telona fo'i." Ua ia fa'atatauina lona uiga e lē pei o le uiga pa'ia o le Atua, a e ala i amioga a isi tagata. Ua liliu 'ese lona mafaufau mai le Atua a e fa'asaga i le aigā tagata; o le ala lilo lea o lona loto malie iā te ia lava.

Sa fa'aauau lana faitauina o mea lelei na ia faia: "E lua i le vaiaso ona 'ou anapogi; 'ou te avatu mea e sefulu a'i mea uma 'ou te maua." O le tapua'iga a le Faresaio e le'i pā'ia ai le agaga. Na te lē o sa'ilia se uiga fa'ale-Atua, se loto e tumu i le alofa ma le agalelei. Ua malie lava ia i se tapua'iga e tāua na o le va'ai mai fafo; o lana amiotonu e sau mai iā te ia lava - o le fua o āna ia lava galuega - ma ua fuatia i se tapula'a fa'aletagata.

So'o se tasi e talitonu iā te ia lava ma o ia e amiotonu, o le a manatu fa'atauva'a i isi. E fa'apei ona fuaina e le Faresaio ia lava ia e tusa ai ma i isi tagata, o le a fa'apea ona ia fa'atusatusa o isi tagata e ala iā te ia lava. O lana amiotonu e fa'atatauina i lo latou amiotonu, ma o le tele atu o lo latou leaga o le a foliga mai ai ia ua sili atu lona amiotonu pe a fa'atusatusa i ai. O lona fa'afiaamiotonu ua i'u ai i le tu'ua'iina. "O isi tagata" sa ia ta'usaina o ē ua solia tulafono a le Atua. O lea, ua ia fa'atinoina le agaga o Satani, o lē ua molia le 'au uso. E matuā lē mafai e ia o lo'o i ai lenei agaga ona ulu atu i se so'otaga ma le Atua. Na te alu ifo i lona fale e aunoa ma se fa'amanuiāga fa'ale-Atua.

Sa alu ifo i le malumalu le telona ma isi tagata tapua'i, a e ua tō'ese mai ia ona ua manatu e lē aogā ia e so'ofa'atasi ma isi i a latou tapua'iga. Ua tū mamao o ia, na ia "lē mafai ona tepa a'e ōna mata i le lagi, a ua pōpō lona fatafata," i le loto mafatia ma le 'ino'ino iā te ia lava. Ua ia lagona ua solitulafono i le Atua, ma o ia se tagata agasala ma le 'ele'elea. Na te le'i manatu e maua se tigāalofa mai ē o lo'o si'omia o ia, ona ua latou va'ai mai iā te ia ma le 'ino'ino. Sa ia iloa e leai sona uiga tataua ia ta'uleleia ai ia i le Atua, ma ua ia tagi atu ma le matuā fa'anoanoa lava, "Le Atua e, ia e alofa mai iā te a'u le tagata agasala." Na te le'i fa'atusatusa atu ia i nisi. Ona ua fa'atumulia lona loto i le lagona o le agasala, sa ia tū e fa'apei ua na o ia lava i luma o le Atua.

E na o lona fa'anaunau ia fa'amagaloina ma ia maua le filemū, o lana ōlega e mo le alofa tunoa o le Atua. Ma sa fa'amanuiaina o ia. Sa fetalai Keriso, "Na alu ifo lenā tagata i lona fale ua ta'uamiotonuina, a e le'i fa'apea le isi."

O le Faresaio ma le telona e fa'asino lea i vasega tetele e lua e vavaeina ai i latou e ō mai e tapua'i i le Atua. O a latou sui e lua muamua e maua lea i tamaiti e to'alua muamua na fananau mai i le lalolagi. Na manatu Kaino o ia lava e amiotonu, ma na aumaia e ia i le Atua e na o se taulaga fa'afetai. Na te le'i ta'uta'u atu ni agasala, ma fa'a'iloa atu ai e lē mana'omia le alofa tunoa. A e peita'i na sau Apelu ma le toto e fa'asino lea i le Tama'i Mamoe a le Atua. Sa sau ia o se tagata agasala, ua ta'uta'u atu o ia ua lēiloa; e pau lona fa'amoemoe o le alofa e lē fa'atatauina o le Atua. Sa fa'aaloaloga e le Ali'i lana taulaga, a e ia

Kaino ma lana taulaga e le'i i ai iā te Ia se fa'aaloaloga. O le mana'omia o le fesoasoani, o le iloa o lo tatou mativa ma le agasala, o le tulaga muamua lea o le taliaina ma le Atua. "Amuia ē loto maulalo, auā e ō latou le malō o le lagi" (Mataio 5:3).

Mo vasega ta'itasi o lo'o fa'asino mai e ala i le Faresaio ma le telona o lo'o i ai se a'oa'oga i le tala fa'asolopito o le aposetolo o Peteru. I le taimi fa'ato'ā avea Peteru ma sso'o, sa ia manatu o ia lava e malosi. A e fa'apei o le Faresaio, i lana lava ia fa'atatau o ia "e lē pei o isi tagata." Ina ua lapata'i Keriso i Ōna so'o i le afiafi a e le'i o'o i Lona fa'alataina, "Tou te tausuai uma ona o A'u i lenei pō,...," a ua fai mai Peteru ma le lotomau, "E ui lava ina tausuai tagata uma, 'ou te lē fa'apea lava a'u" (Mareko 14:27, 29). Sa lē iloa e Peteru lona ia lava faigatā; ona o le fa'atuatuamau sa iā te ia lava ia, na ta'ita'i 'esea ai lava ia. Ua manatu o le a mafai e ia lava ia ona tete'e i fa'aosoosoga; a e peita'i i ni nai itulā itiiti na o'o mai ai loa tofotofoga, na ia fa'afitia lona Ali'i i fetu'u ma 'upuvale.

Ina ua vivini le moa ma ua manatua ai e Peteru fetalai a Keriso, sa fa'ate'ia o ia ona o lana mea ua fai, ua liliu ma va'aipulato'a i lona Matai. I lea lava taimi, na silasila ifo Keriso iā Peteru, ma i ia fofoga fa'anoanoa o lo'o fefiloi ai le alofa mutimutivale ma le tigāalofa mo ia, na malamalama ai loa Peteru iā te ia lava. Na alu ia i fafo ma ua tagi lotulotu lava. Sa matuā tigā lona loto i lea va'aiga i fofoga o Keriso. Ua o'o nei Peteru i le tulaga e liliu'ese ai, ma ua matuā salamō ona o lana agasala. Sa pei ia o le telona i lona loto salamō ma le mafatia, ma e fa'apei o le telona, sa ia maua le alofa tunoa. Sa ia va'aia i fofoga o Keriso le mautinoāga o le fa'amagaloina. Ua tu'u 'ese nei le fa'atuatuamau iā te ia lava; o le a lē toe faia pea ta'utinoga tauvi'ivi'i.

E fa'atolu ona tofotofoina Peteru e Keriso ina ua uma Lona toe tū a'e. Sa Ia fetalai atu, "Simona e, le atali'i o Iona, pe sili mai lou alofa iā te A'u, i o latou nei?" Ua lē o toe fa'aeaina nei e Peteru o ia i luga a'e o ōna uso. Na ia tagi atu i Lē e mafai ona faitauina lona loto. "Le Ali'i e, ua e silafia mea uma lava; ua e silafia 'ou te alofa lava iā te 'Oe" (Ioane 21:15, 17).

Ona maua lea e ia o lana galuega ua fa'atonuina; o se galuega e lautele atu ma e sili le mu'amu'a i lo o le mea na galue ai, o lea ua filifilia mo ia. Sa poloa'i Keriso iā te ia ia fafaga mamoe ma tama'i mamoe. Ina ua avatu i lana tausiga agaga o ē na tu'uina atu ai e le Fa'aola Lona lava soifua, o lea le fa'amaoniga na tu'u e Keriso iā Peteru i lona toe fa'afouga. O lenei so'o sa lē to'afilemū, mitamitavale, fiavi'ia a ua gaua'i atu ma le loto salamō. Mai lenei lava taimi ua ia mulimuli i Lona Ali'i ma ua te'ena lona uiga fa'apito a e ua ofo atu ia fai o ia fa'ataulaga. Na fai ma soa fa'atasi ma Keriso i Ōna mafatiāga. Pe a nofoia e Keriso le nofoāli'i o Lona mamalu, o le a fa'asoa ai Peteru i Lona mamalu.

O le leaga na i'u ai i le pa'ū o Peteru ma na tapunia ai i fafo le Faresaio mai le so'otaga ma le Atua, o lo'o mafua ai le to'ilalo o le to'atele i nei ōna pō. E leai se mea e sili atu le leaga i le Atua po o le matuā faigatā lava i le agaga o le tagata e pei o le mitamitavale ma le lē mana'omia o se tasi a e fa'alagolago iā 'oe lava ia. O lenei le agasala e sili ona leai o se fa'amoemoe ma e lē mafai ona togafitia.

E le'i pa'ū fa'afuase'i Peteru a e na fa'asolosolo mālīe. O le fa'atuatuamau iā te ia lava na ta'ita'ina ai ia i le talitonuga o ia ua fa'asaoina, ma na la'ala'a lemū ai i le ala aga'i i lalō, se'ia o'o ina ua mafai ai e ia ona fa'afitia lona Matai. Ia 'aua lava ne'i mafai ona tatou fa'alagolago iā i tatou lava pe manatu ua saogalemū i tatou mai fa'aosoosoga. O i latou o ē ua talia le Fa'aola, e tusa pe o le ā le mautinoa ua liua ato'atoa, e lē tatau ona a'oa'oina i latou e tautala pe manatu o latou ua fa'aolaina. E sesē lea ta'ita'iga. E tatau ona a'oa'oina tagata uma ta'ito'atasi ia tu'uloto fa'amoemoega ma le fa'atuatua; a e peita'i e ui lava ina ua tatou tu'u atu tatou iā Keriso ma iloa e Na te talia i tatou, e lē o mamao pea tatou mai le 'a'apa a fa'aosoosoga. Ua fetalai le Atua i Lana afioga, "E to'atele e fa'amamāina, ma fa'asinasinaina, ma tofotofoina" (Tanielu 12:10). E na o "lē onosa'i i tofotofoga, e maua e ia le pale o le ola" (Iakopo 1:12).

O i latou o ē ua talia Keriso ma ua fa'apea mai i lo latou mua'i fa'atuatua, 'O a'u ua fa'asaoina,' o le a i se tulaga faigatā ona ua fa'atuatua lava ia iā te ia. O le a lē iloa lo latou vaivaiga ma le mana'omia pea o le malosi fa'aleAtua. E latou te lē o sauni mo togafiti a Satani, ma pe a i lalo o fa'aosoosoga, e to'atele o le a fa'apei o Peteru ona pa'ū i le maulalo o le agasala. Ua fautua mai i tatou, "O lē manatu o lo'o tū ia, inā fa'aeteete ia ne'i pa'ū" (I Korintio 10:12). E pau lo tatou saogalemū o le lē fa'atuatua lea iā te 'oe lava ia, a e fa'alagolago pea iā Keriso.

Sa mana'omia e Peteru ona iloa o ōna ia lava uiga lē ato'atoa, ma lona mana'omia o le mana ma le alofa tunoa o Keriso. E le'i mafai e le Ali'i ona fa'asao ia mai tofotofoga, a e Na te mafai ona fa'asaoina ia

mai le fa'ato'ilaloina. Pe ana loto Peteru e maua le lapata'iga a Keriso, semanū ua mataāla pea ia ma tatalo. Semanū ua savali o ia ma le fefe ma le tetemū ina ne'i to'ia ōna vae. Ma e manū o le a ia maua le fesoasoani fa'ale-Atua ona lē maua ai lea e Satani le manumalō.

Sa pa'ū Peteru i lona lē mana'omia o le fesoasoani a e ua fa'atuatua iā te ia lava; ma na toe fa'atūina i ōna lava vae e ala i le salamō ma le loto fa'amaulalo. Mai tala'aga o lona olaga e tatau ona maua ai se fa'amalosi'aga mo tagata agasala uma ua salamō. E ui ina matuā agasala lava Peteru, e le'i tu'ulafoa'iina lava ia. Sa tusia fetalaiag a Keriso i lona agaga, "A ua 'Ou fa'atoga mo 'oe, ina ne'i mavae lou fa'atuatua" (Luka 22:32). I lona mafatiāga ina ua salamō, o lenei tatalo ma lana manatuaina o fofoga alofa mutimutivale ma le tigāalofa o Keriso, sa ia maua ai se fa'amoemoe. Sa manatua Peteru e Keriso ina ua uma Lona toe tū a'e, ma ua tu'u i le agelu le fe'au mo fafine, "A ia outou ō atu, inā ta'u atu i Ōna so'o atoa ma Peteru, e muamua atu o Ia iā te outou i Kalilaia, tou te iloa ai o Ia i lea mea" (Mareko 16:7). O le salamō a Peteru sa taliaina e le Fa'aola fa'amagalo agasala.

O le agaalofo lava lea e tasi na 'a'apa atu e fa'asao mai Peteru o lo'o ōfo atu i agaga uma ua pa'ū'ū i lalo o tofotofoga. O le togafiti fa'apitoa a Satani o le a ta'ita'i ai le tagata i le agasala, ona tu'ulafoa'i lea o ia, ua limavaivai ma leai se fesoasoani, ma ua fefe e sa'ili se fa'amagaloga. A e aiseā o le a tatou fefefe ai, ina ua fetalai mai le Atua, "Se'i tago o ia i Lo'u malosi, ia mā lelei ma ia, e lelei fo'i o ia ma A'u" (Isaia 27:5). Ua lavasauni mea uma mo o tatou vaivaiga, o fa'amalosi'aga uma ua ōfoina mo i tatou ia ō mai iā Keriso.

Ua ōfo a'e e Keriso Lona tino mafatia e toe fa'atau mai ai le tofi a le Atua, ia toe tu'u i le tagata se tasi iloilogia. "O le mea fo'i lea e mafai ai iā te Ia ona fa'aola pea lava i ē fa'alatalata atu i le Atua ona o Ia, auā o lo'o soifua pea Ia e fautua mo i latou" (Eperu 7:25). E ala i Lona soifuāga e lē ponā, Lona usiusita'i, o Lona maliu i luga o le satauro o Kalevario, ua 'avea Keriso ma puluvaga mo le aigātagata ua lē iloa. Ma o nei, e lē na o le 'avea le Ta'ita'i o lo tatou fa'aolataga e fai ma puluvaga mo i tatou, a e pei o se Ta'ita'i'au o lo'o taliaina Lona manumalō. Ua 'ato'atoa Lana taulaga ōfo, ma ona o Ia o lo tatou Puluvauga ua Ia amataina Lana galuega na filifilia lava e Ia, o lo'o Ia tau'a'aoina le ipu fa'amū meamanogi i luma o le Atua, e i ai Ōna ia lava uigalelei e lē ponā ma talosaga, o ta'utinoga o agasala, ma fa'afetaia'iga a Ōna tagata. Ua fa'amanogiina e le sasalamanogi o Lona amiotonu, ua alu a'e i le Atua o se manogi lelei. Ua matuā talia ato'atoa le taulaga, ma o le fa'amagaloga ua ufitiaina solitulafono uma.

Ua tautōina e Keriso Ia lava e fai ma o tatou sui ma mautinōga, ma e Na te lē tu'ulafoa'ia se tasi. O Ia lava e lē mafai ona silasila ifo i le fanau a tagata ua tu'u atu ia malaia e fa'avavau, a e lē o fofola mai Lona Agaga se'i o'o i le oti mo i latou, ma o lo'o silasila ifo ma le alofa mutimutivale ma le tigāalofa i nei agaga uma ua iloa e lē mafai ona fa'asaoina o ia e ia lava. O le a Ia lē silasila ifo i lē o lo'o fai talosaga a e o le a lē si'i a'e ia i luga. O Ia lē na tu'u mai mo le tagata, e ala i Lona lava fa'aleleiga, se fa'aputuga e lē mafa'agataina o le mana fa'aleagaga e iloa ai le lelei ma le leaga, o le a fa'aaogāina e Ia lenei mana mo lo tatou lelei. E mafai ona tatou tu'u a tatou agasala ma fa'anoanoāga i Ōna 'a'ao; auā e alofa o Ia iā te i tatou. O Ōna fofoga ma fetalaiaga uma e fa'atupu ai lo tatou fa'atuatuamau. O le a Ia fuaitinoina ma fausia a tatou amioga fa'atatau i Lona lava finagalo.

O le 'au fa'aSatani atoa e lē lava se malosi e fa'ato'ilaloina ai se agaga e tasi o lo'o fa'atuatua e tu'uina o ia iā Keriso. "Na te avatua le malosi i ē ua vaivai; a o ē ua leai se malosi, Na te fa'atuputele i ai le malosi" (Isaia 40:29).

Ma "A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava" (I Ioane 1:9). Ua fetalai mai le Ali'i, "Tau ina e iloa lau agasala ua e fouvale ai i le Ali'i lou Atua" (Jeremia 3:13). Ua toe fa'apea mai, "Ona 'Ou sausuina lea o outou i le vai manino, ona mamā ai lea o outou; 'Ou te fa'amamāina fo'i outou i lo outou leaga uma, ma a outou tupua uma" (Esekielu 36:25).

A e peita'i, ia tatau ona iā i tatou se malamalama o tatou ia, se malamalama e i'u ai i le loto salamō, ona fa'ato'ā tatou maua lea o le fa'amagaloga ma le filemū. E le'i lagona e le Faresaio lona uiga agasala; e le'i e le Agaga Pa'ia ona galue ma ia. Sa ufitia atoa lona agaga e le ofutau o le fa'afiaamiotonu e le'i mafai e 'a'u a le Atua na tafanaina mai e lima o agelu ona atia. E na o lē e iloa o ia o le tagata agasala e mafai e Keriso ona fa'asaoina. Na afio mai o Ia "E fa'amalōlō i ē loto momomo, e tala'i le sa'olotoga i le tafeāga, ma ia pupula mata o ē tauaso, e tu'u sa'oloto i ē ua fa'asauāina" (Luka 4:18). A e o "ē malōlō e lē

aogā i ai le foma'i" (Luka 5:31). E tatau ona tatou iloa lo tatou tulaga moni, a leai o le a tatou lē lagonaina e tatou te mana'omia le fesoasoani a Keriso. E tatau ona tatou malamalama i le faigatā ua tatou i ai, ina ne'i tatou lē sosola i le lafitaga malu. E tatau ona tatou lagona le tigā o a tatou manu'a, ne'i tatou lē fa'anaunau i se fa'amalōlōga.

Ua fetalai le Ali'i, "Auā ua e fai mai, 'Ou te se mau'oa, ua fa'atamao'aigaina a'u, 'ou te lē mativa fo'i i se mea e tasi; a ua e lē iloa o 'oe o le malaia, ma le pagātia, ma le mativa, ma le tauaso, ma le lē lavalava; 'ou te fai atu ai iā te 'oe, ia e fa'atau atu iā te a'u le auro ua fa'amamāina i le afi, ina ia e tamao'aiga ai; ma ofu sisina ina ia e ofu ai, ina ne'i iloa le mā o lou lē lavalavā; ma le vaimata e nini a'i ōu mata, ina ia e pupula ai" (Fa'aaliga 3:17, 18). O le auro sa fa'amamāina i le afi o le fa'atuatua lea e ola lelei e ala i le alofa. E na o lenei e mafai ai ona aumaia i tatou ia ō gatasi ma le Atua. Atonu e tatou te ma'elegā, atonu e tele a tatou galuega e fai; a e a leai se alofa, o le alofa lea e pei ona mau i le finagalo o Keriso, o le a lē mafai lava ona faitaulia i tatou ma le aiga i le lagi.

E leai se tagata e mafai e ia lava ia ona malamalama i āna mea sesē. "E sili le fa'a'ole'ole o le loto i mea uma, ma ua matuā leaga lava; po o ai na te mafaia ona iloa?" (Ieremia 17:9). Atonu o le a ta'u mai e laugutu se mea o mativa ai le agaga e lē o fa'ailoa mai e le loto. A o talanoa atu i le Atua fa'atatau i le tulaga mativa o le agaga, a e o le loto atonu o lo'o fa'afefeteina i le va'ai fa'amaualuga i lona lava loto maulalo ma le amiotonu ua fa'aeaina. E na o le tasi le ala e mafai ai ona maua se malamalamaga moni o 'oe lava ia; ia tatau ona tatou iloa Keriso. O le lē iloa o Ia o le a si'itia a'e ai lava e le tagata lona lava fa'afiaamiotonu. Pe a tatou tu'uloto Lona uiga mamā ma le silisili 'ese, tatou te va'aia ai lo tatou vaivaiga ma le tulaga mativa ma le fa'alē'atoa o lo'o tatou i ai. Tatou te va'aia i tatou ua lēiloa ma leai se fa'amoemoe, o lo'o fa'alavalava i ofu o lo tatou fa'afiaamiotonu, e pei o isi uma tagata agasala. O le a tatou iloa pe afai e fa'asaoina i tatou, o le a lē mai so tatou lava lelei, a e ona o le alofa tunoa e lē mafa'agataina o le Atua.

Sa fa'alogoina le tatalo a le telona ona sa fa'aalia se fa'alagolago e 'a'apa atu ia u'umau i Lē Silisili 'Ese. I le telona lava ia, o ia e lē aogā a e na o le tumu i le masiasi. E fa'apea fo'i i tagata uma o lo'o sa'ili le Atua. E ala i le fa'atuatua - fa'atuatua e tu'u'esea ai uiga fa'apito uma e talitonu ai e na o 'oe lava - o lē ōle atu ma mana'oga o le a tapa i le mana e lē gata.

E leai se va'aiga mai fafo e mafai ona fesuia'iina le fa'atuatua fa'atauva'a ma le tu'u 'ese ato'atoa o le tagata lava ia. A e lē mafai e se tagata ona fa'agaogaoina ia e ia lava. E tatau ona tatou fa'atagaina Keriso e fa'ataunu'u lea galuega. O le a fa'apea le agaga, Ali'i e, ia e 'ave ma lo'u loto; e lē mafai ona 'ou tu'ua atu, auā e pule ai 'Oe. Tau ina ia mamā pea, ona e lē mafai e a'u ona tausia lea mo 'Oe. Ia e fa'asao mai a'u, e ui lava o a'u e vaivai ma o o'u uiga e lē fa'apei o Keriso. Ia e fa'atinoina a'u, fausia a'u, tausii a'u i lo'u tupu a'e i se si'omaga e mamā ma pa'ia, e tumu i Lou alofa e mafai ona tafe malū atu e ala mai lo'u agaga.

Ia lē na o le amataga o le olaga fa'a-Kerisiano e tu'u'esea ai le manatu fa'apito mo le tagata lava ia; ia fa'afouina i so'o se la'asaga a o aga'i atu i le lagi. O a tatou galuega lelei uma ia fa'alagolago i se malosii mai fafo atu o tatou lava ia. O lea e tatau ona tu'u pea i taimi uma le loto i le Atua, ia faifai pea ma le fa'amaoni le ta'uta'u atu ma le tauānau o agasala atoa ma le fa'amaulaloina o le agaga i Ōna luma. E pau lea o le mea o le a mafai ai ona tatou savavali ma le saogalemū pe a tu'u'ese le fa'apito iā 'oe lava ia, a e fa'alagolago ma le ato'atoa iā Keriso.

O le latalata o la tatou ō mai iā Iesu ma le sili atu o le manino o la tatou malamalama i le ato'atoa o Lona uiga, o le a sili atu fo'i lea ona manino lo tatou iloa le matuā leaga lava o le agasala ma o le a tatou lē lagonaina le fia fa'aeaina o tatou lava ia. O i latou o ē ua fa'ailoa mai e le lagi lo latou tulaga pa'ia latou te lē fa'aaliaia mai so latou lava lelei. O le aposetolo o Peteru sa 'avea ma se 'au'auna fa'amaoni a Keriso ma sa fa'aaloaloga o ia i se malamalama fa'ale-Atua ma le mana; sa i ai sona vaega tāua i le atina'eina o le ekalesia a Keriso; peita'i e le'i galo iā Peteru le mea mata'utia na tupu o lona fa'alumaina; sa fa'amagaloina lana agasala; a e sa iloa lelei e ia e na o le alofa tunoa o Keriso e mafai ona manuia ai e ui i lona uiga vaivai na mafua ai ona pa'ū. Na te le'i maua iā te ia lava se mea e tatau ona mitamita ai.

E leai se aposetolo po o se perofeta na ta'u mai o latou e leai se agasala. O tagata na ola latalata i le Atua, o tagata na sauni e tu'u atu o latou ola ona e sili atu i lo o le faia o se mea e lē tonu, o tagata ua fa'aaloaloina e le Atua i le malamalama fa'alelagi ma le mana, ua latou ta'uta'u atu le matuā leaga o latou

uiga moni. Latou te lē fa'atuatuaaina mea fa'aletino, lē fa'ailoa mai so latou lava amiotonu, a e latou te talitonu ato'atoa i le amiotonu a Keriso. E fa'apea i latou uma e iloa Keriso.

I so'o se la'asaga o le ola fa'a-Kerisiano o le a fa'aalu loloto la tatou tulaga salamō. Ua fetalai mai o Ia iā i latou o ē ua fa'amagaloina, iā i latou ua Ia fa'ailoa mai o Ōna tagata, "Ona outou manatunatu ai lea i o outou lava ala leaga ma mea sa outou faia e lē o i ai se lelei, tou te 'ino'ino ai lava outou iā te outou" (Esekielu 36:31). Ma na toe fetalai fo'i, "'Ou te fa'atumauiina fo'i la ta feagaiga ma 'oe; e te iloa ai o A'u lava o le Ali'i; ina ia e manatunatu, ma ia e mā, ma ia lē toe tautala lava ona o lou masiasi, pe a 'Ou fa'amagalo atu iā te 'oe i mea uma ua e faia, o lo'o fetalai mai ai le Ali'i le Atua" (Esekielu 16:62, 63). O le a tatou lē tautala i 'upu e fa'avi'ia ai lava tatou ia. Tatou te iloa o lo tatou manuia e tumu ma totoo e na o Keriso e maua ai. O le a tatou ta'utino atu e pei o le aposetolo, "Auā ua 'ou iloa e leai se mea lelei ua nofo i totonu iā te a'u, o lo'u tino lea; auā ua iā te a'u le loto atu, a 'ou te le'i iloa ona fai o le mea lelei" (Roma 7:18). Ma "A o a'u, 'aia ne'i 'ou mitamita i se mea, tau lava o le satauro o lo tatou Ali'i o Iesu Keriso, o Ia ua fa'asatauroina ai le lalolagi iā te a'u, o a'u fo'i i le lalolagi" (Kalatia 6:14).

E fa'apea ona talafeagai ma leni a'oa'iga, "Auā o le Atua, o Ia lē galue i totonu iā te outou i Lona finagalo alofa, ina ia outou loto ma galulue i ai" (Filipi 2:13). E lē finagalo le Atua e fa'amata'uina 'oe ona ua Ia lē fa'ataunu'u Āna folafolaga, ina ne'i fa'aititia Lona onosa'i, pe o le a lē lava Lona tigāalofa. O le a fefe ina ne'i lē gaua'i atu lou loto i le finagalo o Keriso, ne'i pulea lou olaga e amioga a'oa'oina ma mea fa'asolo mai augātupulaga. "O le Atua, o Ia Lē galue i totonu iā te outou i Lona finagalo alofa, ina ia outou loto ma galulue i ai." O le a fefe ne'i tū mai 'oe lava e fa'apito i le vā o lou agaga ma le Matai o le galuega. O le a mata'u ne'i fa'aleagaina e lou lava loto malosi le fuafuāga maoa'e e naunau le Atua ia fa'ataunu'u e ala mai iā te 'oe. O le a e fefe e fa'atuatuaaina lou lava malosi, fefe e tō'ese lou lima mai le 'a'ao o Keriso ma taumafai e savali i le ala o le olaga a e lē o fa'atasi ai o Ia.

E tatau ona tatou sola 'ese mai mea e tau fa'amalosia mai ai uiga mitamitavale ma lē mana'omia ai se fesoasoani a se tasi; o lea ia tatou fa'aeteete e tu'u atu pe taliaina o vi'iga ma fa'ane'ene'ega. O le galuega lea a Satani o le taufa'ase'e! O āna fegaoiōiā'iga e i ai le tau fa'ase'e fa'apea ma le fetu'ua'iina ma le fa'amalaiaina. O lea ua ia sa'ili ia fa'aumatia le agaga. O i latou o ē fai vi'iga i tagata ua fa'aaogā e Satani e 'avea ma ōna sui. E tatau i le 'au faigaluega a Keriso ona ta'ita'i 'ese 'upu faivi'iga uma mai iā i latou lava; ia tu'u 'ese mai le va'aiga 'oe lava ia. Ia na o Keriso e tatau ona fa'aeaina. "O Lē ua alofa mai iā te i tatou, na Ia fufulu mai i tatou i a tatou agasala i Lona lava toto" (Fa'aaliga 1:5), ia fa'atosina i ai mata uma, ma si'i a'e vi'iga mai loto uma.

O le olaga e tu'uloto le mata'u i le Atua, o se olaga lea e lē i ai se fa'anoanoa pe pōuliuli. A leai Keriso o le a fa'aalia lea e se foliga fa'anoanoa, ma o le olaga o se tagata sopomalaga e tapua'i a e lē manuia. O i latou o ē ua tumu i le fia fa'amamaluina o ia lava ma le alofa fa'apito mo ia fo'i, o le a lē lagona e mana'omia se so'ofa'atasiga o ia ma Keriso. O le fatu e le'i pa'ū ma nutimomoia i luga o le Papa, e mitamitavale i lona tulaga ato'atoa. E mana'o le tagata i le tapua'iga e fa'amamaluina. Latou te naunau e savavali i se ala e lautele ina ia tau'ave ai o latou lava uiga moni. O lo latou alofa fa'apito mo i latou lava, o le fiafia i uiga fia vi'ia ma le fa'ane'etaga, o le a lē aofia ai le Fa'aola mai o latou loto, ma a lē i ai o Ia o le a na o le pogisā ma le fa'anoanoa e maua ai. A e a mafuta Keriso i le agaga, o le pogai lea o le 'oli'oli. Mo i latou uma e talia o Ia, o le manatu silisili o le Afioga a le Atua o le 'oli'oli lea.

"Auā o lo'o fa'apea ona fetalai mai o Lē ua Maua'uga ma ua Silisili, o lē afio e fa'avavau, e pa'ia lona suafa, 'Ou te nofo i le mea maua'uga ma le pa'ia, ma te nonofo fo'i ma lē ua momomo ma ua maua'uga lona loto, e fa'amafanafana i ē ua loto maua'uga, ma fa'amafanafanaina loto o ē ua loto momomo" (Isaia 57:15).

Na iloa e Mose le mamalu o le Atua a o fa'alafiina o ia i le mavaevae o le papa. E ufiufi i tatou e Keriso i Ōna lava 'a'ao na tu'ia pe a tatou lalafi i le Papa na vaeluaina, ma o le a tatou fa'alogi ai i le mea na fetalai ai le Ali'i i Āna 'au'auna. Iā i tatou fa'apei o Mose, o le a fa'aali mai e le Atua Ia lava o Sē "e alofa mutimutivale ma alofa fua, e telegese Lona to'asā, e tele le alofa ma le fa'amaoni, e tausii le alofa e o'o atu i le afe o tupulaga; o Lē fa'amagalo i le amiolētonu ma le solitulafono ma le agasala" (Esoto 34:6, 7).

O le galuega o le fa'aolataga e aofia ai fa'ai'uga e faigatā i tagata ona malamalama i ai. "O mea e le'i va'aia e mata, e le'i lagona fo'i e taliga, e le'i o'o fo'i i le lot o se tagata, o mea ia e saunia e le Atua mo i

latou o ē alofa iā te Ia" (I Korinito 2:9). A o aga'i atu le tagata agasala ua lata i le satauro o lo'o tū mai, ua fa'apa'ū i ōna luma ona ua tosina mai ia i ai e le mana o Keriso, ua 'avea o ia o se foafoāga fou. Ua tu'u iā te ia se loto fou, ma ua 'avea ia o se tagata fou iā Keriso Iesu. Ua leai se mea e toe mana'omia ina ia fa'apa'iaina ai, auā o le Atua lava o le a "ta'uamiotonuina e Ia lē ua fa'atuatua iā Iesu" (Roma 3:26). Ma "o ē ua ta'uamiotonuina e Ia, ua fa'amanuiaina fo'i i latou e Ia" (Roma 8:30). E ui ina ua tele la fa'alumaina ma le fa'aleagaina e le agasala, a e sili atu le fa'amamaluina ma le fa'aeaina e ala i le alofa na togiolaina ai. Mo i latou o lo'o taumafai ia suia i le fa'atusa o le Atua, ua tu'u mai i ai ia fa'aaogāina 'oa o le lagi, o se mana e sili ona lelei, o le a si'itia ai i latou i se tulaga maua luga a'e i lo agelu e le'i pa'ūū.

"O lo'o fa'apea ona fetalai mai le Ali'i, le Fa'aola o Isara'elu, o Lona Ali'i pa'ia, o Lē ua fa'alēaogāina e tagata, ma 'inosia e le nu'u,...e iloa mai e Tupu ma latou tula'i, o ali'i fo'i, ua latou ifo; auā o le Ali'i, o Lē ua fa'amaoni, ma le Pa'ia o Isara'elu, lē ua filifilia 'oe" (Isaia 49:7).

Ua fa'apea mai fo'i, "O sē fa'amaualuga o ia iā te ia, e fa'amaualoina lea; a o sē fa'amaulalo o ia iā te ia, e fa'amaualugaina lea" (Mataio 23:12).

"E Lē Tauia e le Atua Lana 'Au Filifilia?"

Matā'upu 14

O lenei matā'upu e fa'avae i le Luka 18:1-8.

Na fetalai mai Keriso e fa'atatau i le taimi a e le'i o'o i Lona afio fa'alua mai, ma e fa'atatau i faigatā o le a o'o i Ōna tagata. Sa la fa'asino fa'apito i lea taimi ma tu'u mai i le fa'ata'oto "ina ia tatalo so'o e tatau ai, a e 'aia le fa'avaivai."

Na la fa'apea atu, "Sa i le tasi 'a'ai le fa'amasino, ua lē mata'u i le Atua, e lē āva fo'i i tagata. Sa i lea 'a'ai fo'i le tasi fafine ua oti lana tane, ua alu atu ia iā te ia, ua fa'apea atu, Ia e fa'amasino atu i lē ua i ai a'u mea. O nai aso e le'i mafai ai o ia; a e mulimuli ane ua fa'apea ifo o ia i lona loto, E ui lava ina 'ou lē mata'u i le Atua, ma a'u lē āva i tagata, a e peita'i ona o le fa'asoesā mai iā te a'u o le fafine nei ua oti lana tane, 'ou te fa'amasino i āna mea, ina ne'i fa'atigā mai iā te a'u i lona sau so'o. Ona fetalai atu ai lea o le Ali'i, Ia outou fa'alogoa mai i le 'upu a le fa'amasino amiolētonu. E ui lava ina tuai mai le Atua i ē na Ia filifilia, o lo'o alalaga i latou iā te IA i le ao ma le pō, pe lē fa'amasino ea o Ia i a latou mea? 'Ou te fai atu iā te outou, e vave ona fa'amasino e Ia o a latou mea" (Luka 18:2-8a).

O lenei fa'amasino sa leai sana fa'atatau mo se mea sa'o, leai se tigāalofa mo ē mafatia. Sa tuli'esea pea le fafine e leai sana tane ina ua tagi mai i ōna luma, ma o taimi uma sa toe fo'i mai iā te ia, a e na o le tuli i fafo mai le nofoāga o le fa'amasinoga. Sa iloa e le fa'amasino e tonu lana tagi, ma e mafai fo'i e ia ona talia ma fa'amalie lenei tagata, peita'i na te le'i faia fa'apea. Na i le fa'amasino le pule, a e na tu'u atu i le fafine ia talosaga ma ōle pea ma le lē talia. Peita'i e le'i fa'avaivai le fafine, ma e ui i le loto ma'a'a o le fa'amasino, na avatu pea le talosaga se'ia o'o ina ia talia lea tagi. Ua fai mai loa ia, "E ui ina 'ou lē mata'u i le Atua, ma a'u lē āva i tagata, a e peita'i ona o le fa'asoesā mai iā te a'u o le fafine nei ua oti lana tane, 'ou te fa'amasino i āna mea, ina ne'i fa'atigā mai iā te a'u i lona sau so'o." Ina ia mautū lona tulaga, ma leai ni 'upu faitio ona o lana fa'ai'uga, sa ia tauia le tautigā o lenei fafine.

"Ona fetalai atu ai lea o le Ali'i, Ia outou fa'alogoa mai i le 'upu a le fa'amasino amiolētonu. E ui lava ina tuai mai le Atua i ē na Ia filifilia, o lo'o alalaga i latou iā te IA i le ao ma le pō, pe lē fa'amasino ea o Ia i a latou mea? 'Ou te fai atu iā te outou, e vave ona fa'amasino e Ia o a latou mea." Sa aumaia e Keriso se fa'atusatusaga i le 'ese'esega o le fa'amasino lē fa'amaoni ma le Atua. Na taliina e le fa'amasino le talosaga a le fafine ona o lona loto fa'apito, ina ia malōlō mai le fa'asoesā o lea tagata. E le'i lagona e ia se tigāalofa po o se agalelei; e leai sona popole ona o lē ua pagātia. E matuā 'ese le uiga o le Atua fa'atatau iā i latou o ē sa'ili iā te IA. O le tagi mai ē o mafatia ma mana'omia le fesoasoani, e talia e Ia ma le tigāalofa e lē mafai ona fa'atusatusa.

Sa sa'ili se fesoasoani mai le fa'amasino e le fafine ua oti lana tane, e mativa ma e leai fo'i ni uō, ma e leai ni āna mea e tausia ai ia. E fa'apea le agasala, ua mafua ai ona vavae'ese le tagata mai lona so'otaga ma le Atua. Pe a na o ia, e leai sona ala i le fa'aolataga. Peita'i e aumaia i tatou e Keriso ia tau latalata atu i le Tamā, ona o le 'au filifilia a le Atua e pele i Lona finagalo. O i latou ia o ē na Ia vala'auina mai le pogisā i Lona malamalama ofoofogia, e fa'ailoa Lona vi'iga, ma ia susulu atu e pei o molī i totonu o le pouliuli o le lalolagi. O le fa'amasino lē fa'amaoni sa leai sona manatu i le fafine ua oti lana tane o lo'o fa'asoesā mai mo se sa'olotoga. A e ina ia sa'oloto ia mai ana talosaga, na ia lagona ma talia lana tagi ma na fa'asao ia mai lona fili. Peita'i e alofa le Atua i Lana fanau ma se alofa e fa'avavau; o le mea e aupito pele iā te Ia i le lalolagi o Lana ekalesia lea.

"Auā o le tofi a Ieova o Lona nu'u lea; o Iakopo o Lona tofi lea ua fuafuaina. Na Ia maua o ia i le vao, o le mea e lē 'ainā, e uiō ai manu fe'ai, ma ua gaogao; na Ia si'osi'o iā te ia, ma a'oa'o atu i ā te ia, na Ia leoleo iā te ia e pei o Lona tamatama'imata" (Teuterēnome 32:9, 10). "Auā o lo'o fa'apea ona fetalai mai o Ieova o 'au, E mulimuli ane i le malumalu, ua Ia 'auina mai o a'u i nu'u 'ese na vetea a outou mea; auā o lē pa'i atu iā te outou, ua pā'ia e ia le tamatama'i mata o Lona fofoga" (Sakaria 2:8).

O le tatalo a le fafine ua oti lana tane, "Ia tau mai a'u" - "ia fa'amasino mai a'u mea" - "mai o'u fili," e fa'asino lea i le tatalo a le fanau a le Atua; fa'asa'oloto mai iā Satani lo latou fili mata'utia. O ia o lē

e "tu'ua'ia o tatou uso," e molia i latou i luma o le Atua i le ao ma le pō. O lo'o galue pea ia e taufa'asesē ma fa'aumatia tagata o le Atua. Ma o le fa'asaoia mai le pule a Satani ma āna 'au na a'oa'o mai ai e Keriso i lenei fa'ata'oto Ōna so'o e tatalo.

Sa va'aia i le valo'aga a Sakaria le galuega taumolimoli a Satani, ma le galuega a Keriso i le tete'e'eseina o le fili o Ōna tagata. Ua fa'apea mai le perofeta, "Ua ia fa'aali mai fo'i iā te a'u o Iosua le faitaulaga sili, o lo'o tū i luma o le agelu a Ieova; o Satani fo'i, o lo'o tū o ia i lona itū taumatau e tete'e atu iā te ia. Ona fetalai atu lea o Ieova iā Satani, Ia a'oa'i atu Ieova ia te 'oe Satani, ia a'oa'i atu iā te 'oe Ieova, o Lē ua filifili i Ierusalem; e lē o le motumotu ea lenei na se'ia mai le afi? Ua 'ofu Iosua i 'ofu 'ele'elea; ua tū fo'i o ia i luma o le agelu" (Sakaria 3:1-3).

Ua fa'asino i tagata o le Atua e pei o se tagata amioleaga o lo'o fa'amasinoia. O Iosua le faitaulaga sili, o lo'o sa'ili mo se fa'amanuiāga mo ōna tagata, ē o lo'o matuā puapuagātia lava. A o fa'atoga atu ia i luma o le Atua, sa tū atu lona fili o Satani i lona itū taumatau, ma o lo'o ia molia le fanau a le Atua ua foliga mai ua leai so latou fa'amoemoe. Sa ia ta'u atu i luma a latou amioga leaga ma 'aleu, ma fa'ailoa o latou sesē ma mea na to'ilalo ai, ma le fa'amoemoe o le a foliga mai o latou uiga e lē tatau i le silafaga a Keriso ma o le a lē maua ai se fesoasoani o lo'o latou matuā mana'omia. Ua tula'i Iosua ua ta'usalaina, o le sui o tagata o le Atua, o lo'o la'e i 'ofu palapalā. E iloa e ia agasala a ōna tagata ma ua fa'avaivai ai, a e ua fa'amalosia e Satani ia lagona i lona agaga ua ta'usalaina ma 'afia ai ia e pei ua leai se fa'amoemoe. Peita'i ua tula'i mai o ia e fai talosaga, a o sauni e tete'e iā te ia.

Sa amata i le lagi le galuega a Satani o le tu'ua'i. Ina ua pa'ū le tagata, sa fa'aauau loa lana galuega i le lalolagi ma o le a faifai pea lana galuega fa'apitoa a o tatou tau lata atu i le fa'ai'uiga o le tala fa'asolopito o le lalolagi. A o ia va'ai atu ua pu'upu'u lona taimi, o le a ia galue atili ma le ma'elegā e taufa'asesē ma fa'aumatia. E tupu tele lona ita pe a va'ai atu i tagata o le lalolagi, o ē e ui ina vaivai ma agasala, a e āva i le tulafono a le Atua. O lea ua ia taumafai malosī ai ia latou lē usita'i i le Atua. E fiafia ia i le manatu o latou e lē aogā, ma e tele āna togafiti ua saunia mo so'o se agaga e fa'amailei ai ma vavae'ese ai ma le Atua. O lo'o sa'ili ia e tu'ua'i ma ta'usalaina le Atua ma latou uma o lo'o taumafai e tau'ave Āna fuafuāga i lenei lalolagi ma le alofa mutimutivale, fa'apalepale, ma le fa'amagaloga.

E fafaguina le ita o Satani i taimi uma e fa'atinoina ai le mana o le Atua mo Ōna tagata. O taimi uma e galue ai le Atua mo Ōna tagata e fa'afou ai fo'i le malosī o Satani ma āna 'au e galulue ia fa'aumatia i latou. E oso le mataū'a o Satani iā i latou uma e fa'alagolago iā Keriso; e fuafua ia e taufa'aoso a'e le leaga, ona tu'ua'i lea o mea uma i ē ua fa'asesēina pe a manumalō. Ua ia fa'asino i o latou ofu 'ele'elea, o latou uiga lē ato'atoa; ma ia fa'ailoa mai o latou vaivaiga ma 'aleu, la latou agasala i le lē loto fa'afetai, o le lē pei o Keriso, ua ala ai ona latou lē fa'amamaluina lo latou Fa'aola. O nei mea uma ua ia fa'aaogā i lana finauga ina ia fa'amaonia ai e tatau ona faia lana galuega mo lo latou fa'aumatiāga. Ua ia taumafai e fa'amata'u o latou loto ma manatu ai ua leai so latou fa'amoemoe, ma e lē mafai ona toe fa'amamāina o latou leaga. O lona fa'amoemoe ia 'ave'esea lo latou fa'atuatua a e tu'u atoa latou i āna fa'aosoosoga ma fulitua ai i le Atua.

E lē mafai e tagata o le Atua ona tali atu e latou lava ia i moliaga a Satani, auā a vā'ai latou iā i latou lava, ona fa'avaivai ai lea. Peita'i e tatau ona ōle atu i le Fautua pa'ia, ma ia latou fa'alagolago i le uiga lelei o le Fa'aola. O le Atua o "Ia o Lē amiotonu, ma ua ta'utamiotonuina e Ia lē ua fa'atuatua iā Iesu" (Roma 3:26). Ia tagi atu iā te Ia e fa'afilemū tu'ua'iga a Satani ma 'ave'ese āna mea faigaluega. "Ia e fa'amasino atu i lē ua i ai a'u mea," ua latou tatalo atu ai; ma ua fa'afilemū e Keriso le fili mai āna tu'ua'iga, e ala i le mana ofoofogia o le satauro.

Ona fetalai atu lea o Ieova iā Satani, Ia a'oa'i atu Ieova iā te 'oe Satani, ia a'oa'i atu iā te 'oe Ieova, o Lē ua filifili i Ierusalem; e lē o le motumotu ea lenei na se'ia mai le afi?" (Sakaria 3:2). E tula'i Keriso i le vā e fai ma puluvaga pe a sa'ili Satani e ufitia tagata o le Atua i le pogisā ma fa'aumatia ai i latou. E ui ina agasala, ua tau'ave e Keriso le sala o a tatou amioleaga i luga o Lona lava agaga ma Ia se'iina e pei o se motumotu mai le afi. E ala i Lona itū fa'aletagata, ua i ai Lona so'otaga ma le tagata, a e ala i Lona itū fa'a-Atua, ua tasi Ia ma le Atua e leai se gata'aga. E latalata mai lava le fesoasoani mo agaga o le a fa'aumatia, a e ua tulia i tua le fili.

"Ua ofu Iosua i ofu 'ele'elea; ua tū fo'i o ia i luma o le agelu. Ua ia tali atu, ma fetalai atu i ē na tutū mai i ona luma, o lo'o fa'apea, 'Ave 'ese ia o ofu 'ele'elea ua ofu ai o ia. Ua ia fetalai atu fo'i iā te ia,

Fa'auta, ua 'ou 'ave'esea āu amiolētonu i ōu luga; 'ou te fa'aofu fo'i iā te 'oe i le ofu matagofie. Ona 'ou fai atu lea, Ia latou fa'ae'e le pulou lelei i luga o lona ulu. Ona latou fa'ae'e ai lea o le pulou lelei i lona ulu, ma fa'a'ofu iā te ia i ofu." Ua tū mai le agelu ma fai atu le ta'utinoga iā Iosua, le sui o tagata o le Atua, "Afai e te savali i O'u ala, afai fo'i e te tausiusi i A'u sauniga, ona e fa'amasino ai lea i Lo'u fale, ma e leoleo i O'u lotoā; 'Ou te tu'u atu fo'i iā te 'oe ta'ita'i mai iā te i latou nei o ē tutū mai" - e o'o atu lava i agelu o lo'o si'osi'omia le nofoali'i o le Atua. (Sakaria 3:3-7).

E ui ina i ai mea e lē tonu a tagata o le Atua, a e lē fultua ai Keriso mai mea o i lalo o Lana tausiga. E iā te Ia le pule e suia ai o latou la'e; e 'ave'esea ai 'ofu 'ele'elea, a e fa'aofu le tagata ua salamō ma talitonu i Lona lava 'ofu o le amiotonu, ma tusi ai ua fa'amagaloina i o latou igoa o lo'o i tusi o le lagi. Na te ta'uta'u atu o i latou o Āna lava i luma o le atulaulau. E fa'ailoa atu o Satani o le fili e tu'ua'ia ma taufa'asesē, a e o le a faia le fa'amasinoga tonu e le Atua mo Ōna lava tagata filifilia.

O le tatalo, "Ia e fa'amasino lē ua i ai a'u mea," e lē fa'atatau na o Satani, a e o āna a'u uma ua ia u'una'i e ta'usesē, fa'aosooso, ma fa'aumatia tagata o le Atua. O i latou o ē ua filifili e usiusita'i i poloa'iga a le Atua o le a malamalama e ala i a latou galuega, o latou o fili a ē o lo'o pulea e se mana mai lalō. O ia fili o lo'o si'omia pea Keriso i la'saga uma, ma e lē mafai e se tagata ola ona iloa taumafaiga ma le galuega e faifai pea. E pei o lo latou Ta'ita'i, sa fa'apea ona fa'afeagai le 'au so'o o Keriso ma fa'aosoosoga i taimi uma.

Ua fa'amatalaina e le Tusi Pa'ia le tulaga o le lalolagi a e ua lata le afio fa'alua mai o Keriso; ma ua fa'aalia mai e le aposetolo o Iakopo aso e fa'ateleina ai le matape'ape'a ma le fa'asauā. Ua fai mai o ia, "Fa'auta mai ia; outou ē tamao'aiga,... ua outou fa'aputu mea i ōna aso e gata ai. Fa'auta, o le totogi o ē galulue, ē na fa'aputu le fua o outou fanua, ua taofia e outou, ua 'alaga ia; o le 'alaga fo'i o ē na selesele saito ua fa'afogaina lava e le Ali'i o Sapaota. Ua outou nonofo i le nu'u ma le sololelei, ma le fiasia i la le tino; ua fafagaina outou e outou, fa'apei o manu mo le aso e fafasi ai. Ua outou fa'asala ma fasioti lē amiotonu, ua lē tete'e mai o ia ia te outou" (Iakopo 5:1-6). O le ata lenei o mea o lo'o tutupu i le lalolagi i ōna pō nei. E ala i itu'aiga sauāga 'ese'ese ma uiga lē fa'amaoni, ua fa'aputu e tagata 'olua e mata'utia le tele, a o lo'o alu a'e pea i luma o le Atua 'alaga a le fanau a tagata o lo'o matelāina ma mafatia.

"Ua fa'afo'isia i tua le fa'amasinoga, ua tū mamao atu le amiotonu; auā ua pa'ū le fa'amaoni i le malae, e lē mafai ona ulu mai le amio sa'o. Ua lē iloa lava le fa'amaoni; o lē ua 'alo i le leaga ua vetea ana mea. Ona silafia lea e Ieova, ua leaga fo'i iā te ia ina ua leai se fa'amasinoga" (Isaia 59:14, 15). O lenei mea sa fa'ataunu'uina i le soifuāga o Keriso i lenei lalolagi, auā sa fa'amaoni pea lava Ia i poloa'iga a le Atua, a e na tu'u'ese aganu'u ma talitonuga fa'aletagata na fa'aeaina i luga a'e o le 'upu moni. Ona o nei gaoioiga, sa inosia ma sauāina ai o Ia, ma ua toe faia mea ua mavae o le tala fa'asolopito. Ua fa'aeaina tulafono ma tū masani a tagata i luga a'e o tulafono ale Atua, ma o i latou uma o ē fa'amaoni i poloa'iga a le Atua e faitioina ma sauāina. Na molia Keriso, ona o Lona fa'amaoni i le Atua, fa'apea ua soli Sapati ma ua fa'atauemu i le Ali'i. Ua fa'apea o Ia ua ulufia e le ti'apolo, ua ta'ua o Pelesepuolo. Sa fa'apea fo'i ona tu'ua'ia Ōna so'o ma ta'usesēina. O lea ua fa'amoemoe ai Satani e ta'ita'i i latou ia agasala ma ia lē fa'amamaluina ai le Atua.

O le uiga a le fa'amasino i le fa'ata'oto, o lē e lē mata'u i le Atua pe manatu i tagata, sa tu'u mai e Keriso e fa'ailoa ai le itu'aiga fa'amasinoga sa faia i lea vaitaimi, ma o le a molimauina i Lona fa'amasinoga i se taimi o le a lata mai. E fa'anaunau o Ia mo Ōna tagata ia iloa i taimi uma le lē tāua o le fa'alagolago i ta'ita'i po o fa'amasino fa'alelalolagi pe a o'o i aso o fa'afitauli. O le tele o taimi o le a tutū tagata filifilia o le Atua i luma o ta'ita'i o le malō, o ē lē fa'alagolago i ta'ita'iga ma fautua mai le afioga a le Atua, a e mulimuli o i latou lava manatu lē pa'ia ma e lē taupulea.

I le fa'ata'oto o le fa'amasino lē fa'amaoni, ua fa'aalia mai ai e Keriso le mea e tataua ona tatou faia. "E ui lava ina tuai mai le Atua i ē na Ia filifilia, o lo'o 'alalaga i latou ia te Ia i le ao ma le pō, pe lē fa'amasino ea o Ia i a latou mea?" O Keriso lo tatou fa'aa'oa'o, na te le'i faia se mea e puipui pe fa'asoina ai o ia e Ia lava, a e na Ia tu'u atu Lona moliaga i le Atua. E fa'apea Ōna so'o, latou te le'i tu'ua'ia pe ta'usalaina, pe faia se mea e fa'avevesi ai ina ia fa'asao ai i latou lava.

Pe a o'o mai tofotofoga e foliga mai e lē mafa'amatalaina, e lē tataua ona mavae ai lo tatou filemū; pe ui ina so'ona fai mai mea e lē tonu iā te i tatou, ia lē fa'avevesiina ai o tatou mafaufau. Pe a tatou fia fa'amalieina se agaga o le tau i ma sui atu, o le a fa'aumatia ai lo tatou fa'atutua i le Atua ma le Agaga

Pa'ia. E i ai pea i o tatou tafatafa se 'avefe'au fa'alelagi, o le molimau e si'itia i tatou i se tulaga e tete'e atu ai i le fili. O le a ia si'omia i tatou i 'ave pupula o le Lā o le Amiotonu, e lē mafai e Satani ona lepetia, ma e lē mafai ona ia ūlufale i totonu o lenei talipupuni o le malamalama pa'ia.

A o aga'i pea i luma le leaga o le lalolagi, ia leai se tasi o tatou e fa'apea o le a lē o'o mai i ai ni faigatā. Peita'i o faigatā lava nei e aumaia i tatou i le afeafe o le Silisili 'Ese. E tataua ona tatou sa'ili se fautua mai Lē Ōna le poto e lē gata.

O lo'o fetalai le Ali'i, "Ia e vala'au fo'i iā te A'u i le aso e i ai le puapuagā" (Salamo 50:15). Ua Ia vala'au mai ia tatou avatu o tatou fa'afitauli ma mana'oga iā te Ia, ia fa'apea ona tatou maua le fesoasoani o lo'o tatou mana'omia. O le taimi e o'o mai ai faigatā, ia tatou tatalo ma tu'u atu loa a tatou ōlega iā te Ia. E ala i a tatou tatalo fa'atauānau, o le fa'amaoniga lea o le malosi o lo tatou fa'atuatua i le Atua, ma o le a ta'ita'i tatou ia ma'elegā ma tatalo e lē aunoa. E fa'afofoga mai lo tatou Tamā fa'alelagi i a tatou talosaga.

O le tele o taimi o i latou o lo'o sauāina ona o lo latou fa'atuatuāga e tofotofoina ina ia manatu ai ua tu'ulafoa'i i latou e le Atua. I le va'aiga a tagata, o latou e to'aitiiti, ma e foliga mai ua manumalō le fili iā i latou. Peita'i ia lē tataua ona fa'avaivai ai lo latou loto fuaiaifo; auā o Lē e lē tu'ulafoa'iina i latou ua puapuagātia e sui ai i latou, ma na tau'ave o latou fa'anoanoāga ma mafatiāga.

E lē tu'ua ta'ito'atasi le fanau a le Atua, pe tu'uina e leai se puipuiga. O le tatalo e fa'agaoioia le a'ao o le Silisili 'Ese. O le tatalo "na fa'ato'ilaloina malō i le fa'atuatua, na fai ai amiotonu, na maua ai mea na folafolaina, na pupuni ai gutu o leona, na tinei ai le malosi o le afi" - o le a tatou malamalama ai i le uiga pe a tatou fa'alogi i tala o ē ua maliliu ona o lo latou fa'atuatua - "na tutuli ai 'au a nu'u 'ese" (Eperu 11:33, 34).

Pe a tatou tu'u o tatou ola mo Lana galuega, e lē tu'ua tatou i se tulaga e le'i i ai se fuafuāga ua faia mo i tatou e le Atua. Po o le ā lava se tulaga ua tatou i ai, e i ai le Ta'ita'i e fa'asino lo tatou ala; o le ā lava ni o tatou fa'afitauli, e i ai la tatou Fautua moni; pe o ā o tatou fa'anoanoāga, mea e tigā ai, po o le lagona ua tu'ua to'atasi, e i ai la tatou Uō e tigāalofa. Pe a sesē la tatou la'a, e lē tu'ulafoa'ia i tatou e Keriso. E matuā manino ma mālū Lona si'ufofoga a o fa'apea mai, "O A'u nei o le Ala, o le 'Upu moni, ma le Ola" (Ioane 14:6). Ma "Auā e lavea'i e Ia o lē mativa i lona 'alaga mai; atoa ma lē ua puapuagātia, ma lē ua leai sone fesoasoani" (Salamo 72:12).

Ua fetalai le Ali'i o le a aloā'ia o Ia e i latou o ē fa'alatalata mai iā te Ia, o ē fai Lana galuega ma le fa'amaoni. "E te leoleoina ia ffilemū lava lē ua mausalī lona loto; auā ua ia fa'atuatua iā te 'Oe" (Isaia 26:3). E fa'aloaloa le a'ao o le Silisili 'Ese e ta'ita'i i tatou ia aga'i pea i luma. Ua fetalai mai o Ia, aga'i pea i luma; 'Ou te 'auina atu le fesoasoani mo 'oe. Ua e ōle mai i le mamalu o Lo'u suafa, ma o le a e maua le tali. O le a fa'amamaluina A'u i luma o ē o lo'o fa'atali ina ia lē taunu'u, a e o le a latou va'aia le manumalō o A'u afioga. "O mea uma fo'i tou te ole mai ai i le tatalo ua i ai le fa'atuatua, e maua lava e outou" (Mataio 21:22).

Ia tagi atu i le Atua i latou uma o lo'o mafatia po o fa'aaogā sesē. Ia fāliu'ese mai iā i latou ua fa'ama'a'aina loto, ma ia fa'ailoa mana'oga uma i le Ali'i na faia 'oe. E lē tuli'esea se tasi o lo'o sau iā te Ia ma le loto salamō, ma e leai se tatalo e faia ma le fa'amaoni o le a lē iloa. E fai vi'iga a le 'au faipese a le lagi a o fa'afofoga le Atua i le tagi a le tagata e aupito vaivai. Pe a fa'aleo atu o tatou fa'anaunauga mai le ta'ele o tatou agaga, pe fai se tatalo a o savavali i le ala, e o'o atu lava a tatou 'upu i le nofoāli'i o le Tupu o le atulaulau. E tusa pe lē lagona i taliga o so'o se tagata, peita'i e lē mafai ona tu'u'esea ia lē leoa, e lē mafai fo'i ona lē iloa ona o gaoioiga i mea o lo'o tutupu. E lē mafai ona fa'afilemūina fa'anaunauga o le agaga; e ēa a'e i luga o le pisapisaō o alatele, i luga a'e o le femēmēa'i o le motu o tagata, a e o'o atu i lotoā o le lagi. A tatou tagi atu i le Atua, Na te fa'afofoga mai i a tatou tatalo.

O outou ē lagona e matuā lē aogā, ia 'aua ne'i fefe e tu'u atu ōu mana'oga i le Atua. Ina ua Ia tu'u mai o Ia lava o Keriso mo agasala a le lalolagi, na Ia tau'a'aoina fa'anaunauga a agaga ta'ito'atasi. "O Ia lava sa na le fa'asaoina Lona lava Alo, a ua tu'uina mai o Ia e sui a'i i tatou uma lava, e lē foa'i fua mai ea e Ia iā te i tatou mea uma lava fa'atasi ma Ia i se ā?" O le a Ia lē fa'ataunu'uina ea afioga alofa na Ia tu'u mai mo lo tatou fa'amalosia ma le fa'alototele?

E fa'anaunau Keriso ia na lavea'iina Ōna suli mai le puleaga a Satani; peita'i a e le'i fa'asaoina i tatou mai le pule a Satani o i fafo, e tataua ona fa'asaoina i tatou mai lona mana o i totonu. E fa'ataga e le Ali'i tofotofoga ina ia fa'amamā i tatou mai le fa'alelalolagi, o le loto fa'apito, o uiga leaga e lē pei o

Keriso. E Na te uia mafatiāga ina ia tatou iloa ai la ma Iesu Keriso, o Lē sa Ia 'auina mai, ina ia iā te i tatou se naunauta'iga loloto ia fa'amamāina mai mea leaga, ma ia mafai ona tatou ō mai mai tofotofoga ua mamā, ma pa'ia, ma fiafia. O le tele o taimi e tatou te ulu atu i le afi o tofotofoga ma agaga ua fa'apogisāina e le loto fa'apito; peita'i a tatou onosa'i ai i ia tofotofoga, o le a tatou tula'i mai ma fa'aatina le uiga fa'apa'iaina. Pe a fa'ataunu'uina Lana fuafuāga e ala i o tatou puapuagā, "E faaalia e Ia lau amiotonu e pei o le malamalama, ma lou fa'amasinoga e pei o le aoauli" (Salamo 37:6).

E leai se faigatā, ne'i fa'apea o le a lē amana'ia e le Ali'i tatalo a Ōna tagata. O le faigatā e o'o mai pe a ua tau fa'avaivai ma lē tatalo pea e lē aunoa i taimi o fa'aosoosoga ma tofotofoga.

Na fa'aalitinoina le tigāalofa fa'ale-Atua o le Fa'aola i le fafine Suria-Foinie, ma sa lagona i Lona agaga lona loto mafatia. Sa naunau o Ia e fa'ailoa atu iā te ia ua fa'afogaina lana tatalo; peita'i o Lona fa'anaunauga ia maua se a'oa'oga e Ōna so'o, a e na foliga mai ua Na lē amana'ia le tagi mai lona loto pagātia. Ina ua fa'atinoina lona fa'atuatua, sa Ia fetalai atu i ni 'upu fa'amalosi ma na alu'ese atu ia ma le manuia tāua na ia ōle atu ai. O lenei lesone e le'i toe galo i le 'au so'o, ma ua tusia e fa'ailoa ai le i'uga o le tatalo fa'atauānu.

O Keriso lava na tu'uina le uiga tūtūmau e lē masuia i le loto o lea tinā; o Keriso lea sa tu'u i le fafine ua oti lana tane le malosi ma le lototele e tū ai i luma o le fa'amasino lē fa'amaoni. I se taimi ua leva ona mavae, sa fa'atasi ai Keriso i le fetaua'iga uiga'ese i tafatafa o le asaga o Iapoka, ma na fa'aosofia Iakopo i le fa'atuatua tumau lava lea e tasi. Ma na Ia tauia i le tu'uina atu i ai lea fa'atuatua. E fa'amasino ma le amiotonu Lē e afio i le malumalu fa'alelagi, ona e sili Lona fiafia i Ōna tagata o lo'o fetaia'i pea ma fa'aosoosoga i le lalolagi agasala, i lo'o 'au agelu o lo'o si'omia Lona nofoali'i.

I lenei tama'i vaega o le vāteatea ua fa'aalitino atu ai e le atulaulau atoa lona tāua, ona ua totoigiina e Keriso se tau e lē mafaitauina mo agaga o ē o nonofo ai. Ua faia e le Fa'aola o le lalolagi le so'otaga tumau ma le lagi e ala i le mafaufau ona o lo'o iinei le 'au fa'aolaina a le Ali'i. Sa asiasi mai lava 'avefe'au mai le lagi i ōna pō a o feoa'i ma talatalanoa fa'atasi ma Aperamo ma Mose. E o'o lava i taimi o gaoioiga o aso faiso'o i 'a'ai tetele, i le tumutumu o tagata o lo'o femalagaa'i ma fa'atumuina nofoāga o fefa'ataua'iga mai le taeao e o'o i le afiafi, i tu'inanau ma fa'afiafiāga e fa'apei lava ona pau lea o mea e tāua o le olaga, ma e to'aititi ē o lo'o manatunatu i mea tāua e lē o va'aia - a e o lo'o i ai pea i le lagi 'avefe'au ma ōna 'au pa'ia o lo'o silasila mai. O lo'o i ai 'au e lē o mava'aia a o lo'o mātā'i ifo i gaoioiga ma 'upu uma a tagata ta'ito'atasi. I so'o se fa'apotopotoga mo galuega po o fa'afiafiāga, i fa'apotopotoga uma mo tapua'iga, e to'atele atu fo'i le 'au fa'alologologo i lo'ē o lo'o va'aia e mata o tagata. E i ai taimi e to'esea ai le 'ie pupuni e lē o va'aia a e o lo'o natia le lalolagi, ina ia tosina 'ese mai o tatou mafaufauga mai fa'asoesā o le olaga a e ia manatunatu i 'au o lo'o molimauiina a tatou 'upu ma mea uma o lo'o tatou faia.

E tataua ona tatou malamalama lelei i le galuega a agelu asiasi, ma e tataua ona manatunatu i le tausiga ma le 'au'aumea fa'atasi o nei 'au fa'alelagi. E fa'atasi mai 'au e lē mava'aia o le malamalama ma le mana e aumai le fesoasoani i ē loto maulalo ma lē amana'ia, o latou o ē talitonu ma ua tapa i folafolaga a le Atua. E tutū i Lona itū taumatau kerupi ma serafi ma agelu e mata'utia lo latou malosi - e sefulu afe ma sefulu afe, e afe ma afe, "E lē o agaga e 'au'auna ea i latou uma, ua 'auauna e 'au'auna ona o i latou o ē a maua le ola?" (Eperu 1:14).

E ala mai nei agelu 'avefe'au, o 'upu uma ma gaoioiga a le fanau a tagata o le a fa'amauiina i tusi o le lagi. O uiga sauā po o le lē fa'amaoni sa faia i tagata o le Atua, o mea uma sa fa'apuapuagātia ai latou e ala i le mana o le 'aufaigaluega leaga, o lo'o fa'amauiina lava i le lagi.

"E ui lava ina tuai mai le Atua i ē na Ia filifilia, o lo'o alalaga i latou iā te IA i le ao ma le pō, pe lē fa'amasino ea o Ia i a latou mea? 'Ou te fai atu iā te outou, e vave ona fa'amasino e Ia o a latou mea" (Luka 18:2-8a).

"O le mea lea 'aua le lafoa'i ai o outou fa'amalosi, ua i ai le tau e tele. Auā ua aogā ia te outou le onosa'i, ina ia maua e outou le mea na folafolaina, pe a uma ona faia e outou le finagalo o le Atua. Auā e toe itiiti itiiti lava, ona o'o mai ai lea o Lē maliu mai, e lē fa'atuai mai lava" (Eperu 10:35-37). "Fa'auta, e fa'atali lē galue fanua i le fua aogā o le 'ele'ele, e fa'atalitali i ai, se'ia maua le uāga muamua ma lē mulimuli; ia onosa'i ia outou, ia fa'atumauiina o outou loto, auā ua latalata le afio mai o le Ali'i" (Iakopo 5:7, 8).

E matuā ofoofogia le fa'apalepale o le Atua, ma ua fa'aumiumi le fa'amasinoga a o ōle atu pea ma le alofa mutimutivale i le tagata agasala. Peita'i "o le amiotonu ma le fa'amasinoga o lo'o tumau ai Lona nofoāli'i" (Salamo 97:2). Ma "O Ieova e telegese Lona to'asē, a e tele Lona mana; Na te lē fa'asaoina lava ē ua agasala; o Ieova o lo'o i ai Lona ala i le asiosio ma le afā, o ao o le efuefu ia o Ōna 'a'ao" (Nauma 1:3).

Ua matuā solia leaga lava e le lalolagi tulafono a le Atua, ma ua solipala e tagata Lana pule ona o lo'o fa'aalia pea Lona fa'apalepale ofoofogia. O lo'o fefa'amalosia'i le tasi i le tasi i la latou fouvalega ma le fa'asauā i Ōna tagata, ma ua fa'apea mai, "Pe fa'apefea ona silafia e le Atua? Pe silafia ea e lē Silisili 'Ese?" (Salamo 73:11). Peita'i e i ai se laina e lē mafai ona latou la'asia, ma ua lata mai lava le taimi o le a taunu'u ai i lea i'uga. E o'o i le taimi nei ua lata i le fa'ai'uga o le onosa'i o le Atua, e fa'agataina ai Lona alofa tunoa, o le a gata ai Lona alofa mutimutivale. O le a fa'aali mai le Ali'i i Lona Ia lava mamalu, e lavea'i Ōna tagata, ma fa'aumatia ai le amiolētonu ua fa'ateteleina.

I ōna pō o Noa, sa lē amana'ia e tagata le tulafono a le Atua se'ia o'o ina a toeitiiti lava te'a'ese mai le lalolagi ma galo uma iā i latou Lē na faia mea uma. E mata'utia le maualuga na o'o i ai a latou agasala, ona aumaia lea e le Atua i luga o le lau'ele'ele se lolovai ma 'ave'esea ai uma ōna tagata amio leaga.

O lo'o fa'ailoa pea e le Ali'i mai augātupulaga le uiga o Āna galuega. Pe a o'o mai se fa'afitauli, o le a fa'aali mai o Ia e fa'alavelave ma vavao ai le galuea'iina o fuafuāga a Satani. E i ai taimi ua Ia fa'atagaina nei fa'afitauli i malō, i aiga, ma tagata ta'ito'atasi ina ia fa'ailogaina Lana aiā, ona Ia fa'ailoa mai lea o lo'o soifua pea le Atua i Isara'elu, e mautū pea Lana tulafono, ma o le a Ia fa'asao Ōna tagata.

I lenei vaitaimi o lo'o faifaiepa le agasala, atonu ua tatou iloa ua lata mai lava le fa'afitauli mata'utia mulimuli. Pe a toetoe lava ina a aofia le lalolagi atoa e tete'e le tulafono a le Atua, pe a sauāina ma fa'apuapuagātia Lana fanau e o latou uso ā tagata, a e o le Ali'i o le a Ia lavea'iina.

Ua lata le taimi o le a Ia fa'apea mai ai, "Inā ō mai ia, Lo'u nu'u e; inā ūlu atu ia i o outou afeafe, ma pupuni o outou faitoto'a; ia outou lalafi e pei se 'emo ona pu'upu'u, se'ia mavae atu le to'asā. Auā fa'auta, o lo'o afio mai Ieova ai le mea o afio ai o Ia, ina ia fa'asalaina ē o nonofo i le lalolagi ona o a latou amio leaga; e fa'aalia fo'i e le 'ele'ele lana toto, na te lē toe ufitia fo'i lana fasi" (Isaia 26:20-21). O tagata o lo'o fa'apea o latou o Kerisiano, atonu o le a fa'atigā i ē matitiva ma 'ave'ese a latou mea e ala i le faitogafiti; o le a latou gaoi mea a le fafine ua oti lana tane ma ē ua leai ni mātua; atonu o le a fa'amalieina lo latou 'ino'ino fa'aSatani ina ua lē mafai ona latou pulea le loto fuatiaifo o tagata o le Atua; peita'i ona o nei mea uma o le a lē aumaia e le Atua i latou i le fa'amasinoga. Fai mai, "o lē lē alofa, e lē alofagia o ia i le fa'amasinoga." E lē o toe umi a e o le a latou tutū loa i luma o le Fa'amasino o le lalolagi atoa, e avatu se fa'amatalaga i mafatiāga na latou fa'atupu i tino ma agaga o Lana fanau pele. Atonu o le a latou faia ni molimau pepelo, o le a latou tu'ua'ia ē na filifilia e le Atua e faia Lana galuega; atonu o le a latou tu'u le 'au fa'atuatua i falepuipui, i 'au a ē amioleaga, i nofoāga lē ainā, po o le oti fo'i; a e peita'i o le a mana'omia sa latou tali mo ia puapuagā uma, mo loimata uma sa fa'amaligiina; o le a tauia e le Atua fa'asautualua i latou mo a latou agasala. E fa'atatau iā Papelonia, le fa'ailoga o le ekalesia ua fulitua, na Ia fetalai atu i Āna 'au'auna o le fa'amasinoga, "Auā ua pa'i atu ana agasala i le lagi, ua manatua fo'i e le Atua ana amioleaga. Ia outou tau i iā te ia ia pei ona tau mai e ia iā te outou, ia outou tau fa'alua iā te ia e tusa ma ana galuega; o le ipu fo'i na liligi mai ai e ia, ia outou liligi fa'aluaina atu ai iā te ia" (Fa'aaliga 18:5, 6).

Mai atunu'u uma o le lalolagi, mai Initia, mai Aferika, mai Saina ma motu o le sami, mai miliona o lo'o i nu'u e ta'u o nofoāga Kerisiano, o lo'o alu a'e ai i le Atua se tagi ona o puapuagā e mata'utia. E lē fa'aumiumi ona lē taliina o lea tagi. O le a fa'amamāina e le Atua le lalolagi mai le amioleaga, e lē ala mai se lolovai pei o ōna pō o Noa, a e ala i se lepa afi e lē mafai ona tinea e se galuega fa'aletagata.

"E o'o mai fo'i aso vale, e leai sona tusa talu ona fa'ato'ā tupu o nu'u, ua o'o i ia lava aso; o ona pō fo'i ia e lavea'iina ai Ōu tagata, o i latou uma o ē ua tusia i le tusi" (Tanielu 12:1).

O le a fa'apotopoto e le Atua Lana fanau mai lua o le 'ele'ele ma le loloto o le sami, mai mauga ma toafa, o falepuipui ma āna, mai tauāluga o fale ma la'au mauti'eti'e fo'i. I lenei lalolagi sa sauāina, fa'amativaina ma fa'apuapuagātia i latou; ma e matuā to'atele lava na fasiotia ona latou te le'i talia mea taufa'asesē a Satani. Sa ta'usalaina le fanau a le Atua e fa'amasino fa'alelalolagi e pei o tagata e mata'utia le amioleaga. Peita'i o lo'o lata mai le aso fiafia "auā o le Atua o Ia lava le Fa'amasino" (Salamo 50:6). O

le a suia tofiga uma o le lalolagi....Ma o le a "igoa fo'i i latou, O le nu'u pa'ia; O ē ua fa'atauina e Ieova" (Isaia 62:12).

Po o ā satauro na vala'auina ai ia latou tau'ave, po o ā mea totino sa tu'u'esea, po o ā sauāga na mafatia ai, e o'o lava i ola na 'ave'esea, e tauia ma le ato'atoa le fanau a le Atua. "Latou te va'ava'ai atu fo'i i Ōna fofoga, e i ai fo'i i o latou muāūlu Lona suafa" (Fa'aaliga 22:4).

"Ua Talia e Lenei Tagata o ē Agasala"

Mata'upu 15

Fa'avacina lenei matā'upu i le Luka 15:1-10.

A o fa'atasi ane "telona ma tagata agasala" ma ua latou si'omia Keriso, sa fa'aleoina le lē fiafia o le 'au a'oa'o. Fai mai latou, "Ua talia e lenei tagata o ē agasala, ua 'a'ai fa'atasi fo'i o Ia ma i latou" (Luka 15:2).

E ala mai lenei moliaga, ua latou fa'apea mai e fiafia Keriso e fa'atasi ma tagata agasala ma le leaga tele, a e ua lē amana'ia lo latou amioga leaga. E o'o i a'oa'o ua lē malilie iā Iesu. Aiseā ua lē 'au'aumea fa'atasi ai ma i latou, ma a'oa'o atu fa'apei ona latou faia? Aiseā ua Ia lē femalagaa'i ai ma galue i so'o se vasega o tagata? Pe ana fai o Ia o se perofeta moni, sa latou fa'apea ai o le a Ia ō gatasi ma i latou, ma o le a Ia lē amana'ia le 'au telona ma tagata agasala. Ona o Lona tigāalofa mo ē tulaga maulalo ma le mativa, sa fa'aauau pea le fete'ena'iga ma ia leoleo o mea tau le aganu'u, peita'i o Lona soifuāga mamā ma le 'ato'atoa sa latou maofa ai, a e na ta'usalaina ai fo'i i latou. Latou te le'i fa'amaonia ala sa Ia a'oa'o atu ai, ona ua latou fa'atatauina o i latou lava o tagata a'oa'o'ina, e mamā, ma e maoa'e fa'aleagaga. Peita'i ua fa'aalia manino mai e le fa'aa'oa'oga a Keriso lo latou manatu fa'apito.

Sa fa'aalia mai fo'i lo latou 'ino'ino ona o ē ua mulimuli iā Iesu ma e matuā fiafia e fa'alogologo i Āna fetalai, o i latou ia e lē o va'aia o fa'atasi atu i sunako a e o fa'ailoa atu le lē fiafia i a'oa'o o le malumalu. Ua lagona e tusi'upu ma Faresaio na o le ta'usalaina i Lona fa'atasi ai; a o le 'au telona ma tagata agasala e tosina atu lava i latou iā Iesu.

Latou te lē o iloa o le pogai o lea mea o lo'o fa'amatalaina i a latou lava 'upu fa'atauēmu, "Ua talia e lenei tagata o ē agasala." Sa lagona e agaga o lo'o ō mai iā Iesu, ona o Lona fa'atasi ai, ua maua e i latou se sa'olotoga mai le lua o le agasala. E na o le tauēmu ma le ta'usalaina na latou maua mai le 'au Faresaio; peita'i na fetalai Keriso o latou o fanau a le Atua, e ui ina sa ō 'ese mai le fale o le Tamā, a e le'i fa'agaloina i le finagalo o le Tamā. Ona o le agasala ma lo latou puapuagātia, ua matuā fa'ateleina ai Lona tigāalofa. O le mamao o lo latou vā ma Ia, o le tele fo'i lea o Lona naunauta'i e fa'asaoina i latou.

O nei mea uma sa tataua ona iloa e a'oa'o o Isara'elu mai tusi ta'ai pa'ia o lo'o iā i latou ma o lo'o latou fa'aaogā mo a'oa'oga o aso fai so'o. E le'i tusi mai ea Tavita - Tavita lea sa pa'ū maulalo i se agasala mata'utia - "Ua 'ou alu 'ese fa'apei o le mamoe ua sē; ia e sa'ili mai i Lau 'au'auna" (Salamo 119:176)? E le'i fa'aalia mai e Mika le alofa o le Atua mo le tagata agasala, ina ua fa'apea mai, "O ai ea se Atua e tusa ma 'Oe o Lē fa'amagalo agasala, ma ua lē manatua solitulafono a ē o totoe o Lona tofi? Na te lē fa'amoemoe pea i Lona to'asā, auā e fiafia o Ia i le alofa?" (Mika 7:18).

O le Mamoe na lē Iloa

E le'i fa'amanatu atu Keriso i lenei taimi i Lana 'au fa'alogologo 'upu o le Afioga Pa'ia, a e sa Ia 'ai'oi atu ia latou fa'ailoa atu mea na latou molimau i ai. I le itū i sasa'e o le Ioritana, e i ai fanua laulelei mo lafu manu; i vanu ma atu mauga o lo'o tele ai mamoe ua sē ma o lo'o sa'ilia ma toe fa'afo'i mai i le tausiga a le leoleo mamoe. E to'atele leoleo mamoe sa fa'atasi ai ma Iesu, ma sa i ai fo'i ē na fa'aalu a latou tupe i nei lafu manu ma mamoe, e malamalama lelei latou i lenei ata: "O ai ea so outou e ana mamoe e selau, afai e lē iloa le tasi, e lē tuua e ia le ivagafulu ma le iva i le vao, a e alu ma sa'ili i lē na le iloa, se'ia maua?" (Luka 15:4).

O nei agaga o lo'o tou inosia, na fetalai ai Iesu, o mea totino lava a le Atua. E ō Ia i latou, e ala i le foafoāga ma le fa'aolataga, ma e tāua i latou i Lana silafaga. E fa'apei ona alofa le leoleo mamoe i āna mamoe ma o le a lē mafai ona malōlō pe a o lē iloa se to'atasi, e fa'apea le alofa o le Atua mo se agaga e tasi ua tuli'esca. Atonu e te'ena e tagata Lona alofa, atonu o le a ō 'ese mai iā te Ia, atonu latou te filifili se

isi matai; peita'i o latou lava e ā le Atua ia, ma e naunau pea Ia ia toe maua mai Āna mea totino. Ua fetalai o Ia, "E pei o le leoleo mamoe ona su'eina o lana lafu i le aso o i ai o ia i lana lafu ua ta'ape'ape; e fa'apea ona 'Ou su'eina La'u lafu, ma 'Ou lavea'iina i latou ai mea uma ua salalau ai i latou i le aso fa'amalumalu ma le pogisā" (Esekielu 34:12).

I lenei fa'ata'oto na alu lava le leoleo mamoe e sa'ili i le mamoe e tasi - o le fuainumera aupito fa'atauva'a lea na mafai ona faitaulia.. Pe ana fai e na o le to'atasi lava le agaga e lē iloa, semanū e maliu lava Keriso mo lea agaga e tasi.

O le mamoe na sē 'ese mai le lotoā, o le meaola lava lea e matuā sili le vaivai, ma e tataua ona sa'ilia e le leoleo mamoe ona e lē iloa e ia le ala e toe fo'i mai ai. E fa'apea le agaga e sē 'ese mai le Atua; e pei ia o le mamoe na lē iloa. Pe a lē sau le fesoasoani mai le alofa tunoa fa'alelagi, o le a lē mafai lava ona maua e ia le ala e fo'i ai i le Atua.

A iloa e le leoleo mamoe ua leai se mamoe e tasi, e lē va'ai o ia i le lafu o lo'o saogalemū ma fa'apea, "O lo'o i ai pea le 99 mamoe o le lafu, ma o le a taugatā tele mo a'u pe a 'ou alu e sa'ili lea tasi ua sē 'ese. Tu'u pea se'i toe fo'i mai ia ona 'ou tatala lea i ai le faitoto'a o le pā puipui e sau ai i totonu." E leai lava; a sē se mamoe, o le a fa'atumuina le leoleo mamoe i le popole ma le fa'anoanoa. E faitau lana lafu, ma a mautinoa ua leai se tasi, e lē mafai ona moe ia. Na te tu'u le 99 i totonu o le pā puipui, a e alu e sa'ili le tasi ua sē 'ese. O le tele atu o le faigatā ma le pogisā o le pō ma le ala, o le fa'ateleina fo'i lea o lona malosi ma le taumafaiga ia maua lea mamoe e tasi ua lē iloa.

Ina ua fa'alogoia le tagi vaivai, sa ia a'ea mea maua luga ma āsa vanu ma tofē i lana sa'iliga. Mulimuli ane ina ua tauia lana taumafaiga, na te le'i a'oa'i atu ona ua fa'atupu fa'afitauli. Na te le'i sasa iā te ia, pe ta'ita'i fa'amalosi i le aiga. I lona fīafīa, ua ia si'i le mamoe ma fa'ati'eti'e i ōna tau'au; ona ua manu'a, sa ia si'i mai i lona fatafata ma ia fa'amafanafana iā te ia. I le loto fa'afetai ona ua manuia lana sa'iliga, na ia si'i iā te ia ma toe fa'afō'i i le lotoā o mamoe.

E fa'afetai i le Atua ona o lenei ata ua tu'uina mai i o tatou mafaufau, e lē o se mea e fa'anoanoa ai i le toe fo'i mai o le leoleo mamoe a e leai se mamoe. E lē o tu'u mai e le fa'ata'oto se to'ilalo, a e o le manuia ma le 'oli'olisaga i le toe maua mai. O le fa'amaoniga lenei o lo'o ta'u mai ai e lē fa'agaloina e le Atua se mamoe e tasi ua sē 'ese mai Lana lotoā. O tagata ta'ito'atasi uma lava e gaua'i ia fa'asaoia o le a lavea'iina e Keriso mai le lua o le leaga ma le pagātia a le agasala.

Ma le agaga ua fa'avaivai, ia e fa'amalosi, e ui lava ina ua e faia se amioleaga. 'Aua e te fa'apea, atonu o le a fa'amagalo le Atua i āu agasala ma fa'ataga 'oe e tū atu i Ōna luma. A o e fouvale ma te'ena pea Ia, na afi'o mai o Ia e sa'ili iā te 'oe. I le loto alofa o le leoleo mamoe, sa Ia tu'ua le 99 a e alu i le vaomatua e sa'ili lē ua lē iloa. Na si'omia e Ōna 'a'ao alofa le agaga ua manu'a ma pagātia ua tali oti, ma na tau'ave ia i le saogalemū o le lotoā.

Sa a'oa'o tagata luitaia ia āo ona salamō muamua le tagata agasala ona fa'ato'ā ofoina mai lea o le alofa o le Atua. I la latou va'ai, o le salamō o se galuega e mafai ai ona maua e le tagata fa'amanuiāga a le lagi, ma o lenei manatu na ta'ita'iina le 'au Faresaio e ta'u atu ma le ita tele. Fai mai la latou 'upu, "Ua talia e lenei tagata o ē agasala." E tusa ai ma o latou manatu, sa lē tatau ona fa'atagaina nisi e ō fa'alatalata iā te Ia vaganā ē ua salamō. Peita'i ua a'oa'o mai Keriso i le fa'ata'oto i le mamoe na lē iloa, e lē fa'asaoia se tasi e ala i lo tatou sa'ilia o le Atua, a e ala i le sa'ilia e le Atua o i tatou. "E leai sē sa'ili i le Atua. 12 Ua latou ō 'ese uma lava, ua leaga fa'atasi i latou, e leai sē ua amio lelei, ua leai lava se tasi" (Roma 3:11, 12). Tatou te lē salamō ina ia alofa mai ai le Atua iā i tatou, peita'i ua Ia fa'a'ailoa iā te i tatou Lona alofa ina ia tatou salamō ai.

Ina ua aumai le mamoe na lē iloa i le aiga, sa pese fa'afetai ma le fīafīa le leoleo mamoe. Sa ia vala'au i āna uō ma tuā'oi, ua fa'apea atu, "Ia tatou 'oli'oli ia; auā ua 'ou maua la'u mamoe na lē iloa" (Luka 15:6). E fa'apea se tagata ua sē a e ua maua e le Leoleo o mamoe, o le a fa'apotopoto le lagi ma le lalolagi mo ni vi'iga fa'afetai ma le fīafīa.

"E fa'apea fo'i ona tele o le 'oli'oli i le lagi i le tagata agasala e to'atasi e salamō, a e itiiti i ē amiotonu e to'aivagafulu ma le to'aiva e lē tusa i ai le salamō" (Luka 15:7). Ua fetalai Keriso, O 'oe le Faresaio, o lau fa'atatau o 'oe lava lē e aupito fīafīa i ai le lagi, ma ua e manatu ua e saogalemū ona o lau lava amiotonu. Ia e iloa, pe afai e te lē mana'omia se salamō, o La'u galuega e lē o faia mo 'oe. O nei agaga o lo'o lagona lo latou tulaga mativa ma le agasala, o i latou ia na 'Ou sau e lavea'i. E fa'apea fo'i

agelu o le lagi ona manatu alofa i ia agaga lē iloa o lo'o e inosia. E te faitio ma tauemu pe a fa'afeso'ota'i mai ia agaga iā te A'u; a e ia e iloa e fa'afiafiaina agelu ma o le a fa'alogoia vi'iga o le manumalō i maota i lugā.

E i ai se alagā'upu a a'oa'o o le malumalu e fa'apea, e fiafia le lagi pe a fa'aumatia se to'atasi e agasala i le Atua; peita'i na a'oa'o mai Iesu o le galuega fa'aumatia, o se galuega e matuā 'ese lea i le Atua. O le mea e fa'afiafiaina ai le lagi o le fa'afo'i lea o le fa'atusa o le Atua i agaga na la faia.

Pe a sa'ili e toe fo'i mai i le Atua se tasi na sē mamao i le agasala, o le a fetaia'i ia ma faitiōga ma le lē talitonu. E i ai nisi o le a masalosalo pe moni lenā salamō, po o le a femusumusua'i, "E leai sona tulaga mautū; 'ou te lē talitonu o le a tūtūmau o ia." E lē o faia e nei tagata le galuega a le Atua, a e o le galuega a Satani, lē o lo'o tu'ua'ia le 'au uso. E ala i a latou faitiōga, o lo'o fa'amoemoe le ti'apolo e fa'alotovaivai lea agaga, ma tau fa'amamao atili ia mai se fa'amoemoe fa'apea ma le Atua. Ia teuloto e le tagata ua salamō le 'oli'olisaga i le lagi i le toe fo'i mai o lē na lē iloa, ma ia iloa le malōlōga e maua i 'a'ao alofa o le Atua ma ia lē fa'alotovaivaiina i le fa'asausili ma le uiga masalosalo o le 'au Faresaio.

Sa malamalama a'oa'o o le fa'ata'oto a Keriso e fa'asino i telona ma ē agasala; a e peita'i na i ai fo'i se uiga e sili atu le lautele. O le mamoe na lē iloa sa fa'asino e Keriso e lē na o le tagata agasala e to'atasi, a e o le lalolagi e tasi ua fulitua mai le Atua ma ua fa'aleagaina e le agasala. O lenei lalolagi e na o sina mea fa'atauva'a itiiti i lalolagi e mata'utia le tele o lo'o pulea e le Atua, a e o lenei lalolagi ua pa'ū - le mamoe e tasi ua lē iloa - e aupito sili le tāua i Lana silafaga i lo o le 99 e le'i sē 'ese mai le lotoā. O Keriso le Ta'ita'i'au alofagia o le lagi, ua tu'u'ese le mamalu na iā te Ia fa'atasi ma le Tamā; ua Ia afio 'ese mai Lona maota i lugā, ina ia fa'asao le lalolagi e tasi ua lē iloa. Ma o lea, ua Ia tu'ua ai lalolagi uma e le'i agasala, le 99 e alofofa iā te Ia, a e afio mai i lenei lalolagi, ina ia "manu'a o Ia ona o a tatou solitulafono," ma ua "momomo o Ia ona o a tatou amio leaga" (Isaia 53:5). Ua tu'u mai e le Atua Ia lava i Lona Ālo, ina ia maua e Ia le 'oli'olisaga i le taliaina o le mamoe na lē iloa ua toe fo'i mai.

"Faauta i le silisili o le alofa ua foa'iina ma e le Tamā ia te i tatou, ina ua ta'ua i tatou o le fanau a le Atua" (I Ioane 3:1). Ma na fetalai mai Keriso, "Fa'apei ona e 'auina mai A'u i le lalolagi, ua fa'apea fo'i A'u ona 'auina atu o i latou i le lalolagi" (Ioane 17:18) - ia "fa'a'atoa fo'i...o mea na totoe i puapuagā o Keriso, ona o Lona tino, o le ekalesia lea" (Kolose 1:24). O agaga uma ta'ito'atasi sa lavea'iina e Keriso ua vala'auina, i Lona suafa e galulue mo le fa'asaoina o ē ua lē iloa. O lenei galuega sa lē amana'ia i Isara'elu. E lē o fa'apea ea fo'i i ōna pō nei ona lē amana'ia e i latou o lo'o ta'ua o so'o e mulimuli iā Keriso?

E to'afia ē o lo'o sē 'ese ua e sa'ilia ma toe fa'afo'i mai i le lotoā? Pe a e fulitua iā i latou e foliga ua leai se fa'amoemoe ma e tulaga maulalo, e te iloa o lo'o e lē amana'ia agaga o i latou o lo'o sa'ilia e Keriso? I le taimi lava e te faliu 'ese ai ma latou, atonu o le taimi tonu lea o le a latou matuā mana'omia ai lou alofa. I so'o se fa'apotopotoga mo sauniga, e i ai lava agaga o lo'o naunau mo se malōlōga ma le filemū. Atonu e foliga mai o latou ia o lo'o ola i se olaga lē fa'autauta, ma o le a lē lagona le fa'atasi ai o le Agaga Pa'ia. A e o le to'atele o i latou ia e mafai ona fa'atosina mai mo Keriso.

Pe a lē toe fa'afo'i mai le mamoe ua lē iloa i le lotoā, o le a fesēa'i pea se'ia o'o ina fa'aumatia. Ma e to'atele fo'i agaga o le a fa'apea ona ō i lalo i le malaia a o lo'o mana'omia se lima ia fa'amafola atu e lavea'i mai. Atonu o nei agaga ua ō sesē, e foliga mai e loto ma'a'a ma e lē fa'aeteete; a e peita'i pe ana latou maua se fa'amanuiāga pei o isi, atonu o le a fa'aalia so latou uiga tamali'i, ma se taleni mo le faimealelei. E tigāalofa agelu mo ē ua sē 'ese; e maligi o latou loimata, pe a leai se loto fa'anoanoa po o se alofa mai le aigā tagata.

Oi, le leai o se tigāalofa mo ē o lo'o tofotofoina ma ua ō sesē! E mana'omia tele le agaga o Keriso, a e lē o le loto fa'apito mo le tagata lava ia!

Sa malamalama le 'au Faresaio i le a'oa'iga o i latou mai le fa'ata'oto a Keriso. Na te le'i talia la latou faitiōga ona o Lana galuega, a e na Ia tu'ua'ia lo latou lē amana'ia o telona ma ē agasala. E le'i faia e Ia lenei mea i luma o isi, ina ia lē tapunia ai o latou loto i Lana matā'upu; peita'i ua Ia fa'ailoa atu le ata o le galuega na finagalo le Atua latou te faia, a e o lea latou te lē o faia. Pe ana o latou o ni leoleo mamoe moni, se manū e faia e nei ta'ita'i i Isara'elu le galuega a leoleo mamoe. Se manū ua latou fa'aalitinoina le alofa mutimutivale ma le tigāalofa o Keriso, ma 'au'aumea fa'atasi ma Ia i Lana galuega. O lo latou te'ena o lea galuega na fa'amaonia ai e lē tonu lo latou fiaamioatua.. E to'atele na te'ena le a'oa'iga a Keriso; peita'i e i ai nisi sa talitonu i Āna afioga. I luga o i latou nei, ina ua mavae le afio a'e o Keriso i le lagi, sa

afio ifo i ai le Agaga Pa'ia, ma na 'au'aumea fa'atasi i latou ma Ōna so'o i le galuega na tu'u mai i le fa'ata'oto o le mamoe na lē iloa.

O le Tupe na lē Iloa

Ina ua uma ona tu'u mai o le fa'ata'oto i le mamoe sa lē iloa, na toe fetalai mai Keriso i se tasi, ua fa'apea, "O ai ea fo'i le fafine e ana tupe e fuagafulu, afai e lē iloa ia te ia le tasi tupe, e lē tutu ea se afi, ma tafitafi le fale, ma matuā sa'ili i ai, se'ia maua?" (Luka 15:8).

I totonu o fale o ē matitiva i nu'u i Sasa'e, e na o le tasi le potu e i ai, o le tele e leai se fa'amalama ma e pogisā, e seāseā na salu ma fa'amamā. Pe a pa'ū se tupe i le fola, e vave ona ufitia e le pefu po o le otaota. Ina ia toe maua lea tupe, e o'o lava i le ao, e tatau ona fa'amumū se molīga'o ma ia salu fa'amamā ma le fa'aeteete le fale atoa.

O le vaega a le tama'ita'i fa'aipoipo e aumaia mo le aiga o le fasi tupe lea, e na te teu fa'alelei ona o le mea e pito tāua ma e tu'u e ia i lana fanau teine. Pe a lē iloa se tupe e tasi, o se mala mata'utia lea; pe a toe maua, o se 'oli'olisaga lea, e vala'au ai fafine tuā'oi ma āna uō ina ia tofusia i le fiafia.

Ua fetalai Keriso, "A maua, ua fa'apotopoto ai ana uō ma ē tua'oi ma ia, ua fai atu, Ia tatou 'oli'oli ia; auā na 'ou maua le tupe na lē iloa ia te a'u. 'Ou te fai atu ia te outou, ua fa'apea le 'oli'oli i luma o agelu a le Atua, ona o le tagata agasala e to'atasi ua salamō" (Luka 15:9, 10).

E fa'apei o lea na muamua atu, o lenei fa'ata'oto e fa'asino i le lē iloa o se mea a e o le a sa'ilia ia toe maua mai ma i'u ai i se 'oli'olisaga tele. Peita'i o ia fa'ata'oto e lua e fa'aasino lea i vasega o tagata 'ese'ese. E iloa e le mamoe ua lē iloa o ia; sa ia alu 'ese mai le leoleo mamoe ma le lafu ma ua lē mafai ona toe fa'afo'i ia e ia lava. E fa'asino i ē e iloa ua vavae 'ese latou mai le Atua ma ua i se tulaga fa'aletonu, i le fa'alumaina, ma ua fa'aosoosoina. O le tupe na lē iloa e fa'asino i ē o lo'o lē iloa i le sesē o le agasala, a e latou te lē o iloa le tulaga o lo'o latou i ai. Ua vavae 'ese i latou mai le Atua, peita'i e latou te lē o iloa ua malaia o latou agaga a e latou te lē o mafaufau i ai ma e lē o fa'apopoleina ai. Ua a'oa'o mai Keriso i lenei fa'ata'oto, o ē lē amana'ia folafolaga a le Atua o pogai ia o Lona alofa mutimutivale, e tatau ona sa'ilia ina ia toe fa'afo'i i le Atua.

Na sē 'ese le mamoe mai le lotoā; sa lē iloa i le vaomatua po o luga o le mauga. O le tupe sa lē iloa i totonu o le fale. Sa lē iloa i se mea e latou te felāta'i, a e peita'i e na o le sa'iliga ma'elegā e mafai ai ona toe maua mai.

E i ai se a'oa'oga lelei mo aiga mai lenei fa'ata'oto. I totonu o le aiga, e i ai taimi e tele ai le lē fa'aeteete fa'atatau i agaga o ōna tagata. Atonu o le a i ai se to'atasi o le aiga ua tau mamao ma le Atua, a e tau lē lagona ina ne'i i ai se popole i le vā fa'ale-aiga mo se tasi o meaalofo a le Atua o le a lē iloa.

O le tupe o se fasi ario lava lea, e ui ina o lo'o ta'atia i totonu o otaota ma le pefu. E sa'ili e lē ōna lea mea itiiti ona e tāua iā te ia. E fa'apea agaga uma ona tāua i le silafaga a le Atua, e ui ina ua fa'aleagaina e le agasala. E pei ona fa'amauiina le fa'atusa ma le fa'amatalaga a le malō o lo'o i ai le pule, sa fa'apea ona tau'ave e le tagata mai lona foafoāga le fa'atusa ma le fa'amatalaga o le Atua; ma e ui ina ua fa'aleagaina nei ma ua fa'apogisāina i le malosī o le agasala, o lo'o i ai pea le tusi o lenei fa'amatalaga i luga o agaga ta'ito'atasi. E fa'anaunau le Atua ia toe fa'afo'i mai lea agaga ma toe tusia ai Lona lava fa'atusa i le amiotonu ma le mamalu.

Sa matuā sa'ili ma le ma'elegā le fafine mo lana tupe na lē iloa. Na ia tapena 'ese meafale, sa tutu le molīga'o, ma salu fa'amamā le fale. E ui ina lē iloa le tupe e tasi, a e o le a lē malōlō lana taumafaiga se'ia maua lea tupe. Ia fa'apea le aiga ona faia mea uma e mafai ia toe fa'afo'i i le Atua le uso e to'atasi ua lē iloa. Mo isi o le aiga ia su'esu'e ifo ma le fa'aeteete le tagata lava ia iā te ia, ia iloiloia gaoioiga o le olaga. Ia va'ai ifo pe lē o i ai se sesē, se fa'alētonu i le ta'ita'iga, ua ala ai le lē salamō o lea agaga.

Ia lē malōlō mātua pe a o i ai se isi o le fanau e lē iloa lona tulaga agasala, ia fa'amumū le molī. Sa'ilili le afioga a le Atua, ma ia ala i lona malamalama, ia iloilo ma le filigā mea uma i le aiga, ina ia iloa ai pe aiseā ua lē iloa ai se tasi o le fanau. Ia sa'ilili e mātua o la'ua loto, iloilo tū masani ma fa'agaoioiga o aso faiso'o. O le fanau o tofi mai le Ali'i, ma e tatou te tali iā te Ia mo le pulea o Āna mea totino.

E i ai tamā ma tinā e naunau ia galulue fa'amisionare i nu'u 'ese; e to'atele o lo'o galulue ai i galuega fa'a-Kerisiano i fafo atu o le aiga, a e o le fanau e lē o i ai se so'otaga i le Fa'aola ma Lona alofa

tunoa. E to'atele mātua ua tu'u atu i le faife'au po o ta'ita'i o a'oga o le Sapati le galuega o le fa'atosina mai o a latou fanau, peita'i ua latou lē amana'ia la latou galuega na tu'u mai e le Atua e fai. O le a'oa'oina ma le fa'ata'ita'i o le fanau ia 'avea ma Kerisiano o le galuega e aupito sili le maualuga e faia e mātua mo le Atua. O lea le galuega e mana'omia ai le onosa'i, e taumafai ia la ma'elegā ma ia filigā mo le olaga atoa. Pe a lē faia i lenei galuega ua tu'uina mai, ua tatou fa'aailoa atu o i tatou o tausimea lē fa'amaoni, ma e leai sa tatou fa'amalamalamaga mo lenei fa'atamala o le a talia e le Atua.

A e peita'i ia lē fa'apopoleina ē sa fa'atamala i lea vaega. Na sa'ili e le fafine lana tupe sa lēiloa se'ia ōna maua. Ia fa'a'apea ona galulue mātua ma le alofa, fa'atuatua ma le tatalo mo a latou fanau, se'ia o'o ina fa'afiafiaina ma mafai ona ō atu i le Atua ma le 'alaga fa'afetai, e fa'a'apea, "Fa'auta, o a'u nei ma la'u fanau, o ē ua foa'iina mai iā te a'u e leova" (Isaia 8:18).

O le galuega fa'amisionare lenei i le aiga, ma e tāua mo ē o lo'o faia le galuega e pei lava o ē o lo'o faia i ai. Pe a tatou galulue ma le fa'amaoni i o tatou aiga, o lo'o tatou galulue lea mo le Atua, o ē o le a tatou i ai fa'atasi i le malō ma le ola e fa'avavau. Ia tatou fa'aali lea lava agaga fiafia mo o tatou uso uma iā Keriso fa'apei o a tatou lava aiga moni.

Ma ua fuafua e le Atua o le a fa'a'apea ona tatou galulue mo isi fo'i, auā o le fa'alauteleina o lo tatou alofa ma le agalelei o le a tatou maua ai pea i so'o se mea se galuega e tataua ona faia. O le aiga fa'aletagata a le Atua e aofia ai le lalolagi atoa, ma ia leai se isi e i fafo ona ua lē amana'ia.

So'o se mea e tatou te i ai, o lo'o i ai le tupe ua lē iloa, a e mana'omia ia tatou sa'ili i ai. O lo'o tatou sa'ili ea la i ai? I aso ta'itasi, e tatou te fa'afeagai ai lava ma ē o lo'o lē amana'ia mea fa'aleagaga; tatou te talanoa ma latou, e tatou te asiasi fo'i ma latou; a e tatou te fa'aalia ea se agaga fia fesoasoani atu i lo latou ola fa'aleagaga? E tatou te fa'aailoa atu Keriso o le Fa'a'ola fa'amagalo agasala? Pe a o mafanafana o tatou loto i le alofa o Keriso, e tatou te ta'u atu iā i latou lea alofa? A leai, o le a fa'a'apefea ona tatou fa'afeso'ota'i ma ia agaga - o ē o le a lēiloa e fa'avavau - pe a tatou tutū atu ma i latou i luma o le nofoāli'i o le Atua?

O ai e mafai ona tau fa'atatauina le tāua o le agaga? O le a e iloa lona tāua, alu atu i Ketesemane, ma tū mata'i ai Keriso i itulā uma a o tigā ai, a o maligā ifo mai iā te Ia le toto ma le vai. Ia tepa a'e i le Fa'a'ola o lo'o si'itia i luga o le satauro, ma fa'alogo i lenā 'alaga, "Lo'u Atua e, lo'u Atua e, se ā le mea ua e tu'ulafoa'i mai ai A'u?" (Mareko 15:34). Inā tepa a'e i le āo ua manu'a, le itū ua tuia, o 'a'ao ua fa'aleagaina. Ia manatua na tu'ua mea uma e Keriso, mo lo tatou toggiola, ma tu'uina ai le lagi i se tulaga faigatā. I le satauro, e manatua ai e tu'u atu lava e Keriso Lona soifua mo le tagata agasala e to'atasi, o le a fa'atatauina ai le tāua o le agaga e tasi.

Afai o lo'o e feso'ota'i ma Keriso, o le a e fa'atatauina le tāua o tagata ola ta'ito'atasi uma. O le a e lagona i lou loto le alofa mo isi fa'apei o le alofa o Keriso mo 'oe. O le a e fiafia e fa'atosina mai iā Keriso a e lē o le tuli'ese atu i latou o ē na Ia malū ai. Se manū o le a lē mafai ona toe fa'afo'i mai i le Atua pe ana lē taumafai Keriso e galue mo i latou; o le galuega fo'i lenei e mafai ai ona tatou lavea'i mai agaga. Pe a tatou iloa o i latou o lo'o aga'i atu i le oti, o le a tatou lē malōlō filemū ma le lē popole. O le tele o la latou agasala ma le loloto o lo latou mafatia, o le tele fo'i lea o la tatou taumafaiga mo le fa'asaoina o i latou. O le a tatou iloa le mea e mana'omia e i latou o lo'o puapuagātia, o ē o lo'o agasala i le Atua, ma o lo'o mafatia e 'avega o le ta'usalaina. O le a e lagona se tigāalofa mo i latou, ma o le a e 'a'apa atu iā i latou ma se lima fesoasoani. Ona o lou alofa ma lou fa'atuatua, o le a e aumai ai i latou iā Keriso. O le a leoleo ma fa'amalosi iā te i latou. O lo latou fa'amoemoe o le a tumau ona o lou tigāalofa ma le fa'atuatua moni.

O lo'o ua nofo sauni pea agelu uma o le lagi e 'au'aumea fa'atasi mo lenei galuega, ma e fa'a'apea 'oloa uma o le lagi ua saunia e fa'aaogāina e i latou o lo'o sa'ili e laveā'i ē ua sē. O le a fesoasoani agelu iā te 'oe ina ia e maua ē aupito loto ma'a'a ma ē sili le fa'atamala. E fa'afiafiaina le lagi atoa pe a toe fa'afo'i mai i le Atua se agaga e to'atasi; o le a tā la'u pese a agelu ma fai vi'iga i le Atua ma le Tama'i Mamoe ona o lo latou alofa mutimutivale ma le fa'apalepale i le fanau a tagata.

"Na Lē Iloa a e ua Toe Maua"

Matā'upu 16

O lenei matā'upu e fa'avae i le Luka 15:11-32.

Ua fa'ailoa manino mai e fa'ata'oto i le mamoe na lēiloa, le tupe na lē iloa, ma le atali'i fa'amaumau mea le alofa mutimutivale o le Atua mo i latou o ē o lo'o sē 'ese mai iā te Ia. E ui ina fulitua i latou i le Atua, a e Na te lē tu'ulafoā'i i latou i o latou puapuagā. E tumu o Ia i le agalelei ma le alofa fa'apalepale iā i latou uma o lo'o fa'afeagai ma fa'aosoosoga a le fili faitogafiti.

I le fa'ato'ato o le atali'i fa'amaumaumea, o lo'o tu'u mai ai e le Ali'i Āna faiga ma latou o ē na iloa muamua le alofa o le Tamā, a e peita'i ua latou fa'ataga le taufa'asesē e ta'ita'i 'ese latou ia faia mea e na te loto i ai.

"O le tasi tagata e to'alua ona atali'i. Ua fai atu le ui'i i lona tamā, Sena e, ia e 'au mai iā te a'u lo'u tofi o le 'oa; ona vaelua lea e ia o ana mea ia te i laua. Ua mavae nai aso, ona faapotopoto ai lea e le uii mea uma, ua alu malaga i le nuu mamao" (Luka 15:11-13).

Sa fiu le atali'i lea ma lē mana'o i le taofiofi i le aiga ma lona tamā. Ua manatu ia ua fa'aititi ai lona sa'olotoga. A e ua ia fa'auigasesē le alofa ma le tausiga a lona tamā mo ia, ma ua naunau ai ia e mulimuli i ōna ia lava mana'oga.

Sa fa'ailoa e le talavou e leai sona tiute tau'ave i lona tamā, e leai sona loto fia fa'afetai; peita'i sa ia fa'ailoa mai o ia o se atali'i tāua ma e i ai sana aiā i le 'oa a le tamā. O le tofi e tatau mo ia pe a maliu le tamā, ua mana'o ia na maua i le taimi nei lava, ona o lona tu'inanau ia fa'afiafia i lenei lava taimi a e lē va'ai i le lumana'i.

Ua maua lona tofi, ona alu lea i "se nu'u mamao," mamao mai le aiga o lona tamā. Ona ua tele āna tupe, ma ua sa'oloto e fai so'o se mea e mana'o i ai, ua fa'afefeteina lona loto i le manatu ua taunu'u lona fa'amoemoe. Ua leai se isi e vavao atu i mea e naunau i ai lona loto e fia fai, a e na o āna uō lē fa'amaoni sa fesoasoani e fa'amaumau "ana mea...ua so'ona ulavale."

Ua ta'u mai e le Tusi Pa'ia tagata o ē "fa'afiapopoto i latou, a e valea" (Roma 1:22) ma ua fai lea ma tala fa'asolopito o le olaga o le talavou i le fa'ata'oto. Ua fa'amaumau uma i tu'inanau o le tino le 'oa na ia tapa i ai ma le loto fa'apito mai lona tamā; ua ia fa'amaumau le 'oa o lona olaga talavou. O tausaga tāua o le olaga, o le malosi o le poto, o va'aiga matagofie a le talavou, o naunauta'iga fa'aleagaga - o nei mea uma e fa'aumatia i afi o le tu'inanau.

Ina ua oge le nu'u ma ua tele ōna mana'oga, sa ia feso'ota'i atu i se tasi tagata o lea nu'u, ma galue ai i le fanua e fafaga puā'a. O lenei galuega e matuā fa'atauva'a ma tulaga maulalo i le aganu'u a Iutaia. O lea talavou na fa'aali lona loto mitamitavale i lona sa'olotoga, a e o lenei ua 'avea ia ma pologa, ua saisaitia e se noataga e aupito leaga - "o maea o āna agasala e taofia ai o ia" (Fa'ata'oto 5:22) Ua mavae 'ese le fe'ilafi ma le susulu o tu'inanau na fa'atosina i ai o ia, ma ua lagona nei e ia le mamafa o ōna noataga. A o nofo o ia i luga o le 'ele'ele i lea nu'u ua matelāina i le ōge, ua leai ni uō a e na o puā'a, ma sa tupu lona mana'o i atigi mea a meaola. E le'i i ai se tasi o ē na fia feso'ota'i ma ia a o tele āna 'oa. O fea nei ana mea fa'afiafia? Ua 'avea nei ia o se tagata pito mafatia, ona ua fa'ate'ia lona loto fuaiaifo, ma ua iloa lona lē fiafia. O lenei ua uma ona fa'aalu ana tupe, ua lē maua se mea'ai, ua fa'amaulaloina le loto mitamitavale, o lona uiga moni ua fa'amaulaloina, ua loto vaivai ma ua leai se fa'amoemoe. o ia ua sili le pagātia.

O se ata lea o le tulaga o le tagata agasala! E ui ina si'omia o ia i fa'amanuiāga o Lona alofa tunoa, a e leai se fa'anaunauga e sili ona fia maua e le tagata agasala o lo'o sa'ili pea i tu'inanau fa'alelalolagi e pei o le vavae 'ese mai le Atua. E fa'apei o le atali'i lē fia fa'afetai, ua ia tapa i mea lelei a le Atua e fa'apea o āna mea e ala i lana aiā tatau. E 'ave e ia mea mai lana aiā, e na te lē faia se galuega alofa, ma e lē fa'aalia se loto fa'afetai. E fa'apei o Kaino ina ua alu 'ese ia mai le silafaga a le Atua a e sa'ili mo sona ia lava aiga; e fa'apei o le atali'i fa'amaumaumea ona alu malaga 'ese atu i se "nu'u mamao," e fa'apea fo'i tagata agasala ona sa'ili se fiafia i le fa'agalogalo o le Atua (Roma 1:28).

So'o se ola e fa'aaogā ma le fa'apito, o le ola so'ona fai lea, e tusa pe fa'apefea le foliga mai. Ma o ai lava e taumafai e ola i se tulaga e vavae'ese mai le Atua, o le a fa'amaumau i āna mea. Ua ia fa'amaumau tausaga aogā, fa'ataugā i le malosi o le mafaufau ma le loto ma le agaga, a e ua galue ia fa'amativa ai ia lava e fa'avavau. O le tagata ua vavae'ese mai le Atua ina ia galue mo lona lava lelei, o ia ua fa'apologaina e le 'oa. O le mafaufau na faia e le Atua mo le mafutaga ma agelu ua fa'amaulaloina e galue ai mo mea fa'alelalolagi ma le olaga lē taupulea. O lea le i'uga o le manatu fa'apito.

Afai ua e filifili i lea itu'aiga olaga, ia e iloa o lo'o e fa'aalu le tupe i mea e lē aogā, ma e galue mo mea e lē manuia ai. E o'o mai le itulā o le a iloa ai lou pa'ū maulalo. Ina ua na o 'oe i se nu'u 'ese, ua e lagona lou mafatia, ona e tagi a'e ai lea, "Auē o a'u le tagata malaia! o ai sē lavea'i ia te a'u ai le tino o lenei oti?" (Roma 7:24). O lenei le 'upu moni mo tagata uma, fa'apei ona ta'u mai i 'upu a le perofeta, "Ia malaia le tagata e fa'atuatua i tagata, ma ua fai tagata mona lima a ua liliu 'ese lona loto iā Ieova. 6 E 'avea o ia pei o le tula i le vao, na te lē iloa fo'i pe a o'o mai mea lelei; e mau ai o ia i mea pa'a'ā i le vao, o le nu'u naumati ma le lē āinā" (Jeremia 17:5, 6). O le Atua "o Lē na te fa'aoso i Lona lā i ē ua amio leaga atoa ma ē ua amio lelei; ua Ia fa'atotō ifo fo'i le ua i ē ua amiotonu, atoa ma ē ua amiolētonu" (Mataio 5:45); peita'i o lo'o i le tagata le malosi e puipua ai i latou mai le susulu o le lā ma timuga. O lea a o susulu mai le Lā o le Amiotonu, ma to'ulu timuga o le alofa tunoa mo tagata uma, a e o lo'o vavae 'ese pea i tatou mai le Atua, ma tatou "mau ai i mea pa'a'ā i le vao."

O lo'o fa'anaunau pea le Atua ma Lona alofa mo le tagata e to'atasi ua filifili e vavae 'ese mai iā te Ia, ma ua Ia galue e toe fa'atosina mai ia ma fa'afō'i i le fale o le Tamā. I lona tulaga pagātia, ua "atamai" loa le atali'i fa'amaumaumea. Ua mavae 'ese le mana tautafa'asesē na tu'u e Satani i ōna luga, ua ia iloa o ōna puapuagā o i'uga o āna filifiliga, ona ia fa'apea ane lea, "E lē to'atele ea o 'au'auna a lo'u tamā ua faula'i a latou areto ua totoe; a o a'u, 'ou te matelāina. O le a a'u tula'i ma alu i lo'u tamā" (Luka 15:17, 18). E ui ina mafatia o ia, a e ua maua e le fa'amaumaumea le fa'amoemoe ina ua talitonu i le alofa o lona tamā. O le alofa lava lea sa ta'ita'iina o ia aga'i i le aiga. E fa'apea le ta'utinoga mautinoa o le alofa o le Atua e una'iina le tagata agasala e toe fo'i i le Atua. "E ta'ita'iina 'oe e le agamalū o le Atua i le salamō" (Roma 2:4). O le maea auro, o le alofa mutimutivale ma le fa'apalepale o le alofa fa'ale-Atua, e si'omiaina ai le agaga o lē a malaia. Ua fetalai le Ali'i, "O le alofa e fa'avavau, ua 'Ou alofa atu ai iā te 'oe; o le mea lea ua 'Ou fa'afualoaina ai Lo'u alofa iā te 'oe" (Jeremia 31:3).

E naunau le atali'i e ta'u atu lana agasala. O le a alu ia i lona tamā ma fa'apea atu, "ua 'ou agasala i Lē o i le lagi, atoa ma ōu luma; ua 'ou lē toe aogā ona ta'ua o lou atali'i." A e ua toe fa'aopoopo atu ma fa'a'ailoa atu ai le fa'atauva'a o lona manatu i le alofa o lona tamā, " a ia e 'avea a'u ia pei o se tasi o āu 'au'auna" (Luka 15:18).

Sa liliu 'ese le talavou mai le lafu puā'a, ua fa'asaga lana va'ai aga'i i lona aiga. Ona ua tino vaivai ma fia 'ai, na ia aga'i vave atu i le ala. O ōna lavalava ua masaesae lava; peita'i ua fa'amalosia e lona tulaga mafatia ma na fa'avavave lana savali ina ia o'o vave i le nofoāga na ola a'e ai, ma ina ia fai lana talosaga ia maua sona avanoa fa'atasi ma 'au'auna.

E le'i iloa e le talavou fa'amaumaumea le tigā ma le fa'anaunauga sa ia tu'u i le loto o le tamā, ina ua alu'ese mai le faitoto'a a lona aiga. A o fa'atasi ma āna uō i fa'afiafiāga 'ese'ese ma isi tu'inaanau fa'alelalolagi, sa ia lē mafaufau i le tulaga pogisā na o'o i luga o lona aiga. O le taimi nei a o savali i le ala e aga'i i le aiga, o lona tino ua fāi ifo i le vaivai ma ua lagona le matuā mafatia mai le savaliga, a e na te lē o iloa o lo'o mātā'i pea se tasi mo lona toe fo'i mai. Peita'i a o lo'o "mamao" lava a ua iloa atu ia e le tamā. E ui ina fa'aleagaina e le agasala le tino fa'aletagata, a e lē mafai ona lilo i le tamā foliga o le atali'i. Ua "mutimutivale lona alofa, ua momo'e atu ia, ua fusi iā te ia ma sogi atu iā te ia." (Luka 15:20).

Sa lē fa'atagaina e le tamā ni foliga lē fiafia po'o 'upu tauemu fa'ataui i puapuāga ma le tulaga o lona atali'i. Sa ia fa'aofu lona tino ua vaivai i le fa'ataugā, a o tagi a'e le atali'i i le salamō, "Lo'u tamā e, ua 'ou agasala i Lē o i le lagi, atoa ma ōu luma; ua 'ou lē toe aogā ona ta'ua o lou atali'i." Sa opo mai le atali'i i le fatafata o le tamā ma savavali i le aiga. O ia o se atali'i, ma e tataui ona fa'aaloaloga e tagata o i le aiga o lo'o fa'atalitali mai.

Ua fa'atonu atu le tamā i 'au'auna, "'Au mai ia le ofu tātapuvae e aupito lelei, ma fa'aofu iā te ia; ma ia tu'u se mama i lona lima, ma fa'ase'e i ona vae; 'au mai ia fo'i le tama'i povi peti, ma fasi; tatou te

'ai ma 'oli'oli; auā o lo'u atali'i lenei, na oti, ua toe ola mai; na lē iloa fo'i o ia, a ua maua. Ona latou 'oli'oli ai lea" (Luka 15:22-24).

O lenei talavou sa manatu o lona tamā e faigatā ma fa'asauā; a o le taimi nei ua matuā suia lava lona mafaufau. E fa'apea i latou ua fa'asesē e Satani ona manatu o le Atua e fa'amaliegatā ma e faigatā. Latou te fa'apea o Ia e silasila ifo ina ia tau fa'aleaga ma ta'usala tagata ona e fa'apea ua Ia lē finagalo e talia se tagata agasala pe o i ai se faitiōga o le a lē mafai ai ona fesoasoani iā te ia. Ua fai mai i latou o Āna tulafono ua fa'afaigatā ai ona fa'afiafia tagata, o se avega mamafa o lo'o taumafai latou e sola 'ese ai. Peita'i o mata o ē o lo'o talia le alofa o Keriso, o le a va'ai latou o le Atua e tumu i le tigāalofa. E lē foliga fa'asauā pe fa'amaliegatā, a e o se Tamā alofa e fa'anaunau e fusi mai le atali'i ua salamō. O le a ta'utino le tagata agasala fa'apei ona fai mai le Tusipese, "E fa'apei ona alofa mutumuti vale o le tamā i lana fanau, e fa'apea lava ona alofa mutumuti vale o Ieova i ē matata'u iā te Ia" (Salamo 103:13).

I le fa'ata'oto e le'i i ai ni 'upu fa'atigā, lē fa'amanatuina le ala leaga na uia e le atali'i fa'amaumau mea. Sa lagona e le atali'i ua fa'amagaloina o ia, ua galo mea ua tuana'i, ma ua soloi'esea e fa'avavau. O lea ua fetalai mai le Atua i le tagata agasala, "Ua 'Ou sōloia ōu solitulafono e pei o se ao uliuli, ma āu agasala e pei o se ao" (Isaia 44:22). "Ou te fa'amagalo i a latou amio leaga, ma 'Ou lē toe manatua a latou agasala" (Jeremia 31:34). "Ma "O nā ona pō, ma lenā tausaga, ua fetalai mai Ieova e sa'ilia ai le amiolētonu a Isara'elu, a e leai; e sa'ilia fo'i agasala a Iuta, a e lē maua" (Jeremia 50:20).

Oi se ta'utinoga ua i ai nei, ua finagalo le Atua e talia le tagata agasala ua salamō! O 'oe le uso, o lo'o e filifili ea e 'oe lou lava ala? Ua e sē mamao mai le Atua? O lo'o e sa'ili i tu'inanau e fua mai e le agasala, a e mulimuli ane e i'u i le liu efuefu i ōu laugutu? Ua o'o nei i le taimi, ina ua fa'aalu uma āu mea, ua lē manuia fuafuāga o lou olaga, ua leai sou fa'amoemoe, o le a e nofo na o 'oe e to'atasi ua tu'ulafoa'iina? O lenei ua e lagona manino le leo ua leva ona fetalai mai i lou loto, a e te le'i fia fa'alogi i ai, "Tutū ia i luga outou, inā ō 'ese ia; auā e lē o lo outou malōlōga lenei; ua leaga, o le mea lea e malaia ai outou, e matuā tele fo'i le malaia" (Mika 2:10). Ia e toe fo'i i le fale o lou Tamā; o lo'o Ia vala'au mai 'oe, e fa'apea, "Fo'i mai ia iā te A'u, auā ua 'Ou fa'atauina 'oe" (Isaia 44:22).

Ia 'aia ne'i e fa'alogi i le apoapoa'i mai a le fili e te taumamao ma Keriso se'ia fai ia lelei lau amio; se'ia e o'o i se tulaga e tatau ai ona e sau i le Atua. A e pe afai e te fa'atali mo lea taimi, o le a lē o'o 'oe i se tulaga o le a mafai ai ona e sau. Pe a fa'asino Satani i ōu lavalava palapalā, ia e manatua le folafolaga a Iesu, "O ia fo'i e sau iā te A'u, 'Ou te lē tulia lava i fafo" (Ioane 6:37). Ta'u i le fili ua fa'amamā agasala uma e le toto o Iesu Keriso. Ia fai mo 'oe le tatalo a Tavita, "Ia e fa'amamā iā te a'u i le isopo, ona mamā ai lea o a'u; ia e fufulu mai iā te a'u, ona sinasina ai lea o a'u e sili i lo le kiona" (Salamo 51:7).

Ia e tula'i ma alu i lou Tamā, auā o le a Ia fa'afetaia'i 'oe a o lo'o e mamao lava. E tusa pe na o le tasi sau la'a aga'i iā te Ia ma lou loto salamō, a e o le a Ia fusia 'oe i Ōna 'a'ao alofa, ona e fa'afofoga Ia i le tagi mai a le agaga ua salamō moni. E silafia e le Atua le loto o lo'o tau 'a'apa atu iā te Ia. E leai se tatalo e tu'u atu, po o le ā le fa'atauva'a, e leai se loimata e pa'ū, tusa pe o le ā le tau fa'alilolilo, e leai se fa'anaunauga mo le Atua, pe o le ā le vaivai, a e peita'i e tula'i mai pea le Agaga o le Atua e fetaia'i ma ia tulaga uma. A e le'i faia se tatalo po o le fa'a'ailoa atu o mana'oga o le loto, a o le alofa tunoa o Keriso ua alu a'e e fetaia'i ma le alofa o lo'o galue i le agaga o le tagata.

O le a to'esea e lou Tamā fa'alelagi lavalava ua fa'aleagaina e le agasala. I le valo'aga fa'afa'ata'oto matagofie a Sakaria, sa tula'i mai le faitaulaga sili o Iosua i ōna ofu e 'ele'elea lava i luma o le agelu a le Ali'i, e fa'asino lava lea i le tagata agasala. Ma sa fetalai atu le Ali'i, "'Ave 'ese ia o 'ofu 'ele'elea ua ofu ai o ia. Ua Ia fetalai atu fo'i iā te ia, Fa'auta, ua 'Ou 'ave'esea āu amiolētonu i ōu luga; 'Ou te fa'aofu fo'i iā te 'oe i le 'ofu matagofie... Ona latou fa'ae'e ai lea o le pulou lelei i lona ulu, ma fa'a'ofu ia te ia i 'ofu" (Sakaria 3:4, 5). E fa'apea fo'i ona fa'aofu 'oe e le Atua i "ofu o le fa'aolataga," ma fa'apulupulu 'oe i "le ofu o le amiotonu" (Isaia 61:10). Ma "E ui lava ina ta'o'oto outou i le vā o ulu, e 'avea outou e pei o apa'au o le lupe e liloia i ario, ma ōna fulu e liloia i le auro samasama" (Salamo 68:13).

Na te aumaia 'oe i Lona fale mo le tausama'aga, ma o Lana fu'a i ōu luga o le alofa lea (Pese a Solomona 2:4). Ua Ia fetalai mai, " Afai e te savali i O'u ala,... 'Ou te tu'u atu fo'i iā te 'oe ta'ita'i mai iā te i latou nei o e tutū mai" (Sakaria 3:7).

"E pei ona fiafia fo'i o le fa'ato'āfaiavā i lana avā, e fa'apea ona fiafia o lou Atua iā te oe" (Isaia 62:5). Ma "E 'oli'oli o Ia iā te 'oe ma le fiafia; o Lona alofa e lē fetalai ai o Ia; e 'oli'oli lava o Ia iā te 'oe ma le ofo fiafia. (Sefana'ia 3:17). O le a 'aufa'atasi le lagi ma le lalolagi atoa ina ua pepese fiafia i le vi'iga a le Tamā, "Auā o lo'u atali'i lenei, na oti, ua toe ola mai; na lē iloa fo'i o ia, a ua maua" (Luka 15:24).

E le'i i ai se mea na lē talafeagai ma le leo o le fiafia; a e peita'i ua fa'ailoa nei e Keriso se isi matā'upu. Ina ua toe fo'i mai le fa'amaumaumea i lona aiga, a o le atali'i ulumatua "sa i le vao;... ua sau ia, ua latalata mai i le fale, ona fa'alogo ai lea o ia i la'aupepe ua tā, ma le siva. Ua vala'au atu ia i le tasi 'au'auna, ua fesili atu, po o le ā le uiga o nei mea. Ua fai mai o ia iā te ia, Ua sau lou uso; ua fasi ai fo'i e lou tamā le tama'i povi peti, ina ua toe o'o mai o ia o ola. Ona ita ai lea o ia, e lē mafaia ona ulufale i ai" (F. 25-28). O lenei uso matua e le'i tofusua ia i le atuatuvaale o lona tamā, pe sa tulimata'i mo lē na lē iloa, o lea sa lē fiafia ai ina ua toe fo'i mai lē na alu malaga. E le'i i lona loto se fiafia, ma ina ua ia fesiligia le pogai o le fa'afiafiaga, sa fa'ate'ia le mataū'a o lona loto i le tali a le 'au'auna. O le a lē ulufale ia e fetalai ai ma lona uso na lē iloa. Ua ia fa'atatauina le loto alofa na fa'aalia i lē sa fa'amaumaumea, o le lē fa'aaloalo atu lea iā te ia.

Ina ua sau le tamā e fa'afeagai ma ia, sa na o le mitamita vale ma le leaga o lona uiga na ia fa'aalia. Sa manatu i lona ia lava olaga i le fale o lona tamā, ma fa'apea ai o lana 'au'aunaga e lē tauia, ma e lē fa'atusaina i le alofa ua fa'aalia i le atali'i na fo'i mai. Sa ia ta'u manino atu o lana galuega e pei lea o se 'au'auna a e lē o se atali'i. Sa alu lona mafaufau i le fa'aputu o 'oa e tele mai lona olaga lē fa'autauta, A o tataua ona maua e ia se fiafia i le fa'atasi ai o lona tamā, a e sa alu lona mafaufau i le fa'aputu o 'oa e tele mai lona olaga lē fuafua lelei. Sa fa'ailoa i āna 'upu lona lē fiafia i tu'inaanau o le agasala. Pe ana fai o le a tofusua lenei uso i meaalofo a le tamā, ua fa'atatau loa e le uso matua ua sesē le mea ua faia iā te ia. Sa ia fa'ailoa lona lē malie i le uso ona o le alofa ua fa'aalia iā te ia. Sa ia fa'ailoa atu fo'i pe ana i ai ia i le tulaga o le tamā, semanū na te lē talia le fa'amaumaumea; na te lē fa'ailoa o ia o se uso, a e na o le ta'u ia o "lou atali'i."

Peita'i sa fa'aali e le tamā le alofa fa'apalepale mo ia. Na ia fa'apea atu, "Tā e, ta te nonofo pea ma 'oe, o a'u mea uma fo'i, o āu ia" (Luka 15:31). O nei tausaga uma o le olaga fa'atauga o lou uso, e te le'i maua ea le avanoa e mafuta fa'atasi ai ma a'u?

Sa ia tu'u sa'oloto mea uma ia fa'amanuia ai olaga o lana fanau; e le'i mana'omia e fesiligia e le atali'i uiga o le meaalofo po o le fa'asoa. "O a'u mea uma, o āu ia." E tau ina ia e talitonu i lo'u alofa, ma e talia le meaalofo o lo'o avatu fua. Sa alu 'ese mai le aiga mo sina taimi le tasi atali'i, ma sa ia lē malamalama i le alofa o le tamā. Peita'i o lea ua toe fo'i mai ma ua tafi'esea manatu lē lelei uma o le leo o le fiafia. "O lou uso lenā na oti, a ua toe ola mai; na lē iloa fo'i, a ua maua."

Sa aumai ea le uso matua ina ia na iloa lona agaga lē fa'afetai ma le alofa? Na sau ea ia ina ia iloa o lona uso lava lea, tusa pe o ā ana agasala na fai? Na salamō le uso matua ona o le mataū'a ma le loto ma'a'a? E le'i fetalai Keriso fa'atatau i lea mea. Ona o lo'o fa'aauau pea le fa'ata'oto, ua tu'u atu e Keriso i Lana 'au fa'alologolo ia latou filifili i se fa'ai'uga.

O le atali'i ulumatua sa fa'atusa lea i Iutaia lē salamō i ōna pō o Keriso, ma le 'au Faresaio i tupulaga uma, o ē o lo'o va'ai ma le fa'asiasia i ē latou te manatu o telona ma tagata agasala. O i latou ia ua tumu i le fa'afiaamiotonu, a e sa fa'afetaia'i latou e Keriso i lo latou lava mafaufauga. E pei o le ulumatua o le fa'ata'oto, sa latou maua fa'amanuiāga fa'apitoa mai le Atua. Ua fa'apea o i latou o atali'i i le aiga o le Atua, a e o iā i latou agaga o 'au'auna. E lē galulue latou mai le alofa, a e ona o le naunau ia tauia. I la latou va'ai, o le Atua o se pule sauā. Sa latou va'ai ma le loto vale ina ua vala'au Keriso i telona ma tagata agasala ina ia talia le meaalofo o Lona alofa tunoa - o le meaalofo lea sa naunau a'oa'o e maua mai a latou galuega lelei. Sa fa'atumulia le finagalo o le Tamā i le 'oli'oli ina ua toe fo'i mai le atali'i fa'amaumaumea, a e ua fafaguina le mataū'a iā i latou.

I lenei fa'ata'oto ua fa'aalia i le faitiōga a le tamā i le ulumatua le ōlega alofa mai le lagi i le 'au Faresaio. "O a'u mea uma, o āu ia" - o se mea alofa a e lē o se totogi. E pei o le fa'amaumaumea, e te maua lenei meaalofo ona o le alofa tunoa o le Tamā.

O le fa'afiaamiotonu e lē na o le ta'ita'iina o tagata e fa'auiga'eseina le Atua, a e peita'i e fa'ama'a'aina ai le loto ma fai faitiōga aga'i i o latou uso. E pei o le ulumatua sa ia va'ava'aivale i lona uso, ona o le loto fa'apito ma le matau'a, e faitio i so'o se gaoioiga, ma tete'e i so'o se sesē. Na te sa'ili ia

ta'uamiotonuina lona ia lava agaga lē fa'amagalo. E fa'apea fo'i le to'atele i ōna pō nei. A o feagai le agaga ma ulua'i fa'aosoosoga, o le tele e tutū ma faitio, fa'asinosino lima, tau tu'ua'i, ma fa'atu'i'ese. Atonu e fa'apea mai o latou o fanau a le Atua, a e o lo'o latou fa'aalia le agaga o Satani. E ala i o latou uiga e fa'atatau aga'i i o latou uso, e latou te fa'atulaga latou lava ia i se mea e lē mafai e le Atua ona tu'u i latou le malamalama o Ōna fofoga.

E to'atele o lo'o fesili pea, "'Ou te alu atu ma ni ā i luma o Ieova, 'ou te ifo atu ma ni ā i le Atua maua'ua? 'Ou te alu atu ea i Ōna luma ma taulaga mū, ma tama'i povi e tasi lo latou tausaga? E fiafia ea Ieova i afe o mamoe po'a, ma manomano ālia o tafe suāu'u?" A e "ua fa'aali atu e Ia iā te 'oe le mea lelei; se ā fo'i se mea e finagalo ai Ieova iā te 'oe, pe a le o ia mea, ia fai le amiotonu, ia naunau i le alofa, ma ia feoofa'i ma lou Atua ma le loto fa'amaulalo?" (Mika 6:6-8).

O le galuega lena na filifilia e le Atua - "ia tatalaina fusi na faia i le amio leaga, e tatala fusi o le amo, e tu'uina atu ia sa'oloto ē ua fa'asauāina, ma ia outou gausia amo uma lava,.. ia 'aia fo'i e te lafi iā i latou o lou lava aiga" (Isaia 58:6, 7). Pe a e iloa o 'oe o le tagata agasala e na o le alofa o lou Tamā fa'alelagi e mafai ona sao ai, o le a iā te 'oe le tigāalofa mo isi o lo'o mafatia i le agasala. O le a e lē toe fa'afetaia'i le puapuagātia ma le salamō i le matau'a ma le a'oa'iga. Pe a 'ave'ese le manatu fa'apito mai lou loto, o le a e lagona le tigāalofa ma e fa'asoa atu le alofa ma le fiafia o le Atua e fa'asao mai ai ē ua lē iloa.

E moni ua ta'u i tatou o le fanau a le Atua; peita'i afai e moni lea mea, o "lou uso" lava la lea lē na "oti a ua toe ola mai; na lē iloa, a ua maua." Ua fusia fa'atasi oulūa i se fusi e mau; ma e silafia e le Atua o ia fo'i o se atali'i. A e te'ena lou so'otaga iā te ia, o le a e fa'aailoa atu i ōu uiga o 'oe e na o se 'au'auna i le aiga, a e lē o se atali'i i le aiga o le Atua.

E ui ina e lē fa'atasi ai i le fa'afeiloā'iga ma lē na lē iloa, o le a fa'aauau pea le fa'afiafiāga, ma o le a fa'anofo lē na fo'i mai i tafatafa o le Tamā fa'apea le galuega a le Tamā. O lē na tele le loto fa'amagalo, e fa'apea ona tele le alofagia. A o 'oe o le a e i fafo i le pōuliuli, ona "o sē lē alofa ua lē iloa e ia le Atua; auā o le Atua, o le alofa lava Ia" (I Ioane 4:8).

"Ia Fa'asao i Lenei Fo'i Tausaga"

Matā'upu 17

Fa'avae i luga o le Luka 13:1-9.

Na so'ofa'atasi e Keriso i Āna a'oa'oga le lapata'iga o le fa'amasinoga ma le vala'au o le alofa tunoa. Sa fetalai o Ia, "E le'i sau le Atali'i o le tagata e fa'aumatia le ola o tagata, a ia fa'aolaina" (Luka 9:56). Na fa'amalamalamaina i le fa'ata'oto o le la'au o le mati e lē fua Lana galuega o le alofa tunoa.

Sa lapata'i pea Keriso i tagata e uiga i le o'o mai o le malō o le Atua, ma na Ia a'oa'i latou ona o le fa'atamala ma le lē manatu popole. Sa vave ona latou faitauina fa'ailoga i le vānimonimo; a o fa'ailoga o lo'o tu'u mai mo lea taimi na fa'asino manino i Lana galuega, sa latou lē malamalama i ai.

A e peita'i e tutusa lava tagata o nei ona pō ma tagata o lea vaitaimi, le manatu ua fa'apitoa latou e le lagi, ma o le fe'au o a'oa'iga e fa'atatau mo isi tagata. Sa fa'ailoa e le 'au fa'alologologo iā Iesu se mea mata'utia na tupu i se taimi lata mai. Sa fouvale tagata Iutaia i fuafuāga a Pilato, le kovana a Iuta, ona ia taumafai lea e fofō lea fa'afitauli. I se tasi taimi, ua osofa'i ai le malumalu i Ierusalem a o faia taulaga, ma sa to'atele le 'au tapua'i mai Kalilaia na afāina ai. Sa fa'apea ai loa Iutaia o le fa'afitauli ua o'o mai i ia tagata ona o la latou agasala, ma sa fa'amalieina ai o latou manatu lilo. I la latou va'ai, o latou lava e sili atu i lo ia tagata Kalilaia i le fa'atatau a le Atua. Sa latou fa'atalitali loa i ni 'upu a Iesu e ta'usalaina ai ia tagata, ma fa'apea mai ai o se fa'asalaga lea ua tatau mo i latou.

E le'i taumafai le 'au so'o e fa'ailoa ni o latou taofi se'ia latou fa'alogologo i se manatu o lo latou Ali'i. Na Ia tu'u iā te i latou ni a'oa'oga fa'apitoa e fa'atatau i le fa'amasinoina o uiga o isi tagata, ma le fuata'iina o le tau ma sui atu fa'atatau i lea fa'amasinoga. A e sa latou vā'ai atu iā Keriso ina ia na ta'uleagaina nei tagata fa'apea ua sili atu le agasala i lo isi. Sa fa'ate'ia i latou i Lana tali.

Sa faliu le Fa'aola i le motu o tagata, ma fetalai atu, "Fa te outou ea, ua sili ona agasala ia Kalilaia i tagata Kalilaia uma, ina ua tigāina i latou i mea fa'apena? 'Ou te fai atu iā te outou, e leai; a e afai tou te lē salamō, e fa'apenā lava ona fano outou uma" (Luka 13:2, 3). O nei mala uma sa fuafuaina ia ta'ita'iina ai i latou i le loto maulalo, ma ia salamō i a latou agasala. O lo'o ua fa'amālumālumai le taimi e tauia ai ma sui, ma o le a o'o iā i latou uma o ē le'i maua se lafitaga iā Keriso.

A o talanoa Iesu ma le 'au so'o ma le motu o tagata, na Ia tepataula'i aga'i i luma ma se va'aiga fa'avalōaga, ma ua silasila i 'autau o lo'o ua si'omia Ierusalem. Na Ia fa'afofoga i le pa'ō o savaliga a tagata o nu'u 'ese a o osofa'ia le 'ai filifilia, ma silasila atu i le afe ma afe o ē ua fa'aumatia i lea osofa'iga. E pei o ia tagata Kalilaia, o le to'atele o tagata Iutaia sa fasiotia i le lotoā o le malumalu a o faia a latou taulaga. Ua o'o mai malaia i luga o tagata ta'ito'atasi e fai ma lapata'iga mai le Atua i se malō ua fa'apea ona ta'usalaina. Sa fetalai Iesu, "Afai tou te lē salamō, e fa'apenā lava ona fano outou uma." O lo'o fa'aumiumi pea mo i latou sina taimi pu'upu'u lava o le aso o fa'ata'ita'iga. Sa i ai pea se taimi mo i latou ia iloa ai lo'o iā i latou mea e maua ai so latou filemū.

Ua Ia toe fa'aauau, "Sa i le tasi tagata le mati, na totō i lana tovine; ua alu atu ia e sa'ili ai ni fua, a e le'i maua. Ona fai atu lea o ia i le galue vine, Fa'auta, ua 'ou sau i ia tausaga ua tolu e sa'ili ni fua i lenei mati, a 'ou te le'i maua lava; inā tu'u ia i lalo; se ā fo'i le mea e fa'aleaogā ai le fanua?"

Sa lē tatau ona lē malamalama le 'au fa'alologologo a Keriso i le uiga o Āna fetalaiga. Na fai le pese a Tavita e uiga iā Isara'elu le vine sa aumaia i fafo mai Aikupito. Na tusia fo'i e Isaia e fa'apea, "Auā o le tovine a Ieova o 'au, o le aiga o Isara'elu lea, o tagata o Iuta fo'i, o Lana fa'ato'aga lea na Ia fiafia i ai." Sa afio mai le Fa'aola i le tupulaga na fa'asino i le mati i le tovine a le Ali'i - e i totonu o le si'osi'omaga o Lana tausiga ma fa'amanuiāga fa'apitoa.

O fuafuāga a le Atua mo Ōna tagata ma mea ofoofogia ua i o latou luma, sa tu'u maia i 'upu matagofie, "e igoa i latou, O la'au o le amiotonu, o le fa'ato'aga a Ieova, e fai mona vi'iga" (Isaia 61:3). Na fa'apea atu Iakopo e fa'atatau i lona atali'i pele, ina ua lata ona malii o ia, ma o lo'o iā te ia le Agaga o le Atua, "O Iosefa o le lā la'au o ia e fua, o le lā la'au e fua i tafatafa o le vaipuna; e sosolo ona lā i luga i le pā." Ma na ia fa'apea atu, "O le Atua o lou Tamā, o le fesoasoani iā te oe, o Lē e ōna le malosi uma lava

na te fa'amanuia 'oe i manuia mai le lagi i lugā, ma manuia mai le mea loloto o lo'o i lalō" (Kenese 49:22, 25). Sa fa'apea ona totōina e le Atua Isara'elu ia pei o se vine lelei i tafatafa o vaitūloto o le ola, auā ua Ia faia Lana tovine "i le mauga e lafulemū lava." Ua Ia "matuā 'eli i ai, ma aoao ai ma'a, na Ia totō ai fo'i le vine e aupito lelei" (Isaia 5:1, 2).

"Ona fa'atalitali ai lea o Ia, ia fua mai ni vine, a ua fua mai ai vine leaga" (Isaia 5:2). Sa matuā fa'aali atu le uiga fa'aaloalo e tagata i ōna pō o Keriso i lo Iutaia o tupulaga ua mavae, a e ua sili atu ona mana'omia e latou fa'amanuiāga fa'apitoa o le Agaga o le Atua. O fua tāua o le amio na fa'amatagofieina ma manogi i le olaga o Iosefa, e le'i fa'aalitinoina i le malō o Iutaia.

Na sa'ilia e le Atua e ala i Lona Ālo lea fua, a e na le'i maua. O Isara'elu ua lē aogā i lalo i le 'ele'ele, ua 'avea o se fetu'u ona ua na fa'aaogā le 'ele'ele o lo'o i le tovine manū e totō ai se la'au fua lelei. Ua ia taofia fa'amanuiāga a le Atua na Ia fuafua mo le lalolagi. Sa fa'amatala sesē le Atua e Isara'elu i nu'u 'ese. E le'i i ai so latou aogā, a e na o le 'avea ma fa'alavelave. O la latou tapua'iga sa ta'ita'i sesē ma aumai ai le malaia a e lē o le fa'aolataga.

I le fa'ata'oto, e le'i fesiligia e le teuteu tovine le fa'ai'uga ia tu'u i lalo le la'au pe a fai pea le lē fua mai; peita'i e iloa fo'i e ia le tāua o lea la'au lē fua i le pule o le tovine. E fa'afiafiaina o ia pe a va'ai atu ua tupu lelei ma fua mai lea la'au, ona ia tali atu lea e pei o le fa'anaunauga a le ali'i, "Le ali'i e, tu'u pea ia i lenei tausaga fo'i, se'ia 'ou 'eli fa'ata'ali'oli'o i ai, ma avane i ai otaota. Afai fo'i e fua mai, e lelei" (Luka 13:8).

E le'i fa'avaivai le galue fa'ato'aga ona o lea la'au lē fua, a e ua sauni ia e tausi atili pea i ai. E matuā tāua le la'au o le mati i le pule o le fanua ma le teuteu tovine, ma o le a faia mea uma e fa'aleleia ai mea uma e tau i le 'ele'ele. E fa'apea le tasi o le Tamā ma le Ālo i lo la alofa mutimutivale mo tagata filifilia. Na fetalai Keriso i Lana 'au fa'alogologo e fa'atatau i le tele na'uā o avanoa o le a tu'uina iā te i latou. E fa'aaogā mea uma e mafai e le alofa o le Atua ona fa'agaoioi, ina ia 'avea i latou ma la'au o le amiotonu, e maua mai ai fua mo le manuia o le lalolagi.

E le'i fa'ailoa mai e Iesu i le fa'ata'oto le fa'ai'uga o le galuega a le faifa'ato'aga. Sa fa'agata lava i inei le tala, ma ua tu'u le i'uga mo le tupulaga o lo'o fa'alogo mai i Lana fetalai. Ua avatu nei iā te i latou le lapata'iga, "Pe afai e leai, e mulimuli ane ona e tu'u ai lea i lalo" (Luka 13:9). E i o latou luga po o le a tataua ona fa'aleoina 'upu e lē mafai ona toe fa'afo'i mai. Ua lata mai lava le aso o le to'asā. I le taimi ina ua fa'amalaiaina ai Isara'elu, sa tu'u atu e le pule o le tovine iā i latou se lapata'iga i le fa'aumatia'aga o le la'au e lē fua.

Ua o'o mai iā i tatou i ōna pō o lenei tupulaga leo o lapata'iga. O 'oe ea, le loto fa'atamala, o se la'au e lē fua i le tovine a le Ali'i? E tataua ea ona ta'u atu pea iā te 'oe 'upu o le malaia? Ua fia le umi o e maua pea Āna meaalofoa? Ua leva ea ona Ia silasila ifo ma fa'atalitali pe fa'afo'i atu afea le alofa? Sa totōina i totonu i Lana tovine i lalo o le tausiga a le faifa'ato'aga, o i ni avanoa se tele na tu'u atu mo 'oe! Sa matuā fa'afiafiaina lou loto i le fe'au o le tala lelei; na e 'ave le suafa o Keriso, o 'oe, i le va'aiga mai fafo o se tasi o le ekalesia, o Lona tino pa'ia lea, a e peita'i e leai sou so'otaga ola ma le agaga e ofoofogia le alofa. E lē o fa'atafeina le matagofie o Lona soifuāga i totonu iā te 'oe; o le suamalie o Lona uiga alofa, "o fua o le Agaga" (Kalatia 5:22), e lē o fa'ailoa mai i lou olaga.

E maua pea le timu ma le lā ma le tausiga mai le galue fa'ato'aga e le la'au lē fua, ma e maua mea'ai mai le 'ele'ele. Peita'i e fa'apogisāina le fanua e ōna lālā lē fua, ma lē mafai ona olaola lelei a'e la'au o lo'o fua mai i lalo o lona paolo. E fa'apea fo'i meaalofoa a le Atua, o lo'o tele na'uā i ōu luga a e ua lē fa'asoaina atu se manuia i le lalolagi. Ua e 'ave'ese avanoa o lo'o tu'u atu e fai mo isi, a e ana leai 'oe, se manū ua fa'asoa atu ai iā i latou.

Atonu e itiiti lou iloa, o 'oe e leai se aogā i le 'ele'ele, a e ona o Lona alofa tele na'uā, e lē o tu'u ifo e le Atua 'oe i lalo. E lē fa'atauva'a 'oe i Lana silafaga; e lē fulitua Ia ma le lē popole, pe tu'ua 'oe ia fa'aumatia ai. A o silasila ifo i ōu luga, ua tagi o Ia fa'apei ona tagi ona o Isara'elu i aso e tele ua mavae, "Efaraima e, 'Ou te mafai fa'apefea ona tu'u atu iā te 'oe? Isara'elu e, 'Ou te tu'uina atu 'oe fa'apefea?... 'Ou te lē fa'ao' Lo'u ita tele; 'Ou te lē toe fa'aumatia Efaraima; auā o A'u o le Atua, a e lē se tagata" (Hosea 11:8, 9). O lo'o fetalai mai le Fa'aola tigālofa e fa'atatau iā te 'oe, "Tu'u pea ia i lenei tausaga fo'i, se'ia 'ou 'eli fa'ata'ali'oli'o i ai, ma avane i ai otaota."

Sa galue Keriso ma le alofa e lē mafa'amatalaina i le taimi o le alofa tunoa. Na Ia tatalo i luga o le satauro, "Lo'u Tamā e, ia e fa'amagaloina atu iā te i latou; auā ua latou lē iloa le mea ua latou faia" (Luka 23:34). Ina ua mavae Lona afio a'e i le lagi, sa muā'i tala'iina le tala lelei i Ierusalemā, ma na liligi ifo ai le Agaga Pa'ia iinei. O iinei na fa'aalia ai e le ulua'i ekalesia o le tala lelei le mana o le Fa'aola ua toe tū a'e. O iinei sa tu'u atu ai le molimau a Setefano - "ua iloa e i latou ona mata, ua peiseā'i o fofoga o se agelu" (Galuega 6:15), ma tu'u atu ai lona ola. O mea uma e mafai ona tu'u mai e le lagi ua aumai uma nei. Ua fetalai mai Keriso, "Se ā ea se mea e toe faia i La'u tovine 'Ou te le'i faia? (Isaia 5:4). E fa'apea ona lē fa'aitiitia a e o lo'o fa'ateleina Lana tausiga ma le galuega o lo'o faia mo 'oe. Ua fetalai mai pea Ia, "O A'u o Ieova, 'Ou te leoleo i ai; 'Ou te fa'asūsū pea lava i ai; 'Ou te leoleo lava i ai i le pō ma le ao, ne'i o'o i ai se leaga" (Isaia 27:3).

"Afai fo'i e fua mai, e lelei; pe afai e leai, e mulimuli ane" - O le loto e lē talia le fe'au fa'alelagi o le a fa'ama'a'aina ma o le a lē toe mafai ona tosina i le ta'ita'iga a le Agaga Pa'ia. Ua aumai loa le 'upu, "ia e tu'u loa lea i lalo."

O le asō, ua Ia vala'au mai, "Isara'elu e, inā toe fo'i mai ia iā Ieova lou Atua;.. 'Ou te fa'amalōlōina lo latou liliu 'ese; 'Ou te alofa fua ia te i latou;.. E 'avea A'u ma sau iā Isara'elu; e fuga mai o ia e pei o le susana, e sosolo ōna a'a e pei o Lepanona.... O i latou o ē nonofo i lalo ifo o lona paōlo, e toe ola mai i latou e pei o saito, e fua mai e pei o le vine,.. e maua lau fua mai ia te A'u" (Hosea 14:1-8).

"Ia Ō Atu i Āla ma Magāāla"

Matā'upu 18

O lenei matā'upu e fa'avae i le Luka 14:1, 12-24.

Sa vala'aulia le Fa'aola i le taumafataga i le maota o se Faresaio. Na Ia talia ma le fiafia vala'aulia mai tagata mau'oa fa'apea fo'i ma ē matitiva, ma e pei o Lana masani, sa Ia fa'aso'ota'i le va'aiga o i Ōna luma ma Āna a'oa'oga o le 'upu moni. O tausamiga pa'ia a Iutaia sa fai fa'atatau ma o latou vaitausaga o fa'afiafiāga fa'ale-atunu'u fa'apea ma le fa'aleagaga. I a i latou, o ia mea o itu'aiga fa'amanuiāga o le ola e fa'avavau. O le taumafataga tele lea o le a latou nofoia fa'atasi ma Aperamo, Isa'ako ma Iakopo, a o laulaututū mai fafo nu'u 'ese ma vā'ai mai ma le naunauta'i, o le mafuaga lea ua latou fiafia e u'umau i ai. O lesonea o lapata'iga ma a'oa'oga o lo'o naunau Keriso e tu'u atu, lea ua Ia fa'amalamalamaina e ala i le fa'ata'oto o le tausamiga tele. Ua manatu Iutaia e latou te tapunia fa'amanuiāga a le Atua a e vaganā ai mo i latou lava, mo le taimi nei ma le ola o i lumana'i. Ua latou tete'e i le tu'uina atu o le alofa tunoa o le Atua i tagata o nu'u 'ese. E ala i fa'ata'oto, sa fa'aalia ai lava e Keriso o latou o lo'o te'ena pea le vala'au o le alofa tunoa i lea lava taimi, le vala'au mo le malō o le Atua. Sa Ia fa'aalia iā i latou le vala'aulia na latou lē amana'ia, ua avatu i ē latou te 'inosia, o ē ua latou aumai ai o latou la'e'i ma lē fia latalata i ai pei o tagata lepele.

Ina ua filifili malō mo lana taumafataga, sa manatu le Faresaio i le lelei fa'apito mo ia lava. Ona fetalai atu lea o Keriso iā te ia, "Pe a e sauni se faiga'ai, po o se talisuāga, 'aia e te tala'i i āu uō, po o ōu uso, po o tagata o lou aiga, po o tagata mau'oa tou te tuā'oi, ne'i latou toe tala'i mai fo'i iā te 'oe, ona tau'i mai lea o 'oe. Peita'i o 'oe, pe a e sauni le faigā'ai, inā tala'i ia i ē matitiva, i ē mumutu, i ē pipili, ma ē tauaso, e manuia ai 'oe; auā latou te lē mafaia ona tau'i mai iā te 'oe, a e tau'i 'oe i le toe tutū mai o ē amiotonu" (Luka 14:12-14).

O lea ua toe tu'u mai e Keriso fa'atonuga sa Ia tu'uina iā Isara'elu e ala iā Mose. I a latou tausama'aga pa'ia, sa fa'atonu mai le Ali'i mo "le tagata 'ese fo'i ma lē ua āumatuā, ma fafine ua oti lana tane, o i lau 'a'ai, latou te ō ane, ma latou 'a'ai ai ia ma'o'ona" (Teuterenome 14:28, 29). O nei fa'apotopotoga sa faia e 'avea ma a'oa'oga fa'afa'atusa iā Isara'elu. Sa tataua ona a'oa'o ai le matagofie o le talileleia moni, o le tausiga o tagata mafatia ma ē matitiva i aso uma o le tausaga. O nei tausamiga e i ai se a'oa'oga e lautele atu. O fa'amanuiāga fa'aleagaga sa tu'uina iā Isara'elu, a e lē na o i latou lava. Na tu'u e le Atua le areto o le ola iā i latou, ina ia latou tofitofi atu i le lalolagi. A e sa latou le'i fa'ataunu'uina lenei galuega. O fetalaiaga a Keriso, o se a'oa'iga i lo latou manatu fa'apito.

I le 'au Faresaio o fetalaiaga a Keriso o se mea 'inosia. Sa taumafai se tasi o i latou e fa'aliliu'ese le talanoāga, ma ua fa'apea ane ma se uiga fa'afiaamiotonu, "Amu'ia lē 'ai i le malō o le Atua" (Luka 14:15). Sa tautala lenei tagata ma lana ta'utinoga mautū, e pei o ia ua mautinoa lona tulaga i le malō. O lona manatu ua pei o uiga o i latou ua fiafia ona ua fa'asaoia e Keriso, a e latou te lē o tausisi i tulaga ua folafola mai e maua ai le fa'aolataga. O lona agaga ua pei o Pala'amo a o ia tatalo, "Ia oti lava a'u i le oti o ē amiotonu; ia tusa fo'i lo'u i'uga ma lona" (Numera 23:10). E lē o mafaufau le Faresaio pe tataua o ia mo le lagi, a e po o le ā le mea e fa'anaunau ia maua ai lona fiafia i le lagi. O āna 'upu sa fa'atatau ia fa'aliliu'ese ai mafaufau o malō o le tausamiga mai le matā'upu i o latou tiute. Sa manatu ia e ō 'ese mai le taimi nei a e fa'atepa aga'i i luma i le taimi o le toe tutū a'e o le 'au amiotonu.

Na faitauina e Iesu mea i le loto o lē fa'afoliga, ua Ia silasila atu ma tatala atu i o latou luma le uiga ma le tāua o lo latou tulaga fa'apitoa o i ai i le taimi nei. Sa Ia fa'aali iā i latou la latou vaega e faia i lenei lava taimi, ina ia tofusua ai i le manuia o le lumana'i.

Ua fetalai atu o Ia, "Na sauni e le tasi tagata le talisuāga tele, ua tala'i atu fo'i e ia i tagata e to'atele" (Luka 14:16). Ina ua o'o i le taimi o le taumafataga, na toe 'ave e le 'au'auna se fe'au mai le ali'i i āna malō sa vala'aulia, "Ia outou ō mai, auā ua uma ona saunia o mea uma." A e peita'i sa fa'aalia mai se uiga 'ese pei o se mea e lē o tāua. "Ona latou fe'alo'alofa'i ai lea, ua tasi le loto. Ua fai mai le tasi iā te ia, Ua 'ou fa'atau le fanua, e tataua ona 'ou alu atu e matamata ai; se'i e fa'apea, ia tu'u mai iā te a'u. Ua fai mai

fo'i le tasi, Ua 'ou fa'atau e lima ni tailua, 'ou te alu e fa'ata'ita'i i ai; se'i e fa'apea, ia tu'u mai iā te a'u. Ua fai mai fo'i le tasi, Ua 'ou fai avā; o le mea lea 'ou te lē mafai ai ona 'ou alu."

O nei 'alofaga uma e le'i i ai se fa'avae i se mana'oga moni. O le fasi fanua na fa'atau e le tagata "e tatau ona 'ou alu e matamata ai" ua uma ona fa'atau. Sa ia fa'avavave e alu e va'ai i ai ona ua alu uma lona mafaufau i lana mea sa fa'atau. Fa'apea le uma ona fa'atau o le povi. Pau le mea e fa'amaonia o le fa'amalieina o le tagata fa'atau. O le 'alofaga lona tolu sa fa'apea fo'i le leai o se mafuaga. Ua uma ona fa'aipoipo o lea malō ma e lē o se pogai lea o le a lē alu ai i le tausamiga; e mafai fo'i e le avā fou ona fa'atasi atu i le taumafataga. A e ona ua i ai āna fuafuāga mo nisi itu'aiga fa'afiafiāga, e foliga mai e na te mana'omia atu i lo lē e ōna le vala'aulia. Na te le'i faia se fa'anoi, leai se fa'afoliga mai e uiga fa'aaloalo lona lē talia le vala'au. O le tali "ou te lē mafai" e na o se pupuni o le mea moni - "Ou te lē mana'o 'ou te alu atu."

O 'alofaga uma e fa'ailoa ai le mafaufau ua fa'atumuina i mea 'ese'ese. O malō sa fa'atatau i ai le vala'au sa fa'atumulua i latou i a latou mea o le olaga. Sa latou tu'u'ese le vala'aulia na fa'apea e latou te talia, ma ua lē fa'aaloalo i le tagata alofa e ala i le lē manatu mamafa i ai.

E ala i le tausama'aga tele, sa fa'asino e Keriso i fa'amanuiāga o lo'o ofo mai e le tala lelei, e lē o se tasi a e o Ia lava ua tu'uina mai. O Ia o le areto ua afio ifo mai le lagi, o lo'o tafe mai iā te Ia alāvai o le fa'aolataga. Sa ta'u mai lava e 'avefea'u a le Ali'i iā Iutaia le afio mai o le Fa'aola; sa latou fa'asino iā Keriso o "le Tama'i Mamoe a le Atua, Na te 'ave'esea le agasala a le lalolagi" (Ioane 1:29). I le taumafataga ua Ia saunia, na ofo ai e le Atua iā te i latou le meaalofo aupito sili ua mafai ona tu'uina mai e le lagi - se meaalofo e lē mafa'atusalia. o le alofa o le Atua sa saunia mea uma o le tausamiga tautele, ma na aumaia le tamā'o'aiga mana'omia e lē fa'agata mai. Na fetalai mai fa'apea Keriso, "O A'u o le areto o le ola na alu ifo mai le lagi; pe a 'ai se tasi i lenei areto ona ola ai lea o ia e fa'avavau. O le areto fo'i 'Ou te avatua, o Lo'u tino lea, 'Ou te avatua ma ola o le lalolagi" (Ioane 6:51).

A e peita'i ina ia talia le vala'aulia i le tausamiga o le tala lelei, e tatau iā i latou ona tu'u fa'amulimuli fiafiāga fa'alelalolagi a e fa'atāua fuafuāga mo le taliaina o Keriso ma Lana amiotonu. Na tu'uina e le Atua mea uma mo le tagata, ma o lo'o Ia ōle mai ina ia fa'amuumua Lana galuega i luga o mea uma fa'alelalolagi ma manatunatuga fa'apito mo le tagata lava ia. Na te lē talia se loto fa'aleogolua, auā o le loto e tumau i mana'oga fa'alelalolagi e lē mafai ona tu'u atu fo'i i le Atua. O le a'oa'oga lea mo taimi uma. E tatau ona tatou mulimuli i le Tama'i Mamoe a le Atua i so'o se mea e femaliua'i ai. Ia filifili i Lana ta'ita'iga; ia fa'atāua Lana mafutaga ma 'oe ia sili atu i lo le mafutaga ma uō fa'alelalolagi. Ua fetalai mai Keriso, "O lē ua tele lona alofa i lona tamā po o lona tinā, a e itiiti iā te A'u, e lē aogā lea iā te A'u; o lē ua tele fo'i lona alofa i lona atali'i po o lona afafine, a e itiiti iā te A'u, e lē aogā fo'i lea iā te A'u" (Mataio 10:37).

I fa'atasiga a aiga mo taumafataga o aso ta'itasi i ōna pō o Keriso, e to'atele lava sa tautalagia nei 'upu, "Amu'ia lē o le a 'ai le areto i le malō o le Atua." A e peita'i sa fa'aali mai e Keriso le faigatā o le sa'iliga o malō vala'aulia mo le la'o'ai ua saunia, e lē mafaitauina lona tau. O i latou na fa'alogi i āna fetalai sa iloa ua latou lē amana'ia le vala'au a le alofa mutimutivale. I a i latou, o mea fa'alelalolagi, o 'oa ma tu'inaanau i fa'afiafiāga ua alu uma i ai le malos. E tasi lo latou maliliēga, ua fai a latou 'alofaga.

E fa'apea i ōna pō nei. O 'alofaga o lo'o tu'u fa'amalosai mai ia te'ena ai le vala'au i le tausama'aga ua aofia ai 'alofaga uma lava mo le te'ena o le vala'au a le tala lelei. Ua fa'apea mai tagata latou te lē fia fa'aleagaina fa'amoemoega fa'alelalolagi e ala i le fa'alogi i a'oa'oga o le tala lelei. Ua latou fa'atāua a latou mea fa'alelalolagi ia sili atu i lo mea e fa'avavau. O fa'amanuiāga uma na latou maua mai le Atua ua 'avea ma pā puipui e vavae'ese ai o latou agaga mai Lē na faia i latou ma lo latou Fa'aola. O le a lē fa'alavelavea i latou i le sa'iliga o mea fa'alelalolagi, ma ua latou fa'apea mai i le 'avefea'u o le alofa tunoa, "Se'i e alu atu i le aso nei, se'ia 'ou maua fo'i se aso e aunoa, i lo'u toe 'a'ami atu iā te 'oe" (Galuega 24:25). O isi ua fa'ailoa mai faigatā o le a tupu a'e i lo latou vā feagai ma nisi pe afai o le a usita'i i le vala'au a le Atua. Ua fai mai latou e lē mafai ona lē ō gatasi ma o latou aiga ma ē masani. O lea ua fa'amaonia i a i latou lava ia o i latou lava o lo'o fa'amatalaina i lenei fa'ata'oto. Na fa'atatauina e le Matai a latou 'alofaga ua fa'aalia ai lo latou 'ino'ino i Lana vala'au.

O le tagata sa fa'apea mai, "Ua 'ou fai avā, o le mea lea 'ou te lē mafai ai ona 'ou alu atu" (Luka 14:20), e fa'asino i se vasega e to'atele. E to'atele i latou e lē fa'atagaina le to'alua (tane po o le fafine) e

talia le vala'au a le Atua. E fa'apea le tane, "E lē mafai ona 'ou usita'i e fai le tiute ua 'ou lagona e tatau a o lo'o tete'e mai i ai la'u āvā, ona o le a matuā faigatā ona 'ou faia lea mea a e lē loto mai ia i ai." Pe a fa'alogo le āvā i le vala'au alofa, "Inā sau ia; ua saunia mea uma," a e fa'apea ia, "'Ou te ōle ia fa'amagalo mai a'u." O lo'o te'ena e la'u tane le vala'au alofa. Fai mai o ia ua leai se avanoa ona o āna galuega. E tatau ona 'ou fa'atasi ai ma lo'u to'alua, o lea e lē mafai ai ona 'ou alu atu." Ua fa'alogo le fanau i lenei vala'au ma ua fa'atosina o latou loto ia mulimuli i ai. A e peita'i, ona o le alofa i o latou mātua e le'i taliaina le vala'au o le tala lelei, ua manatu fo'i le fanau e tatau ona latou faia lea 'alofaga. Ua fai mai fo'i latou, "Ia fa'amagalo mai."

Ua te'ena e lenei aiga atoa le vala'au a le Fa'aola ona o le fefe ina ne'i vaevaeina ai le li'o a le aiga. Ua manatu latou o le a mautinoa le filemū ma le ola lelei pea o le aiga ina ua lē usita'i i le Atua; peita'i e na o se taofiga sesē lava lea. O i latou o ē lulū le loto fa'apito o le a selesese le manatu fa'apito. Ina ua te'ena le alofa o Keriso, ua latou te'ena le mea e aumaia le uiga mamā ato'atoa ma le tutūmau o le alofa fa'aletagata. O le a latou lē maua le lagi, ma o le a lē 'ausia le fiasia moni na tu'u mai ai le taulaga ofo a le lagi.

I le fa'ata'oto, na iloa e le ali'i o le talisuāga le tali fa'alētonu i lana vala'au, ma "ona ua ita o ia, ua fai atu i lana 'au'auna, 'Inā alu ia vave i ala ma alātua o le 'a'ai, ma ia aumai iinei ē matitiva, ma ē mumutu, ma ē pipili, atoa ma ē tauaso'" (Luka 14:21).

Sa liliu 'ese le ali'i mai ē manatu fa'atauva'a i lona limamāfola, ma ia vala'au i se vasega o tagata e itiiti a latou mea, e leai ni fale po o ni fanua. Sa ia vala'aulia ē matitiva ma o fia 'a'ai, ma i latou e talia ma le fa'afetai mea o lo'o maua mai lē loto foa'i. Na fa'apea mai Keriso, "E muamua atu telona ma fafine talitane iā te outou i le malō o le Atua" (Mataio 21:31). E tusa po o le ā le pagātia ma le tulaga maulalo o vaega tagata o lo'o 'inosia ma faliu 'ese mai i ai nisi, a e o lo'o taulia pea i le silafaga ma le alofa o le Atua. O lo'o naunau lava Keriso mo ē mafatia, vaivai, ma sauāina ina ia ō mai iā te Ia. E naunau o Ia e avatu iā i latou le malamalama ma le fiasia ma le filemū e lē o maua i se isi lava mea. O le autū o Lona alofa mutimutivale ma le tigāalofa o i latou ua matuā goto i le loloto o le agasala, ma ua Ia 'auina mai i ai Lona Agaga Pa'ia ona o le naunauta'i ia sa'ili iā i latou ma ia tosina mai iā te Ia.

Sa aumai e le 'aua'una i lona ali'i le tala mai ē matitiva ma tauaso, e fa'apea, "Le Ali'i e, ua uma ona faia o le mea na e poloa'i mai ai, a e le'i nofoia lava le fale. Ua fai atu le ali'i i le 'au'auna, Inā alu atu ia i ala tele ma magāāla ma ia pulunaunau atu latou te ō mai, ina ia tumu lo'u nei fale." O i nei na fa'asino ai e Keriso le galuega o le tala lelei o le alu i fafo atu o Iutaia, i ala ma magāala o le lalolagi.

Na usiusita'i Paulo ma Panapa i lenei fa'atonuga, ma na fa'ailoa atu i tagata Iutaia, "Ua tatau lava ona ua mua'i folafolaina atu le afioga a le Atua iā te outou; a ua outou tete'e mai i ai, ma ua ta'ulēaogāina outou e outou i le ola e fa'avavau, fa'auta, o le mea lea ma te liliu atu ai i tagata o nu'u 'ese. Auā ua fa'apea ona poloa'i mai le Ali'i iā te i matou, 'Ua 'Ou tofia 'oe e fai ma malamalama o nu'u 'ese, ina ia 'avea 'oe ma fa'aolataga e o'o i le tulu'iga o le lalolagi. Ua fa'alogo tagata o nu'u 'ese, ona 'oli'oli ai lea, ma vivi'i atu i le afioga a le Ali'i; ua fa'atuatua fo'i i latou uma lava ē ua saunia i le ola e fa'avavau" (Galuega 13:46-48).

O le fe'au o le tala lelei na tala'i e le 'au so'o o Keriso, sa fa'ailoa mai ai Lona mua'i afio mai i le lalolagi. Sa aumaia i tagata le tala lelei o le fa'aolataga e maua mai le fa'atuatua iā te Ia, ma sa fa'asino i le lumana'i i Lona afio mai fa'alua i le mamalu e togiola i Ōna tagata; ma na fa'atū mai i luma o tagata le fa'amoemoe, e ala i le fa'atuatua ma le usiusita'i, e tofusua ai i le tofi o le malamalama ma le 'au pa'ia. O lenei fe'au ua tu'uina i tagata i ōna pō nei, ma o lo'o sautualua mai ai le fa'aaliga ua lata mai lava le afio fa'alua mai o Keriso. Ua fa'ataunu'uina fa'aailoga na tu'u mai lava e Ia e fa'atatau i Lona afio mai, ma e ala i le a'oa'o atu o le Afioaga a le Atua e tatou te iloa ai ua i faitoto'a le Ali'i.

Sa valo'ia e Ioane i le Fa'aaliga le tala'iina o le fe'au o le tala lelei ina ua lata le afio fa'alua mai o Keriso. Na ia iloa se agelu o le lele "i le taulotoa'iga o le lagi, ua iā te ia le tala lelei e fa'avavau e folafola atu i ē nonofo i le lalolagi i atunu'u uma, ma itu'aiga, ma gagana 'ese'ese, ma nu'u, ua fa'apea atu ma le leo tele, Ia outou matata'u i le Atua, ma avatu iā te Ia le vi'iga, auā ua o'o mai le itū aso o Lana fa'amasinoga;.." (Fa'aaliga 14:6, 7).

I le valo'aga o lenei lapata'iga ma le fe'au e fa'atatau i le fa'amasinoga, sa soso'o mai ai ma le afio mai o le Atali'i o le tagata i ao o le lagi. O le fe'au o le fa'amasinoga o se fa'aaliga lea i le latalata o le afio fa'alua mai o Keriso, ma o lenei fa'aaliga e ta'ua lea o le tala lelei e fa'avavau. O lea o le tala'iina o le afio

mai fa'alua o Keriso, o le fa'aaliga i Lona taimi ua lata mai lava, e fa'ailoa mai ai o se vaega e matuā tāua lenei o le fe'au o le tala lelei.

O lo'o fa'aalia mai e le Tusi Pa'ia o le a matuā fa'atosina mafaufau o tagata i tu'inanau fa'alelalolagi, i mea fa'afiafia ma le mana'o i tupe. O le a fa'atauasoina i latou i mea moni e fa'avavau. Ua fetalai Keriso, "E pei o ona pō o Noa, e fa'apea fo'i pe a sau le Atali'i o le tagata. Auā e pei ona faia i ona pō a o le'i o'o le lolo, ua latou 'a'ai ma inu, ua latou fai avā fo'i ma fa'aavāga, ua o'o lava i le aso na ūlu atu ai Noa i le va'a, na lē iloa fo'i e i latou ina se'ia o'o le lolo, ma 'ave'esee i latou uma; e fa'apea fo'i pe a sau le Atali'i o le tagata" (Mataio 24:37-39).

E fa'apea fo'i i ōna pō nei. Ua fetaufetulia'i tagata e su'e le 'oa ma le olaga manatu fa'apito e pei e lē o i ai se Atua, leai se lagi, ma leai se ola e fa'avavau i tua atu o lenei olaga. Sa tu'u se lapata'iga e fa'ataui i le lolo i aso o Noa, ina ia fa'ate'ia ai tagata mai le latou amioleaga ma vala'au iā i latou ia salamō. E fa'apea le fe'au i le lata mai lava o le afio mai o Keriso, o lo'o fa'amoemoe ia fafagu ai tagata mai le tosina atu i mea fa'alelalolagi. O le fa'amoemoe ina ia fafaguina le fa'alologa o le tagata i mea moni e fa'avavau, ma ia lagona le vala'au alofa i le la'o'ai a le Ali'i.

O le vala'au a le tala lelei e tu'uina atu lea i le lalolagi atoa -"i atunu'u uma, ma itu'aiga, ma gagana 'ese'ese, ma nu'u." O le fe'au mulimuli o le lapata'iga ma le alofa tunoa e fa'amalamalamaina ai le lalolagi atoa i lona pupula, ma e o'o atu ia aofia ai vasega uma o tagata, o lē mau'oa ma lē mativa, ē tulaga maua ma lē maua. Ua fetalai Keriso, "Ia ō atu i ala tele ma magāala, ma ia pulunaunau atu latou te ō mai, ina ia tumu ai lo'u nei fale."

O lo'o fa'apuapugātiaina le lalolagi i le mana'omia o le tala lelei; ua matelāina mo le afioga a le Atua. E i ai nisi o lo'o tala'i atu le 'upu a e lē fefiloi ai ma matā'upu fa'aletagata. E i o latou lima le Tusi Pa'ia, a e latou te lē o maua fa'amanuiāga ua tu'u i ai e le Atua mo i latou. O lo'o vala'au le Ali'i i Āna 'au'auna ina ia 'ave Lana fe'au i tagata, ma ia tu'uina 'upu o le ola e fa'avavau iā i latou o le a fano i a latou agasala.

Ina ua fa'atonu mai e ō i alatele ma tuā'oi, na Ia tu'u mai ai le galuega mo latou uma ua Ia vala'auina e galulue i Lona suafa. O le lalolagi atoa o le fanua lea mo 'au'auna a Keriso, ma o le 'au fa'alologa o le lalolagi atoa. E fa'anaunau le Ali'i ia aumaia Āna afioga alofa i agaga uma ta'ito'atasi.

E tatau ona fa'ataunu'u lenei galuega e tagata ta'ito'atasi, auā o le 'auala tonu lenei a Keriso. O Lana galuega sa aofia ai feso'ota'iga ma talanoāga ma tagata ta'ito'atasi. Na ala atu i lea agaga e to'atasi, a e mulimuli ane ai ua fa'ato'ateleina ma na sili atu i le afe.

E lē tatau ona tatou fa'atalitali se'ia ō mai agaga iā i tatou, a e tatau ona tatou sa'ili i latou i le mea o lo'o i ai. E amataina le galuega pe a ua laugaina le afioga a le Atua. E to'atele o le a lē o'o i ai le tala lelei vaganā ua 'ave i ai iā te i latou.

O le vala'au i le taumafataga tele sa muamua ona tu'uina atu i tagata Iutaia, o tagata sa vala'auina e tutū mai e 'avea ma a'oa'o ma ta'ita'i, o tagata na tu'u i o latou lima tusi o valo'aga sa valo'ia ai le afio mai o Keriso, ma o ē na tu'uina i ai sauniga o fa'ailoga e fa'asino i Lana galuega. Pe ana usita'i le 'au faitaulaga ma tagata i le vala'au, semanū ua latou 'au'aumea fa'atasi ma 'avefe'au a Keriso e tu'u atu le vala'au o le tala lelei i le lalolagi, auā sa 'auina iā i latou le 'upu moni ina ia latou fa'asoa atu. Ina ua latou lē talia le vala'au, sa avatu loa i ē matitiva, o ē pipili, ē mumutu ma ē tauaso; sa vala'aulia fo'i telona ma ē agasala. O le fuafuāga lava lea e tasi o le galuega ina ua tu'uina atu le vala'au i tagata o nu'u 'ese. Sa muamua tu'u le fe'au "i ala tele" - i tagata galulue i galuega 'ese'ese o le lalolagi, i a'oa'o ma ta'ita'i o tagata.

Ia tau'ave lenei mea i mafaufau o 'avefe'au a le Ali'i. Mo ta'ita'i o lafu mamoe, o a'oa'o fa'aleagaga na tofia, o ia 'upu e tatau ona fa'alogi ma usita'i i ai. E tatau ona sa'ili ma le fa'aaloalo ma le loto maua ē tulaga fa'aeaina o nu'u. O tagata a'oa'o, e i ai le poto su'esu'e, tulaga maua ma le fa'atuatua, matāgaluega fa'aeaina o le olaga, o ū popoto, o a'oa'o o le tala lelei e le'i vala'auina i o latou mafaufau le 'upu moni fa'apitoa mo le taimi nei - o tagata nei e tatau ona fa'amua ona fa'alogi i le vala'au. E tatau ona 'ave le vala'au iā i latou.

E i ai le galuega e tatau ona faia mo ē mau'oa; e tatau ona fafaguina i latou i lo latou tiute tau'ave fa'ataui i meaaloa a le lagi na tu'uina iā i latou. E mana'omia ia latou manatua mea e tatau ona latou fa'ailoa iā te Ia Lē o le a fa'amasinoina ē o lo'o ola ma ē ua oti. E tatau ona e galue ma le alofa mo le tagata maua, ona o le tele o taimi e fa'atuatua ia i āna 'oa a e lē o lagona le faigatā o lona tulaga. E

mana'omia ia fa'atosina mata o lona mafaufau i mea tāua e lē mavae gofie, ma ia iloa le pogai o mea lelei moni uma, lea na fetalai mai, "Ia outou ō mai iā te A'u, o outou uma o ē tigāina ma mafatia i 'avega, o A'u fo'i e malōlō ai outou. Ia outou amoina La'u amo, ma ia outou fa'aa'oa'o iā te A'u, auā o A'u Lē agamalū ma le loto maulalo; ona maua lea e outou o le malōlōga mo outou agaga. Auā e 'ave gofie La'u amo, o La'u avega fo'i e māmā ia" (Mataio 11:28-30).

O le to'atele o ē tutū maualuga i le lalolagi ona o le a'oa'oina, o le tamā'oiga, po o se tulaga o galuega ua vala'au ai, a e seāseā maitaulia mo le tagata lava ia fa'atatau i mea tāua tau i le agaga. O nei vasega o tagata e fa'alēamana'ia e le tele o le 'aufaigaluega Kerisiano, peita'i e lē tataua ona fa'apea. Pe a va'aia se tagata o le a malemo, tatou te lē tutū ma na o na matamata ona o ia o se loia, se fa'atau'oa, po o se fa'amasino. Pe a tatou vā'ai atu i se tagata o lo'o fa'avave atu e oso i se mea maulalo ina ia pule i lona lava ola, o le a lē fa'atuai ona tatou fautua atu i ai ia lē o'o lea fuafuāga, e tusa po o le ā lona tulaga. Ia fa'apea ona tatou lapata'i tagata fa'atatau i le agaga o le a fano.

Ia leai se tasi o le a lē amana'ia ona o le tu'inaanu i mea fa'alelalolagi. O le to'atele e i tulaga maualuluga i faigānu'u e maua i le loto fa'anoanoa ma ua fiu i le olaga fa'alialia, a e latou te naunauta'i se filemū e faigatā ona latou maua. I nei tulaga maualuluga, o i ai ē o lo'o matelāina ma gālala mo le fa'aolataga. E mafai e le to'atele ona maua le fesoasoani pe a fa'asaga atu le 'au faigaluega a le Ali'i e fai lea galuega, mo i latou ta'ito'atasi, ma se uiga agamalū, alofa e ala i le alofa tunoa o Keriso.

O le manuia o le tala lelei e lē fa'alagolago i le faigofie o le fe'au o lo'o tu'u mai ma ia fafauina ia talafeagai ma agaga o lo'o matelāina mo le areto o le ola. E lē fa'alagolago i ni lauga mo ē a'oa'oina, ni molimau e fa'agae'etia mafaufau, po o fefinaua'iga loloto. O le mana'oga o le Agaga - "O le ā le mea e tataua ona 'ou faia ia 'ou ola ai?"

E mafai ona maua le to'atele i le auala e sili ona faigofie ma le maulalo. O le to'atele o ē a'oa'oina, i latou e aupito talenia ma agava'a, e sili ona latou fiafia i 'upu faigofie mai sē e alofa i le Atua, ma e mafai ona tautala i uiga moni o mea faigofie, fa'apei o mea e matuā fiafia ia i ai.

O 'upu e matuā saunia lelei ma su'esu'eina o le a sili le itiiti o le tāua. A o mea e fa'aalia ma le fa'amaoni mai le loto o le atali'i po o le afafine a le Atua, pe a tautala manino ma le faigofie, e i ai le mana e tatalaina ai faitoto'a o loto ua leva ona tapunia e le tete'eina e Keriso ma Lona alofa tunoa.

E tataua i lē e galue mo Keriso ona manatua o ia e lē o galue i lona lava malosi, a e ia na u'umau atu i le nofoālī'i o le Atua ma le fa'atuatua i Lona mana fa'aola. Ia fagatua ia ma le Atua i le tatalo, ma ia fa'aaogā uma tomai na tu'u e le Atua iā te ia. E maua e ia le Agaga Pa'ia e mafai ai mea uma, ma e i ai agelu i ōna tafatafa ia mafai ona tosina mai ai loto.

Pe ana talia e ta'ita'i ma a'oa'o o Ierusalemā le 'upu moni na aumaia e Keriso, oi se manū ua 'avea lo latou 'a'ai ma totonugalemū o le galuega fa'amisionare! Semanū ua liua Isara'elu mai i le se'e i tua; ma o le a fa'ato'ateleina le 'au tau mo le Atua. Ma semanū o le a televave le fa'asalalauina o le tala lelei i itū uma o le lalolagi. A o nei, pe a fa'atosina mai mo le Ali'i se to'atele o tagata e aogā ma agava'a, ona mafai lea, e ala iā i latou, ona faia se galuega ina ia fa'ataunu'uina le si'itia a'e o ē ua pa'u'ū, fa'apotopoto mai ē na lē iloa, ma fa'asalalau le tala lelei o le fa'aolataga i itū uma. Atonu o le a vave ona alu atu le vala'au ma fa'apotopoto mai loa le 'au fa'aolaina i le la'o'ai a le Ali'i.

A e tatou te lē mafaufau ia na o tagata agava'a ma ē tulaga maualuga, ona lē amana'ia lea o vasega o tagata tulaga maulalo ma ē matitiva. Sa fa'atonu e Keriso i Āna 'avefe'au ia ō atu fo'i i alatele ma magāala, i ē matitiva ma le 'au lē amana'ia o le lalolagi. E i ai lotoā ma alavāiti o 'a'ai tetele, i auala laiti o tuā'a'ai o lo'o i ai aiga ma tagata ta'ito'atasi - atonu o tagata o nu'u 'ese o aumau i lenei atunu'u - o ē leai ni feso'ota'iga ma ni tapua'iga ma ua manatu ua leai so latou so'otaga i le Atua. E to'atele ua magoto ifo i lalo o latou agasala ma ua lē malamalama i se ala e mafai ai ona toe fa'asaoina i latou. I lo latou mafatiāga ua lofia nei i le puapuagā, o mana'oga, ma le lē talitonu. O fa'ama'i 'ese'ese ua afāina ai le tino ma le agaga. O lo latou fa'anaunauga ia maua se filemū mai fa'afitāuli, a e o Satani o lo'o fa'aosooso pea i latou ina ia sa'ili mea e tu'inaanu i ai fa'apea mea fa'afiafia e ta'ita'iina ai i le malaia ma le oti. Na te ofoina atu 'apu a Sotoma ia e liu efuefu i o latou laugutu. Latou te fa'aalu tupe i mea e lē aogā a e lē malilie ai lava.

O i latou nei na afio mai Keriso e fa'asao. O Lana vala'au iā i latou, "E! outou uma o ē fia inu, ō mai ia i le vai, atoa ma outou ua leai ni tupe, ō mai ia, ina fa'atau ma 'a'ai; ia outou ō mai lava, ma fa'atau le uaina ma le suāsusu, a e leai se tupe, e leai fo'i se tau e fa'atau a'i.... Se'i matuā fa'alologologo mai ia iā te

A'u, ma outou 'a'ai i mea lelei, e fiafia fo'i o outou loto i mea lololo. Uā'i mai ia o outou taliga, ma outou ō mai iā te A'u; fa'alologologo mai ia, e ola ai o outou agaga" (Isaia 55:1-3).

Ua tu'u mai e le Atua se poloa'iga fa'apitoa ina ia tatou manatua le tagata 'ese, o ē fa'asevasevaloaia, o ē matitiva ma ua fa'avaivai. E ui ina foliga mai o le to'atele ua lē tāua iā i latou mea fa'aleagaga, a e o lo'o naunau pea lava o latou loto i se malōlōga ma se filemū. Atonu ua goto i latou i le loloto o le agasala, a e o lo'o i ai pea se avanoa e fa'asaoia ai i latou.

E tatau i 'au'auna a Keriso ona mulimuli i Lana fa'ata'ita'iga. A o femaliua'i o Ia mai lea nofoāga i lea nofoāga, sa Ia fa'amafanafana i ē na mafatia ma fa'amalōlō i ē mama'i; ona Ia tu'u atu lea i o latou luma 'upu moni tāua e fa'atatau i Lona malō. O le galuega lava lenei a Ōna so'o; a o fa'amalōlō mafatiāga o le tino, o le a e maua fo'i ala e 'au'auna atu ai i mana'oga o le agaga. E mafai ona e fa'asino i le Fa'aola ua fa'aeaina ma ta'u atu e uiga i le alofa mutimutivale o le Foma'i Sili, Lē e i ai le mana e fa'afouina ai.

Ia ta'u atu i ē ua sē 'ese, ia 'auna ne'i fa'avaivai, auā e ui ina ua sesē ma lē aga'i i se ala e fausia a'e ai le amio lelei, e fiafia le Atua e toe fa'afouina i latou, ma e fiafia e ofoina mai Lana fa'aolataga. O Lona 'oli'oli e maua lea i le toe fa'afouina, e ala i le alofa tunoa, o lē ua leai se fa'amoemoe ona o le galuega a Satani. E fiafia o Ia e fa'asao i latou mai le to'asā o le a i luga o le 'au lē usita'i. Na te fa'amalōlō ma fa'amamā agaga uma ta'ito'atasi, ma o le a i ai so latou tofi i le la'o'ai a le Ali'i. O lo'o fa'atali o Ia e fa'aulufale i latou uma.

O ē ō atu i ala ma alātua o le 'a'ai o le a latou maua ai itu'aiga tagata 'ese'ese, i latou ia e mana'omia la latou galuega. E aofia ai i latou o lo'o ola fa'atatau i le malamalama o iā te i latou, o lo'o 'au'auna i le Atua e tusa ma lo latou iloa. Peita'i latou te iloa o lo'o tele pea le galuega e tatau ona faia mo i latou lava ia fa'apea ma ē o i le si'osi'omaga. Latou te fa'anaunau ia iloa atili le Atua, ona o lenei taimi ua fa'ato'ā amata ona iloa le susulu o le malamalama tele. E tatalo i latou ma loimata i le Atua ia aumai se fa'amanuiāga, e ala i le fa'atuatua ina ia iloa mamao atu ai lea o tulaga maulalo lava ma ua lē amana'ia e le lalolagi. E o'o lava i ekalesia ma 'avefe'au o le tala lelei latou te lē o iloa fo'i. A e iinei nofoāga pagātia o lo'o molimauina ai le Atua e ui ina la'itiiti le malamalama ma e itiiti fo'i avanoa e a'oa'oina ai fa'aKerisiano; e ui i nei tulaga uma, a e iā i latou le agaga e sa'ili e fesoasoani atu i isi. E fa'apea fo'i le 'au galulue a le Atua ona sa'ili'ili i ia agaga, asiasi i o latou aiga, ma tali o latou mana'oga e ala i le mana o le Agaga Pa'ia. Latou te su'esu'e le Tusi Pa'ia ma nei uso, i se ala faigofie mai le ta'ita'iga a le Agaga o le Atua, ma fai talosaga fa'atasi. E aumaia e Keriso i Āna 'au'auna se fe'au o le a 'avea ma areto o le ola mai le lagi mo le agaga, o nei fa'amanuiāga o le a fe'avea'i mai lea loto i lea loto, mai lea aiga i lea aiga.

Ua fa'auigasesē i le tele o taimi le poloa'iga na tu'u mai i le fa'ata'oto, ina "ia pulunaunau atu latou te ō mai." Ua fa'apea a nisi e tatau ona tatou fa'amalosi tagata e talia le tala lelei. E lē aumaia fa'amalosi e le tala lelei tagata iā Keriso, a e o le fe'au e fa'apea, "E, outou uma e fia inu, ō mai ia i le vai" (Isaia 55:1), ua fa'a'iloa mai ai le fai fa'anatinati o le vala'au. "Ua fetalai mai le Agaga ma le fa'ato'ānofotane, Inā sau ia....Ma o lē mana'o i ai, Inā 'ave fua ia le vai o le ola" (Fa'aaliga 22:17). O le mana o le alofa o le Atua ma le alofa mutimutivale o lo'o u'una'iina i tatou ia ō mai iā te Ia.

O lo'o fetalai le Fa'aola, "Fa'auta, 'Ou te tū atu i le puipui ma tu'itu'i atu; ai se tasi e fa'alogologo mai i Lo'u leo, ma tatala mai le puipui, 'Ou te ulufale atu iā te ia, ma te talisua fo'i ma ia, o ia fo'i ma A'u" (Fa'aaliga 3:20). E lē tete'e o Ia ona o 'upu faifai pe fa'aliliu'ese ona o le tau fa'amata'u; peita'i Na te sa'ili'ili pea i ē o lēiloa, a o fa'apea atu, "'Ou te mafai fa'apefea ona tu'u atu iā te 'oe?" (Hosea 11:8). E ui ina tuli'ese Lona alofa e le loto ma'a'a, e toe fo'i mai lava o Ia ma le ōlega e matuā tauānau lava, "Fa'auta, 'Ou te tū atu i le faitoto'a ma tu'itu'i atu." O le mana o Lona alofa o le a fa'atosina mai ai le agaga iā te Ia, ma e tali mai latou iā Keriso, "O Lou agamalū ua fa'asilisiliina ai a'u" (Salamo 18:35).

O le a tu'uina e Keriso i Āna 'avefe'au le alofa naunau lava lea e tasi o lo'o iā te Ia mo le sa'ilia o agaga o lo'o lē iloa. E tatou te lē na o na fa'apea atu, "Inā sau ia," auā e i ai nisi e fa'alogologo i le vala'au a e latou te lē lagonaina ma e lē mafai ona malamalama i lona uiga. O latou mata fo'i ua matuā tauaso lava e lē o va'aia se aogā o se mea o lo'o tu'u mai mo i latou. E iloa e le to'atele lo latou tulaga to'ilalo ma ua fa'apea mai ua lē aogā iā i latou se fesoasoani. A e ia fai pea le galuega e le 'au galulue ma le agamalū, tigāalofa, ma le fa'amalosi'au e mafai ai ona una'i ai ē ua leai se fa'amoemoe. Tu'u i ai lou fa'amoemoe, lou malosi, ma lou lototele ina ia tosina mai ai i latou e ala i lou agalelei. "O le loto alofa o isi e maua ai le

'ese'esega; o isi na fa'asao i latou mai le afi, ona o le fefe i ai." "Ia outou alofa atu i nisi ma ia fa'atatau; a o isi ia outou fa'aola iā i latou ma le mata'u, ia se'i iā te i latou mai le afi" (Iuta 1:22, 23).

Pe a savavali 'au'auna a le Atua ma Ia i le fa'atuatua, e Na te tu'uina le mana i la latou fe'au. E u'una'i tagata ina ia talia le tala lelei pe a latou fa'ailoa atu Lona alofa mutimutivale fa'apea ma le faigatā pe a te'ena le alofa tunoa o le Atua. O le a faia e le Atua vavega ofoofogia pe a fai e le tagata lana vaega pei ona tu'u mai e le Atua. E mafai ona fa'aliua loto o tagata i ōna pō nei e pei ona faia i tupulaga ua mavae. O le tagata o John Bunyan sa fa'asao mai amioga lē taupulea ma fa'afiafiāga pisapisaō, po o John Newton lē sa galue e fefa'ataua'i tagata pologa, a e na i'u i lona tala'i atu o le Fa'aola. E fa'apea le taimi nei pe a 'au'aumea fa'atasi sui fa'aletagata ma sui fa'alelagi, o le a mafai ona toe tosina mai le to'atele na ui i ala sesē, ma latou sa'ili e toe fa'afouina i le fa'atusa o le Atua na faia ai le tagata. E i ai nisi e itiiti avanoa ona o le tulaga maulalo, ua ō i ala sesē ona e pau lea o le mea e iloa, a e o le a o'o mai i ai 'ave o le malamalama, fa'apei ona fetalai Keriso iā Sakaio, "E tatau ona 'Ou nofo i lou fale i le aso nei" (Luka 19:5). O le a o'o mai le 'upu iā i latou, ma o ē fa'apea o tagata ua fa'ama'a'aina e le agasala, o le a fa'aalia mai loto e agamalū e pei o se tamaitiiti ona ua tāua i latou i le silafaga a Keriso. E to'atele o le a ō mai mai le matuā fa'asesē ma le agasala, ma o le a sui ai i latou sa tele avanoa ma fa'amanuiāga a e latou te le'i fa'atāuaina. O le a faitauina i latou o le 'au filifilia a le Atua; pe a ulufale Keriso i Lona malō, o le a latou tutū i tafatafa o Lona nofoāli'i.

A e peita'i, "ia outou ne'i liliu 'ese outou iā te Ia o lo'o fetalai mai" (Eperu 12:25). Sa fetalai Iesu, "E leai lava se tasi o ia tagata ē na tala'iina, e 'ai i La'u talisuāga nei." Sa latou te'ena le vala'au ma e leai se tasi o latou na toe vala'auina. Sa fa'ama'a'aina loto o Iutaia ina ua tete'e Keriso, a e ina ua tu'u atu i latou i le mana o Satani, ua lē mafai loa ona latou talia Lona alofa tunoa, pei lava o ōna pō nei. O tatou o tagata ua matuā lē iloa, pe a ua lē fa'atāuaina le alofa o le Atua ma lē 'avea lea o se fa'avae tumau e fa'afilemū ma fa'agaua'i mai ai le loto. Ua uma ona fa'atinoina e le Atua Lona alofa tunoa; a lē mafai e le alofa o Iesu ona fa'ato'ilalo le loto ma'a'a, o le a leai se isi ala e mafai ona o'o i ai.

O taimi uma e te tete'e ai ma lē fa'alogi i le fe'au o le alofa tunoa, o le a e fa'amalosia ai lou lē talitonu. A e lē tatalaina le faitoto'a o lou loto iā Keriso, o le a fa'ateleina lou lē fia fa'alogi i Lona si'ufofoga, ma e fa'aitiitia lou avanoa e tali ai i Āna olega. Ia 'aua ne'i tusia e fa'atatau iā te 'oe, e pei o Isara'elu anamua, "Ua pipi'i Efaraima i tupua, inā tu'u ai pea ia iā te ia" (Hosea 4:17). Ia 'aua ne'i tagi Keriso ona o 'oe, fa'apei ona tagi o Ia i luga o Ierusalem, ma fa'apea mai, "Ua tele lava O'u mana'o e fa'apotopoto i lau fanau, e pei o le moa ona ofaofata'i i lana tolota'i i lalo o ōna 'apa'au, a e lē mafafai outou! Fa'auta, e tu'ua lo outou fale, e fa'atafunaina" Luka 13:34, 35).

O lo'o tatou ola i se taimi o le a logo ai i le fanau a tagata le fe'au mulimuli o le alofa tunoa, le vala'au mulimuli lava. Ua o'o i le taunu'uga mulimuli o le poloa'iga, "Ia ō atu i alatele ma alātua." Ua tu'uina mai Lana fe'au i agaga ta'ito'atasi uma, le vala'au a Keriso, "Inā ō mai ia, ua saunia nei mea uma." O lo'o galulue fa'atasi pea agelu o le lagi ma sui fa'alalolagi, ma o lo'o tu'u mai pea e le Agaga Pa'ia mea e tosina ai 'oe ia sau. A o silasila ifo pea Keriso mo se fa'ailoga o le a tatalaina le faitoto'a o lou loto mo Lona ulufale mai i ai, a o lo'o fa'atali ma ua sauni 'au a le lagi e tā la'au ma pepese vi'iga o le fiasia ona o se agaga ua talia le vala'au mo le tausama'aga o le tala lelei. O agelu fo'i sa fa'atali a e o nei ua latou aumaia i le lagi tala i se tagata agasala sa lē iloa, a e o lenei ua maua mai.

O le Fua o le Fa'amagaloga

Matā'upu 19

Fa'avaeina i luga o le Mataio 18:21-35.

Sa sau Peteru iā Keriso ma le fesili, "E agaleaga mai fa'afia ea lo'u uso iā te a'u, ma 'ou fa'amagaloga iā te ia? Se'ia atu fitu ea?" Na fa'agata e a'oa'o fa'aleagaga le gaoioiga mo le fa'amagaloina pe a fa'atolu ona agasala, a e ua manatu Peteru, e tatau ona fa'ataunu'u a'oa'oga a Keriso ma fa'ateleina ia fa'afitu, le fuainumera e fa'asino i le tulaga e ato'atoa. Peita'i na a'oa'o mai Keriso e lē tatau iā i tatou ona fa'avaivai e fa'amagaloga atu, a e na Ia fetalai ai, e lē "se'ia atu fitu, a ia fitugafulu ni fitu" (Mataio 18:22). Ona Ia fa'aali atu lea o le tulaga e tatau ona avatu ai le fa'amagaloga ma le faigatā pe a teuloto se agaga lē fa'amagaloga.

Na Ia ta'u atu i se fa'ata'oto le faigāmea a se tupu ma āna ta'ita'i, o ē na faia fa'agaoioiga o lona malō. Sa tu'u i nisi ta'ita'i tupe e tele mai le faigāmalō. Ina ua faia su'esu'ega a le tupu i le fa'aaogāina o nei 'oa e tele, na fa'ailoa ai se aitalafu sa faia e se tasi tagata i lona ali'i mo le aofa'i e sefulu afe taleni. E tusa ai ma le aganu'u, sa fa'atonu e le tupu e fa'atau atu lenei tagata ma āna mea totino uma ina ia mafai ona toe totogi mai lana aitalafu. A e ua fa'apa'ū le 'au'auna ua matuā fefe lava, ma fa'apea ane i le ali'i, "'Le ali'i e, ia e fa'apalepale mai iā te a'u, 'ou te tau'i atu ai āu mea uma.' Ona mutimuti vale ai lea o le alofa o le ali'i o lea 'au'auna, ua tu'u atu o ia ia sa'oloto, ma fa'amagaloga atu ana tupe ua i ai" (Mataio 18:26, 27).

A e peita'i ua "alu atu lea o lea 'au'auna, ua iloa e ia le tasi o ōna uso a 'au'auna ua i ai ana tenari e selau; ona pu'e lea ma titina iā te ia, ua fa'apea atu, Inā tau'i mai ia a'u mea ua iā te 'e. Ona fa'apa'ū atu ai lea o lona uso a 'au'auna i ona vae, ua 'ai'oi atu iā te ia, ua fa'apea atu, Ia e fa'apalepale mai iā te a'u, 'ou te tau'i atu au mea uma. A ua lē mafai o ia; a ua alu ma tu'u atu iā te ia i le fale puipui, se'ia tauia mai ana mea. Ua iloa e ōna uso a 'au'auna o mea na faia, ona latou matuā tigā ai lea; ua latou ō atu, ma ta'u atu i lo latou ali'i o mea uma lava na faia. Ona vala'au atu ai lea o lona ali'i iā te ia, ua fa'apea atu iā te ia, Le 'au'auna leaga e, na a'u fa'amagaloina atu a'u mea uma ua iā te 'oe, ina ua e 'ai'oi mai iā te a'u; e lē tatau ea ona e alofa atu i lou uso a 'au'auna, e pei o a'u fo'i na 'ou alofa atu iā te 'oe? Ona ita ai lea o lona ali'i, ua tu'u atu iā te ia i ē fa'atauma'oi, se'ia tauia mai ana mea uma" (Matio 18:28-34).

O lo'o tu'u manino mai i lenei fa'ata'oto mea e mana'omia mo le fa'amalamalamaina o le ata atoa. Peita'i e leai se tāua fa'aleagaga, vaganā 'upu moni o lo'o fa'aalia mai ma e tatau ona tatou mafaufau i ai i ia mea.

O le fa'amagaloga na tu'u mai e le tupu e fa'asino i se fa'amagaloina fa'ale-Atua o agasala uma, ma o Keriso le Tupu, Lē alofa mutimutivale, ua Ia fa'amagaloga le aitalafu a le 'au'auna. E lē mafai e le tagata ona fa'asoina ia lava ua ta'usalaina i lalo o le tulafono. O lea na afio mai ai Keriso i le lalolagi e la'ei i Lona itū Atua ma le itū tagata, ma tu'uina atu Lona ola, o Lē amiotonu mo lē e agasala. Ua Ia tu'u atu Ia mo a tatou amioleaga, ma ōfo atu e leai se tau le fa'amagaloga sa fa'atauina i Lona toto, mo agaga uma ta'ito'atasi. "O iā Ieova le alofa, o iā te Ia fo'i le fa'aolataga tele" (Salamo 130:7).

O lenei le 'auala e tatau ona tatou fa'aali atu ai lo tatou tigāalofa i o tatou uso ā tagata agasala. "Afai ua fa'apea ona alofa mai o le Atua iā te i tatou, e tatau ai ona tatou fealofani" (I Ioane 4:11). Ua fetalai mai Keriso, "Ua maua fua e outou, ia outou foa'ifuaina atu" (Mataio 10:8).

I le fa'ata'oto, sa to'esea le fa'asalaga ona o le ōlega a lē sa aitalafu, ina ia tolopō le totogiina ma lana folafolaga, "Ia e fa'apalepale mai iā te a'u, 'ou te tau'i atu ai āu mea uma" (Mataio 18:26). Sa soloia atoa le aitalafu, ma ua tu'u iā te ia le avanoa e mulimuli ai i le fa'ata'ita'iga a lona ali'i, lē na fa'amagaloga iā te ia. Sa fa'amagaloina le aitalafu telē mai lona ali'i, a e na ia lē fa'amagaloga i le aitalafu o nai pene laiti a lana uso ā 'au'auna ma na 'ese lana faiga i lea uso ā tagata galue. O ia lea na tauia i le fa'apalepale ona sa ia tagi atu i le tupu ma na soloia ai lea o le fa'asalaga. A o nei ua na lē fa'aali atu i lenei agaga se agalelei ma se tigāalofa, ua lē lagona e ia le ōlega mo se uiga onosa'i. E pau le mea sa tāua iā te ia o le aitalafu itiiti o lo'o i lenei uso. Ua ia tapa i le atoa o le tama'i aitalafu ma fa'atonu ia fa'ao'o le fa'asalaga e pei o lea na tatau ona faia mo ia, a e na toe 'ave'esea.

E to'atele o lo'o fa'aalitinoina lenei lava agaga e tasi. Ina ua òle atu lē sa aitalafu i lona ali'i mo le alofa tunoa, na te le'i iloa lelei le telē o lana aitalafu, ma e le'i iloa lona tulaga ua leai se fa'amoemoe. Peita'i sa manatu o le a mafai ona fa'asao e ia ia lava, ona fai atu lea, "Ia e fa'apalepale mai iā te a'u, 'ou te tau'i atu ai āu mea uma." E to'atele fo'i i latou o ē naunau e faia a latou lava galuega lelei ia fiafia mai ai le Atua, a e latou te lē iloa ua latou mana'omia le fesoasoani. Ua latou lē talia le meaalofoa foa'ifua o le alofa tunoa o le Atua ona o lo'o taumafai lava latou e atina'e lo latou fa'afiaamiotonu; ma o latou loto ua lē fa'amaulaloina ona o le agasala, a e tumau le fa'amaliegatā ma le lē fa'amagalo atu i isi. O a latou agasala i le Atua e matuā telē atu lea pe a fa'atusatusa atu i le agasala a lo latou uso iā i latou - e tau miliona i le tasi, a e fa'apefa ona latou lē fia fa'amagalo atu.

I lenei fa'ata'oto sa toe 'a'ami e le ali'i lē na aitalafu lē alofa, ma fa'apea atu iā te ia, "Le 'au'auna leaga e, na a'u fa'amagaloina atu a'u mea uma ua iā te 'oe, ina ua e 'ai'oi mai iā te a'u; e lē tataua ea ona e alofa atu i lou uso a 'au'auna, e pei o a'u fo'i na 'ou alofa atu iā te 'oe? Ona ita ai lea o lona ali'i, ua tu'u atu iā te ia i ē fa'atauma'oi, se'ia tauia mai āna mea uma." Ona fetalai atu lea o Iesu, "E fa'apea fo'i ona faia iā te outou e Lo'u Tamā o i le lagi, pe afai tou te lē ta'itasi ma fa'amagalo ma o outou loto atoa i o outou uso pe a latou agaleaga mai" (Mataio 6:15). O lē e lē mafai ona fa'amagalo atu o le a 'ave'esea e ia lona ia lava fa'amoemoe mo le fa'amagaloga.

A e lē tataua ona fa'aaogāsesēina le a'oa'oga o lenei fa'ata'oto auā e lē fa'aitiitia ai lo tatou tiute e usiusita'i ai i le Atua ona o Lona uiga fa'amagalo mo i tatou. O lea agaga fia fa'amagalo i o tatou uso a tagata o le a lē fa'aitiitia ai le tonu o lea mea e tataua ona faia. Na a'oa'o atu e Keriso i Ōna so'o le tatalo e fa'apea, "Ia e fa'amagalo iā te i matou i a matou agasala, pei o i matou fo'i ona matou fa'amagalo atu i ē agaleaga mai iā te i matou" (Mataio 6:12). E lē o le uiga o le a lē mana'omia e totogi mai aitalafu a ē na sesē mai iā i tatou ina ia mafai ai ona fa'amagaloina a tatou agasala. A latou lē mafai ona toe totogiina mai ona o le lē fai ma le fa'autauta, ia 'a'ua ne'i tu'uina i latou i le fale puipui, fa'asauāina, pe so'onafai; a e peita'i e lē o a'oa'o mai le fa'ata'oto e tu'u latou ia fa'apaiē pea. Ua fa'ailoa mai e le afioga a le Atua, pe afai o le a lē galue le tagata, o le a lē tataua fo'i ona 'ai (II Tesalonia 3:10). E lē finagalo le Ali'i ina ia talisapaia e le tagata galue ma'elegā isi e nofonofovale ma paiē, ona e to'atele o lo'o fa'ama'imaui le taimi, leai se fia taumafai, ona o'o mai ai lea o le mativa ma le mana'o i mea, a e lē o ni ana mea. Pe a lē fa'asa'oina ia sesē e i latou o lo'o tausisi i ia tulaga, o mea e faia e isi mo i latou o le a pei o 'oloa e tu'uina i totonu o se ato e i ai pūpū. Peita'i o lo'o ta'u mai ia tatou fa'aali se agalelei ma le fa'apalepale mo i latou e tulaga pa'ū ma le mativa, ma ia tatou faia i nisi pei ona mo'omo'o ia faia iā i tatou pe a tatou i ai i se tulaga fa'apea.

Na aumai se lu'iga a le Agaga Pa'ia mo i tatou e ala mai le aposetolo o Paulo, "O lenei, afai a e ai sē fa'amafanafana iā Keriso, afai a e ai sē fa'amatalaloto i le alofa, afai a e ai sē mafuta fa'atasi ma le Agaga, afai a e ai sē alofa mutimuti vale ma sē loto alofa, inā fa'a'ato'atoa mai ia e outou lo'u 'oli'oli, ina ia gatasitasi o outou manatu, ia iā te outou le alofa fa'atasi, ma le loto gatasitasi, ma le manatunatu i le mea e tasi. 'Aua ne'i faia se mea e tasi ma le finau vale, ma le mitamita fua; a ia ta'itasi outou ma manatu ma le loto maulalo, ua sili nisi uma iā te ia. 'Aua ne'i ta'itasi ma va'ava'ai i ana lava mea, a ia ta'itasi ma va'ava'ai i mea a isi. Ia iā te outou fo'i lea lava manatu sa iā Keriso Iesu" (Filipi 2:1-5).

E lē tataua ona manatu māmā i le agasala; ia ta'ua i lona igoa tonu ma ia ta'u manino i luma o lē ua faia le sesē. Ua fa'atonu mai le Ali'i ina ia 'a'ua ne'i tatou faia se mea ia leaga ai so tatou uso, e fa'apea, "Pe afai a e agaleaga mai lou uso iā te 'oe, ia e a'oa'i atu iā te ia" (Luka 17:3). Ia e ta'u le agasala o le agasala, ma fa'amanino atu i le tagata na faia le agasala.

I lana lu'iga iā Timoteo, sa tusi Paulo e ala i le Agaga Pa'ia, ua fa'apea atu, "Ia e tala'i atu le 'upu, ia e fa'amalosi i ōna aso e taugalēmū ai, ma ōna aso e lē taugalēmū ai, ia e fa'atonu atu, ia e a'oa'i atu, ia e apoapoai atu ma le onosa'i uma atoa ma le a'oa'o atu" (II Timoteo 4:2), ma sa tusi atu fa'apea iā Tito, "E to'atele ē solitulafono ua tautalatala i 'upu lē aogā ma fa'asesē atu....O le mea lea ia va'ava'ai ona e a'oa'i atu ai iā te i latou, ina ia fa'amaoni i le fa'atuatua" (Tito 1:10-13).

Sa fetalai Keriso, "Afai e agaleaga mai lou uso iā te 'oe, ia e alu, ma a'oa'i iā te ia tau lava o oulua ma ia. Afai e fa'alogi mai o ia iā te 'oe, ua e maua lou uso. A e afai e lē fa'alogi mai o ia, lua te ō ma se tasi, po o se to'alua, ina ia fa'amaoni ai 'upu uma i le mau a le to'alua, po o le to'atolu. A lē fa'alogi lava o ia iā te i la'ua, ia e ta'u atu i le ekalesia; pe afai e lē fa'alogi lava o ia i le ekalesia, ia 'avea o ia iā te 'oe, ia pei o le fa'apaupau, po o le telona" (Mataio 18:15-17).

O lo'o a'oa'o mai lo tatou Ali'i e uiga i fa'alētonu e tupu i le vā o tagata Kerisiano, ia tatau ona teuteuina ia lelei i totonu o le ekalesia. Pe a ua faia se sesē e se uso i se tasi uso Kerisiano, e lē tatau ona tagi atu i se malaefono o fa'amasinoga a ē lē talitonu, a e ia mulimuli i fa'atonuga sa tu'uina mai e Keriso. Ia lē taumafai e tauia lea leaga iā te ia, a e ia sa'ili e fa'asao mai lona uso. E puipui le Atua i a i latou e alolofa ma matata'u iā te Ia, ma o le a mafai fo'i ona avatu a tatou fa'afitauli uma iā te Ia, Lē e tonu Āna fa'amasinoga.

E tele taimi pe a ua faifai so'o ni agasala ma ua ta'uta'u fo'i e le tagata faimea sesē ōna leaga, ua o'o ina fiu ai le tagata ua manu'a ma manatu loa ia ua lava ona ia fa'amagalo atu. A e ua manino ona fetalai mai le Fa'aola pe fa'aapefa la tatou faiga o lē ua sesē: "Pe afai a e agaleaga mai lou uso iā te 'oe, ia e a'oa'i atu iā te ia; pe afai e salamō ia, ia e fa'amagalo atu iā te ia" (Luka 17:3). Ia lē fa'atauiina lea tagata o sē e leai sona aogā iā te 'oe. Mafaufau ma le "fa'aeteete 'oe, ina ne'i fa'aosoosoina fo'i 'oe" (Kalatia 6:1).

Pe a ua sesē sou uso, ia e fa'amagalo iā te ia, a e 'aia ne'i e fa'aapea, ailoga ua lava lana fa'amaulalo. A ē manatu e lē o iā i latou se salamō moni, a o iā te 'oe la se pule e fa'amasino ai iā i latou, pei e te mafai ona iloa mea i le loto o lea tagata? Ua fa'aapea mai le afioga a le Atua, "Pe afai e salamō ia, ia e fa'amagalo atu iā te ia. Pe afai fo'i e fa'afitu i le aso ona agaleaga mai o ia iā te 'oe, ma fo'i fa'afitu i le aso ona liliu mai iā te 'oe, ua fa'aapea mai, 'Ua 'ou salamō,' ia e fa'amagalo atu iā te ia" (Luka 17:4). Ma ia lē na o le atu fitu, a e ia fitu gafulu ni fitu - ia pei o taimi uma e fa'amagalo ai 'oe e le Atua.

E maua fua e tatou mea uma ona o le alofa tunoa o le Atua; o le alofa sa tu'u mai e ala i le feagaiga ina ua 'avea i tatou ma Āna fanau. O le alofa tunoa mai le Fa'aola e a'afia ai lo tatou fa'aolataga, lo tatou fa'afouina, ma le fa'aeaina o i tatou e 'avea ma sulī fa'atasi ma Keriso. Ia fa'aailoa atu lenei alofa tunoa i isi.

Ia 'aia ne'i fa'atagaina le uso na agasala ina ia toe fa'avaivai, ma ia lē fa'aaogāina se uiga lē alofa fa'a-Faresaio e fa'amanu'alia ai lea uso. Ia leai se manatu po o se loto fa'atauemu, pe i ai fo'i se uiga fa'asausili i le leo e fa'aali atu ai le 'ino'ino po o le uiga lē popole ma le masalosalo o le a fa'aumatia ai se agaga. O lenei uso e mana'omia le agaga o se "uso matua;" o lona tigāalofa o le a pā'ia lona loto fa'aletagata. Ia na lagona le 'u'umau a se lima e alofa mutimutivale ma fa'alogo i le musumusuga, "Ia tatou tatalo." O le tatalo e so'o fa'atasi ai tatou ma isi ma le Atua, ma o le a tu'u mai ai e le Atua fa'amanuiāga mo tatou uma. E fa'atasi mai Iesu pe a tatou tatalo, ma o le tatalo e tu'uina ai se malosī fou i le agaga ua fa'avaivai ma lē mautonu ina ia fa'ato'ilalo le lalolagi, o tu'inaanau o le tino, ma le ti'āpolo. O le tatalo fo'i e fa'aliliu'esea osofa'iga a Satani.

Pe a liliu'ese se tasi mai lona lē ato'atoa fa'aletagata ina ia iloa ai Iesu, o le a i ai se suiga fa'alelagi e tupu i lana amio. O le a galue le Agaga o Keriso i le loto e suia ai i Lona fa'atua; ia e taumafai loa e si'itia i luga Iesu. Ia fa'ataula'i mata o le agaga i le "Tama'i Mamoe a le Atua, Na te 'ave'esea le agasala a le lalolagi" (Ioane 1:29). Ma a o e faia lenei galuega, ia manatua "Lē e fa'afo'i mai le tagata agasala nai lona ala sesē, e fa'aolaina e Ia le agaga nai le oti, e ufiufi fo'i e Ia le vao agasala" (Iakopo 5:20).

"Afai tou te lē fa'amagaloina atu tagata i a latou agasala, e lē fa'amagaloina fo'i e lo outou Tamā a outou agasala" (Mataio 6:15). E leai se mea e ta'uamiotonu ai se agaga e lē fa'amagalo atu. O le tagata e leai se loto alofa mo isi e fa'aailoa mai ai o ia e lē o tofusīa i le alofa fa'amagalo o le Atua. Ina ua fa'amagaloina e le Atua le tagata ua sesē, o le a fa'atosina mai loa lona loto i Lē e alofa lē mafa'agataina. O Lona alofa mutimutivale o le a fa'atumulīa le agaga o le tagata agasala, ma o'o atu ai i nisi agaga. O le alofa mutimutivale ma le fa'apalepale sa fa'aalia e Keriso i Lona lava soifuāga, o le a va'aia iā i latou o ē ua tofusīa i Lona alofa tunoa. A e "ai se tasi ua lē iā te ia le Agaga o Keriso, e lē fai lea mona" (Roma 8:9). O ia ua vavae'ese mai le Atua, ma o lona i'uga o le vavae'esea lea mai iā te Ia e fa'avavau.

Atonu sa maua e ia le fa'amagaloga i se taimi; a e peita'i o lona agaga lē alofa ua fa'aailoa mai ai ua ia te'ena nei le alofa fa'amagalo o le Atua. Ina ua vavae'ese ia mai le Atua, ua toe fo'i nei i lona tulaga a e le'i fa'amagaloina; ua ia te'ena le salamō ma ua i ōna luga āna agasala pei lava e le'i salamō ai.

O le a'oa'oga tāua o lenei fa'ata'oto e maua lea i le fa'atusatusaina o le 'ese'esega i le vā o le fa'apalepale o le Atua ma le loto ua fa'ama'a'aina o le tagata, le fa'amaoniga o le alofa fa'amagalo o le Atua e fuatia ai lava i tatou. "E lē tatau ea ona e alofa atu i lou uso ā 'au'auna, e pei o A'u fo'i na 'Ou alofa atu iā te 'oe?" (Mataio 18:33).

E lē fa'amagaloina i tatou ona ua tatou fa'amagalo atu, a e ina ua tatou fa'amagalo. O le alofa e lē mafa'atusatusaina o le Atua o le fa'avae lea o fa'amagaloga uma, a e ala i o tatou uiga e fa'aalia mo isi o le a fa'ailoa atu ai pe mai se alofa ua faia mai iā i tatou lava. O lea ua fetalai mai ai Keriso, "Auā o le fa'amasinoga tou te fa'amasino atu ai, e fa'amasinoina ai outou; o le fua fo'i tou te fuaina atu ai, e toe fuaina mai ai iā te outou" (Mataio 7:2).

O le Mea na Maua a e ua Lē Iloa

Matā'upu 20

O lenei matā'upu e fa'avae i luga o le Luka 12:13-21.

Sa a'oa'o atu Keriso, ma e pei o Lana masani, ua potopoto ane Ōna so'o fa'apea ma nisi e to'atele iā te Ia. Na Ia fetalai atu i le 'au so'o i va'aiga o mea o le a a'afia ai i latou, e i ai le fa'asalalauina o 'upu moni i nu'u mamao pei ona Ia tu'uina iā i latou, ma o le a molia i latou i fete'ena'iga ma ta'ita'i o lenei lalolagi. Ona o Lona suafa, o le a vala'auina i latou i luma o fa'amasinoga, ma luma o ali'i ma tupu. O Āna lava afioga sa tosina ai loto o le to'atele ma aumai ai le vevesi i mafaufau o Ōna fili, o le a fai ma molimau i le mana o Lona Agaga na Ia folafola mai i Ōna so'o.

Peita'i e to'atele nisi sa naunautai ia maua le alofa tunoa o le lagi mo fuafuāga fa'apito mo ia lava. Ua latou iloa le mana ofoofogia o Keriso e aumaia i se malamalama e matuā manino le 'upu moni, ma na fa'alogoina ua folafola i Ōna so'o le potō e tautala ai i luma o ta'ita'i ma fa'amasino. Mata o le a Ia lē tu'uina Lona mana e fa'aaogā ia maua ai so latou manuia fa'alelalolagi?

"Ua fai mai iā te Ia le tasi tagata mai le motu o tagata, 'Le a'oa'o e, ia e fetalai ane i lo'u uso, ina ia vaeluaina mai le tofi iā te a'u" (Luka 12:13). Sa tu'uina e le Atua, e ala mai iā Mose fa'atonuga e fa'atatau i le fa'asologa ma le vaevaeina o mea totino. E lua vaega e maua e le atali'i ulumatua mai mea tau i 'oloa a le tamā (Teuterenome 21:17), a e vaelua tutusa vaega a uso uma e laiti ifo. Sa manatu lea tagata ua 'ave fa'asesē e lona uso lona tofi fa'alesuli. Sa lē manuia āna taumafaiga ia na maua mea na tataua ona aumai iā te ia. Na fa'alogoina ia i 'ai'oiga a Keriso ma Lona ta'uileagaina o tusi'upu ma le 'au Faresaio. Pe a fa'aaogā nei 'upu e tautala atu ai i lona uso, o le a lē mafai ona ia te'ena le vaega mo lenei tagata mafatia.

Mai totonu o fa'atonuga manino sa tu'u atu e Keriso, na fa'aalia ai e lenei tagata ōna uiga manatu fa'apito. Sa tataua ona ia iloa le mana o le Ali'i e mafai ai ona galue ia fa'aleleia lone tulaga fa'alelalolagi; a e peita'i e le'i fa'atumulia e mea moni fa'aleagaga lona loto ma le mafaufau. Ua fa'atāua iā te ia le maua o le tofi, a o Iesu le Tupu mamalu, o Ia e mau'oa a e mo i tatou ua fa'amativaina ai, ma sa naunau o Ia e tatala atu mo lenei tagata tamā'o'aiga o Lona alofa tunoa. Sa ōle pea le Agaga Pa'ia ina ia 'avea ia ma suli o "le tofi e lē pala, e leai se leaga o i ai, e lē mamae lava" (I Peteru 1:4). Na va'aia e ia le fa'amaoniga o le mana o Keriso, ma o le avanoa lenei mo ia e talanoa ai ma le A'oa'o Sili, e fa'aali ai fa'anaunauga o i lona loto. Peita'i, fa'apei o se tagata i se tasi fa'ata'oto, ua tepa taula'i ōna mata i le lalolagi, a e ua na lē iloa atu ai le pale o i luga o lona ulu. Ua tāua iā te ia le meaalofo a le Atua e fai ma ala ina ia maua ai manuia fa'alelalolagi.

Ua lata nei le fa'ai'uga o le galuega a le Fa'aola i le lalolagi. Ua na o nai masina o lo'o totoe e galue ai e fa'ataunu'uina mea sa Ia afio mai e fai ma fa'avae le malō o Lona alofa tunoa. O le tu'inaanau fa'aletagata se manū o le a fa'aliliu'ese ai Ia mai Lana galuega ona o le fefinaua'iga e uiga i le lau'ele'ele, peita'i e le'i faliu 'ese Iesu mai Lana fe'au. O Lana tali atu iā te ia, "Sole, o ai ea lē na fai A'u ma fa'amasino ma pule iā te outou?" (Luka 12:14).

Na mafai e Iesu ona ta'u atu i lea tagata le mea sa'o, auā e Na te silafia le tonu o le matā'upu. Peita'i o nei uso ua fefinaua'i ona o le uiga mana'ofua iā i la'ua uma. Ua fa'apea atu Keriso, E lē o Sa'u galuega le fa'aleleia o fete'ena'iga fa'apenei. Sa afio mai o Ia e tala'i le tala lelei, ina ia fa'atosina tagata ia lagona ma iloa mea tāua moni e fa'avavau.

O mea na faia e Keriso i lenei matā'upu o se a'oa'oga mo i latou uma o ē galulue i Lona suafa. Ina ua 'auina atu le to'asefulu ma le to'alua, sa Ia fetalai ai, "A outou ō, ia outou tala'i atu, ia fa'apea atu, 'Ua latalata mai le malō o le lagi.' Ia outou fa'amalōlō i ē mama'i, fa'amamā lepela, fa'atutū i ē ua oti, tutuli i temoni. Ua maua fua e outou, ia outou foa'ifuaina atu" (Mataio 10:7, 8). O la latou galuega o le una'iina fa'atauānau lea o tagata ia toe fa'aleleia ma le Atua, a e lē o le fofōina o fa'afitauli fa'alelalolagi. O le mana o i lenei galuega e manuia ai le aigā tagata, ona e pau le togafiti mo agasala ma mafatiāga a tagata o Keriso lea. E na o le tala lelei o Lona alofa tunoa e fa'aleleia le leaga ua fetu'u ai le fanau a tagata. O le

fa'atigā o ē matitiva e tagata maumea, po o le 'ino'ino o ē tulaga maulalo i ē mau'oa, o nei mea uma e tupu mai le manatu fa'apito ma e mafai ona fa'aumatia pe a gaua'i atu iā Keriso. E na o Ia e mafai ona aumaia se loto fou e alofa, a e 'ave'ese le loto fa'apito o le agasala. O le a tala'i atu le tala lelei e 'au'auna a Keriso ma le fesoasoani a le Agaga na 'auina mai le lagi, o le a galulue lea e pei ona faia e Ia mo le manuia o tagata uma. O nei i'uga o le a fa'atinoia i fa'amanuiāga ma e si'itia ai le aigā tagata i se tulaga maoa'e e lē mafai ona fa'ataunu'uina mai se malosi fa'aletagata.

Na taia e le Ali'i le autū o le fa'afitauli a lea tagata sa fesili, ma ē o lo'o fefinaua'i fa'apea, ina ua fetalai atu, "'Ia outou, ia leoleo outou iā te outou auā le matape'ape'a; Auā e lē ola se tasi i le tele o āna mea ua iā te ia. Ua fetalai atu Ia iā te i latou le fa'ata'oto, ua fa'apea atu, Na fua tele mai le fanua o le tasi tagata mau'oa; ona manatunatu ifo lea o ia, ua fa'apea, Se ā se mea ou te faia, auā ua leai sa'u mea e fa'aputu ai a'u fua? Ua fai ane fo'i o ia, O lenei le mea 'ou te faia; 'ou te sa'ena o'u fale saito, a e faia ia tele; 'ou te fa'aputu i ai a'u fua ma a'u mea lelei uma. 'Ou te fai ifo fo'i i lo'u agaga, Lo'u agaga e, ua iā te 'oe mea lelei e tele ua teuina mo tausaga e tele; inā nofonofo filemū ia, inā 'ai ia, ma inu ma ia e 'oli'oli. A ua fetalai atu le Atua iā te ia, O 'oe na le vale, e 'a'amiina atu lou agaga nai iā te 'oe i le pō nanei; a e fai ma ai mea ia ua e saunia? O lo'o fa'apea fo'i lē fa'aputu 'oa iā te ia, a e lē mau'oa i le Atua" (Luka 12:15-21).

E ala mai le fa'ata'oto i le tagata mau'oa valea, sa fa'aali mai ai e Keriso le lē aogā iā i latou o lo'o fai le lalolagi ma o latou ola atoa. Sa maua e lenei tagata mea uma mai le Atua. O le lā e susulu i luga o fanua uma, fa'apea le timu mai le lagi ona pa'ū i luga o ē amiotonu uma fa'apea ē amioleaga fo'i. O la'u e fua tele mai ma laufanua e olaola lelei, e mafua mai lava lea i le tausiga alofa a le Atua. Sa lē mautonu le tagata maumea po o se ā se mea o le a fai i fua o lona fanua, ona ua tumu ma lē ofi fale teu mea o le fa'ato'aga, ma ua leai se mea e tu'u i ai le tele o le selesalega. E le'i manatu o ia i le Atua, o Lē na maua mai ai āna fa'amanuiāga uma. Na te le'i iloa sa faia ia e le Atua o se tagata e tausimea mo āna 'oa ina ia fesoasoani atu i ē mana'omia le fesoasoani. Sa tu'u iā te ia le avanoa e 'avea ai o se 'au'auna a le Atua, peita'i o lona manatu e na o ia ma lona ia lava manuia.

Sa aumaia i luma o lenei tagata maumea le tulaga o ē matitiva, ē mātua oti, o lē ua oti lana tāne, o ē puapuagātia, ma ē mama'i; e tele mea e mafai ona tufa i ai āna 'ololo. Pe ana manatu i ai, e faigofie lava ona vaevaeina o āna 'oa tele, semanū o le a fafagaina ē o lo'o fia'a'ai, fa'a'o'ofu ē lē o lavalavā, fa'afiafia ai loto o le to'atele ona o tatalo ua taliina ma o le a fai a'e vi'iga fa'afetai i le Atua. E fa'afofoga le Ali'i i tatalo a ē mana'omia le fesoasoani, ma o Lona agalelei e sauni ai mo lē ua puapuagātia (Salamo 68:10). Ua fa'amanuiaina le tagata mau'oa ina ua tu'u i āna luga le faula'iga mea fa'aletino mo le to'atele o lo'o mana'omia se mea, a e peita'i ua punitia lona loto ua lē mafai ai ona ia lagona le tagi mai a lē o mafatia, Sa fai atu i āna 'au'auna, "O lenei le mea 'ou te faia; 'ou te sa'ena o'u fale saito, a e faia ia tele; 'ou te fa'aputu i ai a'u fua ma a'u mea lelei uma. 'Ou te fai ifo fo'i i lo'u agaga, Lo'u agaga e, ua iā te 'oe mea lelei e tele ua teuina mo tausaga e tele; inā nofonofo filemū ia, inā 'ai ia, ma inu ma ia e 'oli'oli" (Luka 12:18-20).

E le'i fuafua maua luga lenei tagata, a e sa ola pei e lē o i ai se Atua, leai se lagi, leai se ola o i lumana'i; ola pei e pule ia i mea uma o iā te ia, ma e lē aitalafu ia i le Atua po o se isi tagata. Ua fa'amatala mai e le faipese lea tagata maumea, fa'apea, "Ua fai ifo le tagata valea i lona loto, E leai se Atua" (Salamo 14:1).

Sa ola lenei tagata ma fuafua mo ia lava. Na va'ai ia i le lumana'i ua faula'i sauniuniga; ua na mautinoa e pau le mea e fai o le fa'apelepele ma fa'aaogā e fa'afiafia ai ia i fua o lana galuega. O lana fa'ata'oto e aupito sili a'e ia i lo isi lava tagata, ma e vi'ia e ia lava ia mo lona tomai e pulea ai āna mea. E aloā'ia o ia e āna uso ā tagatānu'u ona ua fa'apea o ia o se tagata e lelei lana fa'ata'oto ma se tagata e maumea, auā "e vi'ia fo'i 'oe pe a e agalelei 'oe iā te 'oe" (Salamo 49:18).

A e "o le poto o lenei lalolagi o le valea lea i luma o le Atua" (I Korinito 3:19). A o tepa taula'i le tagata mau'oa i le lumana'i o fiafiāga, o fuafuāga a le Ali'i mo ia e matuā 'ese lea. Ua o'o mai le fe'au i lenei tausimea lē fa'amaoni, "O 'oe na le vale, e 'a'amiina atu lou agaga nai iā te 'oe i le pō nanei." O lenei se mana'oga e lē mafai ona maua mai se tupe, ma e lē mafai e le 'oa na pele iā te ia ona fa'ata'oto mai ai se isi āna avanoa. I se taimi pu'upu'u lava, o mea uma na galue malosi ai i lona olaga atoa o le a lē toe aogā mo ia. "A e fai ma ai mea ia ua e saunia?" (Luka 12:20). Ua to'esea mai lalo o lana pule'aga āna fanua e tele

ma falesaito e matuā tutumu lava. "Ua fa'afaula'i e ia le 'oloa, a e lē iloa e ia po o ai e fa'apotopotoina ai" (Salamo 39:6b).

O le mea e tasi sa tatau ona fesiligia le tāua iā te ia, na ia lē maua. Ina ua ola fa'apito mo ia lava, na ia te'ena ai le alofa o le Atua semanū o le a fa'atāfea atu lenei alofa i ōna uso ā tagata. A e o lea ua ia te'ena le ola, auā o le Atua o le alofa, ma o le alofa o le ola lava lea. O lenei tagata ua na filifilia le fa'alelalolagi, a e lē o le fa'aleagaga; ma o le i'u fa'alelalolagi, e lava ina oti o ia. "O tagata o lo'o i le lelei, a e lē mafaufau, e tusa i latou ma manu ona fano" (Salamo 49:20).

"O lo'o fa'a'apea fo'i lē fa'aputu 'oa iā te ia, a e lē mau'oa i le Atua" (Luka 12:20). E moni lenei ata mo taimi uma. Atonu e te fuafua mo lou lava lelei, o le fa'apotopotoina o āu 'oa, atonu o le a fauina maota e tetele ma maualuluga, e pei ona faia e tufuga o Papelonia anamua; a e peita'i e te lē mafai ona fauina se puipui e sili le maualuga po o se faitoto'a o le a matuā malosi lava e puipuia ai 'oe mai 'avefē'au o le fa'atafunaga. Sa faia e le tupu o Pelesara le "faiga'ai tele" i lona maota, ma ua "latou vivi'i atu i atua o auro, ma ario, o 'apa memea, o u'amea, o la'au, ma ma'a." Peita'i sa tusia i luga o ōna puipui e le 'a'ao o Lē e lē mava'aia 'upu o le malaia, ma na fa'alogoina i faitoto'a o lona maota 'autau a le fili, ma sa nofoia ai le nofoāli'i e se tupu mai nu'u 'ese (Tanielu 5:4, 30).

A e ola mo 'oe lava ia, o lou malaia lea. O le mana'ofua, o le naunau i manuia mo 'oe lava ia, o le a tō'esea ai le agaga mai le ola, auā o le agaga lea o Satani ia aumaia ma fa'atosina 'oe iā te 'oe lava ia; a o le Agaga o Keriso o le tu'u atu lea, ia fai fa'ataulaga ofo 'oe mo le lelei o isi. "O lenei fo'i le mau, ua foa'iina mai e le Atua iā te i tatou le ola e fa'avavau; o le ola lava lea ua i Lona Ālo. O lē o iā te ia le Ālo, o iā te ia le ola; o lē e lē o iā te ia le Ālo o le Atua, e lē o iā te ia le ola" (I Ioane 5:11, 12).

O le mea lea sa fetalai mai ai o Ia, "Ia outou, ia leoleo outou iā te outou auā le matape'ape'a; auā e lē ola se tasi i le tele o āna mea ua iā te ia."

"O le Vanu Tele ua Toe Fa'aleleia"

Matā'upu 21

Fa'avacina lenei matā'upu i le Luka 16:19-31.

I le fa'ata'oto i le tagata mau'oa ma Lasalo, sa fa'aali mai ai e Keriso o le tagata e filifilia lava e ia i le olaga nei lona i'uga e fa'avavau. A o i le taimi o fa'ata'ita'iga, o lo'o ofoina e le Atua le alofa tunoa i agaga ta'ito'atasi uma lava, a e afai o le a fa'amaumau e tagata lo latou avanoa ina ia fa'amalieina i latou lava, ona soloi'esea lea o i latou mai le ola e fa'avavau. Ona o a latou lava filifiliga ua mautū nei se vanu lautele e lē mafai ona uia i le vā o i latou ma lo latou Atua.

Ua aumai e lenei fa'ata'oto se fa'atusatusaga i le vā o ē mau'oa e lē o fa'alagolago i le Atua ma tagata matitiva o lo'o 'avea le Atua mo latou fa'alagolagoga. Ua fa'aalia mai e Keriso le taimi o le a fesuia'i ai le tulaga o nei vasega e lua. O ē o lo'o matitiva i 'oa fa'alelalolagi a e o lo'o fa'atuatua i le Atua ma o lo'o onosa'i i puapuagā, i se aso o le a fa'aeaina i luga a'e o i latou o lo'o tulaga pito i maualuga o le lalolagi, ona e le'i tu'uina o latou ola i le Atua.

Ua fetalai mai Keriso, "O le tasi tagata mau'oa, ua ofu i le ofu pāuli, ma le 'ie vavae, ua talileleia lava ia i aso uma. O le tasi tagata mativa fo'i e igoa iā Lasalo, ua ta'atia i lona faitoto'a, ua lilo i le papala, ua mana'o tele ia e 'ai momoi mea na pa'u'ū ifo i le la'o'ai a le mau'oa" (Luka 16:19-21).

E lē o aofia ai le tagata mau'oa i le vasega e fa'asino i ai ma le fa'amasino lē fa'amaoni, o lē sa fa'aali manino lona lē amana'ia o le Atua ma tagata. Sa fai mai o ia o se atali'i o Aperā'amo, a e na te le'i sauāina le tagata mativa pe tuli'ese ia mai ōna luma ona e lē lelei lona tulaga i le va'aiga a tagata. Pe ana fai e fa'amālūina le tagata mativa i lona iloa atu o le mau'oa a o ulu atu i ōna faitoto'a, semanū o le a mafai ona nofo mau ai ia; peita'i ona o le loto fa'apito, ua ia lē popole ai i mana'oga o ōna uso o lo'o mafatia.

E le'i i ai ni maota gasegase mo le tausiga o ē mama'i, a e sa mātau i latou o lo'o puapuagātia ma mana'omia le fesoasoani e latou sa tu'u i ai e le Atua 'oa ina ia maua mai ai se fesoasoani ma se agaalofo. Sa fa'apea i le tagata mativa ma lē maumea, auā sa mana'omia tele se fesoasoani e Lasalo ona sa le'i i ai ni ana uō, aiga, tupe, po o se mea 'ai. Sa fa'ataga pea ia ona i ai i lenei tulaga i aso ta'itasi, a o mea uma na mana'o i ai le tagata maumea sa maua lava e ia. O le tagata e to'atasi sa mafai ona fa'amāmā mafatiāga a ōna uso, ua ola lava ia mo ia, pei ona faia e le to'atele i ōna pō nei.

E to'atele o i o tatou tuā'oi i le asō, ē o lo'o fia 'a'ai, lē lavalavā, ma leai ni aiga. A tatou lē avatua se fesoasoani iā i latou o lo'o puapuagātia, o le a i o tatou luga le ta'usalaina tatou te lē fia fa'afetaia'i ai i se aso lumana'i. O le mana'otele o le ifo i tupua lea, ma o le fa'amalieina o mana'o fa'apito uma, o se agasala maoa'e lea i le silafaga a le Atua.

Na faia e le Atua le tagata mau'oa ia 'avea ma tausimea o Āna fa'amanuiāga, ma o lona tiute o le galue lea mo so'o se itu'aiga tulaga e pei o le tagata mativa. Sa tu'u mai le poloa'iga fa'apea, "Ia e alofa atu iā Ieova lou Atua ma lou loto atoa, ma lou agaga atoa, ma lou malosi atoa" (Teuterenome 6:5); ma "e te alofa atu i lē lua te tua'oi ia pei o oe lava ia te 'oe" (Levitiko 19:18). O le tagata mau'oa o se lūtaia, ma na iloa lelei e ia le poloa'iga a le Atua; peita'i ua galo iā te ia o lo'o i ōna lava luga le fa'aaogāina o 'oloa ma agava'a ua tu'uina iā te ia. E tele na'uā fa'amanuiāga a le Atua na i ōna luga a e sa ia fa'aaogā fa'apito mo ia lava, e aloā'ia ai lava ia, a e lē o Lē na faia o ia. Sa fa'atonu mai le Atua ia na fa'aaogā āna meaalofa ia fa'atautau i le tele ua ia maua ina ia si'itia a'e ai le fanau a tagata, peita'i e le'i i ai se manatu o le tagata mau'oa i mea sa tataui iā te ia ona faia mo le Atua. O āna tupe sa fa'aaogā e aitalafu atu, na maua le fa'aopoopo ina ua toe totogi mai; a e na te le'i fa'aopoopo se mea fa'asili ina ua totogi atu mo lana aitalafu mai le Atua. O lona poto ma āna taleni ma agava'a, sa fa'aaogā uma lona malosi i tu'inanau, a e ua galo iā te ia lona tiute i le Atua. Ua si'omia o ia e mea uma mo le fa'amalieina o lona olaga fa'apito, o mea fa'afiafia, o 'upu fa'avivi'i, ma pepelo taufa'ase'e a āna uō. Sa matuā tāua iā te ia fa'alapotopotoga ma āna uō, ma ua lē amana'ia ai lona tiute e 'au'aumea fa'atasi ma le Atua i Lana galuega alofa. Sa iā te ia le avanoa e malamalama ai i afioga a le Atua ma mulimuli i ana a'oa'oga; a e ona ua ia filifili e fa'aaogā lona taimi i tu'inanau ma mea fa'afiafia, ua galo ai iā te ia le Atua o le fa'avavau.

Ua o'o i le taimi e suia ai le tulaga o ia tagata e to'alua. Sa mafatia i aso ta'itasi le tagata mativa, a e sa ola filemū ma onosa'i pea ia; i se taimi, ua oti ia ma ua tanumia i le 'ele'ele. E le'i i ai sona aiga na fa'atasi ma ia; a e ona sa onosa'i ia i puapuagā, na molimau pea ia mo Keriso ma sa tumau lona fa'atuatua a o tofotofoina, ma ina ua maliu sa fa'apea le tala o ia na 'ave a'e e agelu i le fatafata o Aperamo.

O Lasalo e fa'asino lea i le tagata mativa o lo'o mafatia a e fa'atuatua iā Keriso. Pe a ilia le pū ma toe tutū a'e uma ē o i tu'ugamau ina ua fa'alogo i le si'ufofoga o Keriso, o le a maua loa o latou tau; auā o lo latou fa'atuatua i le Atua e lē na o se manatu, a e o le mea e moni ma mautinoa.

"Ua oti fo'i le mau'oa, ma ua tanu; ua i seoli na fa'ataugāina, ona tepa a'e ai lea o ia, ua na iloa mamao atu ia Aperamo ma Lasalo i lona fatafata; ua 'alaga atu fo'i o ia, ua fai atu, 'Lo'u tamā e, Aperamo, ia e alofa mai iā te a'u, ma ia e 'auina mai Lasalo, na te fufui i le tumutumu o lona tamatama'ilima i se vai, e fa'amālulu a'i lo'u nei laulaufaiva; auā ua 'ou puapuagā i le mumū o le afi nei'" (Luka 16:22-24).

I lenei fa'ata'oto sa fetaia'i ai Keriso ma tagata i o latou lava laufanua. O le to'atele sa fa'alogologo i fetalaiaga a Keriso e iā i latou le talitonuga fa'ataui i le ola pea o le tagata i se tulaga malamalama, e i le vā o le oti ma le toe tū a'e; peita'i na silafia e le Fa'aola mea o i o latou mafaufau ma na Ia fuafua Lana fa'ata'oto ia tu'uina atu 'upu moni tāua i totonu o nei manatu na mua'i fa'avaeina. Sa Ia fa'atū i luma o le 'au fa'alogologo se fa'ata ia latou iloa ai lava lo latou vā feāloā'i ma le Atua. Na Ia fa'aaogāina le manatu o lea vaitaimi ia latou iloa ai Lona finagalo o lo'o mana'omia e fa'ailoa i tagata uma - e lē tāua se tagata ona o āna mea, auā o mea uma o lo'o iā te ia e na o se aitalafu mai le Ali'i. A fa'aaogā sesē nei meaalofo, o le a sili ona maulalo lona tulaga i lo le tagata e aupito mativa ma lē e matuā mafatia a e alofa ma fa'atuatua i le Atua.

Sa fa'anaunau lava Keriso mo Lana 'au fa'alogologo ina ia malamalama e lē mafai ona maua le fa'aolataga e le agaga o le tagata ua oti. Ua fa'aalia fa'apea, sa tali Aperamo, "Lo'u atali'i e, ia e manatu, na e maua au mea lelei i lou olaga, na maua fo'i e Lasalo o mea leaga; a o lenei, ua fa'a'oli'oliina ia; a ua puapuagāina 'oe. 26 E lē gata i nei mea uma, a ua tumau le vanu tele i lo tatou vā; o le mea lea e lē masao ai o ē ua i'inei ua fia ō atu iā te outou; e lē masao mai fo'i o ē ua i'inā iā te i matou nei." Ua fa'apea ona fa'asino e Keriso le leai o se fa'amoemoe pe a o tepa taula'i i se avanoa mo se fa'ata'ita'iga lona lua, ona e pau lava le taimi ua tu'u mai i le tagata e sauni ai mo le ola e fa'avavau, o le olaga lenei.

E le'i tu'u 'esea e le tagata mau'oa le talitonuga o ia o se atali'i o Aperamo, ma ona ua mafatia sa ia vala'au a'e ai mo se fesoasoani. O lana tatalo, "Lo'u tamā e, ia e alofa mai iā te a'u." Sa tatalo ia iā Aperamo, a e lē o le Atua; o lea ua fa'aalia mai ai ua ia tu'u le tulaga o Aperamo i luga a'e o le Atua, ma ua fa'alagolago i lona vā feāloā'i ma Aperamo ia maua ai le fa'aolataga. Ina ua tatalo le faomea i luga o le satauro iā Keriso, "Ia e manatua mai a'u, pe a e afio mai i Lou malō" (Luka 23:42), sa ia maua le tali i lea lava taimi, "E moni, 'Ou te fai atu iā te oe i le asō, ta te fa'atasi ma 'oe i parataiso." A e peita'i, e le'i maua se tali a le tagata mau'oa ina ua tatalo iā Aperamo. E na o Keriso ua fa'aeaina e 'avea o "le Ali'i i le ma le Fa'aola, na te avatua iā Isara'elu le salamō ma le fa'amagaloina o agasala" (Galuega 5:31). "E leai lava se isi igoa i lalo o le lagi ua foa'iina mai i tagata e mafaia ona fa'aolaina ai o i tatou" (Galuega 4:12).

Sa fa'aalu e le tagata maumea lona olaga atoa i le fa'amalieina o ia lava ia, ma ua tuai nei a e ua na iloa e le'i i ai sana sauniuniga mo le ola e fa'avavau. Ua ia iloa lona sesē ma ua manatu i ōna uso ma le i'uga e o'o i ai pe a latou faia pea pei o ia, o le ola e fa'amalieina ai latou lava ia. Ona ia talosaga atu ai lea, "Lo'u tamā e, 'ou te fa'atoga atu iā te 'oe, ina ia e 'auina atu o ia i le aiga o lo'u tamā; auā e to'alima o'u uso; ina ia molitino atu ia iā te i latou, ne'i latou ō mai fo'i i lenei mea puapuagā" (Luka 16:27, 28). A e "Ua fai ane Aperamo iā te ia, O iā te i latou Mose ma le 'au perofeta, ia latou fa'alogo i ai. A ua fa'apea atu ia, Lo'u tamā e, Aperamo, 'aua; a e afai e alu atu se tasi ia te i latou nai ē ua oti, e salamo ai i latou. Ua fai ane o ia iā te ia, Pe afai latou te lē fa'alogo iā Mose ma le 'au perofeta, e ui lava ina tū mai se tasi nai ē ua oti, latou te lē mafafai lava" (V. 29-31).

Na manatu le tagata mau'oa e tu'u se molimau mo ōna uso, a e o le tali, e ui i nei fa'amaoniga, o le a lē mafai lava ona fautuaina. O lana talosaga sa fai atu, na pei ua fa'apea, Pe ana e lapata'i mai a'u, semanū ua 'ou lē iinei. A e o le tali a Aperamo i lea talosaga, Ua uma ona 'ave le lapata'iga i ōu uso. Sa tu'u i ai le malamalama, a e latou te le'i fia vā'ai i ai; na fa'ailoa i ai le 'upu moni, a e peita'i latou te le'i fia fa'alogo i ai.

"Pe afai latou te lē fa'alogo iā Mose ma le 'au perofeta, e ui lava ina tū mai se tasi nai ē ua oti, latou te lē mafafai lava" (Luka 16:31). O nei 'upu a Aperamo sa matuā fa'amaonia lava e le tala fa'asolopito o le malō o Iutaia. O le vavega mulimuli ma e aupito sili ona maoa'e a Keriso, o le toe fa'atū a'e o Lasalo mai Petania, ina ua mavae aso e fā talu ona maliu o ia. Sa tu'uina atu iā Iutaia lenei fa'amaoniga ofoofogia o le itū Atua o le Fa'aola, a e peita'i sa latou te'ena lava Ia. Na molimau Lasalo i o latou luma ina ua toe tū a'e, a e na matuā fa'ama'a'aina o latou loto ma tete'e i ia fa'amaoniga uma, ma latou taupulepule e fasioti iā te ia (Ioane 12:9-11).

O le tulafono ma le 'au perofeta o le 'aufaigaluega tofia a le Atua mo le fa'aolaina o tagata. Na fetalai Keriso ina ia latou lagona lelei ai nei fa'amaoniga 'ese'ese. Pe afai latou te lē fa'alogo i le si'ufofoga o le Atua mai Lana afioga, o le a lē lagona fo'i 'upu molimau mai sē na toe fa'atū a'e nai ē ua oti.

O i latou uma e fa'alogo iā Mose ma le 'au perofeta o le a lē mana'omia se isi malamalama e sili i lo o lea ua tu'uina mai e le Atua; a e afai o le a te'ena e tagata le malamalama ma lē fa'aaogāina le avanoa ua tu'u iā i latou, pe a toe tū a'e se tagata oti ma se fe'au mo i latou, o le a lē mafai lava fo'i ona latou lagonaina lea mea. O le a lē mafai ona talitonu i latou i fa'amaoniga; auā o ē ua te'ena le tulafono ma perofeta, ua matuā fa'ama'a'aina o latou loto ma ua latou te'ena malamalama uma.

O le talanoāga a Aperamo ma le tagata mau'oa o se tala fa'afā'ata'oto, a o le a'oa'oga ua fa'aalia mai ai ua tu'uina i le tagata le malamalama o lo'o mana'omia ia na faia ai ōna tiute. O le tiute tau'ave a le tagata e fa'atatauina lea i ōna avanoa ma manuia fa'apitoa, ona e tu'uina e le Atua i tagata ta'ito'atasi le malamalama ma le alofa tunoa e faia ai le galuega ua Ia tu'u i ai e fai. Pe a fa'aalia mai e sina malamalama itiiti ua lē mafai e le tagata ona faia lona tiute, o le a fa'ailoa mai loa e le malamalama e tele atu lona amiolētonu, ma sa ia lē fa'aleleia atili manuia na tu'u mai. "O lē fa'amaoni i le mea itiiti, e fa'amaoni fo'i o ia i mea e tele; o lē amiolētonu i le mea itiiti, e amiolētonu fo'i o ia i mea e tele" (Luka 16:10). O i latou e lē taliaina le fa'amalamalama'aga a Mose ma le 'au perofeta a e talosaga mo se vavega ofoofogia e o'o mai, o le a lē mafai lava iā i latou ona talitonu, tusa pe fa'ataunu'u nei mea.

E fa'aalia mai e lenei fa'ata'oto i le tagata mau'oa ma Lasalo po o le ā le fa'atatau a le lalolagi e lē o mava'aia i vasega e lua o lo'o fa'asino mai e nei tagata. E lē o se agasala le maua o mea e tele, a e ta'usalaina le tagata mau'oa pe a na fa'aalu i se uiga fa'apito manuia na tu'uina iā te ia. Semanū e sili atu pe a na teuina āna 'oa i tafatafa o le nofoāli'i o le Atua, ina ia fa'aaogāina ai mo le lelei o isi; e lē mafai e le oti ona fa'amativaina se tasi pe a fa'amaoni pea e sa'ili 'oa e lē mavae a e fa'avavau. Peita'i o le tagata e fa'aputu āna 'oa mo ia lava, e lē mafai ona alu ia ma se mea i le lagi. Ua fa'amaonia o ia e lē o se tausimea fa'amaoni. Sa iā te ia mea lelei uma i lona olaga atoa, a e sa ia fa'agalo lona tiute tau'ave i le Atua, ma ua lē mafai e ia ona fa'amautū 'oa fa'alelagi.

O avanoa e tele na maua e le tagata mau'oa o lo'o fa'asino mai iā i tatou o ia sa tatau ona fa'amautū lelei āna meaalofoa, ina ia fa'alauteleina i ōna talaatu āna galuega ma avatu ai ma manuia fa'aleagaga e sili atu le lelei. O le fuafuāga o le fa'aolataga e lē mo na o le soloi'esea o agasala, a e ina ia toe avatu i le tagata nei manuia fa'aleagaga na lē iloa ona o le mana fa'atosina o le agasala. E lē mafai ona 'ave se tupe mo le ola o i lumana'i, auā e lē mana'omia ai i inā; peita'i o mea lelei uma sa faia mo le fa'asaoina o agaga mo Keriso e 'aveina lea i maota o le lagi. O ē sa fa'aalu ma le fa'apito mo i latou lava ia meaalofoa a le Ali'i, na latou lē amana'ia uso ā tagata sa mana'omia le fesoasoani ma lē faia se vaega ina ia fa'alauteleina ai le galuega a le Atua i le lalolagi, ua latou lē fa'atāuaina Lē na faia i latou. O le a tusia "ua gaioi mea a le Atua" i tafatafa o latou igoa i tusi o le lagi.

Sa i ai i le tagata mau'oa mea uma sa mafai ona maua mai tupe, a e na te le'i maua 'oa semanū o le a mautinoa ai le tonu o lona tulaga ma le Atua. Sa ola e pei o ia e ōna mea uma o iā te ia, ma ua ia lē amana'ia le vala'au mai le Atua fa'apea ē matitiva o lo'o mafatia. Peita'i ua sau nei le vala'au e lē mafai ona ia lē amana'ia, mai le mana e na te lē mafai ona fesiligia pe tete'e a e ua fa'atonu mai ia alu 'ese mai tamāoaiga ua lē o toe i lalo o lana tausiga. O le tagata sa mau'oa ua 'avea o sē mativa ua leai se fa'amoemoe, ma o le a lē mafai lava ona ufiufi o ia e le ofu o le amiotonu a Keriso. O ia lea sa ofu i le ofu pāuli tautele, ua lē lavalavā nei, ma ua uma lona taimi o tofotofoga. E leai se mea na aumaia e ia i le lalolagi, ma e leai fo'i se mea e mafai ona alu ma ia.

Sa 'ave'esea e Keriso le 'ie pupuni ma fa'aali atu lenei ata i luma o faitaulaga ma ta'ita'i, o tusi'upu ma le 'au Faresaio. Se'i vā'ai atu ia i ai, outou o ē mau'oa i mea fa'alelalolagi a e lē maumea i mea a le

Atua. Tou te lē fia manatunatu ea i lenei va'aiga, i mea e tāua i tagata a e inosia i le silafaga a le Atua? Sa fesili atu Keriso, "Auā se ā le aogā i le tagata, pe afai na te maua le lalolagi uma, a e māumau lona ola? Se ā fo'i se mea e avatu e le tagata e togiola a'i lona ola?" (Mareko 8:36, 37).

E Fa'atatau i le Malō o Iutaia

Ina ua tu'u atu e Keriso le fa'ata'oto i le tagata mau'oa ma Lasalo, e to'atele ē i le malō o Iutaia sa i ai i le tulaga o le tagata maumea, na latou fa'aaogā tamā'o'aiga o le Ali'i mo le fa'amalieina o latou lava, ma ua saunia ai latou e fa'alogi i le lauina o le fa'asalaga, "Ua fuatia 'oe i le fuafa'atautau, a ua iloa 'oe ua māmāsagia" (Tanielu 5:27). Sa fa'amamaluina le tagata mau'oa i so'o se manuia fa'aletino ma fa'aleagaga, peita'i sa tete'e e 'au'aumea fa'atasi ma le Atua i le fa'aaogāina o nei fa'amanuiāga. Sa fa'apea le malō o Iutaia, ona sa faia e le Ali'i i latou o tausimea mo 'upu moni pa'ia. Sa filifilia i latou o tausimea o Lona alofa tunoa, ma na tu'u iā i latou mea lelei uma fa'aleagaga ma fa'aletino ina ia latou tufa atu nei fa'amanuiāga. Na tu'u i ai fa'atonuga e fa'atatau i le tausiga o latou uso ua pa'u'ū i le leaga, o tagata 'ese o lo'o mau ma latou, fa'apea tagata matitiva o puapuagātia. E lē tatau iā latou ona sa'ili mea uma mo lo latou lava lelei, a e ia manatu i ē o lo'o mana'omia le fesoasoani e fa'asoa atu i ai. Ma na folafola mai le Atua e Na te fa'amanuiaina i latou e fa'atatau i a latou galuega alofa ma le agalelei. A e peita'i, sa pei latou o le tagata mau'oa, e le'i fa'amafola atu se lima fesoasoani e tau fa'amāmā ai puapuagā ma mana'oga fa'aleagaga pe fa'aletino fo'i a le fanau a tagata o lo'o mafatia. O i latou ua fa'atumulia i le mitamitavale ona ua manatu o latou o tagata filifilia ma e alofa fa'apito i ai le Atua; peita'i latou te le'i 'au'auna fa'amaoni pe tapua'i i le Atua. Sa fa'alagolago i latou ona ua fa'apea o latou o le fanau a Aperamo, ma fa'aailoa mai, "O i matou nei o le fanau a Aperamo" (Ioane 8:33). Ina ua o'o mai fa'afitauli, sa fa'aalia mai ai ua latou vavae'ese lava i latou mai le Atua, ua fa'atuatua iā Aperamo, e pei o ia o le Atua.

Sa fa'anaunau Keriso e fa'asusuluina le malamalama i totonu o mafaufau pogisā o tagata Iutaia. Sa ia fetalai atu iā te i latou, "Afai o le fanau outou a Aperamo, po ua faia e outou o le amio a Aperamo. A ua outou fia fasioti iā te A'u le tagata ua tautala atu iā te outou i le 'upu moni, sa 'Ou fa'alogi ai mai le Atua; e le'i faia lea e Aperamo" (Ioane 8:39, 40).

E le'i fa'atāuaina e Keriso le lelei mai le gafa, a e na a'oa'o atu ia i le matuā tāua o le so'otaga fa'aleagaga, ia sili a'e i lo so'otaga fa'aletino. E fa'aailoa mai pea e Iutaia lo latou tupuga mai iā Aperamo, a e ona ua latou lē faia galuega a Aperamo ua fa'amaonia ai lava o latou e lē o āna fanau moni. E na o i latou o lo'o fa'amaonia e talafeagai latou fa'aleagaga ma Aperamo e ala i le ususita'i i le si'ufofoga o le Atua, o i latou ia o āna fanau moni. E ui ina tu'u le tagata mativa i se vasega maulalo, a e sa silafia e Keriso o ia se uō lelei lava a Aperamo ma ua tu'u fa'alatalata atu iā te ia.

E ui ina sa si'omia le tagata mau'oa i mea lelei uma o le olaga, a e ona o lona mafaufau fa'apito ua ia tu'u ai Aperamo i le tulaga sa tatau ona i ai le Atua. Pe ana ia fa'atāuaina le avanoa sa fa'aeaina ai ia ma fa'ataga le Agaga o le Atua e fafau lona loto ma le mafaufau, semanū ua i ai ia i se tulaga 'ese; ma e fa'apea fo'i le malō o lo'o fa'asino i ai lenei a'oa'oga. Pe ana latou talia le vala'au pa'ia, manū ua 'ese le tulaga o lo latou lumana'i; semanū e fa'aalia manino lo latou malamalama fa'aleagaga. Sa tu'u iā i latou mea e fa'amanuia ma fa'amalamalamaina ai le lalolagi atoa, a e peita'i ua vavae 'ese mai i latou lava ia mai fuafuāga a le Ali'i ma ua fa'aaogā sesē ai o latou olaga atoa. O latou o tausimea a le Atua, a e sa lē mafai e latou ona fa'aaogā meaalofo e tusa ai ma le 'upu moni ma le amiotonu. E le'i aumaia i totonu o o latou mafaufau le ola e fa'avavau, ma o le i'uga o le lē fa'amaoni, o le fa'amalaiaina lea o le malō atoa.

Na silafia e Keriso o le a manatua e Iutaia Āna lapata'iga i le taimi o le fa'atafunaga o Ierusalem. Ina ua o'o mafatiāga i Ierusalem, ina ua o'o mai puapuagā 'ese'ese ma ua mata'utia le ōge i le 'a'ai, ona latou manatua lea o fetalaiaga a Keriso ma malamalama ai i lenei fa'ata'oto. Sa latou aumaia nei malaia i o latou lava luga ona ua lē amana'ia le Atua ma lē fa'aaogāina le malamalama na tu'u iā i latou e susulu atu ai i le lalolagi atoa.

I Aso o le I'uga

Ua fa'aalia mai i le fa'ai'uga o le tala fa'asolopito o le tagata mau'oa le va'aiga mulimuli o le tala fa'asolopito o lenei lalolagi. E ui ina fa'apea le tagata mau'oa o ia o se atali'i o Aperamo, a e sa vavae'ese ia e se vanu e lē mafai ona sopo'ia mai iā Aperamo. E le'i mafaufau le tagata mau'oa i le Atua ma le fesoasoani sa mana'omia e le fanau a tagata o lo'o mafatia; a e o Aperamo sa 'au'auna ia i le Atua, ma na usiusita'i i Lana afioga ma mulimuli i ai i le fa'atuatua. O le vanu tele sa tumau i le vā o ia ma Aperamo o le vanu o le lē usiusita'i, ma e to'atele i latou o mulimuli i lea lava ala i le asō; e lē o salamō i latou e ui ina fa'apea mai o latou o Kerisiano ma tagata ekalesia. Atonu e fai tofi i sauniga lotu, e vivi'i mai salamo fa'apea, "Le Atua e, e fa'apei ona naunau o le aila i vaitafe, o lo'o fa'apea ona naunau o lo'u agaga iā te 'Oe" (Salamo 42:1), a e o a latou molimau e lē fa'amaoni. I le silafaga a le Atua e lē sili atu latou i lo o le tagata e aupito agasala. E lē mafai lava ona 'au'auna i le Atua le agaga e tu'inanau i fa'afiafiāga fa'alelalolagi mo le fa'amalieina o ia lava, ma le mafaufau e fiafia i le ola fa'alialia. E fa'apei o le tagata mau'oa i le fa'ata'oto le mana'otele i tu'inanau o le tino, tu'inanau i mea 'ai e fa'amalie ai ia. Sa ia filifilia le tulaga o le agasala, ma ina ua to'esea fa'afuase'i e le oti, sa alu i le tu'ugamau ma le uiga na fofoaia i lona olaga atoa a o galulue fa'atasi ma 'au a Satani. I le tu'ugamau o le a lē i ai se avanoa e toe filifili ai mo le lelei po o le leaga; auā o le aso e oti ai le tagata, e fa'aumatia ai ōna manatunatu (Salamo 146:4; Failauga 9:5, 6).

Pe a fafaguina ē ua oti e le si'ufofoga o le Atua, o le a alu a'e lea tagata mai le tu'ugamau ma ia lava tu'inanau ma mana'oga, o mea e fiafia i ai ma mea e lē mana'o i ai, pei lava ona i ai a o ola o ia. Sa tu'u e le Atua i le tagata avanoa uma ma tu'u i ai mea lelei uma e fa'aaogā, o lea o le a lē galuea'iina e le Atua se vavega ia toe faia ai se tagata e lē o mana'o ia toe fofoaia. I lona olaga atoa e le'i fiafia ia i le Atua ma e le'i malie e 'au'auna mo Ia. E le'i talafeagai ōna uiga ma le Atua, ma o le a lē mafai ona maua sona fiafia e fa'atasi i le aiga fa'alelagi.

O lo'o i ai se vasega i le lalolagi i le taimi nei, e fa'afiaamiotonu. O latou e lē o ni tagata e fiafia i le 'ai, e lē inu 'ava malosia e onanā ai, e lē o tagata lē talitonu fo'i; a e fa'anaunau e ola fa'apito mo latou lava, e lē mo le Atua. E lē i ai le Atua i o latou manatunatuga, ma e i ai i le vasega o ē lē talitonu. Pe ana mafai ona latou ulu atu i faitoto'a i le 'ai o le Atua, o le a lē mafai ona i ai so latou tofi i le la'au o le ola, auā sa latou te'ena tulafono a le Atua ina ua fofola atu i o latou luma. Latou te le'i ola ma 'au'auna i le Atua i lenei olaga, o le a latou lagona fo'i le lē fia i ai i le lagi.

O le uiga o le iloa o Keriso o le talia lea o Lona alofa tunoa, auā o Lana amio moni lea. Peita'i o i latou o ē lē fa'aaogāina avanoa tāua ma mea pa'ia ua tu'u mai i le lalolagi, o le a lē talafeagai e tofusia i manuia o le lagi. O a latou amioga e lē o faia e fa'atatau i uiga fa'ale-Atua. Ina ua latou lē amana'ia sa latou faia ai se vā e lē mafai ona toe soso'o, a e ua fa'atunau ai se vanu tele i lea vā ma ē amiotonu.

O 'Upu ma le Faia

Matā'upu 22

Fa'avae lenei matā'upu i luga o le Mataio 21:12-16, 23-32.

"O le tasi tagata e to'alua ōna atali'i; ua alu atu ia i le ulumatua, ua fa'apea atu, Sole, inā alu ia i le asō, se'i e galue i la'u tovine. Ona tali mai ai lea o ia, ua fa'apea mai, 'Ou te musu; a e mulimuli ane ua salamō ia, ua alu. Ona alu atu ai lea o ia i le tasi, ua fa'apea fo'i lana upu *iā te ia*. Ona tali mai ai lea o ia, ua fa'apea mai, Le ali'i e, 'ou te alu; a ua lē alu lava ia. O ai ea so la'ua na faia le loto o lo la tamā? Ona latou fa'apea mai ai lea iā te Ia, O le ulumatua" (Mataio 21:28-31).

I le lauga i luga o le mauga, sa fetalai atu ai fa'apea Keriso, "E lē sao atu i le malō o le lagi i latou uma o ē fai mai iā te A'u, Le Ali'i e, le Ali'i e; na o lē na te faia le finagalo o Lo'u Tamā o i le lagi." O le fa'amaoni e lē tofotofoina i 'upu, a e o galuega e faia. E lē fetalai atu Keriso i se tagata, Se ā sau 'upu e fai ua sili atu i lo se isi? peita'i, e le "Se ā se mea sili ua outou faia?" (Mataio 5:47). O Āna fetalaiga e matuā uigā, "Afai ua outou iloa ia mea, amu'ia outou pe a outou faia" (Ioane 13:17). E leai se tāua o 'upu vaganā o lo'o ō fa'atasi ma galuega tatau ai. O lea le a'oa'oga na tu'u mai i le fa'ata'oto i atali'i e to'alua.

O lenei fa'ata'oto sa fetalai ai Keriso i Lana toe asiasiga i Ierusalema a o le'i malii o Ia. Ina ua Ia tutuli i fafo mai le malumalu ē sa fefa'ataua'i 'olua, na lagona i o latou loto le mana o le Atua i Lona si'ufofoga. E le'i faitio i latou pe tete'e atu a e sa usiusita'i i Lana fa'atonuga ona o le ofo ma ua matata'u.

Sa toe fo'i le 'au faitaulaga ma ta'ita'i i le malumalu ina ua te'a'ese le fefe, ma ua maua atu Keriso o lo'o fa'amalōlō i ē mama'i ma ē mafatia o le a oti. Sa latou fa'alogi i vi'iga ma leo fiafia, o fanau na toe fa'afoti i le soifua malōlōina ua pepese ma vivi'i i le Ālo o Tavita. A e peita'i o nei mea lelei uma e le'i lava mo faitaulaga ma ta'ita'i, ina ia fa'ato'ilaloina ai lo latou fa'ailoga tagata ma le matau'a.

I le aso na soso'o ai, a o a'oa'o atu Keriso i le malumalu, ua ō mai iā te Ia faitaulaga sili ma toea'ina o le nu'u, ma ua fa'apea atu, "O le ā ea le pule e te fai ai na mea? o ai fo'i na na tu'uina atu iā te 'Oe lenei pule?" (Mataio 21:23).

Sa i ai i le 'au faitaulaga ma toea'ina fa'amaoniga manino o le mana o Keriso; e pei o le aso na Ia fa'amamā ai le malumalu, sa latou va'aia ai le pule fa'alelagi ina ua susulu mai Ōna fofoga. Latou te le'i mafai ona te'ena le mana o Āna fetalaiga, fa'apea tali i a latou fesili e fa'atatau i le ofoofogia o Āna galuega fa'amalōlō. Na Ia tu'u atu fa'amaoniga o Lana pule e lē mafai ona fesuia'i, a e lē o fa'amaoniga sa latou mana'omia. Sa naunau faitaulaga ma ta'ita'i ia fa'ailoa mai e Iesu o Ia lava o le Mesia ina ia latou fa'aogāsesē Āna fetalaiga ma fa'avevesi ai tagata ia tete'e iā te Ia. O lo latou fa'amoemoe ia fa'aumatia Lona mana fa'atosina ma mafai ai ona fasioti iā te Ia.

Na silafia e Iesu pe a ua lē mafai ona latou iloa le Atua i Lona itū tagata, pe va'aia i Āna galuega fa'amaoniga o Lona uiga fa'ale-Atua, o le a latou lē talitonu fo'i i Lana lava molimau, o Ia o le Keriso. Ina ua Ia fetalai atu, na Ia 'alo'ese mai le matā'upu sa latou manatu e 'aumi i luma, a e sa fa'aliliuina ma ua ta'usalaina ai lava i latou.

Na Ia fa'apea atu, "'Ou te fesili atu fo'i A'u iā te outou se 'upu e tasi; afai tou te ta'u mai lea ia te A'u, ona 'Ou ta'uina atu lea le pule 'Ou te fai ai nei mea. Se papatisoga ea a Ioane maifea? mai le lagi ea, pe mai tagata?" (Mataio 21:24, 25).

Sa matuā femēmēa'i le 'au faitaulaga ma ta'ita'i. "Ona latou felafolafoa'i ai lea, ua fa'apea ane, Afai tatou te fai atu, Mai le lagi; ona fai mai ai lea o Ia ia te i tatou, Se ā fo'i le mea tou te le'i talitonu ai ia te ia? Afai fo'i tatou te fai atu, Mai tagata; ua tatou fefefe i le motu o tagata; auā o la latou lea taofi uma iā Ioane, o le perofeta ia. Ona latou tali mai ai lea iā Iesu, ua fa'apea mai, Matou te lē iloa. Ona fetalai atu ai lea o Ia iā te i latou, 'Ou te lē ta'u atu fo'i iā te outou le pule 'Ou te fai ai nei mea."

O lenei tali "Matou te lē iloa," o se mau pepelo, a e ua iloa e faitaulaga le tulaga ua i ai nei i latou ma ua tu'u mai lea tali sesē ina ia puipuia ai latou lava ia. Na sau Ioane le Papatiso e aumi le molimau i Lē e ōna le pule lea ua latou fesiligia nei. Sa ia fa'asino iā te Ia ma fa'apea atu, "Fa'auta i le Tama'i mamoe a le Atua, na te 'ave'esea le agasala a le lalolagi" (Ioane 1:29). Ina ua mae'a ona papatisoina o Ia e

Ioane, sa tatala mai le lagi ma ua afio ifo le Agaga o le Atua e pei o se lupe ma ua nofo i Ōna luga, a o fa'alogoina le si'ufofoga mai le lagi ua fa'apea mai, "O lo'u Atali'i pele lenā, ua 'Ou fiafia lava iā te Ia" (Mataio 3:17).

Ona sa latou manatua valo'aga na toe fa'a'ailoa e Ioane e fa'atatau i le Mesia, ma sa manatua va'aiga i le papatisoga o Iesu, e le'i mafai ai ona fa'apea le 'au faitaulaga ma ta'ita'i o le papatisoga a Ioane e mai le lagi. Ona sa latou talitonu o Ioane o se perofeta, o le a fa'apefea ona latou tete'e i lana molimau o Iesu le Nasareta o le Ālo o le Atua? Ona e talitonu le motu o tagata o Ioane o se perofeta, sa lē mafai fo'i ona fa'apea o le papatisoga a Ioane e mai tagata lea. Sa latou fai mai loa, "Matou te lē iloa."

Ona tu'u atu lea e Keriso le fa'ata'oto i le tamā ma ōna atali'i e to'alua. Sa alu atu le tamā ma fa'apea atu i le atali'i muamua, "inā alu ia i le asō, se'i e galue i la'u tovine," a e ua tali mai le atali'i, "'Ou te musu." Sa lē mana'o e usiusita'i ma na tu'u atu ia lava i le ola leaga ma fa'auōga fa'apea, a e mulimuli ane ua salamō ia, ma ua usita'i i le vala'au.

Sa alu le tamā i le atali'i lona lua ma lea lava fa'atonuga, "inā alu ia i le asō, se'i e galue i la'u tovine." Na tali lea atali'i, "Le ali'i e, 'ou te alu," a e sa lē alu o ia.

O le tamā i lenei fa'ata'oto e fa'asino lava lea i le Atua, ma o le tovine o le ekalesia lea. O atali'i e to'alua e fa'asino lea i vasega e lua o tagata. O le atali'i sa lē mana'o e usita'i i le fa'atonuga ma tali mai "Ou te musu," e fa'asino lea iā i latou o lo'o ola ma faia pea le agasala, e latou te lē fia ta'u mai o latou e amiotonu, e lē fia fa'aalia mai e i lalo o le avega o mea e fa'asāina ma le usiusita'i, auā o mea ia e tāua i le tausia o le tulafono a le Atua. Mulimuli ane, o i latou nei e to'atele sa toe salamō ma usiusita'i i le vala'au a le Atua. Ina ua o'o iā i latou le tala lelei e ala mai le fe'au a Ioane le Papatiso, "Inā salamō ia outou; auā ua latalata mai le malō o le lagi" (Mataio 3:2), sa salamō i latou ma ua ta'uta'u atu a latou agasala.

O le atali'i na fai mai "'Ou te alu," a e na lē alu lava, o lo'o fa'aali mai ai le uiga o le 'au Faresaio. E fa'apei o lenei atali'i, e le'i salamō ta'ita'i Iutaia, a e sa manatu lava latou mo latou, ma o le ola fa'aleagaga o le malō o Iutaia sa na o le fa'afoliga. Ina ua ta'u mai le tulafono e le si'ufofoga o le Atua i luga o le mauga o Sinai, sa ta'utino tagata uma o le a usiusita'i i ai. Na fa'apea mai i latou, "'Ou te alu," a e peita'i latou te le'i ō atu. Ina ua afio mai Keriso i Lona itū tagata e tu'u i o latou luma fa'avae o le tulafono, sa latou te'ena o Ia. E tele na'uā fa'amaoniga sa Ia tu'uina i ta'ita'i Iutaia o ia ōna pō e fa'atatau i Lana pule ma le mana fa'a-Atua, peita'i, e ui ina sa talitonu lava i ai, a e latou te le'i talia ia fa'amaoniga. Sa fa'aali i ai e Keriso lo latou lē talitonu pea ona e lē o iā i latou le agaga e ta'ita'i ai ina ia usiusita'i. Na ia fetalai atu iā te i latou, "Ua fa'apea ona outou fa'alēaogāina le poloa'iga a le Atua i a outou 'uputu'u.... E tapua'i fua mai i latou ia te A'u i lo latou fai ma mata'upu o poloa'iga a tagata" (Mataio 15:6, 9).

Sa potopoto i luma o Keriso le motu o tagata e aofia ai tusi'upu, o Faresaio, faitaulaga ma ta'ita'i, ma ina ua mae'a ona fetalai atu i le fa'ata'oto i atali'i e to'alua, sa tu'u atu loa e Keriso se fesili i Lana 'au fa'alogologo, "O ai ea so la'ua na faia le loto o lo la tamā?" Sa vave atu le tali a Faresaio, "O le ulumatua." O la latou 'upu na alu atu ma le lē iloa ua latou ta'usalaina ai lava latou. Ona pa'ū mai lea o moliaga mai iā Keriso, ua fa'apea mai, "E moni, 'Ou te fai atu ia te outou, E muamua atu telona ma fafine talitane ia te outou i le malō o le Atua. Auā na sau Ioane ia te outou i le ala o le amiotonu, a e tou te le'i talitonu ia te ia; a ua talitonu ia te ia telona ma fafine talitane; ua outou iloa fo'i, a e le'i mulimuli ona salamō outou, ina ia talitonu ai iā te ia" (Mataio 21:31).

Na sau Ioane le Papatiso e tala'i le 'upu moni, ma sa talitonu ai ma liua tagata agasala i lana tala'iga. O i latou nei o le a muamua i le lagi i lo o le 'au fa'afiaamiotonu o lo'o tete'e pea i lapata'iga. Sa lē amana'ia telona ma fafine talitane, peita'i sa iloa e nei tagata a'oa'oina le ala o le 'upu moni, a e na latou tete'e atu ia lē savavali ai i le ala e o'o ai i le Parataiso o le Atua. O le 'upu moni sa tataua ona ta'ita'ina latou ia tofo i le ola e fa'avavau, a e ua ta'ita'i i latou i le ala o le oti. O tagata agasala sa 'ino'ino i o latou olaga, ua maua e latou le papatisoga mai iā Ioane; a e o nei a'oa'o e lē fa'amaoni ma e fa'afoliga. O latou loto ua fa'ama'a'aina ma ua lē mafai ai ona latou maua le 'upu moni. Sa latou te'ena le ta'ita'iga a le Agaga o le Atua ma latou lē usiusita'i ai i Āna poloa'iga.

E le'i fetalai atu Keriso iā i latou, Tou te lē mafai ona ūlu atu i le malō o le lagi; peita'i sa Ia fa'a'ailoa atu o le fa'afitauli o lo'o lē mafai ai ona ūlu atu e pogai mai iā i latou lava. O lo'o tatala mai pea le faitoto'a mo nei ta'ita'i Iutaia, ma o lo'o tu'u mai pea le vala'au ona o lo'o naunauta'i lava Keriso ia silasila atu iā i latou ua talitonu ma ua liua.

O olaga atoa o faitaulaga ma ta'ita'i o Isara'elu sa fa'aaogā i le faiga o sauniga fa'aleagaga, ona ua latou fa'atatauina nei mea e pa'ia ma e lē tatau ona tu'u fa'atasi ma galuega fa'alelalolagi. O lea e tatau ai ona fa'aaogā ato'atoa o latou olaga i mea fa'aleagaga. Peita'i o a latou sauniga sa faia ia va'aia e tagata ma fa'apea ai le lalolagi o latou e amiotonu lelei ma pa'ia, a e ui ina fa'aailoa atu o lo'o usita'i i fa'atonuga, latou te lē o usiusita'i i le Atua. Latou te a'oa'o mai pea le 'upu moni, a e latou te lē o mulimuli e faia mea o lo'o latou a'oa'o'ina.

Sa fa'aailoa mai e Keriso o Ioane le Papatiso o se tasi e aupito sili o le 'au perofeta, ma na Ia fa'aali i Lana 'au fa'alogologo fa'amaoniga e tele e mautinoa ai o Ioane o se 'avefe'au mai le Atua, o āna 'upu sa tu'uina mai ma le mana. Na ia tau'ave ma le lototele lana fe'au, sa a'oa'i atu e fa'atatau i agasala a faitaulaga ma ta'ita'i, ma na fa'atonu i latou i galuega a le malō o le lagi. Sa ia fa'asino i lo latou lē amana'ia o le pule a le Tamā ona ua lē faia le galuega sa tofia e latou te faia. E to'atele na liliu'ese mai a latou amiolētonu ona sa ia lē fetu'utu'una'i ma le agasala.

Pe ana fa'amaoni 'upu a ta'ita'i Iutaia, semanū na latou maua le molimau a Ioane ma talia ai o Iesu o le Mesia. Peita'i e le'i fa'aalia fua o le salamō ma le amiotonu, a e o ē na latou 'inosia, ua amata fa'agasolo atu aga'i i le malō o le Atua.

I le fa'ata'oto i le atali'i na fai mai "Ou te alu," sa fa'asino mai ai o ia e fa'amaoni ma e usiusita'i; peita'i sa fa'amaonia mulimuli o āna 'upu e lē moni ma e lē alofa fa'amaoni i lona tamā. O le 'au Faresaio e mitamitavale ona o lo latou mamalu, a e pe a tofotofoina, e matuā māmāsagia lava i latou. Pe a mana'omia ina ia faia se mea mo so latou lelei, ona latou fai lea o tulafono e matuā fa'amalieatā; peita'i e lē talafeagai mea e mana'omia mai iā latou lava, a e ona o le poto faitogafiti ua latou tu'u'ese ai fa'atonuga a le Atua. O latou ia na fetalai fa'atatau i ai Keriso, "a'ua tou te fa'aa'oa'o i a latou amio; auā ua latou fai atu, a e latou te lē faia" (Mataio 23:3). O latou na vala'au e le Atua ia 'au'aumea fa'atasi ma Ia e fa'amanuia ai le lalolagi; peita'i sa fa'aailoa mai ua latou talia le vala'au, a e le'i usiusita'i ona e lē i ai iā i latou se alofa mo le Atua po o tagata. Sa talitonu i latou iā i latou lava, ma fa'alialia lo latou lelei, peita'i sa latou te'ena fa'atonuga a le Atua. Latou te le'i faia le galuega sa tofia ai latou e le Ali'i, a e ona o la latou agasala, ua sauni nei le Atua e vavae'ese Ia mai le malō lē usiusita'i.

O le fa'afiaamiotonu e lē o le amiotonu moni, ma o latou e u'umau i ai o le a tu'uina atu latou i le tau i o le taofimau i ia uiga tau'asesē. E to'atele i le asō ē o lo'o ta'u mai e usiusita'i i poloa'iga a le Atua, peita'i e lē iā i latou le alofa o le Atua i o latou loto ina ia fa'atafe atu ai i isi. Ua vala'au Keriso ia latou so'ofa'atasi ma Ia i Lana galuega mo le fa'asaoina o le lalolagi, peita'i ua na o le fiafia e fa'apea, "Ou te alu atu," a e lē alu. Latou te lē 'au'aumea fa'atasi ma ē o lo'o faia le galuega a le Ali'i, ona o le paiē, ma e pei o le atali'i lē fa'amaoni, latou te faia folafolaga pepelo i le Atua. Ina ua latou tau'a'aoina le feagaiga a le ekalesia, sa latou ta'utino atu e talia ma usiusita'i i le afioga a le Atua, ma o le a tu'u atu latou mo le galuega a le Atua, peita'i latou te lē faia lenei mea. Ua ta'u mai o latou o atali'i o le Atua, peita'i i o latou ola ma amioga, ua latou te'ena lea vā fealoā'i. Latou te le'i tu'u atu i latou ia pulea e le finagalo o le Atua, ma ua ola pea i se olaga pepelo.

O le folafolaga ia usiusita'i ua foliga mai e latou te fa'ataunu'u pe afai e lē o alu ai se malosia; peita'i pe a mana'omia ia fa'afitia 'oe e 'oe lava ma e tu'u atu 'oe mo le lelei o isi, pe a e va'aia le satauro e tatau ona amoina, ona latou toe solomuli lea i tua. A te'a'ese loa le talitonu i tiute tau'ave, o le a 'avea ma masani le solia o tulafono a le Atua, ma o le a fa'ama'a'aina le loto. Atonu o le a lagona pea le afioga a le Atua, a e ua mavae'ese le mana fa'aleagaga e va'ai manino ai.

Ia e lē manatu ona e te lē o faifili iā Keriso, o lo'o e galue pea mo Ia. Pe a tatou taofi i mea sa tu'u mai e le Atua e fa'aaogā i Lana galuega, o le taimi po o 'oa, po o se isi lava o Āna meaalofa, ua tatou galulue lea e tete'e iā te Ia.

E fa'aaogā e Satani ē o ta'ua o Kerisiano a e o lo'o tautulimoe, fugofie, ma lē fiafia, e fa'amalosia ai āna 'au ma ia maua mai ai agaga i lana itū. E to'atele o lo'o manatu o i ai pea latou i le itū a Keriso, e ui ina e latou te lē o faia se galuega mo Ia, a e o latou fa'atagaina le fili e ūlu i o latou loto ma maua ai sona avanoa ma latou. Ona ua latou lē galulue ma le ma'elegā mo le Matai, ua tu'u o latou tiute ma 'upu e le'i tautalagia, a e ua latou fa'atagaina ai Satani e pulea agaga o ē manū e maua mai mo Keriso.

E lē mafai lava ona fa'asaoina i tatou e paiē ma lē galulue, ma e leai se tagata liua fa'amaoni e ola i se olaga e lē aogā ma ua leai se fa'amoemoe. E lē mafai lava e se tasi ona tafea atu aga'i i le lagi, auā e lē

mafai e se paiē ona ūlu i ai. Pe a tatou lē taumafai e ūlufale i le malō, pe a lē sa'ili ma le fa'amaoni e su'esu'e i mata'upu o i ōna tulafono, o le a lē tataui i tatou mo se vaega o i ai. O i latou e lē fia 'au'aumea ma le Atua i le lalolagi o le a lē 'au'aumea fo'i ma Ia i le lagi, ma o le a lē saogalemū le aveina o latou i le lagi.

E sili atu le tele o le fa'amoemoe mo le 'au telona ma tagata agasala i lo o i latou e iloa le afioga a le Atua a e lē usiusita'i i ai. O lē e va'ai iā te ia o le tagata agasala a e na te lē ufitia ōna sesē, e iloa o lo'o ia fa'aleaga lona mafaufau, tino ma le agaga i luma o le Atua, a e o'o ina fa'aatuatuva'eina ona ne'i vavae'esea ia mai le malō o le lagi. Ua iloa e ia lona tulaga pagātia, ua ia sa'ili loa se fa'amalōlōga mai le Foma'i Sili lea sa fetalai mai, "O ia fo'i e sau iā te A'u, 'Ou te lē tulia lava i fafo" (Ioane 6:37). O agaga nei e mafai e le Ali'i ona fa'aaogā e galulue i Lona tovine.

E le'i tu'ua'ia pe na ta'uleleia e Keriso le atali'i sa muamua lē mana'o e usita'i i le fa'atonuga a lona tamā, ma o lea vasega na faia ai le vaega lē usiusita'i a le atali'i ulumatua sa lē tataui ona maua se tau'i lelei ona o lenei tulaga. Pe a ua fa'apa'iaina e le 'upu moni ma le mamalu, o le a 'avea ai tagata ma molimau toa mo Keriso; peita'i a fa'aaogāsesē e le tagata agasala, ua lē migao ma lotoma'a'a, ma o le a tauau ina fai'upuvale. A fa'apea mai o se tagata e lē o sē e fa'atagā lelei, o le a lē fa'aititia ai lona tulaga agasala. Pe a o'o mai ōlega a le Agaga Pa'ia i le loto, e pau le mea o le a maua ai lo tatou saogalemū o le tali atu lea a e 'aua le fa'atuai. Pe a sau le vala'au, "inā alu ia i le asō, se'i e galue i la'u tovine," ia 'aua le te'ena le vala'aulia. "O le aso nei afai tou te fa'alogi ai i Lona si'ufofoga, 'aua tou te fa'ama'a'a i o outou loto" (Eperu 4:7). E lē saogalemū le fa'atuai ona usiusita'i, ne'i te'i ua e lē toe fa'alogi i le vala'au.

Ma ia 'aua ne'i manatu se tasi o agasala e teuina i le loto mo sina taimi o le a faigofie ona toe fa'ate'a'ese atu. O agasala uma e tu'uloto o le a fa'avaivaiina ai le amio a e fa'amalosia ai tū masani; o le i'uga o le fa'aleagaina o le tino, o le mafaufau, ma uiga lelei fa'aleagaga. Atonu o le a salamō mai sesē sa e faia, ma o le a e aga'i atu i se ala sa'o; peita'i ona o mea ua fafa'auina i lou mafaufau ma uiga leaga ua e masani ai, o le a fa'afaigatā ai iā te 'oe ona iloa tonu le lelei mai le leaga. E ala mai sesē ua e masani ai, o le a osofa'ia pea lava pea 'oe e Satani.

O lo'o tu'u mai i le fa'atonuga "inā alu ia i le asō, se'i e galue i la'u tovine," le tofotofoga i le fa'amaoni ato'atoa o agaga uma lava. O le a i ai ni galuega e fai fa'apei ona faia 'upu? Ma o le a fa'aaogā e lē sa vala'auina poto uma o lo'o iā te ia, e galue ai ma le fa'amaoni mo le Pule o le tovine?

Ua a'oa'o mai i tatou e le aposetolo o Peteru e uiga i le fuafuāga e tataui ona tatou galulue ai. Fai mai, "Ia fa'ateleina ia te outou le alofa tunoa ma le manuia i lo outou iloa lelei le Atua, atoa ma lo tatou Ali'i o Iesu. Fa'apei ona foa'iina mai ia te i tatou ai Lona mana Atua o mea uma, e o'o ai i le ola ma le amio Atua, i lo tatou iloa lelei o Lē na vala'au mai ia i tatou i Lona lelei e silisili lava. Ona o lea ua Ia folafolaina mai ai o mea e silisili 'ese lava ma le aogā, ina ia tofusia fa'atasi ai outou i le amio Atua, ina ua sosola 'ese outou i le amio leaga o i le lalolagi i le tu'inanau. O le mea lava lea ia outou matuā fa'amalosi ai lava, ina ia fa'aopoopoina le amio lelei i lo outou fa'atuatua, ia fa'aopoopo fo'i le poto i le amio lelei, ia fa'aopoopo fo'i le lē gaoiā i le poto, ma ia fa'aopoopo le onosa'i i le lē gaoiā, o le amio Atua fo'i i le onosa'i, ia fa'aopoopo fo'i le alofa i le 'au uso i le amio Atua, o le alofa fo'i i le alofa i le 'au uso" (II Peteru 1:2-7).

Pe afai e te tausia ma le fa'amaoni le tovine o lou agaga, o lo'o saunia 'oe e le Atua e galulue fa'atasi ma Ia, ma o le a i ai se galuega e te faia mo 'oe lava ia, a e fa'apea ai ona e galue fo'i mo isi. Ina ua fa'atusaina le ekalesia e pei o le tovine, sa a'oa'o Keriso ina ia tatou galulue ma fesoasoani atu i tagata e lē o ni o tatou uso ekalesia. E tataui ona fa'alauteleina le tovine a le Ali'i ina ia aofia ai itū uma o le lalolagi. A o tatou maua fa'atonuga ma le alofa tunoa o le Atua, e tataui iā i tatou ona fa'asoa atu i isi se malamalama i le tausiga o nei la'au tāua, ma o le a tatou fa'alauteleina ai le tovine a le Atua. O lo'o silasila mai pea le Atua mo fa'amaoniga o lo tatou fa'atuatua, alofa, ma le onosa'i. E silasila mai po o tatou fa'aaogāina manuia fa'aleagaga uma e galulue ai ma le ma'elegā i Lana tovine o i le lalolagi, ina ia mafai ona tatou ūlu atu i le Parataiso a le Atua, i le aiga i Etena lea na punitia iā Atamu ma Eva ina ua agasala.

E tula'i atu le Ali'i i luma o Ōna tagata i se so'otaga fa'atamā, ma e i ai Lona aiā fa'aletamā ia tatou galulue ai ma le fa'amaoni mo Ia. Ia fa'apei o le soifuāga o Keriso, o le Āo o le aigātagata a e 'au'auna ma le fa'amaoni mo Lona Tamā, o Ia o le Fa'aa'oa'o mo Lana fanau uma. O le usiusita'i na tu'u atu e Keriso i le Atua, e mana'omia fo'i lea mai tagata uma o ōna pō nei. Sa 'au'auna Ia i Lona Tamā ma le alofa, mai le

loto malie ma le sa'oloto. Na Ia fetalai mai ai, "Lo'u Atua e, 'Ou te fiafia e fai Lou finagalo; o lo'o i totonu lava iā te A'u Lau tulafono" (Salamo 40:8). E lē faitauina e Keriso le telē o se taulaga, pe ua faigatā tele se galuega, ina ia fa'ataunu'u le galuega na Ia afio mai e fai. I le sefulu ma le lua o Ōna tausaga, sa Ia fa'apea atu ai, "Lua te lē iloa ea e tatau ona 'Ou i le *fale* o Lo'u Tamā?" (Luka 2:49). Sa Ia lagona le vala'au, ma Ia faia loa le galuega. Sa Ia fetalai, "O La'u mea e 'ai, ia 'Ou faia le finagalo o Lē na 'auina mai A'u, ma fa'ai'u Lana galuega" (Ioane 4:34).

O lea, e tatau ona tatou 'au'auna i le Atua; ma ia na o lē e galue ma le usiusita'i i se tulaga e aupito maua o le a 'au'auna atu. O i latou uma o le a 'avea ma fanau a le Atua, e tatau ona i ai se fa'amaoniga e latou te galulue fa'atasi ma le Atua ma Keriso ma agelu o le lagi. O le tofotofoga lea mo agaga ta'ito'atasi uma. O i latou uma o lo'o 'au'auna ma le fa'amaoni mo Ia, ua Ia fetalai mai i ai, "E fai fo'i i latou Ma'u 'olua tāua,.. i le aso ua 'Ou tofia; 'Ou te alofa fo'i ia te i latou, e pei ona alofa o le tagata i lona atali'i ua 'au'auna ia te ia" (Malaki 3:17).

O le fuafuāga a le Atua i le galuea'iina o Lana ta'ita'iga ina ia tofotofoina ai le tagata, o le tu'uina lea o avanoa e atina'e ai lana amio. O lea le fa'amaoniga pe usiusita'i pe lē usiusita'i i Āna poloa'iga, auā e lē mafai ona fa'atau e galuega lelei le alofa o le Atua, a e peita'i e fa'aali mai ai iā i tatou lea alofa. Pe a tu'u atu o tatou loto i le Atua, e mana'omia a tatou galuega ina ia maua ai le alofa o le Atua. O Lona alofa o se meaalofa maua fua ma o le a talia i totonu o le loto, ma o le a tatou fiafia e usiusita'i i Āna poloa'iga ona o lo tatou alofa iā te Ia.

E na o le lua vaega o tagata i le lalolagi i le taimi nei, ma e na o le lua vaega o le a iloa i le fa'amasinoga - o i latou o ē soli tulafono a le Atua ma i latou e usiusita'i i ai. Ua tu'u mai e Keriso le tofotofoga e fa'amaonia ai pe tatou te fa'amaoni pe e leai. Ua fetalai mai o Ia, "Afai tou te alofa mai ia te A'u, ia outou tausii mai i A'u poloa'iga...O lē ua ia te ia A'u poloa'iga ma tausii i ai, o ia lea e alofa mai iā te A'u; o lē alofa mai fo'i iā te A'u, e alofaina o ia e Lo'u Tamā; 'Ou te alofa fo'i ia te ia, ma 'Ou fa'aali iā te ia.... O lē lē alofa ia te A'u, e lē tausii e ia A'u 'upu; o le 'upu fo'i tou te fa'alologologo i ai, e lē Sa'u lea, a o le 'upu a le Tamā ua 'auina mai A'u.... Afai tou te tausii A'u poloa'iga, ona tumau lea o outou i Lo'u alofa; pei ona 'Ou tausii poloa'iga a Lo'u Tamā, ma 'Ou tumau i Lona alofa" (Ioane 14:15, 21, 24; 15:10).

O le Tovine a le Ali'i

Matā'upu 23

E fa'avae lenei matā'upu i luga o le Mataio 21:33-44.

O le Malō o Iutaia

O le fa'ata'oto i atali'i e to'alua, na mulimuli mai i le fa'ata'oto o le tovine. I le tasi, sa fa'amalamalamaina ai e Keriso i faia'oga Iutaia le tāua o le usiusita'i. A o le isi, na fa'atatau lea i fa'amanuiāga tetele na fa'a e'eina iā Isara'elu, ma i ia mea, sa fa'ailoa ai le fa'anaunauta'iga o le Atua i lo latou usiusita'i. Sa Ia fa'amanino iā i latou le mamalu o fuafuāga a le Atua e fa'ataunu'uina e ala i lo latou usiusita'i. I le va'ava'ai atu i le lumana'i, sa Ia fa'aali iā i latou malaia ma puapuagā e o'o mai pe a o latou lē fa'ataunu'uina Āna fuafuāga.

Ua fetalai Iesu, "Sa i ai se matai, sa faia le Tovine, ua ia lotoāina, ua 'eli ai le soligāvine, ua faia fo'i le 'olo, ua tu'uina atu e ia i ē galulue i vine, ona alu malaga ai lea o ia i le nu'u 'ese" (Mataio 21:33).

O le fa'amatalaina o lenei tovine o lo o aumaia e le perofeta o Isaia: "Se'ia 'ou pese atu i la'u pele, o le pese i la'u pele a o pa'i atu i lana tovine. Sa i la'u pele le tovine i le mauga lafulemū lava. Na ia fa'apāina ma aoao 'ese ma'a, na ia totōina vine ua silisili i lana filifiliga, ua ia faia fo'i le 'olo i lona totonugalemū fa'apea fo'i ma le tu'ugauaina, ma ia fa'atalitali ina ia fua mai ni vine" (Isaia 5:1, 2).

Na filifilia e se tamā se fasi fanua mai le vaomatua: sa ia fa'apāina ma fa'amamā ma fa'amalū, ma totō ai vine silisili i lana filifiliga ma ua ia fa'atalitali mo se seleselega silisili ona lelei. Ma o lona galuea'iina o lenei ogā'ele'ele mai i le vaomatua i le tulaga silisili ona lafulemū ua i ai nei, sa ia fa'amoemoe e maua ai lona vi'iga. O lea na filifilia ai e le Atua tagata mai le lalolagi ina ia a'oa'oina e Keriso. Ua fai mai le perofeta, "Auā o le tovine a Ieova o 'au, o le aiga o Isara'elu lea, o tagata o Iuta fo'i, o Lona fa'ato'aga lea na Ia fiefia i ai" (Isaia 5:7). Sa fa'a'oina i latou i fa'amanuiāga e tele ona o Lona agalelei. O Lona fa'anaunauta'iga, ia fua mai a latou galuega i ni fua lelei ma ia latou vi'ia ai o Ia, e ala i lo latou fa'aali atu o ta'iala o Lona malō, atoa ai ma Lona alofa i le lalolagi e ui i le to'ilalo ma le agasala o lo o i ai nei.

Ona o i latou o le tovine a le Atua, e tataua ona fua mai i latou i ni fua e matuā 'ese mai nai lo nu'u fa'apaupau. O tagata ifo i tupua ua fiefia i le amioleaga, fetaua'iga, o le mana'o tele ma le fa'apologaina, atoa ai ma le anoanoa'i o le agasala ua lē mafai ona taofia. O le agasala, fa'ato'ilaloina ma tigāina, o fua ia o le la'au ua fa'aleagaina. Ma o lona 'ese'esega, o fua lelei e maua mai i le vine ua totōina e le Atua.

O le tofi o le nu'u o Iutaia o lo latou tau'aveina lea o foliga va'aia o le agalelei o le Atua e pei ona fa'aalia ia Mose. "Ua afio ane fo'i Ieova i ōna luma, ma ua ta'u mai, O Ieova, o Ieova, o le Atua alofa mutimutivale ma le alofa fua, e telegese Lona to'asā, a e tele le alofa ma le fa'amaoni; o Lē e tausi le alofa e o'o atu i afe o tupulaga, o le fa'amagalo fo'i i le amiolētonu ma le solitulafono ma le agasala" (Esoto 34:6,7). O le fua lea na naunau i ai le Atua mai i Ōna tagata. Eala i lo latou ola fa'amamāina, fa'apa'iaina, i le agalelei ma le loto alofa, ia fa'a'alia ai le "tonu ato'atoa o le tulafono a le Ali'i, e fa'afo'isia mai ai le agaga" (Salamo 19:7).

O le fa'anaunauga o le Atua ina ia fa'ateleina fa'amanuiāga i tagata uma e ala mai i le nu'u o Iutaia. Ma ia 'avea ma auala e 'auina atu ai Lona malamalama i le lalolagi atoa. A e peita'i, ona o auala lē amiotonu ua mulimuli ai le lalolagi, ua 'ave'ese ai ma lo latou iloa o le Atua. A e ui i lea, ona o le agalelei o le Atua, e le'i tu'ulafoa'i ai pe tinea ai Lona naunau iā i latou. Sa Ia tu'uina atu le avanoa e toe fa'atasiaina ai ma Ia, e ala i Lana Ekalesia. O ta'iala lelei na Ia foafoaina ina ia fa'a'alia i Ōna tagata, ia fai lea ma auala e toe fa'afo'isiaina ai le mamalu o le afio o le Atua i le tagata.

O le fa'ataunu'uina o Lona fa'anaunauta'iga, na vala'auina ai e le Atua Aper'a'amo e tu'ua lona nu'u, a e alu atu o ia e nofo i Kanana. Na fetalai o Ia, "'Ou te faia 'oe ma nu'u tele, 'Ou te fa'amanuia fo'i iā te 'oe, 'Ou te matuā fa'amamaluina lou igoa; e manuia fo'i 'oe" (Kenese 12:2).

O i latou na tupuga mai ia Aperamo, o Iakopo ma ē na tupuga mai ia te ia, na aumaia ina ia fa'aalia ai a'oa'oga tāua o le malō o le Atua i le anoanoa'i o le agasala i totonu Aikupito. O le fa'amaoni o Iosefa atoa ai ma āna galuega ofoofogia i le lavea'iina o ola o tagata Aikupito sa fai lea ma fa'ata'ita'iga o le soifuāga o Keriso. O Mose ma isi e to'atele sa fai ma molimau mo le Atua.

O le 'ave'eseina o Isara'elu mai Aikupito, sa toe fa'atinoina ai fo'i le mata'utia ma le agalelei o le Atua. O Āna galuega ofoofogia e ala i le lavea'iina mai o i latou mai le nofopologa atoa ai ma le malaga i le vaofitā sa lē mo so latou lava lelei a e ia fai ma fa'ata'ita'iga aogā i nu'u tuā'oi. Sa fa'aalia e le Ali'i o Ia o Ieova Silisili 'Ese nai lo puleaga tetele a tagata. O fa'ailoga ofoofogia sa Ia faia mo le lelei o Ōna tagata e fa'aalia ai Lana pule i le natura ma i latou uma sa tapua'i i mea fa'anatura. Fa'apei ona ui atu o le Atua i le nu'u fa'asausili o Aukupito, o le a fa'apea fo'i ona Ia faia i aso o le i'uga. I le afi ma afā mata'utia, o le mafui'e ma le malaia, sa lavea'iina e Lē Silisili 'Ese Ōna tagata. Sa Ia 'ave'eseina i latou mai le nofopologa. "O lē na ta'ita'i ia te oe i le vao e tele ma le mata'utia, e i ai gata ūogo ma akarava, o le nu'u naumati fo'i e leai se vai" (Teuteronomie 8:15). "Na Ia fa'atōtō fa'aui i luga ia i latou le manai e 'a'ai ai, na Ia avatua fo'i ia i latou o mea e 'ai mai le lagi" (Salamo 78:24). Ua fa'apea mai Mose: "O le tofi o le Ali'i o Lona nu'u lea, o Iakopo o lona tofi lea ua fuafuaina. Na ia maua o ia i le vao, o le mea e lē āina, e uiō ai manu fe'ai, ma ua gaogao; na Ia si'osi'o ia te ia, ma a'oa'o atu ia te ia, na Ia leoleo ia te ia e pei o Lona tamatama'imata. E pei o le a eto ona fa'aoso i āna tama, e fa'apepepepe i luga o āna tama, e fola ona apa'au e saposapo ia te i latou, e 'ave ia te i latou i luga i ōna apa'au" (Teuteronomie 32:9-12). O le mea lea na Ia aumaia ai i latou ia te IA, ina o latou aumau fa'apei o lo'o i lalo o le paolo o Lē Silisili 'Ese.

Sa ta'ita'i Keriso i le fanauga a Isara'elu i la latou folauga i le vao. Sa ufitia i le ao fa'aniutū i le ao ma le afi fa'aniutū i le pō, sa i ai o IA ma i latou. Sa Ia puipui mai faigatā o le vaomatua, ma Ia avatu i latou i le nu'u na folafolaina, i luma o nu'u fa'apaupau latou te lē iloa le Atua, sa IA fa'atūina Isara'elu o Lana meatotino filifilia, o le tovine a le ALII.

O poloa'iga mamalu a le Atua sa Ia tu'uina atu i ia tagata. O Lana tulafono sa fai ma o latou pā puipui, o ta'iala tumau o le fa'amaoni, amiotonu ma le fa'amamāina. O le usiusita'ia o ia ta'iala, o lo latou puipuiga lea ma lavea'i mai ai i le leaga o le agasala. O le 'olo fo'i i le ogātotonu o le tovine, na tu'uina i ai e le Ali'i Lona malumalu pa'ia.

O Keriso sa fai ma o latou fa'atonu. Auā sa i ai o Ia ma i latou i le vaomatua, na 'avea o Ia ma o latou a'oa'o ma ta'ita'i. Sa Ia fa'aalia i taimi uma ia te i latou, le tele o Lona alofa ma Lona onosa'i. Sa naunau le Atua, ina ia avea Ōna tagata Isara'elu e fai ma nu'u e vi'ia; ia fai ma fa'ata'ita'iga lelei, ma fa'aalia ai Āna fa'amanuiga, Lona alofa atoa ma Lona mamalu.

O lo latou usiusita'i i le tulafono a le Atua, e 'avea ai i latou o se nu'u matuā fa'atumulia i fa'amanuiāga i le lalolagi atoa. O le Atua, o le puna o le poto ma le atamai e 'avea pea ma o latou a'oa'o, na te si'itia ma fa'atupuina lo latou tomai e ala i lo latou usiusita'i i Lana ta'ita'iga. E puipui mai so'o se fa'ama'i e ono a'afia ai. O le mana ma le mamalu o le Atua e fa'aalia i o latou manuia uma lava.

Na mausalī le auala na fa'aalia ai e Keriso e ala mai ia Mose, fuafuaga a le Atua mo fa'amanuiāga i le fanauga a Isara'elu. "Auā o oe o le nu'u pa'ia mo Ieova lou Atua, na filifilia oe e Ieova lou Atua ina ia avea ma nu'u mona, o le 'olua tāua e sili i nu'u uma lava o i le fogā'ele'ele....Ia e iloa fo'i o Ieova lou Atua o Le Atua lava Ia; o Le Atua fa'amaoni, o Lē na te tausi i le feagaiga atoa ma le alofa i ē alolofa atu ia te Ia ma tausiusi i Āna poloa'iga, e o'o lava i le afe o tupulaga.... O lenei, ia e tausi i poloa'iga, ma tulafono, ma fa'amasinoga 'Ou te fai atu ai ia te oe i le aso nei ia faia. Afai fo'i tou te fa'alogi i ia fa'amasinoga ma tausi i ai ia faia, ona tausi lea e Ieova lou Atua o le feagaiga ma le alofa ia te oe na Ia tautō ai i ōu tamā; e alofa mai fo'i o Ia ia te oe, ma fa'amanuia ia te oe, ma fa'ato'ateleina oe; e fa'amanuia fo'i e Ia i lau fanau, ma fua o lou lau'ele'ele, o lau saito, ma lau uaina, ma lau suāu'u, o tama a āu povi, ma āu lafumamoe i le lau'ele'ele na Ia tautō ai i ōu tamā e foa'i atu ia te oe. E sili lou manuia i nu'u uma lava... E 'ave'ese e Ieova o ma'i uma lava ia te oe, na te lē tu'uina mai ia te oe se tasi ma'i o ma'i leaga o Aikupito na e iloa" (Teuteronomie 7:6, 9, 11-15).

Pe ana fa'apea e tausiusi i latou i poloa'iga a le Atua, semanū e faia e Ia fa'apei ona Ia tautō ai; na te foa'iina ia i latou le saito e silisili ona lelei, ma le meli e tafe mai le papa. O le ola fa'afualoa e fa'amalieina, atoa ai ma Lana fa'aolataga.

Ona o le lē usiusita'i o Atamu ma Eva i le Atua, na ave'eseina ai Etena mai ia i la'ua, ma ona o le agasala, na fa'asalaina ai le lalolagi atoa. Peita'i, 'ana savavali Ōna tagata e tusa o Āna poloa'iga, e toe fa'afo'isia lo latou lau'ele'ele i le matagofie ma le fa'amanuiaina. Na tu'uina e le Atua ia i latou ta'iala mo le galuea'iina o le 'ele'ele, ma e ao ona o latou faia fa'apea, ia toe fa'afo'isia ai lona lelei. Ma o le atagia o le Ali'i e Ōna le lau'ele'ele i olaga ma loto o Ōna tagata, e ala i le usiusita'i i Āna poloa'iga ma faia e tusa o Lona finagalo, o le lesonea faitino tāua lea e fa'aali ma molimau atu ai i ē latou te lē talitonu i le silisili 'ese o le Atua Soifua o lo o latou 'au'auna ma tapua'i i ai.

Sa fa'apea mai Mose, “Fa'auta, na 'ou a'oa'o atu ia te outou i tulafono ma fa'masinoga e pei ona p'oloa'i mai ai ia te a'u e Ieova lo'u Atua, ina ia outou faia fa'apea i le nu'u tou te ō atu ai e fai mo outou. O lenei, ia outou usiusita'i i ai, ma ia outou faia, auā o le mea lea tou te popoto ai, ma atamamai ai i luma o nu'u e fa'alologologo i nei tulafono uma; ona fa'apea ane lea, 'E moni lava o le nu'u popoto ma le atamamai lenei nu'u mamalu. Auā o ifea se isi nu'u mamalu ua latalata i ai lo latou Atua, e pei o Ieova lo tatou Atua ua latalata mai i mea uma lava ua tatou vala'au atu ai ia te Ia? O ifea fo'i se isi nu'u mamalu e i ai tulafono ma fa'amasinoga tonu, e pei o lenei tulafono uma ua 'ou tu'uina atu ia te outou i le aso nei?” (Teuteronomie 4:5-8).

Sa finagalo le Atua ina ia nofoia e le fanauga a Isara'elu lau'ele'ele sa Ia filifilia mo i latou. O nu'u uma fo'i sa lē taliaina le tapua'i ma 'au'auna i le Atua moni, sa fa'ata'ape'apeina i latou. Peita'i, o le fuafuāga a le Atua ina ia fa'aalia Lona agalelei e ala ia Isara'elu, ma tosina atu ai tagata ia te Ia. Ma ia tu'uina atu le vala'au o le talalelei i le lalolagi atoa. Ia si'itia Keriso e ala i le a'oa'oina o le 'au'auna atu e aunoa ma se tau, ma o i latou e talia o Ia, e maua e i latou le ola. Fa'apei o Ra'ava le fafine Kanana, ma Ruta le fafine Moapi, sa liliuina mai i le ifo i tupua ma 'avea ma tagata talitonu i le Atua moni, ma nisi o lana fanauga filifilia. O le tupu a'e o le fanauga a Isara'elu, o le fuafuāga a Le Atua, ia fa'alauteleina o latou tua'oi ina ia mafai ona aofia uma ai le lalolagi atoa I Lona malō.

E finagalo le Atua ina ia ō mai tagata uma i lalo o Lana pule'aga alofa. Ma ia fa'atumulua le lalolagi i le 'oli'oli ma le filemū; ma o Lona fa'anaunauta'iga, ia lagona i loto uma Lona filemū e fa'apei o le aiga i le lagi i lugā.

Peita'i e le'i fa'ataunu'uina e Isara'elu le fuafuāga a le Atua. Sa Ia fetalai, “O A'u fo'i sa 'Ou totōina oe o le vine Soreka, o le fua e matuā moni lava; ua fa'apefea fo'i ona liua o oe ia te A'u ma lālā leaga o le vine 'ese?” (Jeremia 2:21). “O Isara'elu, o le vine mālālā; ua ia fua mai ni fua e fai mona” (Hosea 10:1). Ma “O lenei, o outou o e nonofo i Ierusalem, atoa ma tagata o Iuta, inā fa'amasino maia ia te A'u ma La'u tovine. Se ā ea se mea e toe faia i La'u tovine 'Ou te le'i faia? Se ā fo'i le mea ua fua mai ai vine leaga, a ua 'Ou fa'atalitali ia fua mai ni fua lelei? O lenei 'Ou te fa'ailoa atu ia te outou le mea 'Ou te faia i La'u tovine, 'Ou te ave'eseina lona āi, ona 'aina ai lava lea, 'Ou te sōloia lona aupā, ona solia lava lea. 'Ou te fa'atāfunaina ai, e lē salaina, e lē teuteua; a e tutupu ai la'au tuitui ma la'au talatala; 'Ou te fai atu fo'i i ao, 'aua ne'i totō i ai ni ua. Auā o le tovine a Ieova o 'au, o le aiga o Isara'elu lea, o tagata o Iuta fo'i, o Lona fa'ato'aga lea na Ia fiasia i ai; na Ia fa'atalitali i le fa'amasinoga, fa'auta fo'i, o le fasi tagata; na ia fa'atalitali i le amiotonu, fa'auta fo'i, o le uiō” (Isaia 5:3-7).

Na fa'ama'oti e le Atua i Ōna tagata e ala atu ia Mose le i'uga o le lē fa'amaoni. Afai e tete'e ma lē tausi i Lana feagaiga, o le a vava e'eseina i latou mai i le olaga fa'amanuiaina. “Ai 'oe, ne'i galo ia te oe o Ieova lou Atua, i lou lē tausi i Āna poloa'iga, ma Āna fa'amasinoga, ma Āna tulafono, 'Ou te fai atu ai ia te oe i le aso nei. Ne'i e 'ai, ma e ma'ona, ma e faia fale lelei, ma e nofo ai; e tupu tele fo'i lau lafu povi ma lau lafu mamoe, e fa'ateleina fo'i au ario ma au auro, e fa'ateleina fo'i au mea uma; ona fa'amaua'ugaina ai lea o lou loto, ma e fa'agalagalo ia Ieova lou Atua...ne'i e fa'apea ifo i lou loto, O lo'u malosi ma le malosi o lo'u lima ua 'ou maua mai ai lenei 'oloa. Afai fo'i e galo ia te oe Ieova lou Atua, ma e mulimuli atu i atua 'ese, ma e 'au'auna ia i latou, ma ifo ia i latou, 'Ou te matuā fai atu ia te outou i le aso nei, e fa'aumatia lava outou. Fa'apei o nu'u e fa'aumatia e Ieova ai o outou luma, e fa'apea lava outou ona fa'aumatia; auā ua outou lē mafai ona fa'alogi i le si'ufofoga o Ieova lo outou Atua” (Teuteronomie 8:11-14, 17, 19, 20).

Sa lē fia fa'alogi tagata Iutaia i le lapata'iga. A ua latou fa'agalo i lo latou tofi o sui va'aia o le Atua, ma fa'ata'ita'iga lelei i le lalolagi. O a latou galuega lelei uma sa fai ma auala e su'e ai o latou vi'iga a e ua lē 'avea o se fa'amanuiāga mo isi tagata. E lē gata ina ua latou lē 'au'auna i le Ali'i, a e ua latou lē

faia le galuega o le ta'ita'i atu o isi ina ia faia Lona finagalo. Fa'apei o aso o Noa, sa tupu tele le amioleaga, ma sa latou faia mea pa'ia e foliga o ni mea tauemua, ma fa'apea ane, "O le malumalu o Ieova, o le malumalu o Ieova lenei" (Jeremia 7:4), a e i le taimi fo'i lea e tasi, o lo'o latou fa'auiga sēsē le agalelei o le Atua, fa'alumaina Lona suafa ma fa'aleagaina Lona malumalu pa'ia.

Sa lē fa'atuatuaina i latou na tu'uina e le Ali'i e galuea'iina Lana tovine. O a'oa'o ma ositaulaga fo'i ua lē fa'amaoni. Sa o latou lē fa'aalia le agalelei o le Atua i a latou galuega atoa ai ma fa'amanuiāga mai i fua o le tovine, a e ua sa'ili ai le mamalu ma vi'iga mo i latou lava.

O ta'ita'i nei o Isara'elu, po o ē galulue vine, e tusa ai ma le poloa'iga a le Atua, ia ta'ita'i ma fa'atino o latou tiute i le auala tonu fa'apei ona Ia fetalai mai ai. Peita'i ane, sa o latou suia Lana 'Upu. Sa latou fa'amalosia sauniga ma tapula'a na lē mafai ona gafatia e tagata, ma sa 'avea ma 'avega mamafa ia i latou. O tulafono fa'aletagata sa lē usita'ia, ma sa o'o lava ina aofia atu ai ma tulafono a le Atua.

Sa fa'atonuina e le Atua Ōna tagata o Ia o le pule o le tovine, o mea uma fo'i na Ia foa'i atu ia i latou, ia fa'aaogāina e vi'ia ai o Ia. Peita'i ane, sa le'i faia fa'apea e a'oa'o ma ositaulaga. Sa latou faia i auala fa'aletagata sa fa'ava e i le mana'o tele ma le lē fa'amaoni. O le mea lea na 'inosia ai i latou e o'o lava i ē fa'apaupau. Ma sa fai lea ma auala sa lē talitonuina ai e nu'u 'ese le moni o le agalelei o le Atua ma le tonu o tulafono o Lona malō.

I Lona alofa fa'atamā, sa onosa'i pea le Atua i Ōna tagata. E ui lava i le tele o a latou agasala, peita'i o Lona alofa mutimutivale, sa Ia augani pea ona o Lona naunau ina ia o latou salamō. Sa 'auina atu Āna perofeta ma 'avefe'au, a e na o latou itagia ma lē taliaina; sa latou fa'ao'olima ma fasioti ia i latou.

I Lana taumafaiga mulimuli, sa 'auina mai ai e le Atua Lona Ālo, ma fa'apea mai "Latou te āva mai i Lo'u atali'i." Peita'i ane, sa tupu tele ai lo latou ita ma o latou fa'apea mai, "O le suli lenei, ō mai ia, tatou fasiotia o ia, a e fai mo i tatou lona fanua" (Mataio 21:37, 38). Ona o tatou faia lea o le mea tatou te loto i ai i le tovine ma ona fua.

Sa leai se alofa o ta'ita'i o Iutaia i le Atua; o le mea lea na o latou ō 'ese ai ia te Ia, ma te'ena Āna fuafuāga mo se i'uga lelei. O Keriso, le Ālo pele o le Atua, na afio mai e fa'amausalīina ai lē e pule i le tovine; peita'i ane, sa lē amana'ia o Ia e i latou na galulue vine, ma fa'apea ane "matou te lē fa'atagaina lenei tagata e pule ia i matou." Sa o latou lotoleagaina Ōna uiga ma le matagofie o Āna a'oa'oga. O Āna fa'atinoga uma sa atagia ai Lona amiotonu, atamai ma le alofa moni; ma sa to'atele na mulimuli atu ia te Ia. Sa iloa e i latou ua amata ona malamalama tagata i le 'ese'esega o a latou a'oa'oga sesē ma le lē amiotonu, ma ua latou molimauina le telē o le suiga i olaga fa'aleagaga o le to'atele na fa'alogologo i a'oa'oga a Keriso. O Lona olaga atoa fo'i, o se a'oa'iga lea mo i latou ma o latou manatu fa'apito. Sa tupu tele le ita o i latou, ma o latou naunau ai loa ina ia fasiotia o Ia. Ina ua o'o i le tofotofoga mulimuli e filifili ai i le ola e fa'avavau ma le malaia e fa'avavau, sa o latou te'ena "Lē e Pa'ia o Isara'elu." Ina ua fesiligia i latou e filifili pe o Keriso pe o Parapa e tatala, sa latou 'alalaga "Ia tatala mai Parapa ia te i matou" (Luka 23:18). Ona fai atu ai lea o Pilato ia te i latou, "Se ā fo'i le mea 'ou te faia i a Iesu o lē ua igoa iā Keriso?" Ona fai mai ai lea o i latou uma ma le sauā, "Ia fa'asatauroina ia" (Mataio 27:22). Ua fa'apea mai Pilato ia te i latou, "Ou te fa'asatauro ea i lo outou tupu?" Ua tali atu le 'au ta'ita'i ma ositaulaga ia te ia "E leai so matou tupu, na o Kaisara" (Ioane 19:15). Ina ua fufulu lima o Pilato ma fa'apea mai "Ou te mamā a'u i le toto o lenei tagata amiotonu; na 'alalaga le 'au ositaulaga ma le nu'u uma ua fa'apea mai "Ia i luga ia i matou, ma a matou fanau lona toto" (Mataio 27:24, 25).

Sa fa'apea ona faia le filifiliga a ta'ita'i o Iutaia. O lea fa'ai'uga sa fa'amauina i le tusi na va'aia e Ioane i le 'a'ao o Lē o afio i le nofoāli'i, le tusi e lē mafai e se isi ona tatala. Ma o lea fa'ai'uga lē alofa o le a fa'ailoaina i o latou luma, pe a tatalaina lenei tusi e le Leona o le itu'aiga o Iuta.

Ua manatu tagata Iutaia, e tatau ona fa'a eaina i latou ona o i latou o le ekalesia a le Atua e fa'apelepele i ai o Ia. Ma e mausalī lo latou fa'ava e ma aiā i fa'amanuiāga nai lo nu'u uma o le lalolagi ona o i latou na tupuga mai ia Apera'amo. A e peita'i ona o lo latou olaga lē fa'amaoni, na o le fa'asalaina ma le vava e'eseina mai i le Atua o lo'o fa'atali mai mo i latou.

I le fa'ata'oto i le tovine, ina ua uma ona fa'ailoa manino e Keriso i le 'au ositaulaga le tele na'uā o lo latou amio leaga, na Ia fesiligia i latou e fa'apea, "Pe a afio mai le Ali'i o le tovine, o le ā le mea o le a ia faia ia i latou ia na galue vine?" Sa le'i mānatunatu toto'a le 'au ositaulaga i le uiga tonu o le fesili ma

lona feso'ota'iga ia i latou, o lea sa o latou tali atu ai fa'atasi ma tagata, "O le a ia fa'atama'ia i latou, a e tu'uina atu lana tovine i ni galuevine fa'amaoni latou te aumaia ia te ia ni fua lelei i ona tau."

I le aunoa ma so latou iloa, ua o latou faia lava e i latou lo latou i'uga. Na silasila atu Iesu ia i latou, ma silafia mealilo i o latou loto, ua va'aia fo'i e i latou Lona mamalu ma Lona malosi; ona o latou iloa ai lea, o i latou lava lea o lo o fa'asino tonu i ai le fa'ata'oto. Ona o latou fa'aapea ane lea i o latou loto ma le fefe, "Le Atua e, 'aia ne'i e fa'atagaina lea mea e tupu."

Ua fetalai atu Keriso ia i latou, "Tou te le'i faitaulia lava ea i le Tusi, O le ma'a na lafoaina e tufuga fai fale, ua fai lea ma tulimanu aupitoaluga; o le mea lea na faia e le Ali'i, tatou te ofo ai pe a va'ava'ai atu i ai? O le mea lea 'Ou te fai atu ai ia te outou, E 'ave'esea le malo o le Atua ia te outou, a e tu'uina atu i se nu'u e aumai ai ona fua. O sē pa'ū fo'i i luga o lea ma'a, e gāugau ai o ia; a o se tasi e pa'ū ifo i ai le ma'a, e nutipalaina ai o ia" (Mataio 21:42-44).

Sa mafai e Keriso ona lē fa'ataunu'uina le malaia o le nu'u o Iutaia pe ana fa'aapea latou te talia ma aloa'ia o IA. Peita'i ane, ona o lo latou matau'a ma le lotovale, na lē mafai ai ona suia sa latou fa'ai'uga. Sa 'avea lo latou fa'amaualuga ma lo latou lē taliaina o Iesu le Nasareta o le Mesia, o le malamalama o le lalolagi, o le mafua'aga lea o le pogisā na o'o i ai le nu'u o Iutaia ma le malaia e pei ona fa'atama'iaina ai e Roma; ma fa'aleagaina ai le 'a'ai o Ieruselema ma ōna malumalu. Sa fasiotia ma fano ai le fanauga a Iuta atoa ai ma le miliona sa fa'atauina atu e 'avea ma pologa i nu'u fa'apaupau.

Sa lē mafaia e tagata Iutaia ona fa'ataunu'uina le fuafuāga a le Atua, ma sa 'ave'eseina le tovine mai iā i latou. O fa'amanuiāga na latou so'onafai, atoa ma le galuega na latou fai ma le lē fa'amaoni, sa tu'uina atu i isi tagata.

O le Ekalesia o Ōna Pō Nei

O le fa'ata'oto o le tovine e lē na o le nu'u o Iutaia o lo o fa'atautau i ai. E i ai fo'i le lesone mo tatou uma. E anoanoa'i meaalofa ma fa'amanuiāga ua foa'iina mai e le Atua i le ekalesia i nei augātupulaga, ma e ao iā i tatou ona faia o mea lelei ma le silisili e tali atu ai i Lona alofa mai.

Ua fa'atauina i tatou i le tautele. Na o le pau fo'i lea o le togiola tatou te maua ai le fa'amagaloga. O le lalolagi nei ma lona lau'ele'ele ua fa'asūsūina i loimata ma le toto o le Ālo o le Atua, e tataui i tagata uma ona atagia mai i o latou olaga le moni ma le fa'amaoni o le agalelei o le Atua atoa ai ma Lona mamalu silisili 'ese. Ia fa'aalia fo'i le alofa o Keriso ma talitonuga o Lona mālō.

O lo o taumafai Satani e fa'asagatau atu i galuega a le Atua, e ala i lona ta'ita'i sesēina o tagata ina ia talia ana talitonuga. O lana lea matāfaioi, o le faia o 'auala 'ese'ese i lona malosi ina ia taofia tagata mai le faia o le amiotonu ona ia faia lea o moliaga e fa'asaga ia i latou. Ma o le naunauta'iga o le Ali'i ina ia tali atu Ōna tagata iā Satani ma ana moliaga sesē i le faia lea o le mea tonu e ala i le usiusita'i i Āna talitonuga ma poloa'iga.

O ia talitonuga e tataui ona fa'aalia e le tagata Kerisiano i totonu o le aiga, ekalesia, atoa ma isi fa'alapotopotoga ua faia e 'au'auna ai i le Atua. Ia fai ma fa'aailoga e iloa ai e le lalolagi le moni o le talalelei ma lona malosi e mafai ona fa'aolaina ai le tagata. Ma o le fuafuāga sili lea a le Atua mo le lalolagi atoa.

Sa va'ai ma le manatu fa'amaualuga ta'ita'i o Iutaia i foliga mata'utia ma le matagofie o le malumalu na o latou fausia, atoa ai ma a latou sauniga aloa'ia; a e peita'i ua o latou faia mea uma e aunoa ma le fa'amasinoga ma le alofa o le Atua, atoa ma le taulaga i le loto maulalo; o mea ia e sili ona tāua iā te IA. Ua 'avea fo'i le fa'atuatuaana'i o i latou i talitonuga o le mālō o le Atua ua fai ma auala e tosina ai le to'atele i a latou sauniga. Ina ua fultua le tagata i le fa'aleleia ma le fa'aolaina o lona agaga, na o uiga fa'amaualuga, fa'alialia vale i mea e leai se tāua, ma faia sauniga fa'afoliga i auala e lē tusa ma le finagalo o le Ali'i. O ia mea uma, e leai se vi'iga o le Atua o i ai, ma e aunoa fo'i ma se fa'amanuiāga e maua ai.

E pele i le Ali'i Lana ekalesia. E finagalo o Ia ina ia aveia Lana ekalesia o se fa'aolataga i agaga o tagata, ia o latou malamalama ma talitonu iā Keriso ma Lona alofa. E Na te fa'atatauina le tuputupu a'e o Lana ekalesia ma le iloa o Keriso, e fa'atautau fo'i lea i le alu i luma o le olaga fa'aleagaga.

E naunau Keriso ina ia maua e Lana tovine fua o le fa'apa'iaina ma le loto alofa. E lē fa'atusatusaina mea fa'atosina o le lalolagi ma le matagofie o loto o ē latou te faia le finagalo o Keriso. O

le tagata fo'i e talitonu iā te ia, e afio le Agaga Pa'ia i lona loto ma lona mafaufau, e 'avea o ia o se lavea'i i ola o nisi, ma e fa'amanuia fo'i le Atua i āna galuega.

O se fa'apopotoga e aunoa ma ni mea fa'atosina, o le mativa lea i le va'ai a le lalolagi. Peita'i afai e talitonu ma fa'aalia uiga alofa o Keriso i Ōna tagata, e maua e i latou le 'oli'oli i o latou loto. E fa'atasi agelu ma i latou i a latou tapua'iga, auā o le vi'iga ma le loto fa'afetai, o se taulaga sili ona manogi lelei lea e fafia i ai le Ali'i.

E finagalo le Atua ina ia o tatou ta'uta'u Lona agalelei ma Lona silisili 'ese. Ia fa'ane'ene'eina o Ia i vi'iga ma le loto fa'afetai. E pei ona Ia fetalai, “O lē faia le vi'iga ma taulaga, o le āva lea ia te A'u” (Salamo 50:23). A o malaga le fanauga a Isara'elu i le vao, sa o latou vivi'i i le Atua, ma lagiina pese i Āna poloa'iga ma Āna folafolaga. Ina ua o latou taunu'u fo'i i Kanana, sa o latou manatua le agalelei o le Atua, ma o latou vi'ia Lona suafa e ala i taulaga o le fa'afetai. “Ina ia iloa Lou ala i le lalolagi, o le olataga mai ia te 'Oe i nu'u 'ese uma lava” (Salamo 67:2). O le finagalo lea o le Atua mo tagata uma, ia ola e fa'afetai ma vivi'i iā te Ia.

O lo o fa'atatau tonu lava i le taimi nei; ua tapua'i le lalolagi i atua 'ese. Ma e ao ona ta'ita'i'eseina mai i latou i ia tapua'iga sesē, i se auala latou te iloa ma talitonu ai i le lelei ma le silisili 'ese o le Atua. “O outou o A'u molimau, o A'u lava o le Atua” (Isaia 43:12).

E finagalo le Atua ina ia o tatou talia ma talisapaia Lana fuafuāga mo le fa'aolataga, ma ia o tatou mautinoa lo tatou manuia o i tatou ua ta'ua o Lana fanau; e ao ona o tatou savavali ma Ia i le usiusita'i ma le loto fa'afetai. Ma ia o tatou 'au'auna ia te Ia i le ola fou ma le 'oli'oli e lē aunoa. E fia silasila i loto fa'afetai auā ua tusia o tatou igoa i le tusi o le ola a le Tama'i Mamoe, ma si'itia atu a tatou 'avega uma iā te Ia, auā o Ia na te tasi iā i tatou. Na te foa'i mai le 'oli'oli auā o i tatou o tofi, o le amiotonu fo'i a Keriso o le ofu sisina lea a le 'au pa'ia, auā ua iā i tatou le fa'amoemoe manuia o le toe afio mai o le Fa'aola.

O le tatalo, e ō tutusa ma le vi'iga e faia i le moni ma le loto ua 'ato'atoa. E ao ona tatou fa'aali atu i le lalolagi atoa ma le tulu'iga o le malamalama i le lagi, lo tatou fa'afetaia o le ofoofogia o le alofa o le Atua i le tagata agasala; ma o Āna fa'amanuiāga, e anoanoa'i e lē mafaitaulia. O lea e tata ai ona o tatou ta'uta'u ma molimau atu i mea lelei ua Ia faia i o tatou olaga. Ma o le fa'atasi mai o le Agaga Pa'ia, e mafai ai ona fa'atupuina le agaga fafia e 'au'auna ma molimau atu i le agalelei silisili 'ese o le Atua i Lana fanau.

O ia gaoioiga uma, e fa'aititia ai le malosi o Satani. E tafi'esea ai le taumuimui ma le faitio, ma mafai ai ona tete'e atu i fa'aosoosoga. Ma e tutupu ma fua mai ai uiga lelei fa'amamāina, e talafeagai mo i latou ua sauni atu mo le malō o i le lagi.

O le molimau atu, o se auala aupito sili lea ona mautinoa lona aogā i le galuega lavea'i. E leai se tasi ala e sili atu mo le ta'ita'iina mai o agaga iā Keriso.

E ao ia i tatou ona tatou vivi'i i le Atua i sauniga fa'atino, ma ia o tatou faia i le mafai ato'atoa e fa'atupu tele le mamalu o Lona Suafa; ma fa'aaogā meaalofoa ua Ia foa'i mai iā i tatou, e fa'aioa atu ai Lona agalelei i le lalolagi. E tusa ai ma le tamāoa'iga o Iutaia, o meaalofoa ma taulaga, o mea tāua ia i le tapua'iga i le Atua. Sa a'oa'oina tagata Isara'elu ina ia ofoina atu sefulua'i o a latou tupe maua i le sauniga o le malumalu; atoa ai ma taulaga mo agasala, taulaga ofo atu i le lotomalie, ma taulaga o le loto fa'afetai. O ia taulaga sa fesoasoani ma fa'alagolago i ai le galuega o le fa'alauiloaina ma le tala'iga o le talalelei iā Keriso i lea vaitaimi. Ma o le finagalo fo'i lea o Le Atua mo i tatou i nei ona pō. O le galuega sili mo le lavea'iina o agaga, ia fa'aauaina pea ma ua ia saunia le fesoasoani e fa'atinoina ai, e ala i sefulua'i, taulaga, atoa ai ma meaalofoa e ofo atu i le loto malie. O sefulua'i, e pa'ia ma e patino iā leova, ma e ao ona o tatou tu'u'eseina e tusa o Lana poloa'iga; o taulaga ma meaalofoa ofo atu i le loto malie ma le loto fa'afetai, e fesoasoani i le fa'atinoina o Lona finagalo, e ala i le tala'iina atu o le talalelei i itū uma o le lalolagi.

O le 'au'auna i le Atua, e aofia ai ma lou galue lava o lou tagata mo le lelei o isi, a e fa'alagolago i le fesoasoani mai o le Agaga Pa'ia. O le poloa'iga a Keriso “Ō atu ia outou i le lalolagi uma, ma tala'i atu le talalelei i tagata uma lava” (Mareko 16:15), e fa'atatau i tagata uma lava ua iloa ma talitonu iā te Ia. O i latou ua fa'au'uina mo le galuega lavea'i o o latou uso a tagata. O o latou loto ua fusia fa'atasi ma Keriso i le lagona e tasi o le naunau ina ia lē fano se agaga. O le galuega lavea'i, e mo tagata uma a e lē na o se va ega fa'apitoa ua filifilia.

I nā onapō o Apera'amo, Isa'ako ma Iakopo, o le atamai o Mose, o agava'a 'ese'ese o Iosua, sa fa'aaogāina uma e 'au'auna ai i le Atua. E o'o lava i le pese a Miriama, o le loto toa o Tepora, o le alofa fa'amaoni o Ruta, o le usiusita'i o Samuelu, o le agamalū o Elisaia atoa ai ma le fa'amaoni o Elia na mana'omia uma e 'au'auna ai i le Atua. O le mafua'aga lea e tatau ai iā i latou uma ua fa'amanuia i ai Ieova, ona tali atu e ala i le fa'aaogāina o meaalofo uma ua Ia foa'i mai mo le fa'ailoaina atu o Lona malō ma fa'atuputeleina ai Lona vi'iga.

O i latou uma ua talia Keriso e 'avea ma Ali'i Fa'aola, e ao ona fa'aalia i o latou olaga le moni o le talalelei iā Iesu atoa ai ma Lona mana lavea'i. Auā e lē faia fua e le Atua ni mana'oga e aunoa ma ni taunu'uga lelei. O mea uma e finagalo i ai o Ia, tatou te mafaia i le alofa tunoa o Keriso. O tamā'o'aiga uma o i le lagi, e tatau ona fa'ailoaina atu e ala i olaga o tagata ua iloa ma talitonu i le Atua. "E vi'ia Lo'u Tamā i lenei mea, pe a outou fua tele mai; ona fai ai lea o outou Mo'u so'o" (Ioane 15:8).

Ua ta'ua e le Ali'i le lalolagi atoa o Lana tovine. E ui lava ina fāoa e le fili, a e tumau pea ona pulea e Ia. Auā o le togioala na saunia e Keriso mo le lalolagi, e aofia ai mea uma o le foafoāga mai le amataga. "Auā ua fa'apea lava ona alofa mai o Le Atua i le lalolagi, ua Ia aumai ai Lona atali'i e to'atasi" (Ioane 3:16). O le meaalofo lava lea e tasi e ala mai ai le tele o fa'amanuiāga mo i tatou i lea aso ma lea aso. O matāua uma o le timu, o 'ave ta'itasi o le malamalama i o tatou loto lē fa'afetai, o laula'au, fugāla'au atoa ai ma fua o la'au e molimau mai i le tele na'uā o le alofa ma le fa'apalepale o le Atua iā i tatou.

O fa'apēfea ona tausia e tagata poloa'iga a le Atua? O tali atu 'ea iā te Ia e tusa o Lana foa'i alofa mai? O ai o lo o 'ave i ai la latou fa'amuumua i 'au'aunaga i aso uma? O lo o 'au'auna i latou i mea lē aogā o lenei lalolagi. O le tamā'o'aiga, o tulaga taualoa, atoa ai ma tu'inanauga o lenei lalolagi ua fai lea ma sini e taula'i i ai lo latou fa'amoemoe. O le 'oa e maua mai i le gaoi, e lē gata i le gaoi mai i tagata a e ua o'o lava i le Atua. Ua fa'aaogāina e tagata meaalofo mai le Atua e fa'amalie ai lo latou tu'inanau; ma o mea uma fo'i e maua mai i ia 'auala lē tonu, ua atili fa'atupu ai le mana'o tele ma suamalie ai le amio leaga.

O le agasala a le lalolagi i nei onapō, o le agasala lava lea e tasi na fa'ato'ilaloaina ai Isara'elu. O le loto lē fa'afetai i le Atua, o le fa'atamala i avanoa ma fa'amanuiāga, o le fa'aaogā sesē o meaalofo mai le Atua, o le tu'ufa'atasiga o ia mea uma na aumaia ai le malaia iā Isara'elu. Ma o mea uma fo'i ia e aumaia le fa'atafunaiina i luga o le lalolagi i onapō nei.

O loimata na maligi mai i fofoga o Keriso i le mauga o Olive a o Ia silasila atu i le nu'u filifilia, e lē mo na'o Ierusalem. Na Ia mautinoa o le i'uga o Ierusalem, o le malaia fo'i lea e o'o i ai le lalolagi.

"Ana e iloa, o 'oe lava i lenei lou lava aso, o mea e te manuia ai! A o lenei ua lilo iā te 'oe" (Luka 19:42).

"I lenei lou lava aso." O lea aso ua lē o toe mamao. Ua lata le taimi e tapunia ai le faitoto'a o le alofa tunoa ma ua toeitiiti a uma le avanoa. O mala atoa ai ma le to'asā o le Atua ua sauni e fetaia'i ma i latou o lo'o tete'e pea iā te Ia. Peita'i o lo o momoe pea le lalolagi. Latou te lē iloa le taimi e o'o mai ai ia mea.

I nei taimi faigatā, o fea o i ai le ekalesia? O faia ea e Ōna sui 'auai fa'apei ona fetalai mai ai le Ali'i? O fa'ataunu'uina ea e i latou Āna poloa'iga ma fa'ailoa atu Lona agalelei i le lalolagi? O galulue malosi e tata'i mai loto o isi uso ā tagata ina ia talitonu ma talia le fe'au lapata'i mulimuli o le alofa?

Ua i ai nei le lalolagi i taimi fitā ma ua to'atele ua fano ai. A e fa'amata o i ai se vaega itiiti o Kerisiano o o'otia o latou loto ona o ia agaga ua ma'imau? O le lalolagi ma lona taunu'uga ua i se tulaga fa'alētonu, a e peita'i e lē o mafai ona fa'aosofia ai le to'atele o i latou ua ta'ua o tagata ua iloa le 'upu moni e tala'i ma molimau atu. E fai lava si utiuti o le alofa o tagata Kerisiano i le lalolagi nei, pe a fa'atusatusa i le alofa tele o Keriso na Ia tu'ua ai Lona mamalu i le lagi, a e afio mai e 'avea ma tino tagata ona o Lona naunau ia lagona e tagata uma le matagofie o le ola fa'apa'iaina. O lo o i ai pea le fa'apalapala ma le musuā i loto o le fanau a le Atua o lo o taofiofia ai i latou mai i lo latou malamalama lelei i lo latou tiute i le taimi nei.

Ina ua ulufale atu Isara'elu i Kanana, sa le'i faia e i latou e pei ona finagalo i ai le Atua, ina ia o latou nofo'ia lau'ele'ele uma. Sa o latou nofo'ia na o se vaega ma o nai fa'amanuiāga na maua i lea ogā'ele'ele, sa fa'amalieina gōfie ai o latou loto e aunoa ma le taumafai e fa'alautele atu i isi itū la latou nofoa'iga. Sa o'o ina amata ona taumamāo i latou mai i le Atua ma talitonuga uma pei ona sa tatau ona o

latou tausi i ai. O lo latou to'ilalo i le lē usita'ia o le finagalo o le Atua, na lē mafai ai fo'i ona fa'ataunu'uina fa'amanuiāga sa Ia fuafuaina mo i latou. Pe mata e lē o le mea fo'i lea o lo o tupu i le ekalesia i nei ona pō? I le taimi nei ma le mana'omia tele e le lalolagi o le talalelei, a e peita'i, o lo o fa'apopototo le ekalesia i le filemū o lona nofoāga o i ai nei ma talisapaia manuia na o i latou lava. Ua manatu i latou e leai se tāua o le molimau ma fa'asoa atu i isi tagata le fe'au o le fa'aolataga. Ma o le fa'aailoga lea o lo latou lē usita'i i le poloa'iga a Keriso e fa'apea: "Ō atu ia outou i le lalolagi uma, inā tala'i atu ai le talalelei i tagata uma lava" (Mareko 16:15). A fa'atusatusa i le tulaga na i ai le ekalesia i Iutaia, fa'amata e i ai se 'ese'esega tele ma le taimi nei?

O i latou ua ta'ua o Kerisiano, o lo o fa'amasinoina i le lagi; peita'i o le vaivai ma le lē ma'elegā i lo latou ola galulue mo le Atua, ua 'avea ai i latou o ni 'au'auna lē fa'amaoni. Afai o lo'o galulue i le malosi e gata ai lo latou mafai, e lē fa'asalaina i latou; peita'i pe ana galulue ma le loto atoa, e sili atu mea e mafai ona o latou faia.

Ua o latou iloa, ma ua iloa fo'i e tagata uma, ua vaivai tele lo latou ola fa'aleagaga e fa'atino ai lo latou tiute o le fa'ailoa atu o Keriso i le lalolagi. Ua to'atele ua tete'e atu i ē o le a tusia o latou igoa i le tusi o le ola, e lē o i latou na lūlūina a o i latou ua selesela. O le to'atele fo'i ua fai mai ua iā Keriso, ua latou ufitia Lona mamalu ma Lona matagofie, o Lona vi'iga fo'i ua latou taofiofi.

O le to'atele ua tusia o latou igoa i le ekalesia, a e peita'i e lē o ola i lalo o tulafono a Keriso. Ona o lo latou lē fa'alogoma usita'i i Āna poloa'iga, ua 'avea ai i latou ma pologa i pulega a le ti'āpolo. O mea uma fo'i latou te fai, e leai se mea e lelei na o le fa'aleagaina; auā latou te lē o galulue ina ia fa'asaina agaga, na o le fa'amalaiaina.

O lo o fetalai le Ali'i: "Ou te lē tau atu ea iā te i latou ona o ia mea" (Jeremia 5:9)? Sa 'ave'eseina le fanauga a Isara'elu, ona ua o latou lē faia fa'apei ona finagalo i ai le Atua; a e ua tu'uina atu le galuega i tagata 'ese. Peita'i, afai e tumau pea le lē fa'amaoni o le 'au Kerisiano i nei ōna pō, pe lē tatau fo'i ona faia iā i latou fa'apei ona faia i le fanauga a Isara'elu?

I le fa'ata'oto o le tovine na fa'ailoa ai e Keriso, o tagata galue fanua ia e agasala. O i latou ia sa lē fa'amaoni e fa'afo'i atu fua o le fa'ato'aga i lo latou Matai. Ma i totonu o le nu'u o Iutaia, o a'oa'o ma le 'aufaitaulaga i lo latou ta'ita'isesēina o tagata, o lo latou lē āva ma lē usiusita'ia lea o poloa'iga a le Atua ma Lona finagalo. O i latou lava ia na liliu'eseina le nu'u mai iā Keriso.

O le tulafono a le Atua e lē fa'afefiloiina ma tū ma aga a tagata, o le mea silisili lea na fa'amamafaina e Keriso i Āna a'oa'oga ina ia tausisia e tagata uma. O le mafua'aga lea o le tupu o le matau'a i le 'au a'oa'o; ma latou faia a'oa'oga fa'aletagata ina ia fa'amuamua i a'oa'oga mai le Afioga Pa'ia a le Atua ma liliu'eseina ai tagata mai i Āna poloa'iga. O tulafono fa'aletagata, o manatu fa'amauualuga ma le fiasili sa lē mafai ona o latou tu'u'eseina a e fa'alogoma usita'ia le finagalo o le Atua ma le 'upu moni e pei ona a'oa'oina e Keriso. O lo latou ita tele na latou naunau ai e liliu'eseina tagata ina ia latou matuā te'ena o Ia, ma latou 'au fa'atasi ina ia fa'aumatia o Ia.

O le te'ena o Keriso atoa ai ma le fa'ai'uga na mulimuli mai, o i latou lava na faia. O le agasala ma le fa'aleagaina o le nu'u, na mafua mai i ta'ita'i fa'aleagaga.

Pe lē o le a'afiāga fo'i lea o lo'o molimauina i nei ona pō? Pe lē o le to'atele ea o le 'au galulue fanua o le tovine a le Atua o lo'o mulimulita'ia la'asaga o ta'ita'i o Iutaia? Pe lē o le mea ea lenā o lo'o faia e a'oa'o fa'aleagaga, o le ta'ita'i'eseina o tagata mai auala o le Tusi Pa'ia? Pe lē o a'oa'oga sesē ia ua lē tausia ai e tagata le tulafono a le Atua a e ua fa'atupu tele ai le solitulafono? Mai fata faitaulaga o le ekalesia, ua a'oa'oina ai e fa'apea, ua lē toe mana'omia e le tagata le tulafono. O tū ma aganu'u ua 'ave i ai le fa'amuamua. O le tamā'o'aiga ma manuia ua maua, ua tupu ai le fa'amauualuga ma le fa'amalieina i mea a le lalolagi a e ua fa'atuatua'ia i le Atua e āna ia fa'amanuiāga.

I lo latou lē usita'ia o le tulafono a le Atua, ua o latou lē iloa ai le sesē o mea ua latou faia. O le tulafono a le Atua, o le fa'amaoniga o Lana ta'ita'iga alofa mo le manuia o le tagata. O lo o afifi mai ai a'oa'oga o Lona malō; ma o lē na te te'ena ia a'oa'oga, ua ia lē taliaina le ala aga'i atu i le manuia.

O avanoa fa'a'auro na saunia e le Atua mo Isara'elu, e lē mafai ona 'ausia se'i vaganā ua o latou tausi ma usiusita'i i Āna tulafono. O le si'itiaina o le tagata atoa ai ma le ato'atoaga o fa'amanuiāga i le tino, le mafaufau ma le agaga, o lou aiga, ma le lau'ele'ele, o fa'amanuiāga i le olaga nei ma le ola a sau, e maua uma i le usiusita'i.

O galuega e fua mai i le olaga fa'aleagaga, e fa'alagolago lea i le usiusita'i i poloa'iga a le Atua. A e afai e lē o a'oa'oina e le 'au faigaluega tagata ina ia usita'i i Āna tulafono, ua latou taofia manuia e maua ai Lona vi'iga. O la latou agasala lea i luma o le Atua, o le gaoi i fua o Lana tovine.

Mo i tatou, o avefe'au a le Atua e 'auina mai i Lana fa'atonuga. E ō mai ma le loto naunau fa'apei ona faia e Keriso, ina ia faia le finagalo o le Atua e ala i le tausia o Āna poloa'iga; ina ia fua mai le tovine i fua o le alofa, loto mauualalo atoa ai ma le ola 'au'auna mo isi. Pe lē o le to'atele ea o le 'augalue vine i aso nei o lo'o faia ma le ita fa'apei o ta'ita'i o Iutaia? I lo latou ta'ita'isesēina lea o tagata ma o latou lē tausia ai poloa'iga a le Atua? O i latou tonu a ia ua ta'ua e le Atua o 'au'auna lē fa'amaoni.

O fetalai a le Ali'i iā Isara'elu anamua, o lo'o aumai ai le lapata'iga tu'usa'o mo ta'ita'i o le ekalesia i nei ona pō. Ua fetalai le Atua iā Isara'elu: “Ua 'Ou tusi atu iā te ia o mea tetele i La'u tulafono; a ua ta'ua ia mea o mea 'ese" (Hosea 8:12). Ua fetalai fo'i o Ia i le 'au ositaulaga ma a'oa'o; “Ua fa'aumatia Lo'u nu'u ina ua leai se poto; o 'oe fo'i na e tete'e atu i le poto, o le mea lea 'Ou te tete'e atu ai iā te 'oe,...ua e fa'agalologo le tulafono a le Atua, a A'u fo'i, 'Ou te fa'agalologo i lau fanau” (Hosea 4:6).

E tatau ea iā i tatou ona lē amana'ia lapata'iga ua aumai? Pe tatau ea ona fa'atamala pea i le 'au'aunaga na tofia ai i tatou? Pe lē o le fa'asausili, ma le fa'amaualuga atoa ai ma le amio fa'atasi ma tū ma aga a le lalolagi fa'apei ona faia e ta'ita'i o Iutaia, ua taofia ai le 'au Kerisiano mai le faia o le finagalo o le Atua? Ua o tatou molimauina le i'uga o le agasala a Isara'elu. Pe lē ua tatau ea i le ekalesia i nei ona pō ona fa'alogalo i lapata'iga?

“Afai fo'i na gau'i 'ese nisi ona lālā, a o 'oe o le olive vao, ua fa'apipi'iina 'oe fa'atasi ma i latou, ma ua tofi fa'atasi ma i latou i le pogai ma le sua o le olive; ‘Aua e te mimita...a ua gau'i'eseina i latou ona o le lē fa'atuatua, a o lo'o tumau 'oe ona o le fa'atuatua; ‘aua e te fa'amaualuga, a 'ia e mata'u. Auā afai ua lē fa'asaoina e le Atua o lālā na tupu mai ai, 'ia 'oe ne'i lē fa'asaoina 'oe” (Roma 11:17-21).

Aunoa ma se Ofu o le Tausama'aga

Matā'upu 24

O lenei matā'upu e fa'avae mai i le tusi a Mataio 22:1-14.

O le fa'ata'oto i le ofu o le tausama'aga, o lo'o fa'a'ailoa mai ai se a'oa'oga e telē lona a'afiaga. O le fa'aipoipoga, o le fa'a'ailoga lea o le tu'ufa'atasia o le fa'aletagata ma le fa'aleagaga; o le ofu fa'aipiipo ua fa'atusaina lea i uiga fa'aalia e tatau ona maua e tagata uma, ina ia saofagā atu ai i le tausama'aga.

I le fa'ata'oto lenei, ua ose 'aiga tele, o le fa'ata'ita'iga o le vala'aulia a le talalelei iā Keriso, ma le lē taliaina o ia e tagata Iutaia, atoa ai ma le vala'au alofa mo nu'u ese. Peita'i ane, mo i latou na lē taliaina le vala'aulia, o lo'o manino mai ai lo latou lē āva tele, ma e mata'utia lava lona a'afiaga.

O le vala'aulia na aumaia sa'o lava mai i le tupu. O se fa'atinoga mamalu ma aloa'ia. Peita'i ane, o lea mamalu na lē amana'iaina e i latou na vala'aulia. Ua latou fa'ao'olima fo'i ma fasioti i ana 'au'auna. Ona matuā ita ai lea o le tupu, "ua auina atu e ia ana 'au, ua fa'aumatia na tagata fasi tagata, ma susunu lo latou 'a'ai" (Mataio 22:7).

I nei fa'ata'oto e lua, muamua, na saunia le tausama'aga mo le 'au vala'aulia, a o le lona lua, e i ai le tapenaga a le tagata vala'aulia e tatau ona fa'atino. O i latou e lē 'ausia lea tapenaga, e tulia lea i fafo. "Ona ulufale atu ai lea o le tupu e va'ava'ai atu i ē na ta'o'oto e 'a'ai ua iloa atu ai e ia le tasi tagata ua lē ofu i le ofu o le tausama'aga. Ona fai atu ai lea o ia iā te ia, 'Sole, pe fa'apefea ona e ulufale mai i'inei ua lē iā te 'oe le ofu o le tausama'aga?' Ona lē gagana ai lea o ia."

"Ona fai atu ai lea o le tupu i āna 'au'auna, ia outou fusifusia ōna va e ma ōna lima, ma 'ave o ia ma lafo i le pouliuli i fafo, e i ai le taufaitagiauē ma le lilivau o nifo" (Mataio 22:11-13).

O le 'au so'o o Keriso na 'auina atu e tala'i le fe'au. Ina ua uma le to'afitusefulu, na 'auina atu le to'asefulu ma le to'alua e fa'a'ailoa atu i tagata ina ia salamō ma talia le talalelei, auā ua lata mai le malō o le Atua. A e peita'i, sa lē amana'iaina ma lē fia taliaina e i latou na o'o atu i ai le vala'au. Ua toe 'auina atu e ia nisi 'au'auna, ua fa'apea atu, "Fa'auta, ua 'ou saunia mea e taumafa, ua fafasi a'u povi ma a'u mea pepeti, ua saunia fo'i mea uma; inā ō maia i le tausama'aga" (Mataio 22:4). O le fe'au lea na tu'uina atu i le nu'u o Iutaia ina ua tuana'i le fa'asatauroina o Keriso; a e peita'i sa solomua iā i latou na fa'amaua'uga o i latou o le nu'u filifila o le Atua, ona tete'e i Lana talalelei ma le ta'ita'iga a Lona Agaga Pa'ia. "O lea lava aso sa tupu tele ai le sauā tele" (Galuega 8:1). O le to'atele na latou fa'ifai ma fa'atauēmu, a o isi na fa'aali lo latou tete'e i lo latou fa'ao'olima ma fasioti i 'au'auna tala'i o le talalelei e pei o Setefano ma Iakopo.

Ona o le fa'ai'uga a tagata Iutaia e te'ena le agalelei o le Atua, na mautinoa lo latou tau'i fa'apei ona ta'ua e Keriso i le fa'ata'oto. "Ua 'auina atu e le tupu ana 'au, ua fa'aumatia na tagata fasi tagata, ma susunu lo latou 'a'ai." O lea fa'ai'uga na fa'atinoina ina ua fa'atama'ia Ierusalem ma fa'atā'ape'apeina le nu'u o Iutaia.

O le vala'au lona tolu i le tausama'aga, na molimauina lea ina ua tala'iina atu le talalelei i nu'u 'ese. "Ua fa'apea mai le tupu, "Ua saunia lava le tausama'aga, a ua lē aogā ē na tala'iina. O lenei, ia outou ō atu i ala tele, o i latou uma tou te iloa ai, tou te tala'i i ai le tausama'aga" (Mataio 22:8, 9).

O 'au'auna a le tupu na ō atu i le ala e aoina mai ni tagata se to'atele latou te maua, "ua latou fa'apotopoto uma ē na latou iloa, o ē leaga atoa ma ē lelei" (Mataio 21:10). E 'ese'ese itu'aiga tagata na latou aumai, o nisi e lelei, a o isi e fa'alēlelei. O i latou uma na talia le vala'aulia, na i ai nisi na mafaufau e 'avea lea o se 'auala e maua ai se mea'ai po o sina fa'amanuiāga mo lea lava taimi, e aunoa ma se agaga fia fa'afetai pe talisapaia le agalelei o le tupu na avatua le vala'aulia.

Ina ua ulufale le tupu e va'ava'ai i ē na vala'aulia, na iloa gofie e ia uiga moni o i latou uma ia. Auā na saunia e ia ofu mo tagata vala'aulia uma ta'ito'atasi na 'auai i le tausama'aga. O ia ofu fa'apitoa o ni meaalofo mai le tupu, ma o lo latou ofuina, e fa'aali atu ai lo latou fa'aaloalo iā te ia. Peita'i sa va'aia e ia se tagata ua lē ofu i le ofu o le tausama'aga, o se uiga lē fa'aaloalo lea mea. Ona fai atu lea o ia iā te ia "Sole, pe fa'apefea ona e ulufale mai i'inei ua lē iā te oe le ofu o le tausama'aga? Ona lē gagana ai lea o

ia." Ua iloa e ia lana agasala. Ona fai atu lea o le tupu i 'au'auna, "Ia outou fusifusia ona vae ma lima, ma 'ave'ese atu o ia, ma lafo i le pouliuli i fafo" (Mataio 21:13).

Sa fa'atinoina le fa'amasinoga a le tupu, e ala i lona va'ava'ai toto'a i uiga o i latou na vala'aulia. O i latou e vala'aulia i le tausama'aga fa'aleagaga, o ē ua ta'utino e 'au'auna i le Atua, ma ua tusia o latou igoa i le tusi o le ola. Peita'i ane, e lē o tagata uma e ta'utino o i latou o Kerisiano o ni so'o moni. A e le'i tu'uina atu le tau'i mulimuli, e tatau ona iloiloia i latou uma pe agava'a mo le tofi o le 'au amiotonu. O lenei fa'ai'uga e ao ona faia a e le'i toe afio fa'alua mai Keriso i ao o le lagi; auā e afio mai o Ia ma le tau'i, "na te tauia ta'itasi e tusa ma lana amio na fai" (Fa'aaliga 22:12). A e le'i toe afio mai o Ia, ua Ia mautinoa uiga o le 'au Kerisiano fa'amaoni, ma o Lana fa'ai'uga mo ē amiotonu, ia tau'i atu e tusa ma lana galuega na fai.

A o tatou ola ai i lenei lalolagi, o lo'o faia lo tatou fa'amasinoga i le lagi. O ē ua ta'utino e mulimuli i le Atua, o lo'o ia silasila toto'a i lo latou fa'amaoni pe talafeagai ma fa'amaumauga o lo'o i tusi o le lagi, ma o ana amio ma galuega, e mautinoa ai le mausalī o lona taunu'uga.

O lo'o fa'atusaina mai i le fa'ata'oto e ala i le ofu fa'aipoipo, uiga mamā ma le amiotonu o le tagata Kerisiano fa'amaoni. "Ina ia tu'uina atu o ia iā te Ia, o le ekalesia matagofie lava, e leai sona ila, po o se ma'anuminumi, po o se tasi mea fa'apea" (Efeso 5:27). O le amiotonu a Keriso, o lona uiga e leai se ila, ua tu'uina atu i le 'au fa'atuatua ua talia ma 'avea o Ia ma o latou Ali'i Fa'aola.

O le ofu sisina o le olaga mamā na ofuina e o tatou ulua'i mātua ina ua tu'uina i la'ua e le Atua i Etena pa'ia. Sa o la'ua ola ma le ato'atoa i le malosi ma fa'anaunauga mo le Atua ma Lona finagalo. Sa ofuina e i la'ua le malamalama fa'aleagaga o le fa'atusa lea o le mamā fa'alelagi. Pe 'ana tumau pea ma fa'amaoni i la'ua i le Atua, semanū e ufitia pea i la'ua i lea malamalama. Peita'i ina ua o la agasala, ua motusia lo la so'otaga ma le Atua ma ua alu 'ese fo'i ma le malamalama. I lo la lēlavalavā ma le māasiasi, sa taumafai e ufiufi i la'ua i lau la'au auā ua 'ave'esea o la'ua ofu fa'alelagi.

Talu mai lava le aso na to'ilalo ai Atamu ma Eva i le agasala, ua 'avea ma amioga masani a tagata solitulafono le faia o ofu laula'au e ufiufi ai lo latou lē lavalavā ona o a'afiāga o le agasala. Ua o'ofu i galuega fa'afoliga e pupuni ai mea sesē ma taumafai e olegia ai le Atua. Peita'i, e lē mafai lava e se tasi po o se mea o lenei lalolagi ona suia le ofu fa'alelagi o le ola mamā. E lē taliaina fo'i i latou e ofu i ofu fa'alelalolagi nei, ona ulufale atu i le 'a'ai o i ai Keriso ma le 'au agelu i le tausama'aga o le fa'aipoipoga a le Tama'i Mamoe.

Ua na o Keriso lava na te saunia le ofu ina ia o tatou mafai ai ona agava'a e ulufale atu i le mea e afio ai le Atua. O lenei ofu o Lana amiotonu lea, na te fa'aofu ai i le tagata ua salamō ma talitonu fa'amaoni. "Ou te fai atu ai iā te oe, ia e fa'atau mai iā te A'u...ofu sisina ina ia e ofu ai, ne'i iloa le mā o lou lē lavalavā" (Fa'aaliga 3:18).

O lenei ofu, ua gaosia ma saunia i le lagi, e leai se fasi filo a se tagata o i ai i totonu. O Keriso i Lona tino tagata, sa Ia fa'aalia Lona uiga tonu ato'atoa, ma o le itu'aiga uiga lea o lo'o ia ofoina mai mo i tatou ia o tatou ola ai. "O a matou amio tonu uma e tusa ia ma le 'ie o le ma'i" (Isaia 64:6).

O mea uma tatou te faia ua pisia i a'afiāga o le agasala. Peita'i o le Ālo o Le Atua "ua fa'aalia o Ia ina ia 'ave'eseina e Ia a tatou agasala; e lē o iā te Ia fo'i se agasala." O le agasala pe a fa'amatalaina "o le soli tulafono lea" (I John 3:4, 5). O Keriso fo'i sa Ia tausi ma savali e tusa o le tulafono. "Ou te fiafia e fai Lou finagalo; o lo'o i totonu lava iā te a'u Lau tulafono" (Salamo 40:8). A o i ai o Ia i le lalolagi, sa Ia fetalai atu i Ōna so'o, "pei ona 'Ou tausia poloa'iga a Lo'u Tamā" (Ioane 15:10). O Lona usiusita'i ato'atoa ua mafai ai e tagata uma ona tausia poloa'iga a le Atua. Afai tatou te tumau iā Keriso, ua tasi i tatou ma Ia i le agaga ma le mafaufau, o o tatou manatu uma fo'i e fa'ailoa atu ai o lo'o ola Keriso i totonu iā i tatou. O le uiga tonu lea o le tagata ua ofu i le ofu o le amiotonu. Ma a silasila mai le Ali'i i lea tagata, o le a lē toe va'aia le ofu laula'au, po o le lēlavalavā ma le lēato'atoa ona o a'afiāga o le agasala, a e ua na o Lana ofu talaloa o le amiotonu, o le usita'i ato'atoa lea i Āna poloa'iga ma tausi i Lana tulafono.

O i latou uma na vala'aulia i le tausama'aga sa iloiloia e le tupu. Na o i latou lava na usita'ia āiaiga uma, ma ofuina le ofu o le tausama'aga na talia. E fa'apea fo'i i le talisuaga fa'aleagaga. E saofagā lava na o i latou ua ausia tulaga uma e tusa o le finagalo o le Tupu sili, ma o i latou fo'i ia o le a ofu i le ofu o le amiotonu.

O le amiotonu, o le faia lea o le mea tonu, ma o galuega lelei uma o le a faamasinoina. O o tatou uiga e fa'aalia ai le ituaiga galuega tatou te faia. O galuega fo'i e mautinoa ai le moni o lo tatou fa'atuatua.

E lē lava lo tatou fa'apea ifo o Keriso e lē o se fa'afoliga, ma o talitonuga e ala i a'oa'oga a le Tusi Pa'ia e lē o se mea taufa'asesē pe o se tala tu'u. E mafai ona tatou talitonu ma fa'apea mai, e na o le suafa lava o Iesu e fa'aolaina ai i tatou, ae peita'i ane, e lē o mafai ona tatou fa'atuatua i le 'avea lea o Ia e fai ma o tatou Fa'aola totino. E lē lava le na o le talitonu, e lē mafai fo'i ona ato'atoa le na o le folafola le fa'atuatuāga iā Keriso ma 'avea ma sui resitara o le ekalesia. “O lē e tausi fo'i i Āna poloa'iga, o lo'o tumau lea i totonu iā te ia, o ia fo'i o i totonu iā te Ia; o le mea fo'i lenei ua tatou iloa ai o lo'o tumau o Ia i totonu iā i tatou” (I Ioane 3:24; 2:3). O le fa'amaoniga moni lea o le tagata ua liliu 'ese mai i le olaga tuai. E leai se aogā o talitonuga ma folafolaga, pe a lē atagia Keriso i a tatou galuega amiotonu.

O le 'upu moni, ia totōina i le loto e ta'ita'iina ai le mafaufau. Ia fa'aosofia ai lagona uma ina ia fa'ailoa le finagalo o le Atua i o tatou olaga i aso fai so'o.

O le tagata amio Atua, ua ia fa'aalia le amiotonu e finagalo le Atua e ola ai, e ta'ita'ina lea e Lana tulafono. O le tapula'a lea e fuaina ai e le Atua fa'agaoioiga a le tagata. Ma o le iloiloga lea e fa'atinoina i le fa'amasinoga.

E to'atele ua fa'apea mai o le tulafono ua fa'alēaogāina ina ua maliu Keriso; a e peita'i e lē o gatasi lea talitonuga ma fetalaiga a Keriso, na fa'apea mai ai, “Aua ne'i outou manatu ua 'Ou sau e tatalaina le tulafono po o le 'au perofeta;...e mavae atu le lagi ma le lalolagi, a e lē mavae atu lava se iota po o sina fasi mata'itusi o le tulafono” (Mataio 5:17, 18). O le togiola lea na saunia e Keriso e ala i Lona maliu ina ia magalo agasala a 'oe ma a'u, tagata soli tulafono. Pe afai la na sui pe na fa'alēaogāina le tulafono, sa lē mana'omia le togiola e ala i le maliu o Keriso. Sa fa'atāuaina e Keriso le tulafono a le Atua a'o ola ai i le lalolagi, ma o Lona maliu sa Ia fa'amausaliina ai. Sa Ia saunia le taulaga e ala i Lona maliu, e lē ina ia fa'alēaogāina pe lē amana'ia le tulafono a le Atua, a e ia fa'atumauiina le fa'amasinoga tonu, ina ia fa'ailoa ai o le tulafono e lē mafai ona suia; e tumau e fa'avavau.

O le mau a Satani, e lē mafai e le tagata ona tausi i tulafono a le Atua; ma e ioeina e manatu vaivai fa'aletagata. A e peita'i na afio mai Keriso i le tino, ma fa'amaonia e ala i Lona usita'i ato'atoa, e mafaia i le malosia fa'aletagata ma le fa'aleagaga tu'ufa'atasi ona tauiusi i poloa'iga a le Atua.

"A o i latou uma ē na talia o Ia, ma fa'atuatua i Lona suafa, na Ia avatu i ai o lea manuia, ia 'avea i latou ma fanau a le Atua" (Ioane 1:12). O le malosia'aga lea e mai le Atua. O lē na te talia Keriso, e maua e ia le manuia e ola ai fa'apei o Ia.

E finagalo le Atua ina ia ato'atoa Lana fanau. O Lana tulafono, o le fa'amaoniga tusitusia lea o Lona alofa. Ma o le uiga alofa tonu lea e finagalo le Atua e ola ai i latou e fia ulufale atu i Lona malō. O le uiga tonu lava lea na fa'aalia i le olaga o Keriso a'o i ai i le lalolagi. Ma o le tauiusi i tulafono a le Atua, o le mautinoāga lea o le tagata ua ola iā Keriso; o i latou fo'i ia e saofagā atu i Lona malō. Na te avatu i ai le ofu o le amiotonu a Keriso, ma talisua ma ia i le tausama'aga a le upu, ma 'auai atu i le fa'apotopotoga o ē ua fa'amamāina.

O le tagata na sau e aunoa ma se ofu o le tausama'aga, e fa'asino tonu lea i le to'atele o lo o ola i le lalolagi i le taimi nei. Na ona folafola o i latou o Kerisiano, ma sa'afia i fa'amanuiāga o le talalelei; a e leai se suiga o le amio ma salamō moni ma liliu'ese mai i le agasala. Ua manatu lava i latou ua maua le tamāōaiga ma fa'amanuiāga i lo latou malosia, e leai se mea e mana'omia ai fua Keriso. E lē mana'omia se fa'atuatua pe fa'alagolago ia te Ia, ua manatu o lo'o solosolo lelei mea uma i auala soli tulafono o ola ai. Ua fa'alogo i le 'upu, ona ō mai ai lea i le tausama'aga, e aunoa ma se ofu o le amiotonu a Keriso.

O le to'atele ua ta'ua i latou o Kerisiano, ua na'o ni tagata fa'afiaamiotonu. Sa latou te'ena le mea alofa, na'o le pau lea o le auala latou te fa'atāuaina ai Keriso ma 'avea i latou ma Ōna sui i le lalolagi. O le galuega a le Agaga Pa'ia o se manatu e leai so latou iloa i ai auā e na ona fa'alogo i le 'upu a e latou te lē fia faia. O ta'iala fa'alelagi e iloa gofie ai i latou ua tasi ma Keriso mai i a i latou o lo'o i le tu'inaanau o le lalolagi, ua leai se 'ese'esega. Ua faigatā ona tu'u'ese'esaina i latou ua ta'ua o Kerisiano auā ua lē toe i ai le laina tuā'oi. Ua malō tū ma aga fa'asausili a le lalolagi, o le ekalesia ua tosina i mea a le lalolagi ma ua soli ai le tulafono, a e ua lē faia le finagalo o le Atua i le aumaia o le lalolagi i le ekalesia e ala lea i le tauiusi i lana tulafono. O lea suiga o lo'o molimauiina pea i aso uma.

Ua manatu i latou ua maliu Keriso e fa'aolaina ai tagata uma, a e ua tete'e i le olaga fa'apei ona soifua ai o Ia. Na o le vivi'i ma 'alalaga i Lona alofa tunoa, ma fa'afoliga e amiotonu a e fa'alilo ai le olaga tu'inanau ma le agasala; peita'i o ia taumafaiga uma, e lē toe i ai se avanoa i le aso o Le Ali'i.

E lē natia e le amiotonu a Keriso se agasala a se tagata. E mafai ona soli tulafono le tagata i lona loto; e tusa lava pe lē fa'atinoina i le va'aiga a tagata, ma fa'apea mai o ia o se tagata amiolelei; a e peita'i o le tulafono a Le Atua e silasila i mea lilo o i le loto. O gaoioiga uma, e fa'atinoina ona e i ai le mafua'aga. Na o lē ta'ita'iina ma faia e tusa ma fa'avae o le tulafono a Le Atua o le a tula'i i Lana fa'amasinoga.

O le Atua o le alofa lava ia. Ua Ia fa'aalia lea alofa i le meaalofo o Keriso. Ina ua "Ia aumai ai Lona Atali'i e to'atasi, ina ia lē fano se tasi e fa'atuatua ia te Ia, a ia maua e ia le ola e fa'avavau," sa Ia lē tu'ua se mea e tasi mai Āna mea tāua (Ioane 3:16). Na Ia tu'u mai le lagi 'atoa, ina ia tatou maua ai le malosi e manumalō ai i le fili. A e o le alofa o Le Atua, e lē mafai ona 'avea ma 'alofaga o le agasala. E le'i 'alo iā Satani; Na te le'i faia ma 'alofaga mo Atamu ma Kaino; e o'o lava i so'o se tasi o le fanau a tagata. E lē mafai ona Ia fa'atagaina le agasala ia manumalo i Lona Suafa Pa'ia.

O i latou e te'ena le meaalofo o le amiotonu a Keriso, ua latou lē taliaina le olaga tonu ma lelei e tataua ona ola ai ma 'avea ai ma atali'i ma afafine o Le Atua. Na o le pau lava lea o le auala e tasi, e maua ai le avanoa i le tausama'aga.

I le fa'ata'oto ina ua fesiligia e le tupu, "Pe fa'apefea ona e ulufale mai i'inei ua lē ia te 'oe le ofu o le tausama'aga?" sa lē gagana o ia. E fa'apenā fo'i ona faia i le aso fa'amasino tele. O lea fo'i aso, e lē toe i ai se 'alofaga a le tagata mai lana amio lē tonu e pei ona faia i le lalolagi nei.

O ekalesia folafolaina a Keriso i nei ona po, ua si'itia i tulaga maualuluga. Ua fa'alia mai e le Ali'i i le pupula o Lona malamalama, le tele o fa'amanuiāga i le taimi nei e fa'atusatusa i na ōna pō o le fanauga a Isara'elu. O le fa'amaoniga o ia fa'amanuiāga tele o le fa'aolataga na aumaia e Keriso na tusia ma fa'ailoa i le 'au Iutaia i le Feagaiga Tuai, ma o lo o fa'aauau pea e o'o mai i nei ōna pō i le Feagaiga Fou. Ua tatou mautinoa le afio muamua mai o le Fa'aola, Lona fa'asatauroina, ma Lona toetū mai i le tu'ugamau. Ma na Ia fetalai, "O A'u nei o le Toetū ma le Ola." I lo tatou iloa ai o Keriso ma Lona alofa, ua tu'uina mai ai iā i tatou le malō o le Atua. Ua fa'ailoa mai Keriso e ala i lauga ma vi'iga, ma le tausama'aga tele fa'aleagaga ua saunia mo i tatou. O le ofu tautele fo'i o le tausama'aga, e foa'iina fua e aunoa ma se tau i so'o se tasi. O 'avefe'au a Le Atua na fai ma auala e 'auina mai ai iā i tatou le amiotonu a Keriso, o le ta'uamiotonuina i le fa'atuatua, o folafolaga silisili ma tāua i Lana 'Upu, o le feso'ota'iga sa'oloto ma Ia e ala atu iā Keriso, o le fa'amafanafanaga a le Agaga Pa'ia, atoa ai ma le mautinoa ma maualū o le ola e fa'avavau i Lona malō. Pe o le ā ea se mea e le'i saunia e Le Atua e tapenaina ai i tatou mo le 'aiga tele, le tausama'aga fa'alelagi?

I le lagi o lo o fa'apea mai agelu: O le 'au'aunaga sa matou fa'atinoina ua mae'a. Sa o matou fa'ato'ilalo agelu a le ti'apolo. Sa matou fa'apupula atu le malamalama i loto o tagata, ma fa'ata'alise ona o latou mānatua le alofa o Le Atua e pei ona fa'aalia e Keriso. Ma ua matou fa'atosina o latou mata i le satauro o Keriso. Sa matuā o'otia o latou loto i le togiola na saunia e le Ālo o Le Atua ona o le faula'i o a latou agasala. Sa o latou iloa lo latou sesē ma ua o latou iloa le auala e liliu'eseina ai; sa latou lagona le pa'i atu o le mana o le talalelei, ma ua fa'amaulaloina ai o latou loto i le suamalie o le alofa o Le Atua atoa ai ma le matagofie o le agalelei o Keriso. A e peita'i, sa leai se uiga o ia mea uma i le to'atele. Sa lē mafai ona o latou liliu 'ese mai i a latou amio tuai, ma 'ave 'ese le ofu o le lalolagi a e ofuina le ofu fa'alelagi. Ua lē mafai ona lafoa'i le tu'inanau i mea o le lalolagi ma ua fa'amuumua iā i latou ia mea uma nai lo latou alofa i Le Atua.

O se taimi lē taugamalie le aso o le filifiliga mulimuli. E pei ona valo'ia e le aposetolo o Ioane: "Na a'u iloa fo'i le nofoali'i tele e sinasina, ma Lē o ti'eti'e ai, ua sosola 'ese le lalolagi ma le lagi i Ōna luma, e lē iloa fo'i se mea e tū ai i la'ua. Na a'u iloa fo'i o ē na oti, o tagatānu'u atoa ma ali'i, o tutū i luma o le Atua, ona fofola lea o tusi; ua fofola fo'i ma le tasi tusi, o le tusi lea o le ola; ona fa'amasinoina ai lea o ē na oti i mea ua tusia i tusi, e tusa ma a latou amio" (Fa'aaliga 20:11-12).

A tatou fa'afesāga'i ma le i'uga e fa'avavau i lea aso, o se tulaga fa'anoanoa pe a toe tepa i tua. O le olaga atoa na ola ai, o le a fa'aalia lava e pei ona faia. O tu'inauga ma mea fe'ilafi o lenei lalolagi o le a leai se tāua; ma o le a fa'ato'ā iloa ai e le tagata, o le amiotonu sa ia te'ena, pau lava lea o le 'oa e

silisili ona tāua. O le olaga fo'i sa ola ai, na fa'apologaina i mailei a le ti'apolo; ma o le ofu sa latou filifilia o le fa'aailoga lea o lo latou 'auai fa'atasi ma le ulua'i tautafa'asesē. O le i'uga fo'i o a latou filifiliga, i le lē tausisi i le tulafono a Le Atua, o le a latou iloa ma molimauina i lea lava aso.

E leai lava se isi avanoa i le lumana'i e tapena ai mo le ola e fa'avavau. O le olaga i le taimi nei, e tataua ona o tatou ofuina ai le amiotonu a Keriso. Na o le pau lava lea o le avanoa e fa'atino ai uiga lelei e tonu ma talafeagai e ulufale atu ai i le aiga ua tapenaina e Keriso mo i latou e tausi i Āna poloa'iga.

Ua lē o toe mamao ona tapunia lea o le alofa tunoa. O le lapata'iga ua uma ona tu'uina mai; ua lata mai le i'uga. "Ia outou, ne'i fa'amamafaina o outou loto ma le fa'aniniva, ma le onā, ma le popole i mea o le olaga nei, ne'i fa'afuase'i mai lea aso ia te outou" (Luka 21:34). Mataāla ne'i lē maua le avanoa, ne'i maua mai e te le'i sauni ma ofuina le ofu o le tausama'aga.

"I lea lava itulā e te lē iloa, e sau ai le Atali'i o le tagata," ua fa'apea ona Ia fetalai mai ai." "Fa'auta, 'Ou te alu atu pei o se gaioi; amu'ia lē mataāla, ma tausi i ona ofu, ina ne'i savali o ia e lē lavalavā, ne'i latou iloa atu fo'i lona mā" (Fa'aaliga 16:15).

O Taleni

Matā'upu 25

E fa'avae lenei matā'upu i luga o le Mataio 25:13-30.

A o i luga o le Mauga o Olive, na fetalai atu Keriso i Ōna so'o e fa'atatau i Lona afio fa'alua mai i le lalolagi. Sa Ia ta'u fa'apitoa ni fa'ailoga o le a fa'aalia ai pe a ua lata Lona afio mai, ma na Ia a'oa'i atu i Ōna so'o ina ia mataāla ma sauni. Sa Ia toe tu'u atu le lapata'iga, "O lea, ia outou mataāla ai, auā tou te lē iloa le aso po o le itu aso e sau ai le Atali'i o le tagata" (Mataio 25:13). Ona Ia fa'aali atu lea o le uiga o le mataāla mo Lona afio mai. Ia lē fa'aalu le taimi i le nofovale e fa'atalitali, a e ia galue ma le ma'elegā. O le lesone lenei sa Ia a'oa'o atu i le fa'ata'oto e fa'atatau i taleni.

Sa fetalai o Ia fa'apea, "O le malō o le lagi e fa'apei o le tagata fo'i na alu malaga, ua vala'au i ana 'au'auna, ona tu'uina atu ai lea e ia o ana mea iā te i latou. Ua avatu e ia taleni e lima i le tasi, a e lua a le tasi, a e tasi i le tasi; ua fa'atatau i le mea ua mafai ai e le tagata; ona alu loa lea o ia i lana malaga" (Mataio 25:14, 15).

O le tagata na alu malaga i se nu'u mamao e fa'asino lea iā Keriso, Lē na fetalai mai i lenei fa'ata'oto ina ua lata ona 'ave'esea o Ia mai lenei lalolagi a e afio i le lagi. O "'au'auna nofo pologa" po o pologa, o lenei fa'ata'oto e fa'asino i ē o lo'o mulimuli iā Keriso. E lē pule lava tatou iā tatou, ona ua "fa'atauina tatou i le tau" (I Korinito 6:20), e lē "o mea e pala, o le ario po o le auro,...a o le toto tāua o Keriso" (I Peteru 1:18, 19); "ina ia lē usiusita'i pea o ē ola iā te i latou, a o Ia o Lē na maliu ma toe tū mai o le sui o i latou" (II Korinito 5:15).

Ua fa'atauina tagata uma i lenei tau e lē mafai ona fuatia. E ala i le fa'amatala mai ma sasa'a ifo o le 'oa atoa a le lagi i lenei lalolagi, e ala i le tu'u mai iā Keriso o le lagi atoa mo i tatou, ua fa'atauina e le Atua le lotu, o uiga lelei, o le mafaufau, ma le agaga o tagata ta'ito'atasi uma. O tagata uma lava, pe talitonu pe lē talitonu, o mea totino a le Ali'i. Ua vala'auina tagata uma e galulue mo Ia, ma o le a mana'omia tagata uma e 'ave a'e se fa'amatalaga o mea na fai i le aso o le fa'amasinoga tele.

O ē na fa'asino mai e le fa'ata'oto o Āna lava 'au'auna; o i latou ia sa ta'u mai na latou talia le galuega a Keriso.

Sa fa'asaina so'o o Keriso mo le galuega. O lo'o a'oa'o mai lo tatou Ali'i e fa'atatau i le fuafuāga moni o le olaga, o le 'au'auna atu lea. O Keriso lava ia na galue fa'amaoni, ma na Ia tu'u i Ōna so'o uma le tulafono e faia ai galuega - galue mo le Atua ma o latou uso ā tagata. Oinei na tu'u ai e Keriso i le lalolagi se mafaufauga i le olaga e sili ona maoa'e i lo'o mea na latou iloa. Pe a ola e galue mo isi, o le a aumai ai se so'otaga o le tagata ma Keriso. E 'avea le tulafono o le 'au'auna atu ma so'otaga e fusimau ai i tatou i le Atua ma o tatou uso ā tagata.

Ua tu'u mai e Keriso i Āna 'au'auna o "Āna mea" - o se mea ia fa'aaogā mo Ia. Ua Ia tu'u mai e "fa'atatau i le mea ua mafai ai e le tagata" (Mataio 25:14, 15). E tofu tagata ta'ito'atasi ma lana vaega i le fuafuāga e fa'avavau a le lagi. O le a galulue fa'atasi ma Keriso mo le fa'asaina o agaga. E mautinoa lelei atu o le a saunia nofoāga mo i tatou i maota fa'alelagi e sili atu i lo nofoāga fa'apitoa ua faia i le lalolagi, i le mea ua tataua ona tatou galulue ai mo le Atua.

O Mea Alofa a le Agaga Pa'ia

O taleni ua tu'u mai e Keriso i Lana ekalesia e fa'asino fa'apitoa i meaalofo ma fa'amanuiāga sa foa'i mai e ala i le Agaga Pa'ia. "Auā ua foa'iina mai i le tasi le 'upu o le poto e le Agaga; e i le tasi le 'upu o le malamalama, e tusa ma le Agaga e tasi; e i le tasi le taofi tonu e le Agaga e tasi; e i le tasi o mea alofa e fa'amalōlō a'i ma'i e le Agaga e tasi; e i le tasi na te faia vavega; e i le tasi o le perofeta; e i le tasi o su'ega o agaga; e i le tasi gagana 'ese'ese; e i le tasi o le fa'amatalaga o gagana. E matuā galue fo'i na mea uma e lea lava Agaga e tasi, o lo'o o tufatufa i tagata ia ta'itasi ma lana mea, pei ona finagalo i ai o Ia" (I

Korinito 12:8-11). E lē o maua meaalofa e tutusa e tagata uma, peita'i o lo'o folafola mai e le Matai i 'au'auna ta'ito'atasi itu'aiga mealalofa 'ese'ese a le Agaga.

A o le'i afio 'ese Keriso mai Ōna so'o, na Ia "mānāva i o latou luga ma fa'apea atu iā te i latou, 'Ia outou talia le Agaga Pa'ia'" (Ioane 20:22). Sa Ia toe fetalai atu, "Fa'auta fo'i, 'Ou te 'auina mai iā te outou Lē na folafolaina e Lo'u Tamā" (Luka 24:49). A e peita'i sa fa'ato'ā maua le ato'atoāga o le meaalofa ina ua uma ona afio Keriso i le lagi. Na liligi ifo le Agaga Pa'ia i so'o ina ua tu'u atu ato'atoa i latou i Lana galuea'iina, e ala i le fa'atuatua ma le tatalo. Sa 'auina mai loa tamā'o'aiga o le lagi i ē na mulimuli iā Keriso, "Na afio a'e o Ia i lugā, ma na ta'ita'i fa'atagataotaua i le tafeāga; ua na foa'iina fo'i mea alofa i tagata," ma "ua au mai iā te i tatou ta'ito'atasi o le alofa tunoa, e fa'atatauina ma le mea foa'ifuaina mai e Keriso" (Efeso 4:8, 7); o le Agaga "o lo'o o tufatufa i tagata ia ta'itasi ma lana mea, pei ona finagalo i ai o Ia" (I Korinito 12:11). O meaalofa ua iā i tatou o lo'o iā Keriso, peita'i e maua mautinoa pe a tatou talia ma le fa'amaoni le Agaga o le Atua.

E lē o fa'atāuina le folafolaga i le Agaga Pa'ia e pei ona tatau ai; o Lana fa'ataunu'uga e lē o iloa. A lē fa'atasi ai le Agaga o le a lē manuia le galuega o le talalelei. Atonu e i ai taleni, e a'oa'oina, lelei le gagana, e i ai uiga lelei po o mea uma e mana'omia; peita'i a lē o fa'atasi ai le Agaga o le Atua, o le a lē pā'ia se loto, ma o le a leai se tagata agasala e ta'ita'iina iā Keriso. I le isi itū, pe a feso'ota'i ma Keriso, pe a latou talia meaalofa a le Agaga, o le a i ai le mana i le so'o e aupito mativa ma tulaga maulalo e galue ai i loto. E faia e le Atua i latou ma auala mo le galuea'iina o le pule e sili le maualuga i le vānimonimo.

O Isi Taleni

E lē na o meaalofa fa'apitoa a le Agaga taleni o lo'o fa'asino i ai le fa'ata'oto; a e aofia ai meaalofa uma ma tomai, pe maua fua pe foa'iina mai, pe fa'aletino pe fa'aleagaga. O nei mea uma e tatau ona fa'aaogāina i le galuega a Keriso. Ina ua 'avea ma Ōna so'o, ia tatou tu'u atu ato'a i tatou iā te Ia ma mea uma o iā i tatou. O le a toe fa'afo'i mai nei meaalofa iā i tatou ina ua mamā ma lelei, ina ia fa'aaogāina mo Lona mamalu e fa'amanuia ai o tatou uso ā tagata.

Ua tu'u mai e le Atua i tagata ta'ito'atasi e "fa'atatau i le mea ua mafai ai e le tagata" (Mataio 25:15). O taleni e lē tufaina mai fa'alētatau. O le tagata e mafai ona fa'aaogā taleni e lima e maua e ia le lima; a mafai ona fa'atele na o le lua, e maua le lua. O lē mafai ona fa'aaogā tatau le tasi, e maua fo'i e ia na o le tasi. Ia lē faitio se tasi ona ua fa'apea ua na lē maua ni meaalofa e tetele atu; auā o Lē e tufaina mai i tagata uma e fa'amamaluina i le fa'aleleia o mea ta'itasi sa tu'uina mai, tusa pe telē po o le itiiti. O lē na tu'u i ai taleni e lima sa fa'atuatua e fa'aleleia le lima; o lē sa i ai na o le tasi, sa talitonu o le a fa'aleleia le tasi. E finagalo le Atua ia fa'afo'i mai "e tusa ma mea ua iā te ia, a e le tusa ma mea e lē o iā te ia" (II Korinito 8:12).

I le fa'ata'oto, "ua alu ai lea o lē na i ai taleni e lima na fa'atau atu ai, ua maua ai fo'i isi taleni e lima. Ua fa'apea fo'i o lē na i ai taleni e lua, ua maua ai fo'i e ia le tasi lua" (Mataio 25:16, 17).

E tusa pe o le ā le itiiti o taleni, e tatau ona ave e fa'aaogā. Ia lē sili iā i tatou ona fa'apopoleina e le fesili, E fia mea ua 'ou maua? a e O le ā la'u mea ua fai i mea o lo'o iā te a'u? O le tiute muamua e tatou te faia mo le Atua ma o tatou uso ā tagata o le atina'e o malosi uma o lo'o iā i tatou. E leai se tagata o lo'o fa'ataunu'uina le fuafuāga o le olaga pe a lē o tupu a'e i aso ta'itasi le poto ma le aogā. Pe a ta'u atu e fa'atuatua iā Keriso, ua tatou ta'utino loa o le a faia mea uma e mafai ia 'avea ai tatou ma ē galulue mo le Matai, ma e tatau ona tatou tausī lelei itūtino uma ia sili ona ato'atoa, ma e mafai ai ona tele mea lelei e tatou te faia

E mata'utia le galuega e tatau ona faia mo le Ali'i, ma o le a Ia tu'u mai le tele e fai i le lumana'i o i latou o lo'o aupito galulue fa'amaoni i le taimi nei. E filifilia e le Ali'i Ōna lava sui, ma i lalo o tulaga 'ese'ese i aso ta'itasi, e Na te tu'u atu se tofotofoga mo fa'agaoiiga o Lana fuafuāga. E Na te lē filifilia sui ona e ato'atoa i latou, a e ona ia maua e latou le ato'atoāga e ala i le so'otaga ma Ia.

E talia e le Atua na o i latou o ē fuafua maualuga; ma e tu'u e Ia i Ōna tagata le tiute ia taumafai ai i le sili o le malosi. E mana'omia ia ato'atoa le lelei o mea uma. Ia 'aua lava ne'i fa'apa'ū ia maualalo le tulaga o le amiotonu ina ia fa'aofi mai mea sa tupuga ma latou pe na a'oa'oina e tauau ai i le fai o mea sesē. Ia tatou malamalama lelei o le uiga e lē ato'atoa, o le agasala lea. E tumau i le Atua uiga amiotonu

uma, e āugatasi le ato'atoa, ma o le tagata e talia Keriso ma 'avea Ia o lona Fa'aola o le a fa'amanuiaina i le i ai o nei uiga.

O i latou uma o le a galulue fa'atasi ma le Atua e tatau ona taumafai ia 'ausia le tulaga mo le atoa lelei o vaega uma o le tino ma le mafaufau. O le a'oa'oga moni o le sauniuniga lea tau le tino, o le mafaufau, ma le pulea o le amio mo le faia o tiute tatau uma; o le a'oa'oina o le tino, o le mafaufau, ma le agaga mo le galuega pa'ia. O le a'oa'oga lenei o le a tumau e o'o i le fa'avavau.

E mana'omia e le Ali'i Kerisiano uma ina ia tupu a'e i le fai mea lelei ma ia fa'alauteleina le tomai i so'o se mea. Ua totogiina e Keriso la tatou tau, i Lona lava toto ma Ōna mafatiāga, ina ia tatou galulue fa'amaoni mo Ia. Na afiō mai o Ia i lo tatou lalolagi e fai ma fa'ata'ita'i pe a tatou galulue, po o le ā fo'i le agaga e tatau ona tatou aumaia i le galuega. E fa'anaunau o Ia ina ia tatou su'esu'e pe fa'aapefea ona tatou faia Lana galuega ia sili ona mao'ae ma ia fa'amamalu ai Lona suafa i le lalolagi, ia tauia i le fa'aaloalogia, ma le alofa e tele na'uā ma le tapua'iga, o le Tamā e matuā "alofa mai... i le lalolagi, ua Ia 'au mai ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau" (Ioane 3:16).

Peita'i e le'i ta'utino mai Keriso o le a faigofie ona tatou 'ausia uiga e ato'atoa. E lē fa'asolo mai mātua se uiga e atoa le lelei pe ta'uleleia ma e lē o'o fa'afuase'i mai iā i tatou. O le uiga e ta'uleleia e maua lea e le tagata lava ia mai lana taumafaiga e ala i le uiga ato'atoa ma le alofa tunoa o Keriso. E tu'u mai e le Atua taleni ma le mana e pulea ai le mafaufau; o tatou lava e fausia le amio; e fausia e ala i tofotofoga faigatā e fa'ato'ilalo ai le loto fa'apito mo 'oe lava ia. Ia tatou va'ava'ai vale ma faitio i o tatou lava mana'oga, ma ia 'aia nei totoe se uiga e lē mana'omia a ia fa'asa'oina.

Ia lē fa'apea se tasi, 'ou te lē mafai ona togafitia o'u uiga lē lelei; afai ua e faia lea filifiliga, o le a mautino lou lē maua o le ola e fa'avavau. O lou lē mafai e alu a'e mai lou lava loto; pe a e loto e lē mafai se mea, o le a lē mafai lea ona e manumalō. O le faigatā moni e tupu a'e mai le leaga o le loto e le'i fa'apa'iaina, ma le loto e lē fia gaua'i atu i le pule'aga a le Atua.

E to'atele na tofia e le Atua e fai galuega e sili ona lelei, a e le'i tele ua fa'ataunu'uina, ona e itiiti mea sa latou taumafai i ai. E afe ma afe o lo'o fa'aalu le olaga e pei e leai se mea o fuafua i ai, e leai se tapula'a o taumafai e 'ausia. O nei itu'aiga o le a maua le tau e fa'atatau i a latou galuega.

Ia manatua o le a e lē mafai lava ona 'ausia se tapula'a e maualuga atu i lo o lea e te fa'atūina mo 'oe lava. O lea ia e fa'atū maualuga lau tapula'a, ma ia la'ala'a ta'itasi, e tusa pe faigatā le taumafaiga; a e ala i le tu'u 'ese o le loto fa'apito ma 'ave'ese mana'oga lē tatau, ia fa'amalosi e a'e aga'i i le tumutumu o le apefa'i. Ia 'aia ne'i i ai se mea e fa'alavelave i lou aga'i pea i luma. E leai se fa'afitauli e matuā faigatā o le a fa'atumau ai se tagata i se tulaga e mana'omia ai pea le fesoasoani. Pe a una'i e taumafai ia manumalō pe a feagai ma tulaga e fete'ena'i, o le a 'ave'esea ta'itasi pā puipui ma maua ai se malosi ma le lototele e aga'i ai i luma. O le a fa'amalosia 'oe e aga'i i le ala sa'o, ma o le a maua le fesoasoani ona o le tulaga ua e 'ausia.

Ia e ma'elegā, mo le mamalu o le Matai, e tausi lelei le amio. So'o se la'asaga i le fausiga o lau amio, ia e fa'afiafia le Atua. E mafai ona e faia lenei mea; auā sa fa'afiafia le Atua e Enoka e ala i lona olaga mao'e i se tupulaga sa matuā mata'utia le leaga. Ma o lo'o i ai lava ē pei o Enoka i ōna pō nei.

Ia tula'i e pei o Tanielu, le ta'ita'i fa'amaoni o le malō, se tagata e le'i fa'ato'ilaloina e ni fa'aosoosoga. Ia lē fa'afa'anoanoa o Ia, Lē na alofa mo 'oe ua Ia tu'uina mai Lona soifua e 'ave'esea ai āu agasala. Sa Ia fetalai, "E lē mafaia e outou ona fai o se mea e tasi pe a A'u lē i ai" (Ioane 15:5). Ia e manatua lenei mea. A e faia se sesē, ua e maua se lapata'iga pe a ua e iloa ia mea sesē. O le a suia le to'ilalo i le manumalō, ua lē atofaina fuafuāga a le fili, a e ua fa'amamaluina lou Fa'aola.

O le amio e fausia fa'atatau i le fa'atua o le Atua e na o le 'oa lea e mafai ona tatou 'ave mai lenei lalolagi. O ē o i lalo o a'oa'oga a Keriso a o i lenei lalolagi o le a mafai ona 'avea ma latou i maota i le lagi mea uma fa'aleagaga ua latou 'ausia. Ma o le a fa'aleleia atili i tatou i le lagi; o lea e matuā tāua lava le atina'e o le amio i lenei olaga.

O atamai fa'alelagi o le a galulue fa'atasi ma le itū fa'aletagata o lo'o sa'ili ma le fa'atuatua mo le atoa'toāga o le amio ia 'ausia i gaoioiga. Mo i latou uma i lenei galuega, ua fetalai mai Keriso, 'Ou te i lou lima taumatau e fesoasoani atu iā te 'oe.

Pe a 'aufa'atasi le loto o le tagata ma le finagalo o le Atua, o le a silisili'ese le mamana. So'o se mea e tatau ona faia mai Lana fa'atonuga, o le a fa'ataunu'uina lea i Lona malosi. O Āna poloa'iga uma e mafai ona fa'ataunu'u.

Faufauga o le Loto

E mana'omia e le Atua le a'oa'oina o vaega uma o le mafaufau. Ua Ia fuafua ia maua e Āna 'au'auna le poto e aupito sili ma le malamalama e sili le manino i lo o le tagata fa'alelalolagi. Ma e lē fiafia o Ia iā i latou o ē lē fa'aeteete po o le paiē e lē 'avea ai ma tagata galue e faimeamafai. Ua poloa'i le Ali'i ia tatou alolofa iā te Ia ma o tatou loto atoa, ma agaga atoa, ma le malosi atoa, ma le mafaufau atoa. O lea ua tatau ai iā i tatou ona fa'atupuina le poto ia sili ona ato'atoa, ina ia tatou iloa ai ma alolofa ma o tatou manatu atoa, i Lē na faia i tatou.

Pe a tatou i ai i lalo o le pule'aga a Lona Agaga, o le a fausia lelei le poto, o le a mafai ona fa'aaogā lelei mo le galuega a le Atua. O le tagata e lē a'oa'oina a e ua fa'apa'iaina i le Atua ma e naunau ina ia fa'amanuiaina ai isi, e mafai ona fa'aaogāina e le Ali'i mo Lana galuega. Peita'i o isi ua fa'amanuiaina i a'oa'oga ma o lo'o i ai fo'i le agaga o le fa'apa'iaina, e mafai ona faia fo'i galuega e sili atu le lautele mo Keriso.

O le naunauta'iga a le Ali'i ia tatou maua a'oa'oga e aupito maua, ina ia tatou avatu lenei malamalama i isi. E leai se tasi e mafai ona iloa po o fea pe fa'aapefa fo'i ona vala'auina e galue pe tautala atu mo le Atua. E na o lo tatou Tamā fa'alelagi e silafia le mea e aogā i ai le tagata. O lo'o i o tatou luma mea e tele e lē mafai ona malamalama i ai ona o le vaivai o le fa'atuatua. E tatau ona a'oa'oina o tatou mafaufau ina ia mafai ona tatou tu'u atu le 'upu moni o Lana Afioga i luma o ta'ita'i e aupito maua, ina ia fa'amamaluina ai Lona suafa. Ia lē fa'amisia se avanoa e tasi e tatou te galulue ai mo le Atua.

Ia fa'amalosia le 'au talavou o lo'o mana'omia ia a'oa'oina ma galulue ia tausisi e maua lea a'oa'oga. 'Aua ne'i fa'atali mo se avanoa; ia e faia le avanoa mo 'oe lava. Pe o le ā le itiiti, ia e tagolima ma u'umau i ai. Ia poto i mea tau 'oloa; 'aua le fa'aalu fa'alētatau i mea e fa'amalieina ai le tino, pei o mea 'ai, po o le sa'iliga o tu'inanau ma fa'afiafiāga. Ia 'avea 'oe o se tagata aogā ma faimealelei e pei ona vala'auina ai 'oe e le Atua; ia fai mea mae'a ma ia fa'amaoni i so'o se mea e te faia. Ia e maua se tulaga e sili ona lelei e fa'amalosia ai le atamai. Fa'aaogā le su'esu'e o tusi fa'atasi ma galuega o lima, ma e ala i le taumafai fa'amaoni, o le mataāla, ma le tatalo, o le a e maua le tomā mai le lagi. O lenei a'oa'oga o le a e maua e ato'atoa lea ma lelei. O le a si'itia lau amio i se tapula'a e maua, ma e fa'amalosia le tāua i lo isi mafaufau, e mafai ai ona e ta'ita'iina i latou i le ala o le amiotonu ma le fa'apa'iaina.

E tele atu mea e mafai ona fa'ataunu'uina i le galuega o le a'oa'oina e 'oe lava ia pe ana ua tatou iloa a tatou avanoa ma meaalo fa'apitoa. E tele atu le uiga o le a'oa'oga moni i lo o le mea e mafai ona maua mai a'oga maua. E ui ina tāua le poto su'esu'e o mea fa'asaenisi, a e o le a'oa'oga e mao'e e maua mai lea e ala mai le feso'ota'iga tāua ma le Atua. E tatau i tagata a'oga uma ona 'ave lana Tusi Pa'ia ma tu'u ia i se mafutaga fa'atasi ma le A'oa'o Sili. Ia a'oa'oina le mafaufau ma pulea lelei ia mafai ona fa'afeagai ma fa'afitauli a o sa'ili le 'upu moni a le Atua.

O i latou o lo'o fia maua le poto ia mafai ai ona fa'amanuia o latou uso ā tagata o le a latou maua fo'i le fa'amanuiāga mai le Atua. Pe a su'esu'e Lana Afioga o le a fafaguina fo'i o latou mafaufau i gaoioiga lelei ma le fa'amaoni. O le a fa'atupuina ma fa'alauteleina le tomā ma o le a fa'amalosia ma fa'aleleia le mafaufau. O le tagata e galue mo le Atua e tatau ona a'oa'oina ia pulea lelei ia lava. O le a tele atu i'uiga manuia e maua mai le taupulea lelei i lo o lē aupito tele taleni. O le a tele atu mea e fa'ataunu'u ma le galuega e mao'e mai le mafaufau e taupulea lelei i lo o le mafaufau e sili le maua ona a'oa'oina ma le aupito tele o taleni a e lē o pulea.

O le Gagana

O le mana e tautala ai o se taleni e tatau ona galuea'iina ma le ma'elegā. E leai se meaalo fa'atupuina ma le fa'amanuiāga e maua mai ai i lo o lenei. O le leo e tatou te

tauānau atu ma fa'atalitonu mai ai; e si'i a'e ai a tatou talosaga ma vi'iga i le Atua, ma e mafai ai ona tatou ta'u atu i isi le alofa o le Fa'aola. O lea e tāua ai le a'oa'oina o le leo ia matuā fa'aaogāina mo le lelei.

Ua matuā fa'atamala lava i tū masani ma ua fa'aaogā sesē le leo, e o'o lava i tagata a'oa'oina ma i fa'agaioiga fa'aKerisiano. E to'atele ē faitau pe tautala fa'avavevave po o le fa'agesegese fo'i, ma ua lē mafai ona malamalama i ai se tasi. O isi e taumemumemu 'upu pe a tautala; o isi e maualuga leo ma e faigatā ona lagona e le 'au fa'alologo. O pese, tusitusiga, o fa'aaliga ma pepa e faitau mai luma ofa'apotopotoga e tu'uina mai i se tulaga e faigatā ai ona manino pe sa'o i le fa'alogo.

E tatau ona fa'atonuina lenei leaga; o lo'o tu'u mai fa'atonuga e fa'atatau i lenei mea e le Tusi Pa'ia. Ua ta'u mai e fa'atatau i le faitauina o le Tusi Pa'ia e le 'au Sa Levī iā Isara'elu i le taimi o Esera, "Ua latou faitau mae'a i le tusi i le tulafono a le Atua, ma ua latou folafola atu le uiga, ma fa'amatalaina atu iā te i latou le mea ua faitauina" (Ne'emias 8:8).

Pe a tausisi e taumafai o le a mafai e tagata uma ona maua le malosi e faitau malamalama ai, ma tautala i se leo e manino lelei. Pe a faia fa'apea, o le a fa'ateleina lo tatou aogā e 'avea ai ma ē galulue ma'elegā mo Keriso.

Ua vala'auina Kerisiano uma e fa'aiiloa atu i isi 'oloa e lē tau sa'ilia a Keriso; o lea e tatau ona ia sa'ili ia ato'atoa lelei lana gagana. E tatau ona ia ta'u atu le afioga a le Atua i se ala e sili ona maoa'e i le fa'alogo a le 'au fa'afofoga. O le Atua e lē fuafuaina Ōna sui fa'aletagata ina ia lē fa'autauta. E lē finagalo o Ia ina ia fa'aitiitia pe fa'atauva'aina le suāvai ola fa'alelagi o lo'o tafe i le lalolagi, e ala mai lea sui.

E tatau ona tatou tepa iā Iesu, o le fa'ata'ita'i e ato'atoa; ia tatou tatalo mo le fesoasoani a le Agaga Pa'ia, ma e ala i Lona malosi e tatau ona tatou sa'ili ia a'oa'oina itūtino uma mo le galuega ia ato'atoa le lelei.

E matuā fa'apitoa le tāua iā i latou ua vala'auina mo galuega e fa'alaua'itele. O faife'au ma faia'oga uma e tatau ona manino i mafaufau o latou o lo'o tu'uina i tagata se fe'au e afāina ai agaga e fa'avavau. O le 'upu moni e tu'u atu o le a fa'amasinoina ai i tatou i lea aso o le faitauga mulimuli. Mo nisi agaga, o le tulaga e tu'u atu ai le fe'au o le a fa'atatau i ai le taliaina po o le tete'eina. O lea ia fa'aleoina 'upu ina ia mana'o atili ai ia malamalama ma tosina mai ai le loto. Ia tautala manino ma ia lē fa'avavevave, a e ia tu'u atu ma le fa'amaoni e iloa ai le tāua o ōna fa'anaunauga.

O le tū masani tonu ma le fa'aaogāina o le gagana e fa'afeagai lea ma vaega uma o le galuega fa'aKerisiano; e i ai i le olaga i le aiga, ma feso'ota'iga uma i le vā ma isi. E tatau ona tatou fa'amasani e tautala i leo e mālīe i le fa'alogo, fa'aaogā le gagana e ato'atoa ma e sa'o, ma 'upu e agamālū ma e fa'aaloalo. O 'upu e suamalie ma agalelei e pei lea o le sau ma timu ma'ulu'ulu e mālū i le agaga. Ua fa'apea mai le Afioga Pa'ia e fa'atatau iā Keriso ona ua sasa'a ifo i Ōna laufofoga le alofa tunoa ia Ia "iloa ona fa'amafanafana i se 'upu lē ua tigāina" (Salamo 45:2; Isaia 50:4). Ma ua 'ai'oi mai le Ali'i iā i tatou, "Ia le aunoa a outou upu ma le alofa" (Kolose 4:6) "e tupu ai le lelei i ē fa'alologo i ai" (Efeso 4:29).

Pe a sa'ili e fa'asa'o pe toe fa'aleleia isi, e tatau ona tatou fa'aeteete i a tatou 'upu; o le a 'avea latou ma tofoā'iga o le ola po o le oti. I le tu'u atu o fautuāga po o a'oa'iga, e to'atele e fa'aaogā gagana e ma'ama'ai ma faigatā, o 'upu e lē fa'amalōlō atu i se agaga ua manu'a. Ona o nei fautua ua faivale, o le a fa'a'ono'ono i le agaga, ma o le a ta'ita'ia le uso ua sesē ia fouvale. O i latou uma e molimauina fa'avae o le 'upu moni, e tatau ona latou maua le suāu'u fa'alelagi o le alofa; i so'o se tulaga o le olaga e tatau ona a'oa'i ma le alofa. O a tatou 'upu o le a fa'afouina ai a e lē o le fa'avaivai ai. O Keriso, e ala i le Agaga Pa'ia, o le a 'aumaia le malosi ma le mana.

Ia lē faia se 'upu e tasi e lē taupulea. Ia leai se tautala leaga, leai se tala e fai ma le lē fa'autauta, ia lē aumaia manatu e lē lelei, fa'alēmalie loto pe fa'apopole ai, mai laugutu o lē o lo'o mulimuli iā Keriso. Ua fetalai le Agaga Pa'ia, e ala mai le aposetolo o Paulo, "'Aua ne'i alu atu se 'upu leaga ai o outou gutu..." (Efeso 4:29). E lē na o 'upu e lē mamā i se feso'ota'iga leaga; o le uiga e aofia ai ma so'o se fa'amatalaga e tete'e i fa'avae pa'ia ma talitonuga e ato'atoa ma lē 'ele'elea. E aofia ai fo'i le lē ta'usa'o ma faiga fa'atogafiti e taulēiloa ai le leaga. O nei mea uma e i'u ai i le agasala mata'utia pe a lē vave ona te'ena.

I aiga uma, i Kerisiano ta'ito'atasi, ua tu'u mai i ai le tiute e fa'asāsā ai le ala ia tete'e'ese ai gagana e lē lelei. Pe a fa'atasi ma i latou e matele i tala e lē fa'autauta, o la tatou tiute o le suia o le matā'upu o lo'o

talanoaina, pe a mafai. Ia tatalo mo le alofa tunoa o le Atua e fesoasoani mai ina ia suia le talanoāga i se mata'upu e maua ai se aogā.

O le galuega a mātua o le a'oa'oina lea o a latou fanau ia fa'aaogā 'upu e tatau; o le a'oga e aupito sili mo lenei tū masani o le olaga lea i le aiga. Mai ulua'i tausaga e tatau ona a'oa'o le fanau ia tautala ma le fa'aaloalo ma le alofa i mātua ma isi o le aiga. E tatau ona a'oa'oina i latou ia na o 'upu e agamalū, o le mea moni, ma e mamā e tatau ona ui mai o latou laugutu. Ia 'avea fo'i mātua o ē o lo'o a'oa'oina i le ao'ga a Keriso i aso ta'itasi. E ala mai 'upu fa'atonu ma le fa'aa'oa'o o le a mafai ai ona a'oa'oina a latou fanau i le fa'aaogāina o "upu e ola ai, e lē mata'uleagaina" (Tito 2:8). O le tasi lea tiute tau'ave a mātua e aupito sili le tāua.

Ona o tatou o so'o o Keriso e tatau le 'avea o a tatou 'upu o se fesoasoani ma se fa'amalosi'aga i nisi i le olaga Kerisisano. Ia sili atu le tele i lo mea tatou te faia, e tatau ona tatou tautala i mata'upu tāua o a tatou gaoioiga. E tatau ona tatou tautala i le alofa tunoa ma le agalelei fa'apalepale o le Atua, i le loloto e lē mafa'atusaina o le alofa mutimutivale o le Fa'aola. O a tatou 'upu uma ia fai ma vi'iga ma 'upu fa'afetai. Pe a ua fa'atumulua le loto ma le mafaufau i le alofa o le Atua, o le a fa'aalia lea i talanoāga; e lē o se mea faigatā le fa'asoa atu o mea lelei e maua mai i o tatou olaga fa'aleagaga. O mafaufauga e maoa'e, o naunauta'iga e ta'uleleia, o le iloa manino o le 'upu moni, o fuafuāga e lē fa'apito, fa'anaunauga mo le olaga e usiusita'i ma le pa'ia, o le a fua mai i 'upu e fa'aalia ai le uiga o lo'o teuina i le loto. Pe a fa'aali atu fa'apea Keriso i la tatou gagana, o le a i ai le mana e tosina mai ai agaga iā te Ia.

E tatau ona tatou talanoa atu e uiga iā Keriso iā i latou e lē o iloa Ia; ia tatou faia e pei ona fai e Keriso. I so'o se mea na fa'atasi Ia i ai, i le sunako, i autafa o le ala, i le va'a a o tu'utu'u itiiti atu mai le matāfaga, i le tausamiga a le Faresaio po o le la'o'ai a le telona, sa Ia fetalai atu i tagata i mea e fa'atatau i le olaga e maua'uga a'e. O mea o le foafoāga, o mea e tutupu i aso fai so'o, ua fusi fa'atasi e Ia ma fe'au o le 'upu moni. Sa tosina mai iā te Ia loto o Lana 'au fa'alologologo; sa Ia fa'amalōlō a latou tagata mama'i, fa'amafanafana ē fa'anoanoa, ma na aumaia tamaiti iā te Ia ma fa'amanuia iā te i latou. Ina ua Ia fetalai atu, sa tosina mai i latou iā te Ia, ma o fetalaiaga ta'itasi uma sa fai ma tofōga o le ola i nisi agaga.

Ia tatau fo'i ona fa'apea iā i tatou; so'o se mea tatou te i ai, e tatau ona tatou va'ai i avanoa e tautala atu ai i isi e fa'atatau i le Fa'aola. Pe a tatou mulimuli i le fa'aa'oa'o a Keriso i le faia o mea lelei, o le a tosina mai loto o tagata iā i tatou fa'apei ona latou faia iā te Ia. E lē tupu fa'afuase'i, a e o le fa'autauta e pogai mai le alofa fa'ale-Atua, o le a mafai ona tatou ta'u atu o Ia, o Lē "e Silisili 'Ese i le mano" ma o le Tasi "ua ato'atoa ona lelei o Ia" (Pese a Solomona 5:10, 16). O lenei le galuega e aupito sili le maua'uga e mafai ona fa'aaogā ai le taleni o le gagana. Ua tu'uina mai iā i tatou ina ia tatou fa'aailoa atu Keriso o le Fa'aola e fa'amagalo agasala.

Mana Fa'atosina

O le soifuāga o Keriso sa fa'alauteleina pea lava, e lē fa'atuā'oia le tāua, o se mana sa so'ofa'atasi ai Ia ma le Atua fa'apea ma le atoa o le aigā tagata. E ala iā Keriso, ua tu'uina e le Atua i le tagata se mana o le a lē mafai ai e ia ona ola mo ia lava. E so'ofa'atasi tatou ta'ito'atasi ma o tatou uso ā tagata, e na o se vaega o le mea atoa a le Ali'i, ma e i lalo o se fuafuāga mo lelei e fai fa'atasi. E lē mafai e se tagata ona tū to'atasi e 'ese mai ōna uso ā tagata, auā o le lelei o le to'atasi e afāina ai ma isi. O le fuafuāga a le Atua ia lagona e le tagata o ia e mana'omia mo le ola lelei o isi, ma sa'ili ai ia si'itia lo latou olaga manuia.

E si'omia agaga uma e se mana- o se mana atonu e maua ai le fa'atuatua, lototele, ma le fa'amoemoe, ma e fa'asuamalieina e le manogi o le alofa. Pe atonu ua fa'amamafaina ma e malulū ona o le pogisā o le lē fiafia ma le manatu fa'apito, po o le 'o'ona o le leaga o le agasala ua tu'uloto. E ala i le mana fa'atosina o lo'o si'omia i tatou, o le a afāina lava tagata uma e feso'ota'i mai ma i tatou.

O lenei le tiute tau'ave e i o tatou luga. O a tatou 'upu, o gaoioiga, o lavalava, o tatou amioga, e o'o lava fo'i i o tatou foliga, e fa'aailoa atu ai i tatou. O tatou uiga e fa'aali atu e fa'atatauina ai mo le lelei po o le leaga, a e o se mea e lē mafai ona fuaina e se tagata. O mea uma e tu'u mai iā i tatou o fatu ia e totōina ma o le a seleseleina i se aso. O le maea lea o le so'otaga o mea e tutupu i le olaga o le tagata, ma e lē iloa le mea e gata mai ai. Afai e 'avea i tatou ma fa'aa'oa'o ma tatou fesoasoani atu i isi ia fa'atupuina fa'avae lelei, ua tatou tu'u atu loa iā i latou le malosi e faia ai se lelei. E fa'asolo atu fo'i mai iā i latou ona faia lea

lelei mo isi, ma o le a fa'apea ona fa'aauau ai pea aga'i i isi. O lenei mea e le'i mafaufauina a e to'atele ē o le a fa'amanuiaina ai.

A togi se ma'a i le vai, e fausia ai se galu ma se isi ma se isi; o le tele o galu, o le a fa'alauteleina le li'o, se'ia o'o ina taunu'u i uta i le matāfaga. E fa'apea o tatou uiga fa'atosina. I tala atu o la tatou iloa po o la tatou pule, o lo'o fa'ailoa mai i isi i fa'amanuiāga po o le leaga.

O le amio o le malosi lea; o le molimau lē leoa o le olaga e fa'amaoni, e lē fa'apito, e amioatua a e 'avea o se mana e lē mafai ona te'ena. Pe a fa'aalia i lou olaga le uiga o Keriso, o le a ōgatasi loa ma Ia i le galuega mo le fa'asaoina o agaga. E mafai ona tatou galulue fa'atasi ma Ia pe a tatou fa'aalia i o tatou olaga Lona uiga moni. O i latou e ta'u mai o lo'o 'au'auna i le Atua ma mulimuli i le fa'ata'ita'iga a Keriso, latou te tausi fa'avae o le tulafono i o latou olaga o aso fai so'o; pe a molimau mai i gaoioiga o latou e alolofa fa'amaoni i le Atua ma o latou tuā'oi e pei ona faia iā i latou lava, o le a maua loa e le ekalesia le mana e fa'agaoioi ai le lalolagi.

A e ia 'aia lava ne'i galo le mana e mafai ona tosina ai i le leaga. O se mea e sili le mata'utia pe a sē 'ese lou lava agaga; peita'i e aupito sili le leaga pe a lē iloa 'ese nisi agaga ona o 'oe. E to'atele ē faimai e tū fa'atasi ma Keriso a e o lo'o salalau'ese mai ma Ia. O le pogai lenei o le vaivai o le ekalesia, ona e to'atele e na o le faitio ma fai fetu'ua'iga. Pe a fa'aali le masalosalo, matau'a, ma le lē fiafia, ua latou tu'u atu i latou i le ta'ita'iga a Satani ma 'avea ma āna mea faigaluega. E latou te lē iloa le mea ua latou faia, a e peita'i ua fa'aaogā latou e le fili e fa'ataunu'u āna fuafuāga. Ua fa'ailoa le leaga, ua fa'amālumālu mai le pogisā, ma ua ūtia i latou i 'aū a Satani. O le lē fa'atuatuaina, lē talitonu, ma le lē fa'amaoni ua 'u'umauina i latou a e semanū e latou te talia Keriso. A e ua va'ava'ai ifo le 'au faigaluega a Satani ma le lē popole i ē ua latou ta'ita'i ia masalosalo, ma ua fa'ama'a'aina loto ia tete'e i a'oa'iga ma talosaga. Latou te fa'ailoa mai o latou e amiotonu ma fai mea sa'o pe a fa'atusatusa atu i ia agaga. O nei agaga sa tofotofoina ma ua pa'u'ū ona o a latou uiga fa'atosina, ma le galuega a o latou laulaufaiva ma loto e lē taupulea.

E to'atele agaga ua liliu'ese mai le ala o le ola ona o olaga a ē ua ta'ua o Kerisiano a e manatu fa'apito, e fiafia i tu'inaanau 'ese'ese, o le lē fa'autauta ma amioga fa'avalea, ma le lē popole. O le to'atele o le a fefefe e fetaia'i ma fa'ai'uga mai le Atua ona o a latou galuega fa'atosina.

E na o le alofa tunoa o le Atua e mafai ai ona tatou fa'aaogā sa'o lenei meaalofa ua tu'uina mai. E leai se mea iā i tatou lava e mafai ona tatou fa'atosina ai nisi mo le lelei. A tatou iloa e tatou te mana'omia le fesoasoani ma le mana fa'alelagi, o le a tatou lē talitonu i lo tatou lava malosi. O le a tatou lē amata se aso, se itulā, po o se taimi a e lē tu'u atu o tatou ala uma i lo tatou Tamā fa'alelagi. Ua Ia tofia Āna agelu e leoleo iā i tatou, ma i so'o se taimi o fa'afitauli e i ai pea i latou i o tatou itū taumatau. Pe a malosi mai se fa'atosina sesē, o le a fa'atasi pea agelu i o tatou tafatafa, e fa'asa'o le ala ia tatou uia, e filifili a tatou 'upu e fa'aaogā ma ia tonu a tatou fa'agaoioiga. Atonu o le a tatou lē mailoa ma e sau lemū, a e mata'utia le mana e tosina mai ai isi iā Keriso ma mea fa'alelagi.

O le Taimi

O le tatou taimi e ā le Atua. O taimi uma e pule ai Ia, ma o la tatou tiute tāua o le fa'aleleia lea o le taimi mo Lona mamalu. E leai se taleni ua Ia tu'u mai e sili ona tāua le fa'aaogāina i lo o la tatou taimi.

E lē mafuafuaina le aogā o le taimi, ona ua fa'atatauina e Keriso lona tāua. O le mea lea e tatau ona tatou fa'atatau fa'apea, e matuā pu'upu'u lava le olaga, ia 'aia le fa'amaumauina. E itiiti aso o le alofa tunoa e sauniuni ai mo le ola e fa'avavau. Ia tatou lē fa'amaumau se taimi, leai se taimi e fai ai tu'inaanau fa'apito o le tino, leai se taimi e alu e fai ai le agasala. O le taimi lenei e fafau ai amioga mo le lumana'i, mo le ola e fa'avavau. O le taimi lenei ia tatou sauni ai mo le fa'amasinoga o iloiloga.

E le'i umi ona amata le olaga o le aigā tagata a e ua amata loa ona oti i latou, ma o le galuega fa'alelalolagi e fa'ai'u lava i le leai o se mea e maua vaganā ai pe a ua malamalama lelei e fa'atatau i le ola e fa'avavau. O le tagata e fa'aaogā le taimi e galue ai i aso ta'itasi a o mafai, o le a saunia o ia mo se maota ma se ola e lē mavae. Ua fa'amanuiaina lona fanau mai.

Ua a'oa'i mai tatou ia fa'aaogā le taimi, peita'i o le taimi e fa'amaumau e lē mafai ona toe fa'afo'i mai. E pau le ala o le a mafai ona tatou toe fa'asao mai ai la tatou taimi o le fa'aaogā tatau lea o le taimi o lo'o totee, ia tatou galulue ai fa'atasi ma le Atua i Lana fuafuāga tele o le fa'aolataga.

O le a suia le uiga o le tagata e faia lenei mea. O le a 'avea ia o se atali'i o le Atua, o se tasi o le aigā tupu, e fai ma tama a le Tupu o le lagi, e savavali fa'atasi ia ma agelu a le Atua.

O lenei le taimi e galulue ai mo le fa'aolaina o tatou uso ā tagata. E i ai nisi o lo'o manatu e pau le mea e mana'omia latou te faia mo Keriso o le avatu lea o a latou tupe mo Lana galuega. Latou te lē fa'aaogā lelei le taimi tāua, atonu e faia ai se 'au'aunaga mo Ia. Peita'i o le avanoa ma le tiute lea o tagata uma o lo'o manuia le soifua ma le malosi e faia ai se galuega lelei mo le Atua. O tatou uma e tatau ona galulue ia maua mai agaga mo Keriso. E lē mafai ona suia e taulaga foa'i lenei tulaga.

E tatau ona tatou tutūlelei ina ia sauni ai e 'au'auna atu pe a vala'auina; e tāua taimi uma mo i'uga e fa'avavau. O le avanoa ua tu'u mai nei mo i tatou e tautala atu ai i se agaga o lo'o mana'omia le 'upu o le ola, atonu o le a lē toe ofoina mai. Atonu o le a fetalai le Atua i lea uso, "E 'a'amiina atu lou agaga nai iā te 'oe i le pō nanei" (Luka 12:20), ma ona ua tatou fa'atamala o le a lē sauni ai ia. I le aso o le fa'amasinoga tele, o le a fa'apefa se fa'amatalaga e tatou te si'i a'e i le Atua?

O le ola e matuā tāua lava, ia lē fa'aaofia i mea fa'alelalolagi e lē tumau, i le fa'asoesā o mea e fa'apopole ai a e na o se fasimea ititi pe a fa'atusatusa ma mea tāua e fa'avavau. Peita'i ua vala'auina i tatou e le Atua ia galulue mo Ia i fe'au o le olaga fa'alelalolagi; o le ma'elegā ma le loto naunau i lenei galuega o vaega tāua ia o le talitonuga moni. O le paiē o le fetu'u e sili le mata'utia, ua fa'ailoa mai e le Tusi Pa'ia, o lo'o afāina ai lo tatou lalolagi. A e o le tagata ua liua ato'atoa o le a 'avea ma se tasi e tausisi e galue ma le ma'elegā.

E fa'alagolago le maua e tatou o le poto ma le atamai o le mafaufau pe a aga'i i luma le fa'aaogā lelei o le tatou taimi. Ia lē punitia le tausiga o le mafaufau ona o le mativa, tulaga maulalo, po o si'osi'omaga e lē lelei; a ia fa'aaogā tatau le taimi ua tu'u mai. E tele vaega taimi e fa'aalu i talanoāga e leai se aogā; tele itulā o le taeao e fa'amaumau i le moe umi; tele taimi e alu i feōa'iga po o le fa'atalitali i femalagaa'iga; o taimi e fa'atali ai a o sauni taumafataga, po o le fa'atali mo ē lē tausisi taimi; taimi e mafai ona fa'aaogā e su'esu'e ai, pe faitau ai se tusi, pe mafaufau loloto ai. Ia fai fuafua le fa'aaogāina o le taimi ina ia maua ai e le tagata le malamalama ma le atamai e mafai ai ona 'avea o se tagata e mana'omia, ma o le a ia maua so'o se tulaga e tāua ma e aogā.

Ia maua e Kerisiano ta'ito'atasi se tū masani e solosolo lelei, fai mea mae'a, ma fa'auma vave; e leai se 'alofaga mo se galuega e lē 'ausia lea tulaga. Pe a lē i ai le loto ma le mafaufau i le galuega, o le a galue pea a e lē mafai ona mae'a le galuega. O nei sesē e tatau ona fa'asa'o; e mana'omia ia fa'amalosi le mafaufau e ala i le fuafua o le fa'aaogāina o le taimi ma ia maua se i'uga lelei. Pe a fuafua fa'agaoiiga i le aiga, pe a galue ma le fa'autauta, o le a fa'asa'oina ai fo'i le taimi. E 'avea se mea itiiti ma galuega telē ona o le faimeatu'u ma le fa'agesegese, a e mafai ona suia lenei masani pe a i ai se fuafuāga e mautinoa o le a faia ai lenei galuega. Mo so'o se galuega, ia tu'u i ai se taimi e mana'omia ia mae'a ai, ma ia taumafai e fa'ataunu'u le galuega i totonu o lea taimi. E galue ma'elegā lima pe a fa'aaogā le loto e pulea.

Pe a leai se una'iga e pulea ai le tagata ma ia toe fa'afou, o le a ia uia loa se ala sesē; a e a tausisi lelei le malosi, atonu o le a mafai loa ona maua le agava'a e fai ai galuega e sili atu le lelei. O le a vala'auina ma mana'omia lea tagata i so'o se mea; e fa'amanuiaina ona o lona aogā.

O le to'atele o le fanau ma le 'au talavou ua fa'amaumau le taimi e tatau ona fa'aaogā e fesoasoani ai i 'avega tau'ave i le aiga, ma fa'ailoa atu ai le loto alofa i le tamā ma le tinā. O se a'oa'oga tatau fo'i lea mo le talavou auā tiute tau'ave a le tagata e tatau ona faia i le aiga.

O le soifuāga o Keriso mai Lona la'itiiti o se soifua sa tumu i gaoiiga tatau. E le'i soifua o Ia mo le fa'amalieina o Ia lava; o Ia o le Ālo o le Atua soifua, a e sa galue i le faiva fa'akamuta ma Lona tamā o Iosefa. E tāua Lana galuega; sa afio mai o Ia i le lalolagi ina ia atina'e le amio, ma ona o lea, sa ato'atoa le lelei o Āna galuega uma. Na Ia aumaia i Āna galuega fa'alelalolagi uma se ato'atoāga e pei lava o uiga na Ia suia e ala i Lona mana fa'a-Atua. O Ia la tatou fa'aa'oa'o.

E tatau i mātua ona a'oa'o i a latou fanau le aogā ma le fa'aaogā sa'o o le taimi. A'oa'o iā i latou ia faia se mea e fa'amamaluina ai le Atua ma ia fa'amanuiaina ai le aigā tagata, ma o le mea lea e ao ona tatou taumafai i ai. E o'o lava i tausaga a o laiti, e mafai ona 'avea i latou o misionare mo le Atua.

E leai se agasala a mātua e sili atu le leaga i lo o le tu'u atu lea o le fanau ia lē faia se mea aogā e tasi. O le a vave ona a'oina e le fanau le manaia o le paiē, ma o le a tupu a'e i se tulaga lē uta'ia ma e leai se aogā i le aiga. Ina ua matua ma ua o'o i le taimi ua tatau ai ona su'e se galuega, o le a galue i se tulaga e

fa'apaiē, tau muimui, ma e lē ma'elegā, a e peita'i e fuafua o le a totogī tutusa ma ē o lo'o galulue fa'amaoni. E telē le 'ese'esega i le vā o lenei vasega o tagata faigaluega ma ē o lo'o iloa e tataua ona 'avea ma tausimea fa'amaoni.

O le masani e fai fa'apaiē ma le lē fa'aeteete o galuega fa'alelalolagi, o le a aumaia i tototnu o le olaga fa'aleagaga ma o le a afāina ai le faia o galuega e lelei mo le Atua. E to'atele ē galulue ma'elegā ma 'avea o se fa'amanuiāga i le lalolagi, a e ua fa'aleagaina ona o le faimeatu'u. E tele tofotofoga o le a oso mai i totonu i le faitoto'a ua matala ona o le leai o se galuega ma se fuafuāga mautinoa o le olaga. O faigāuō leaga ma masaniga lē taupulea o le a fa'aleagaina ai le mafaufau ma le agaga, ma o le i'uga o le fa'aumatiaina o lenei olaga ma le ola o i lumana'i.

Pe o le ā le galuega tatou te faia, ua a'oa'o mai le Afioga a le Atua ia "'Aua le fa'avaivai i le filigā, ia malosi le loto, ia 'au'auna i le Ali'i" (Roma 12:11). "O mea uma ua e iloa e faia e ou lima, inā faia ia ma lou malosi" (Failauga 9:10), "auā ua outou iloa, e maua e outou mai le Ali'i o le tau, o le tofi lea; auā ua 'au'auna outou i le Ali'i o Keriso" (Kolose 3:24).

O le Soifua Malōlōina

O le soifua malōlōina o se fa'amanuiāga ua fa'atauva'aina e le to'atele le aogā; peita'i e fa'alagolago i ai le galue lelei ma le malosi o tatou mafaufau ma tino. O tatou tino e mafua a'e ai tu'inanau ma mana'oga, ma o lea e tataua ona tasi fa'alelei tulaga fa'aletino ma ia i lalo o pule'aga fa'aleagaga ina ia tatou fa'aaogā i se tulaga e aupito maoa'e a tatou taleni.

So'o se mea e fa'aitiitia ai le malosi tauletino e fa'avaivaiina ai le mafaufau ma lē mafai ai ona iloa le lelei mai le leaga. O le a lē mafai ona filifili mea lelei, ma o le a leai se malosi i le loto e fai ai mea e tatou te iloa e sa'o ma tonu.

O le fa'aaogā sesē o lo tatou malosi tauletino o le a fa'apu'upu'uina ai le taimi e fa'aaogā ai o tatou ola mo le mamalu o le Atua, ma o le a lē mafai ona tatou fa'auma le galuega na tu'u mai tatou te faia. Pe a fa'ataga ia fausia iā i tatou ni masaniga sesē, pe a tasi fa'alētataua itulā o le aso, pe a fa'amalie le tu'inanau o mea'ai a e fa'agalo le soifua malōlōina, o le a tatou fa'atagaina loa fa'avae mo se olaga e vaivai. A lē amana'ia le fa'amalosi'aga tauletino, a e galuea'iina fa'aletataua le mafaufau po o le tino fo'i, o le a lē talafeagai so'otaga i le fa'atulagaina o neura o le tino, e aofia ai le fai'ai. O i latou ua fa'apea ona fa'apu'upu'uina o latou ola ma ua lē mafai ai ona fa'aaogāina mo le galuega ina ua fa'atamala i tulafono o le foafoāga, ma ua ta'usalaina ona ua gaoi mea a le Atua. Ua latou gaoi fo'i mai o latou uso ā tagata. O le a fa'apu'upu'u fo'i le avanoa e latou te fa'amanuia atu ai isi, o le galuega lea sa 'auina mai ai latou e le Atua i le lalolagi, ona o a latou lava fa'agaioiga. E ta'usalaina i tatou e le Atua pe a tatou tu'uloto masaniga e lē tataua, ma ua tatou taofi ai le fa'asoa atu o le lelei i le lalolagi.

O le soli o tulafono tauletino o le solia lea o le tulafono tau i amiotataua; auā o le Atua o Lē na fa'avaeina poloa'iga tauletino a e fa'apea ma tulafono tau i alatataua. O lo'o tusia O lo'o tusia Lana tulafono e Lona lava 'a'ao i neura uma, musela uma, o le mafaufau ma itūtino uma, ma na Ia tu'uina mai i le tagata. A fa'aaogā sesē so'o se itū o tatou tino, o le solia lea o lea tulafono.

E tataua i tagata uma ona i ai le poto e malamalama ai i le fausaga o le tino o le tagata ina ia mafai ona latou tasi lelei le tino i le tulaga e mana'omia mo le faia o le galuega a le Atua. E tataua ona tasi fa'aeteete ma atina'e fa'alelei le ola fa'aletino ina ia fa'aalia ai, e ala mai le aigā tagata, le ato'atoāga o le uiga fa'a-Atua. O le feso'ota'iga i le vā o le meaola fa'aletino ma le ola fa'aleagaga o se tasi vaega e aupito tāua o a'oa'oga. E tataua ona su'esu'e ma le fa'aeteete i le aiga fa'apea i le falea'oga. E mana'omia ia malamalama lelei tagata uma i le fausiga o latou tino ma tulafono e pulea le uiga moni o le ola. E agasala le tagata i le Atua pe a fa'atamala ia iloa le tulafono e fa'atataua i le tino ola ma le lē usita'i i ia fa'atonuga. Ia tataua i tagata uma ona fa'atulagaina i le vā o le ola ma le soifua malōlōina ia aupito sili le lelei. E tataua ona pulea e le mafaufau a tatou tū masani ina ia i ai i lalo o le pule'aga a le Atua.

Ua fa'apea mai Paulo, "Tou te lē iloa ea, o lo outou tino o le malumalu lea o le Agaga Paia ua i totonu iā te outou, o lo'o ua iā te outou mai le Atua, e lē aiā fo'i outou iā te outou? Auā ua fa'atauina outou i le tau; o lenei, ia outou vivi'i atu i le Atua i o outou tino ma o outou agaga, o mea a le Atua ia" (I Korinito 6:19, 20).

O le Malosi

E ao ona tatou alolofa atu i Le Atua, e lē gata i le loto, le mafaufau ma le agaga, a e fa'apea fo'i le malosi atoa. E aofia ai le fa'aaogā poto ma le ato'atoa o le malosi'aga tauletino.

O Keriso o se tagata galue fa'amaoni i le fa'aleagaga atoa ai ma le fa'aletino, ma o Āna galuega uma, na faia i Lona naunauta'iga e fa'ataunu'uina ai le finagalo o Lona Tamā. O mea fa'alelagi ma mea fa'alelalolagi e i ai le feso'ota'iga vāvālalata i le va'aiga a Keriso e lē o'o i ai le iloa a le to'atele. O fuafuāga a Keriso na fa'atulagaina ai le ulua'i falefetafa'i fa'alelalolagi. O tulaga uma fa'apitoa i le fausiaina o le malumalu o Solomona, na fa'atonutonuina e Keriso. O Ia lava lea na soifua i le lalolagi o se kamuta i le nu'u o Nasareta, o le Keriso fo'i lea na foafoa ma fa'atulagaina le malumalu pa'ia e mamalu ai Lona Suafa.

O Keriso na Ia foa'i le poto ma le iloa i le 'aufaigaluega latou te fa'atino ai le galuega i le mea silisili ona lelei. "Fa'auta, ua 'Ou vala'auina i lona lava igoa, o Pesaleli le atali'i o Auri, o le atali'i lea o Huro, o le itu'iga o Iuta. Ua ou fa'atunuina fo'i o ia i le Agaga o le Atua, i le poto ma le fa'autauta, ma le iloa lelei e fai ai galuega uma... Fa'auta fo'i, ua 'Ou tu'uina atu iā te ia, o Avialu le atali'i o Aisamako, o le itu'aiga o Tanu; ua 'Ou tu'u fo'i le poto i loto o ē popoto uma lava, ina ia latou faia o mea atoa uma ua 'Ou fai atu ai iā te 'oe'" (Esoto 31:2-6)

O le finagalo o le Atua mo Lana 'aufaigaluega uma, ia o latou sa'ili atu iā te Ia, o Lē na te aumaia mea uma latou te mana'omia. O foafoāga tonu ma lelei e puna mai iā te Ia o Lē na te fautua ma a'oa'oina i le atamai silisili 'ese. O le pa'i atu o le lima o le foma'i ua i ai le tomā, na te avatua le mana fa'amalolō i ē ua mama'i ina ia maua ai se mapusaga mai o latou mafatiāga. O le tomā e mafai ai ona fa'aaogāina e le kamuta le samala, o le malosi i le fai u'amea e fausia ai mama u'amea, e aumaia lea mai le Atua. Na Ia foa'i taleni i tagata, ma o Lona fa'amoemoega ia o latou sa'ili atu ia te Ia na te fautua ma ta'ita'i. E naunau le Atua ina 'ia tatou tu'u atu atoa o tatou loto ma mafaufau ia te Ia na te tautai, ina ia mafai ai ona fa'atino so'o se tiute tatou te fai i le lelei ato'atoa.

O le fa'atuatuāga ma galuega e fai e lē tatau ona tu'u'ese'eseina. O le fa'atuatuāga fa'ale-Tusi Pa'ia e tatau ona ō fa'atasi i se so'otaga vavālalata ma mea uma tatou te fa'atinoina i le olaga nei; ina ia mafai ona 'ausia se sini e atagia ai Keriso.

Ua folafolaina mai e le Atua le ta'iala silisili e mafai ona 'ausia ai se lelei i lenei galuega faifa'atasi. O le vi'iga o le Atua ia 'avea ma mafua'aga autū o lo tatou fia 'au'auna fa'atasi ma Ia. O a tatou galuega uma, ia fa'atinoina ona o lo tatou alolofa iā te Ia ma ia tusa ma Lona finagalo. E tutusa lava le tūa o se sauniga fa'a-lelotu ma le fausiaina o se fale pe a faia e tusa ma le finagalo o le Atua. Auā afai e fausiaina uiga fa'aalia o le 'aufaigaluega i le ta'iala silisili tonu e pei ona finagalo i ai le Atua, o fale uma lava latou te fausia, e tupu pea lo latou atamai atoa ai ma le fa'amanuiāga.

A e lē mafai ona taliaina e le Atua ni taleni tetele po o ni 'au'aunaga matagofie se'i vaganā ua ofoina atu lou tagata atoa mo Ia. O le a'a ia tatau ona fa'apa'iaina, auā a leai, e lē mafai ona fua mai ni fua e fa'amalieina ai le Atua.

Na faia e le Atua Tanielu ma Iosefa o ni ta'ita'i fa'autauta. Sa mafai ona Ia fa'aaogāina i la'ua auā sa ola i la'ua e fa'amuamua le Atua ma Lona finagalo a e lē o la'ua loto.

E i ai se lesa mo tatou i le tala ia Tanielu. O lo o fa'amaonia mai ai, o le tagata faipisinisi e leai sona atamai e faia ai tulafono. E mafai ona fa'atonuina o ia e le Atua i so'o se la'asaga. A o 'avea Tanielu ma pule i itumalo uma o Papelonía, o ia fo'i o se perofeta a le Atua, sa foa'iina i ai le malamalama i le musumusuga fa'a-lelagi. O le ta'ita'i fa'a-lelalolagi o lo'o fa'atusaina i le Tusi Pa'ia o le vao ola ma le fugala'au ua mamae. A e naunau le Atua ina ia i ai ni tagata atamamai e 'au'auna mo Ia i galuega 'ese'ese. E mana'omia faipisinisi latou te fa'aaogāina le ta'iala silisili i a latou fefa'ataua'iga uma, atoa ai ma le fa'aleleia atili o taleni e ala i su'esu'ega e fa'alatele ai le tomā. Ma o i latou uma o lo'o mana'omia lea fa'aleleiga, o i latou ia o lo'o fa'aaogāina lo latou iloa e fausia ai le malō o le Atua i le lalolagi. O Tanielu, o ia o se tagata fa'autauta ma fa'amaoni. O se fa'ata'ita'iga lelei, ma o lo'o fa'a'iloa mai i lona tala'aga le tele o mea lelei e ausia pe a ofoina atu le malosi uma i le mafaufau, loto ma le ola atoa e 'au'auna ai mo le Atua.

O le 'Oloa

Ua tu'uina fo'i e le Atua fa'amanuiāga i le tagata e ala i le malosi e maua ai le tamāo'aiga. Fa'asūsūina le 'ele'ele i le sau mai le lagi atoa ma le timu. O le susulu o le lā e fa'amāfanafana ai le lau'ele'ele ma ola ai la'au ma fua mai. Ma ia fa'atonuina fo'i le tagata i lana vaega e fa'afo'i atu ia te Ia.

E le'i aumaia le tupe ina ia o tatou vi'ia ai tatou lava. O le 'avea ai o i tatou o ni tausī mea fa'amaoni, ia o tatou fa'aaogāina ina ia vi'ia ai le Atua. Ua manatu nisi na o se vaega o ia fa'amanuiāga e patino lea i le Atua. Ina ua 'ave'eseina le vaega mo taulaga ma sefulua'i atoa ma galuega fesoasoani, ua manatu loa e fa'aaogā le vaega o totoe i so'o se mea e mana'o ai. A e peita'i e lē sa'o lea manatu. O mea uma ua tatou maua, e a Le Atua ia; ma e ao ona o tatou fa'aaogāina tatau e tusa o Lona finagalo ina ia atagia ai lo tatou alolofa moni ia te Ia ma o tatou tuā'oi e pei o tatou lava.

E tāua tele le tupe, auā e mafai ai ona fa'atino mea tetele. A e i le fanau a Le Atua, e mo le fafagaina o ē fia'a'ai, fa'ainu i ē ua gālala ma fa'a'ofu i ē ua lē lavalavā. O le puipuiga o ē ua sauāina ma fesoasoani i ē ua mama'i. O le tupe e leai sona tāua tele nai lo le oneone se'i vaganā ua fa'aaogāina tatau mo mea e mana'omia ia ola ai le tagata, 'avea o se fa'amanuiāga i isi, atoa ai ma le fa'alateleina o le galuega lavea'i a Keriso.

O le 'oa fa'aputu e lē gata ina lēaogā, a e o se fetu'u. O se mailei na te tata'i'eseina le loto o le tagata mai le mana'o atu i le 'oa fa'a-lalagi. I le aso tele o le Ali'i e ta'usalaina i latou na lē fa'aaogāina taleni atoa ai ma le fa'atamala i avanoa e manuia ai. Ua fa'apea mai le Afioga a le Atua, "Fa'auta maia, outou e tamāo'aiga, ia outou fetāgisi ma uiō ona o puapuagā e o'o mai ia te outou. Ua pala la outou 'oloa, ua 'ati'atia o outou ofu i mogamoga, ua 'elea a outou auro ma ario; e fai fo'i ma molimau ia te outou lo latou 'ele, e 'aina ai o outou tino pei o le afi. Ua outou fa'aputu mea i ona aso e gata ai. Fa'auta o le totogi o ē galulue, ē na fa'aputu le fua o outou fanua, ua taofia e outou, ua alaga ia; o le alaga fo'i o ē na selesale saito ua fa'afofogaina lava e le Ali'i o 'au" (Iakopo 5:1-4).

O le lesona na a'oa'oina e Keriso na fa'atatau lea i le fa'aaogā tatau ma fuafua lelei. "Fa'aputu mea o totoe, 'aua ne'i māumau se mea" (Ioane 6:12), o le lesona mo tagata Kerisiano uma. O lē ua manatu ifo i lona loto, o ana tupe o se fa'amanuiāga mai le Atua, na te fa'aaogāina tatau ma foa'i atu e fesoasoani ai i isi.

O le tele o le so'ona fa'aaogā sesē o fa'amanuiāga e ala i le fa'alialia vale ma le fia iloa, o le itiiti fo'i lea o mea e totoe e mafai ona fesoasoani atu ai i ē matitiva ma lē tagolima. Ma o ia gaoioiga uma, o lo'o taofia ai le vi'iga ma le fa'amanū e tatau ona fa'afo'i atu i le Atua ona o Ia e ala mai ai nei meaalofo uma.

O le Agalelei ma le Loto Alofa

O le agalelei ma le loto alofa atoa ai ma le faigofie ona malamalama i mea fa'aleagaga, o ni meaalofo fa'apelepele ia, ma o se tiute tau'ave tele i le tagata le fa'aaogāina o nei fa'amanuiāga. E tatau ona fa'aaogāina e 'au'auna atu ai i le Atua. A e peita'i, o iinei e fa'asesēina ai le to'atele. Ua i ai le manatu fa'amalieina i nei meaalofo ma ua leai se lagona e tufa atu e 'au'auna ai i isi tagata. Latou te fa'atalitali e aunoa ma le ofo atu i so'o se tasi i so'o se taimi ma le lotomalie, se'ia maua se avanoa ona fa'ato'ā faia lea o se galuega ua o latou manatu e sili atu ona lelei. Ua va'ava'ai atu ma le 'ino'ino i le tagata ua lē alofa i le tagata mativa ma fa'apea mai, o se tagata manatu fa'apito ua lē fa'aaogāina lana meaalofo. A e peita'i, o se manatu sesē lea manatu auā e tutusa pau lava le tagata ua lē fa'aaogāina le meaalofo ma le tagata e fa'atalitali se'ia malie lona loto ona fa'ato'ā fa'aaogā lea o lana meaalofo. O le meaalofo e tatau ona fa'aaogā e fesoasoani atu ai i so'o se tasi a e lē na'o au uō ma tagata e te alofa i ai. Ma o le finagalo lenā o le Atua e Āna meaalofo, ia o tatou faia le galuega lelei ma o tatou manatua, e fa'afo'i le vi'iga ia te Ia a e lē o tatou lava.

E Fa'ateleina Taleni pe a Fa'aaogā

O taleni e fa'aaogāina lelei e toe maua ai nisi meaalofa e tele atu. O le fa'amanuiaina, o le alofa foa'i o le Atua ma le tau'i mo le tagata galue fa'amaoni ma lē fiu gofie. E naunau Le Ali'i ina ia tatou fa'aaogāina meaalofa uma ua foa'i mai, auā o le tele o le fa'aaogā, o le tele fo'i lenā o le foa'i mai. Na te fa'aopoopoina fo'i le tomai ma le agava'a atoa ai ma le malosi i lē ua vaivai ina ia mafai ona fa'aauau ai pea lana 'au'aunaga ia lelei ma ato'atoa. Ma o lo tatou ofo atu o ni meafaigaluega e 'au'auna mo Ia, o Lona alofa tunoa e mafai ai ona tete'e atu i tu'inanauga tuai a e fofoa mai ai ni amioga fou. O le mulimuli pea i le ta'ita'iga a le Agaga Pa'ia ma usita'i i ai, o le fa'atupula'ia fo'i lea o le malosi ma le naunau e faia galuega lelei.

O le 'au'auna loto mauualalo e usita'i atu i le vala'au a le Atua e mautinoa lona fesoasoani. O le taliaina o lenei tiute telē ma le pa'ia e fa'aalia ai le tagata ua fa'atupuina lona uiga alofa i le Atua. E ui i lona vaivai ma fa'atauva'a, a e fa'atuatua i le mana ma le malosi mai le Atua na te fa'a'ato'atoaina o ia ina ia mafai ona fa'atino le galuega molimau atu mo le Ali'i. O se malamalama e susulu atu, e na te fa'asino agaga i le Atua ma Lona finagalo. O mea uma fo'i na te mana'omia e foa'iina lea ia te ia. O le tele o le fa'aaogāina o lo tatou malamalama ma le fa'atinoina o lo tatou malosi, o le a fa'atupuina fo'i le poto ma pulea le malosi o iā i tatou.

O galuega uma tatou te faia mo Keriso, e fua mai ai fa'amanuiāga mo i tatou. Afai tatou te fa'aaogāina ia fa'amanuiāga mo le vi'iga o Keriso, e toe foa'i mai e Ia mea e sili atu. O lo tatou molimau atu, ma tatalo fa'atauānu faifaipea ina ia manumalo mai ni agaga mo Keriso, o le fa'amanuiāga sili, o le suiga fou lea i o tatou olaga Kerisiano. Ua moni lo tatou alofa i le Atua, ua fa'amaoni la tatou ta'utinoga ma ua tupu le fa'atuatua ma mafanafana le mafutaga e ala i tatalo. Ua tatou fiasia e galulue auā ua totōina e le Atua i o tatou loto le fa'amaoni e 'au'auna mo Ia ma Lona finagalo.

O le tāua fa'alelagi o le tagata e fa'alagolago lea i lona iloa o le Atua. O le iloa lea, o le punāvai e tafe mai ai le mana uma. Na faia e le Atua le tagata ina ia ola fiasia e mafuta atu ia te Ia, ma naunau e sa'ili atu e fia iloa mea mamana e uiga ia te Ia. Na Ia ofoina mai fo'i Keriso ina ia fai ma fa'ata'ita'iga tatou te iloa ai le matagofie o mea fa'a-lelagi.

A o tatou va'ava'ai atu ia Iesu, ma fa'apupulaina o tatou mata ina ua tatou malamalama i le matagofie o Le Atua ma Lona alofa, e suia i tatou ma ua foliga ia te Ia. O le agalelei ma le alofa i isi atoa ai ma le faia o mea lelei, ua 'avea ma a tatou aga masani. Ua fa'atupuina lo tatou malamalama ma fiasia faifaipea i mea fa'a-lelagi ma le ola e fa'avavau.

O le Taleni e Tasi

O le tagata na i ai le taleni e tasi, na “alu ma tanu i le 'ele'ele le tupe a lona matai” (Mataio 25:18).

O lē na i ai le meaalofa itiiti sa lē mafai ona ia galue ina ia fa'atuputeleina. O se lapata'iga lea mo i latou ua manatu o le itiiti o le fa'amanuiāga, ua fai lea ma 'alofaga o le lē ola 'au'auna mo Keriso. Ua latou manatu, ana i a te i latou ni mea se tele, e fiasia e 'au'auna; a e peita'i ona o le itiiti o le meaalofa, ua lē mafai ai ona faia se mea. A e o se lagona sesē lea manatu; auā o le tufatufaina o meaalofa, o lo'o tofotofoina ai lou tagata e Le Atua. O lē ua fa'atamala i lana meaalofa, o se 'au'auna lē fa'amaoni. Pe ana maua e ia taleni e lima, e tanumia e ia fa'apei o le taleni e tasi? Ua fa'aalia ai lona lē amana'ia o meaalofa fa'a-lelagi.

“O lē fa'amaoni i mea itiiti, e fa'amaoni fo'i o ia i mea e tele” (Luka 16:10). E lē tāua i le tele o taimi mea itiiti ona e fa'atauva'a i le va'ai a le tagata; a e peita'i o i inā e auala mai ai le tele o a'oa'iga tāua o le olaga. E leai se mea e fa'atauva'a i le olaga fa'a-Kerisiano. Auā o lo tatou lē amana'ia o mea itiiti, o le tele fo'i lea o fa'afitauli i le tau fausiaina o a tatou amio ia lelei.

“O lē amiolētonu i le mea itiiti, e amiolētonu fo'i o ia i mea e tele.” O le lē fa'amaoni i tiute laiti, ua ta'u gaoi lea i lona lē fa'atinoina o le 'au'aunaga na tataua ona faia mo lona Matai. E toe tau'i atu lava lona lē fa'amaoni ia te ia lava; ua ia lē maua le fa'amanuiāga, le malosi ma le mana e na o le tagata ua ofoina atu atoa lona ola mo le Atua na te maua. Ona ua ia alu 'ese mai iā Keriso, ua faigofie ona fa'asesēina i fa'aosoosoga a Satani, ma ua faia mea lē tonu i lana 'au'aunaga i lona Matai. Ona o lona lē usita'i i le Atua, ma ua ta'ita'isesēina o ia mai a'oa'oga tonu, ua lē mafai ai ona ia 'ausia mea tetele sa manatu o ia o le a ia maua. O le lē fa'amaoni i mea iti, ua fai ma mea suamalie ma ua fa'aauau ai pea i

mea tāua o le olaga. O fa'atinoga faiso'o e tupu ai amio, o amio e maua ai uiga, o uiga e filifili ai le taimi ma le taunu'uga o le tagata.

Na o le fa'amaoni lava i mea itiiti e mafai ai ona a'oa'oina le loto ina ia faia mea tetele ma le amiotonu. O le ala lea na aumaia ai e le Atua Tanielu ma ana uō ina ia mau fa'atasi ma tagata mautofi o Papelonía, ia a'oa'oina ai nei tagata fa'apaupau i le talitonuga moni. Na tu'uina Tanielu e lotolotoi i le ogātonu o le agasala ma tū fa'apaupau ina ia fa'aalia ai le mata'utia o le Atua. Na fa'apefea ona 'ausia e Tanielu lea tulaga maua ma le mamalu? Ona o lona olaga atoa sa ia fa'amaoni i mea itiiti. Sa mausalī ma tumau lona fa'atuatua, o le ala fo'i lea e le'i tu'ulafoa'iina ai o ia e le Atua. A o Tanielu ma ana uō, sa foa'iina e le Atua iā i latou le "fa'autauta ma le atamai i tusi uma lava, atoa ma le poto; a o Tanielu ua poto i fa'aaliga uma lava atoa ma miti" (Tanielu 1:17).

Fa'apei ona vala'auina e le Atua Tanielu e molimau mo Ia i Papelonía, e fa'apenā fo'i ona Ia vala'auina i tatou o Āna molimau i le lalolagi i nei ona pō. I mea itiiti atoa ma mea tetele, o Lona fa'anaunauga ia tatou fa'aali atu i tagata uma Lona finagalo ma le ala e sao atu ai i Lona malō e fa'avavau.

A o soifua Keriso i le lalolagi, sa Ia a'oa'oina le tāua o le amana'ia o mea itiiti. Sa Ia fa'amamafaina le galuega tele o le fa'aolaina o agaga. A o Ia fa'amalolō i ma'i ma a'oa'o atu, o le malosi i le tino ma le mafaufau sa fai ma fa'atumutumuga, peita'i o mea laiti ma lē amana'ia sa Ia fa'aaogāina e fa'amalamalama ai le moni o le malō o le Atua. Sa Ia fa'atāuina le 'au'auna lotomaulalo ma fa'atauva'a i le va'ai a le tagata. Sa Ia fa'afofoga i le tagi a le tagata ua fia ola. Na Ia lagonaina le pa'i atu a le fafine ua mafatia i le tumutumu o tagata e to'atele; o si ana pa'i ua fa'atumulia i le fa'atuatua moni, sa maua ai lona mapusaga. Ina ua Ia fa'atūina mai i le oti le afafine o Iāilo, sa Ia fa'amanatu i ōna mātua le tāua ona fafaga iā te ia. Fa'apei fo'i ona ua toetū mai o Ia i le tu'ugamau, sa le'i manatu e tu'u ma'anumini ai pea 'ie sa ufiufi ai o Ia, a e sa Ia gaugau ma tu'u fa'alelei.

O le galuega fa'a-Kerisiano ua vala'auina ai tatou, o lo tatou galulue fa'atasi ma Keriso e fa'asaina agaga. O lo tatou fa'atamala, o le fa'ailoga lea o lo tatou lē fa'amaoni iā te Ia. A e ina ia fa'ataunu'uina lenei galuega, e tatau ona tatou mulimuli i Lana fa'ata'ita'iga, o le fa'amāoni atoa ai ma le fa'atāuina o mea itiiti. O le mealilo lenā o le fa'aeaina i so'o se taumafaiga fa'a-Kerisiano.

E naunau le Ali'i ina ia 'ausia e ōna tagata le tulaga aupito sili ona maua ina ia vi'ia ai o Ia, e ala i le fa'aaogāina o le mafai e na te foa'i mai. O Lona alofa tunoa ua Ia saunia ai mea uma e fa'aalia ai o lo'o tatou galulue mo Āna fuafuāga e sili atu nai lo le lalolagi. Ia tatou fa'aali atu le maoa'e o le tomai, agava'a, malamalama ma le poto auā tatou te talitonu i le mana o le Atua e galue i loto o tagata.

A o i latou ua itiiti le meaalofo, e lē tatau ona 'avea lea ma auala e fa'avaivai ai. Ia fa'aaogā ma le fa'amaoni, ma fa'alagolago i Lona alofa e fa'amalosi mai i lou vaivai. O so'o se matāfai o le olaga, e tatau ona faia ma le fa'amaoni, ma galue ina ia fa'atupu le iloa ia mafai ona 'ausia le taunu'uga lelei.

O le ola fa'atamala, e lē tatau ona manumalō. O nisi ua fai ma 'alofaga le galo. A e peita'i, na faia e le Atua le mafaufau o le tagata ina ia mafai ona ia fetu'una'i ia uiga ma iloa le mea e tatau ona fai. O le agasala le fa'atamala ma le galo. Afai o le a fai ia uiga ma amio a le tagata, o lona uiga, e fa'atamala fo'i ia i lona fa'aolataga ma e leai se avanoa mo ia i le malō o le Atua.

O le fa'amaoni sili ia fa'aalia ma fa'atinoina i mea itiiti ma lē amana'ia o le olaga. O le fa'ata'ita'iga aogā ma le agava'a silisili, o le usita'i i fetalaiaga a le Ali'i.

E manatu nisi ona o le lē feso'ota'i o a latou galuega i se talitonuga, ua 'avea ai i latou ma tagata lē aogā; ma ua latou lē mafai ona galulue mo le fa'alauteleina o le malō o le Atua. Peita'i e lē moni lea manatu. O so'o se tiute e ui i le fa'atauva'a, e faia ma le fa'amaoni, o se fa'amanuiāga lea; ma o se tapenaga lelei mo galuega sili e ono fa'amoemoeina ai i le lumana'i.

O so'o se galuega e ui i le fa'atauva'a, e faia mo le Atua ma le loto atoa, e talia tutusa lava ma le galuega telē. E leai se taulaga e itiiti i Lana silafaga pe a faia ma le fiafia ma le loto fuaiaifo e mamā.

I so'o se mea tatou te i ai, e finagalo Keriso ia tatou faia le tiute ua 'auina mai. Afai o lou aiga, ia faia i le mafai ina ia 'avea lou aiga o se nofoāga fiafia. Afai o 'oe o se tinā, a'oa'o lau fanau ia fiafia ma iloa Keriso. E tutusa lava lou tiute ma le galuega a le faife'au o lo'o lauga i le pulela'a. Afai o lou tiute o le gaosia o mea'ai, ia 'avea 'oe o se kuka e sili ona lelei. Ia e kukaina ni mea'ai manogi ma aogā mo le soifua malolōina. Afai o lau galuega o le fa'ato'aina o le lau'ele'ele po'o nisi galuega fa'atino, ia

mautinoa e fa'amanuiaina. Ia tu'u uma lou mafaufau i ai. Fa'atino e fa'aali atu ai Keriso fa'apei ona Ia faia.

Po o le ā lava le la'ititi o lau meaalofa, e tāua ia i le Atua. O lau taleni lenā e tasi pe afai e fa'aaogāina tataui, e mafai ona 'ausia lona taunu'uga lelei. I le fa'amaoni i mea itiiti, o lo tatou galulue, e fa'aopoopoina ai, a'o le Atua na te fa'atupu ma fa'ateleina. O mea itiiti nei, o le a 'avea ma mea aogā tele i le fa'alauiloaina o Lana galuega.

Ia fai le fa'atuatua ola fa'apei o aloi auro i fa'atinoga uma e o'o lava i mea itiiti. Ona fa'aalia lea o le Kerisiano moni i galuega i aso uma. Ia taula'i ma fa'alagolago e lē aunoa iā Iesu, auā na o le pau lea o le malosi'aga sili e mafaia ai mea uma. O le fa'aaogāina tataui o taleni, o le a mafai ona tatou feso'ota'i atu ai i se auala fa'apitoa i le lalolagi e sili atu. O le fa'apa'iaina moni lea; auā o le fa'apa'iaina, e aofia ai le fa'atinoina ma le loto fiefia o tiute i aso uma ma ususita'i ato'atoa i le Atua ma Lona finagalo.

Peita'i o le to'atele o Kerisiano o lo'o fa'atalitali mo ni galuega tetele e aumai iā i latou. Auā ua lē fa'amalieina lo latou fa'anaunauga i avanoa itiiti, ma ua lē mafai ona fa'atino ma le fa'amaoni tiute masani o le olaga, ua manatu i latou e leai se tāua. O aso uma e lē fa'amaoni ai, ua misia ai fo'i ma le avanoa mo fa'amanuiāga. A o fa'atalitali mo ni galuega tetele, o le a tele aso ma'umau o le olaga, ua lē fa'ataunu'uina fo'i ana fuafuāga ma lē mafai ai ona 'ausia se taunu'uga manuia.

O Taleni ua Toe Fa'afo'i

“Ua mavae aso e tele, ona sau ai lea o le ali'i o ia 'au'auna, ma fa'amasino i ana mea ua iā i latou” Pe afai e vala'au e le Ali'i ana 'au'auna, e su'esu'eina e ia taleni ma o latou tau. E iloa le itū'aiga tagata faigaluega i lana galuega na fai.

Pe afai e vala'au e le Ali'i ana 'au'auna, e su'esu'eina e ia taleni ma o latou tau. E iloa le itū'aiga tagata faigaluega i lana galuega na fai. O lē na tu'uina i ai taleni e lima atoa ai ma lē na i ai taleni e lua, sa o la fa'afo'i atu i le Ali'i meaalofa ma o latou tau. Sa le'i manatu i la'ua o so la lelei tele na mafai ai ona 'ausia nei tau. A e ua fa'apea ane, ana leai le meaalofa na tu'uina atu i a i la'ua, e lē mafai ona maua se tau. Ua iloa e i la'ua sa fa'amaoni i lo la tiute, a o le Ali'i sa ia fa'aleleiina. Ana leai le alofa tunoa o le Fa'aola na fa'ae'eina atu iā i la'ua, semanū e leai so la'ua tau.

A e ina ua taulimaina e le Matai taleni, sa ia talia ma tau atu i 'au'auna fa'apei o se galuega na la'ua faia i lo la malosi. O lona fa'amalieina ma lona 'oli'oli na te fa'amanuia ai i le tagata fa'amaoni. Auā o galuega lelei uma, na te tauia e lē ona o se aitalafu, a e ona o ia e tumu i le loto alofa ma le agalelei.

“Ua lelei, le 'au'auna lelei e ma le fa'amaoni,” ua fetalai mai o Ia “Ua e fa'amaoni i nai mea itiiti, 'Ou te tofia 'oe e pule i mea e tele; inā ulufale maia i le fiefia o lou Ali'i” (Mataio 25:21).

O le fa'amaoni ma le tumau i le Atua, atoa ma le 'au'auna alofa, o uiga ia e finagalo ma taliaina e le Ali'i. O lagona uma e fa'aosofia e le Agaga Pa'ia e ta'ita'i ai le tagata i le Atua ma fai le amiotonu, o lo'o fa'amauiina i tusi o le lagi, ma i le aso o le Ali'i, na te tauia ai Āna 'au'auna sa galulue mo Ia.

Latou te ulufale atu i le fiefia o le Ali'i i Lona malō, ma iloa atu ai i latou sa fa'asaoina ona o a latou galuega lelei. Latou te 'oli'oli i le manuia i le lagi, auā sa latou 'au'auna fa'amaoni a o i ai i le lalolagi. O le manuia i le lagi, o le ata manino lea o le ola 'au'auna fa'apei o Keriso i le olaga nei. Pei ona Ia fetalai, “E pei o Le Atali'i o le tagata, e le'i sau Ia ina ia 'au'auna atu tagata iā te Ia, a ia 'au'auna atu Ia” (Mataio 20:28). O Lana galuega i lalo nei, o Lana galuega fo'i lea i le lagi. Ma o lo tatou tau mo le 'au'auna ma Keriso i le lalolagi nei, o le malosi ma le avanoa sili atu tatou te galulue ai ma Ia i le lalolagi a sau.

“Ua sau fo'i lē ua i ai le taleni e tasi, ua fa'apea mai, Le Ali'i e, na 'ou iloa o 'oe o le tagata faigatā, ua e selesese i le mea e te le'i lūlūina ai saito, ua e fa'apotopoto i le mea e te le'i fa'atā'ape'apeina ai mea; ona 'ou fefe ai lea, ua 'ou alu ma nātia lau taleni i le 'ele'ele; fa'auta o lau mea lea” (Mataio 25:24-25).

E fa'apea ona faia e le tagata e fai ma 'alofaga o lona fa'atamala i meaalofa a le Atua. Latou te fai mai o le Atua e sauā, ma va'ava'ai masei ina ia fa'asalaina ai le tagata. Ua latou tu'ua'ia le Atua e Na te lē foa'i, e selesese i mea Na te le'i lūlūina, ma ua Ia fiapule i a latou galuega ma meatotino. A e peita'i, e lē mafai ona tatou avatu i le Atua se mea e lē o Sana mea. "Auā e mai iā te 'Oe mea uma lava" (I Nofoā'iga

Tupu 29:14). O mea uma e ā le Atua ia, e lē gata ona o Āna foafoāga, a e maise ai ua ala mai i Lana fa'aolataga. O fa'amanuiāga uma o lenei olaga, atoa ai ma le olaga a sau, ua foa'iina mai e le Atua mo i tatou ma fa'amaui fa'ailogaina i le satauro o Kalevario. O le fa'amaoniga lenā o Lona alofa mutimutivale; ma o tu'ua'iga fa'apea mai o Ia o se Atua sauā, ma selesele i mea Na te le'i lulūina, e matuā leai, leai lava sona fa'amaoniga.

E lē fa'afitia e le Matai le fa'asalaga o le 'au'auna lē fa'amaoni, e tusa o lana amiolētonu; a e na te a'oa'i ma fa'aioa iā te ia le leaga o lana amio. Ua saunia e lē ona taleni auala e mafai ona fa'aleleia ai. Ua ia fai mai, "O lea e tatau ai pe ana e tu'uina atu la'u ario i ē fa'atau tupe, po ua 'ou sau, ona 'ou maua ai lea o la'u mea ma lona tau" (Mataio 25:27).

E finagalo lo tatou Tamā i le lagi ina ia tatou galulue e tusa o le mafai na Ia tu'uina mai; ia lē itiiti pe sili atu fo'i. Na te lē fa'atigāina e fai ai ma 'avega latou te lē gafatia ona fa'atino. "Auā ua silafia lava e Ia le mea na fai a'i i tatou; ua manatu Ia o le efuefu lava i tatou" (Salamō 103:14). O mea uma lava e finagalo ai o Ia tatou te faia, ia faia ona o le mana o Lona alofa tunoa.

"O lē ua foa'iina atu i ai o mea e tele, e su'eina atu fo'i iā te ia o mea e tele" (Luka 12:48). O le amiolētonu i se galuega tatou te fa'atino a e lē 'ausia le ato'atoa e tusa o le mafai na tu'uina mai e le Atua. E fuaina e le Ali'i 'au'aunaga uma e fa'ataua i le avanoa ma le mafai. O meaalofo ma avanoa lē fa'aaogāina, e su'esu'eina uma fa'atasi ma meaalofo na fa'aaogā ma fa'aleleia pe a afio mai le Matai. E fa'amasinoina i tatou e tusa o a tatou galuega na tatau ona fai, a e ua fa'atamala ma lē ato'atoa ai le vi'iga o le Atua. E ui lava e lē ma'umau ai o tatou agaga, a e ao ona tatou iloa, o taleni lē fa'aaogāina, e i ai ona a'afiāga i le ola e fa'avavau. O tomai ma agava'a na tatau ona tatou maua, ua lē mafai ona 'ausia ona ua lēiloa ia e fa'avavau.

A e afai tatou te ofoina atu ato'atoa i tatou i le Atua ma mulimuli i Ōna ala, e tali mai o Ia e ala i le fa'ataunu'uina o a tatou taumafaiga i le manuia. Na te lē finagalo tatou te faia se mea e taumatemate lona taunu'uga. Ia 'aia ne'i o tatou mafaufau i le to'ilalo, auā o le Atua o lo'o 'au ma i tatou, o le Atua o le manumalo Ia.

'Aia lava ne'i tatou talanoa i o tatou vaivaiga ma le lē agava'a. Auā o le fa'aioa lea o le lē talitonu ma le fa'afitia o le Atua ma Āna folafolaga. O le muimui ona o a tatou 'avega, ma le musuā e faia le galuega ua vala'auina ai i tatou e Ia, o lenā lava ua tatou fai atu i le Atua, "o 'Oe o se Atua sauā, ma mana'omia mea e te lē o aumaia le malosi e fa'atino ai."

E fa'asesēina i tatou i le tele o taimi i uiga vaivai o le 'au'auna paiē, ma tatou fai mai o le lotomaulalo. A e peita'i, e telē le ese'esega o lea manatu ma le lotomaulalo moni. O le fa'a'ofuina i le lotomaulalo, e lē ona o le lē agava'a, po o le lē lava o le u'una'iga e taumafai malosi ai, atoa ai ma le lagona fefe e faia se mea ne'i te'i ua lē o'o i se taunu'uga lelei. O le lotomaulalo moni e fa'ataunu'uina ai fuafuāga a le Atua e ala i le fa'atuatua ma fa'alagolago i Lona malosi.

E galue le Atua i lē ua Ia finagalo i ai. I nisi o taimi, e filifili e Ia mea faigaluega fa'atauva'a e fa'atinoina galuega tetele, auā e fa'aalia ai Lona silisili 'ese. E i ai o tatou tapula'a, o mea ia e fua i ai lo tatou mafai fa'aletagata; pe telē pe itiiti fo'i; a e peita'i o le Atua na te lē fa'atatauina Āna fuafuāga i manatu o le tagata. E lē iā i tatou le fa'amasinoga e faia ai le fa'ai'uga o a tatou meaalofo po o a tatou 'au'aunaga. Pe fa'apea mai o le mea e sili iā te a'u e sili fo'i i le Atua, pe itiiti fo'i iā te a'u e itiiti lea i le Atua. O i tatou e usita'i i le mea ua tofia ai e le Atua, onosa'i i puapuagā ma tumau ia te Ia e maua ai le malolōga. O ā lava tatou galuega, ia faia ma le fiafia ina ia vi'ia ai le Atua ma le loto atoa. E fa'afiafiaina o Ia pe a tatou faia tiute uma i le loto fa'afetai, ma le fiafia e lē aunoa auā o lo'o tatou galulue fa'atasi ma Ia.

Ua Tō'esea Taleni

Ua fa'apea atu i le 'au'auna leaga ma le paiē: "Ia outou fao le taleni na iā te ia, ma avatu i lē ua i ai taleni e sefulu." Fa'apei o le tau i le tagata galue fa'amaoni i le fa'amasinoga mulimuli, o lo'o fa'amanino mai fo'i i lenei fa'ata'oto le a'afiāga o le lē fa'amaoni i le olaga nei. O malosi'aga uma e lē fa'aaogāina fa'alelalolagi pe fa'aleagaga fo'i, o le a fa'avaivaiina ma pala. O le galue o le ola lea, a'o le paiē o le oti lava ia. "Ua foa'iina ta'itasi i tagata le fa'aaliga o le Agaga e aogā ai" (I Korinito 12:7). E

fa'ateleina meaalofa i le tagata galue mo le manuia o isi a e lē mo ia lava. O lē ua tāofiofimaui ma lē fa'asoa atu le meaalofa ua foa'iina atu iā te ia, o le a fa'amativaina e lē gata i le olaga fa'aletino a e o le a fa'apea fo'i i lona olaga fa'aleagaga.

E lē mafai e tagata ola manatu fa'apito mo i latou lava, ona ulu atu i le 'oli'oli o le Ali'i; auā sa le'i iloa e i latou le fiafia e fa'asoa atu ai a latou meaalofa i isi. O le lagi e lē o se nofoāga talafeagai lea mo i latou, auā e matuā leai so latou fa'amalieina e maua ai; latou te lē talisapaia fo'i le si'osi'omaga alofa o lo'o fa'atumulia ai le malō o le Atua.

I le aso tele o le fa'amasinoga, o latou uma na te'ena le vala'au e 'au'auna ai mo Keriso, a ua latou galulue mo le manuia o i latou lava, o le a tu'ufa'atasia ma fa'asalaina fa'atasi ma i latou na faia amioleaga.

O le to'atele ua ta'utino o i latou o Kerisiano a e lē o mulimuli i poloa'iga a le Atua, ua manatu i latou e lē o se mea leaga lea mea. Ua manatu na o le fasioti tagata, o le upu leaga ma le mulilua e tataui ona fa'asalaina; a e leai se afāina o i latou i le 'au'aunaga fa'alelotu. Ua lava le fa'alogo i le laugaina o le 'Upu e agava'a ai e 'avea ma Kerisiano. Fa'apei o le fa'ate'ia o le 'au'auna lē fa'amaoni i le fa'ata'oto ina ua fa'apea mai lona Matai: "Fao 'ese le taleni mai iā te ia," o le a fa'apea fo'i i latou fa'apei ona faia e le 'au lutaia, auā sa latou lē fa'aaogāina a latou meaalofa e fesoasoani atu ai i isi a e ua na o lo latou lava manuia.

O le to'atele fo'i ua 'alo 'ese mai galuega fa'a-Kerisiano ona o le manatu e lē agava'a. A e peita'i na faia e le Atua se tagata lē agava'a? O le tali e LEAI. O le tagata lava ma lana filifiliga e paie ma lē fia 'au'auna ua mafua ai ona manatu e lē agava'a o ia. O uiga fo'i ia e atagia mai ai ua latou mautinoa le i'uga o le fa'atonuga, "Fao 'ese le taleni mai iā te ia." O le fa'aauauina o le lē fa'aaogāina tataui o taleni, o le a oge ai i latou i le ta'ita'iga a le Agaga Pa'ia, o le malamalama moni lea. "Ia outou tulia fo'i le 'au'auna lē aogā i le pouliuli i fafo" (Mataio 25:30), o le i'uga lea e fa'avavau mo le tagata fa'atamala ona o lana filifiliga.

Fai Uō e Ala i 'Oa a lē Amiolētonu

Matā'upu 26

O lenei matā'upu e fa'avae i luga o le Luka 16:1-9.

Na afio mai Keriso i se taimi o le mata'utia o le tu'inanau i mea fa'alelalolagi. Ua fa'amaulaloina le tāua o mea fa'aleagaga i lo mea e mavae o le lalolagi, o mea e fa'ata'au i le lumana'i e sili i lo matā'upu o le taimi nei lava. Ua suia mea moni i mea e fa'afoliga, a e o mea fa'afoliga ua fai ma mea moni. Ua latou lē va'aia ma le fa'atuatua mea e lē o va'aia, ona ua tu'u atu e Satani i o latou luma mea o lenei lalolagi ua sili atu le matagofie ma ua fa'atosina atu ai i āna fa'aosoosoga.

Na afio mai Keriso e suia lenei fa'asologa o mea uma, ma na Ia sa'ili e fa'aumatia le malosi o le mailei o lo'o tosina ai tagata i tu'inanau. I Āna a'oa'oga, na Ia sa'ili ia suia mafauauga e fa'ata'au i le lagi ma le lalolagi, ina ia suia loto o tagata mai le asō ma le lumana'i; mai le sa'iliga o mea o le taimi nei, na Ia fetalai atu ai ina ia latou sauni mo le gata'aga

Ua fetalai atu o Ia, "O le tasi tagata mau'oa sa i ai le 'au'auna e pule; na molia o ia iā te ia, ua ia fa'amāumau ana mea." Sa tu'u e le tagata mau'oa āna mea totino uma i le tausiga a lana 'au'auna pule; peita'i e lē fa'amaoni lenei 'au'auna ma ua iloa e le matai o lo'o gaoia e lenei tagata āna mea. Na ia filifili e fa'ate'a le 'au'auna lē fa'amaoni mai lana galuega, ma ua faia loa se su'esu'ega o āna 'oa totino sa fa'aputuina. Sa ia fa'apea atu, "O le ā lenei mea ua 'ou fa'alogo ai iā te 'oe? Tala mai ia le tala i mea na e pule i ai; auā 'ou te lē mafai ona e toe fai ma 'au'auna e pule" (Luka 16:1, 2).

Ua iloa e ia o le a fa'ate'a mai lana galuega, ua alu loa le 'au'auna pule ma filifili e fa'aaogā se tasi o ala e tolu na tu'u mai i ōna luma: e tata'au ona galue fa'amaoni, aisi solo ia ola ai, po o le matelāina. Ona fa'apea ifo lea i a te ia lava, "Se a se mea 'ou te faia? auā o le a fa'ate'aina a'u e lo'u ali'i i le faiva o 'au'auna e pule; 'ou te lē mafai ona eli; 'ou te mā i fa'atoga. Ua 'ou iloa le mea 'ou te faia, ina ia talia a'u i o latou aiga, pe a tu'u'eseina a'u i le faiva o 'au'auna e pule. Ona 'ami'ami lea e ia o tagata ta'itasi uma ē na i ai mea a lona ali'i, ua fai atu ia i le tasi, Pe fia mea a lo'u ali'i ua iā te oe? Ona fai mai ai lea o ia, O pa'ita o suāu'u e selau. Ua fai atu ia iā te ia, Inā tago ia i lau tusi, ia vave nofo i lalo, ma tusi e lima sefulu. Ona fai atu lea o ia i le tasi, Pe fia mea ua iā te oe? Ua fai mai o ia. O kori o saito e selau. Ona fai atu lea o ia iā te ia, Inā tago ia i lau tusi, ma tusi e valu sefulu" (Luka 16:3-7).

Ua faia e lenei 'au'auna lē fa'amaoni se mea ia tofusua ai ia ma isi i lona lē fa'amaoni. Sa ia fa'asesē lona matai ia manuia ai lava latou; ma ina ua latou talia nei manuia e maua mai i le lē fa'amaoni, na latou tu'u fa'atasi ai lava i lalo o lona malosi taufa'asesē ma latou talia ia i totonu o a latou aiga.

"Ua vivi'i atu le ali'i i le 'au'auna amiolētonu, auā ua na togafiti poto." E vivi'i e le tagata fa'alelalolagi le poto o le tagata na fa'asesē iā te ia. Peita'i o le vi'iga mai le tagata mau'oa e lē o se 'upu ta'uileleia mai le Atua.

E le'i ta'uileleia e Keriso le 'au'auna lē amiotonu, a e sa Ia fa'aaogā se faiga lauiloa e fa'amalamalamaina ai le lesona na Ia naunau e a'oa'o atu. Ona Ia fetalai atu lea, "O le mamone o le amiolētonu ia outou fai ai uō mā outou, ina ia latou talia mai outou i fale e fa'avavau, pe a tu'u'eseina outou" (F. 9).

Sa faitioina le Fa'aola e le 'au Faresaio i le ō fa'atasi ma telona ma tagata agasala; a e peita'i e le'i fa'aitiitia ai Lona fiafia e fa'atasi ma i latou, ma e le'i uma ai Lona fia fesoasoani iā te i latou. Na Ia silafia o tulaga i a latou galuega e aumaia ai i totonu o fa'aosoosoga, ma e si'omia i latou e tu'inanau leaga. E faigofie le ulua'i la'asaga sesē, ma e vave le aga'i i lalo e matuā fai le lē fa'amaoni ma fa'ateleina ai le amioleaga. A e o lo'o sa'ili pea Keriso i ni ala e tosina mai ai i latou ia ausia ni sini e maoā'e ma fa'avae e sili ona lelei. O lenei le fuafuāga sa i Lona finagalo i le faia o le tala i le 'au'auna lē fa'amaoni. Sa i ai telona na fa'asino i ai le fa'ata'oto, ma na latou iloa o latou uiga e pei ona fa'amatalaina e Keriso. Mai le ata na fa'ailoa ai a latou faiga lē fa'amaoni, e to'atele sa maua ai se a'oa'oga e fa'ata'au i le 'upu moni fa'aleagaga.

Sa fetalai tonu lenei fa'ata'oto i le 'au so'o, auā sa muā'i tu'u atu le 'upu moni iā te i latou, ma e ala iā i latou, o le a o'o atu ai loa i isi. O le tele o a'oa'oga a Keriso e le'i malamalama i ai le 'au so'o i lea taimi, ma o le tele o taimi e foliga mai ua tai galo iā i latou Āna fetalai. A e peita'i, ona o le ta'ita'iga a le Agaga Pa'ia, sa toe fa'a ea a'e ma le manino nei 'upu moni, ma sa aumaia, e ala i le 'au so'o, i luma o uso fou na fa'aopoopoina i le ekalesia.

Na fetalai fo'i le Fa'aola i le 'au Faresaio, ma na i ai pea i te Ia le fa'amoemoe e latou te malamalama i le malosi o Āna afioga. E to'atele na talitonu i o latou loto, ma a o latou fa'alogo pea i le 'upu moni e pei ona fa'aalia e le Agaga Pa'ia, e to'atele fo'i na liua ai ma ua mulimuli iā Keriso.

Sa taumafai le 'au Faresaio e ta'uleagaina Keriso ma tu'ua'ia ai o Ia i le feoa'i fa'atasi ma telona ma tagata agasala. O le taimi nei ua Ia a'oa'i atu iā i latou na faitio mai. O le va'aiga sa 'a'afia ai le 'au telona na Ia tu'u atu i luma o Faresaio e fa'ailoa ai a latou faiga, ma e fa'aali atu ai le ala e tasi e mafai ai ona latou fa'asa'o a latou sesē.

I le 'au'auna lē fa'amaoni, o 'oloa a lona ali'i sa tu'u atu i lana tausiga na fuafua mo galuega fesoasoani; a e peita'i na ia fa'aaogā mo ia lava nei mea uma. Sa fa'apea fo'i Isara'elu. Na filifilia e le Atua ē sa tupuga mai iā Aperamo. Ma se 'a'ao malosi, na Ia fa'asao i latou mai le nofo pologa i Aikupito. Sa Ia faia i latou ma faleteumea o 'upu moni pa'ia mo le manuia o le lalolagi. Na Ia tu'u iā i latou afioga ola ina ia latou fa'ailoa atu le malamalama i isi; peita'i ua fa'aaogā e Āna 'au'auna teumea nei meaalofo e fa'amau'oa ma si'itia a'e ai lava i latou ia.

Ona o Faresaio ua fa'atumulia i le fia tāua ma le fa'afiaamitonu, ua fa'aaogāsesē 'oloa sa tu'u tu'u atu fa'aaitalafu e le Atua iā te i latou ina ia fa'aaogā mo Lona mamalu.

E le'i faia e le 'au'auna i le fa'ata'oto se fa'atatau mo le lumana'i. O 'oloa sa tu'u iā te ia mo le lelei o isi na ia fa'aaogā mo ia lava; a e sa ia manatu e tāua na o le asō lava. A 'ave'esea le tulaga o le 'au'auna pule mai iā te ia, o le a leai se mea totino e ta'u ai ia. A e peita'i o lo'o i ai pea i le taimi nei i ōna lima 'oloa a lona ali'i, ma o le a taumafai e fa'aaogā ia mea ina ia maua ai sona manuia pe a mana'omia i se taimi o i lumana'i. Ina ia fa'ataunu'u lenei mea, o le a tataua ona fai se fuafuāga fou. O le a lē fa'aputuina mai se mea mo ia lava, a e o le a fa'asoa atu i isi; Atonu o le a maua ni uō mo le taimi e tuli'ese ai ia mai le galuega, a e o le a talia ia e i latou. Sa fa'apea fo'i ma le 'au Faresaio. Ua lata i le taimi e 'ave'esea ai le tulaga o le teumea mai iā i latou, ma o le a vala'auina e tō atu mea e mana'omia mo le lumana'i. Sa pau le ala o le a mafai ona latou maua ai se manuia pe a latou sa'ili mo le lelei o isi. E pau le ala o le a mafai ai ona maua e latou le ola e fa'avavau pe a latou fa'asoa atu meaalofo a le Atua i le taimi nei.

Ina ua uma ona tu'u atu o le fa'ata'oto, na fetalai atu lea o Keriso, "E sili le poto o tagata o le olaga nei, i lo latou tupulaga, i lo tagata o le malamalama." O lona uiga, ua fa'aalia mai le sili atu o le poto ma le fa'amaoni e tautua ai le tagata fa'alelalolagi mo ia lava i lo le 'au'aunaga i le Atua a ē ta'u mai o i latou o Lana fanau. Sa fa'apea i ōna pō o Keriso, e fa'apea fo'i i ōna pō nei. Se'i taga'i i olaga o le to'atele o lo'o ta'u mai o Kerisiano. Ua tu'u iā i latou o taleni, o le pule, ma le tomai; ua tu'u iā i latou o tupe, ia 'au'aumea fa'atasi ai ma Ia i le galuega tele o le fa'aolataga. O Āna meaalofo uma e tataua ona fa'aaogāina mo le manuia o le aigā tagata, e fesoasoani ai i ē o mafatia ma puapuagātia ona o le mana'omia. E tataua ona tatou fafaga i ē o fia 'a'ai, fa'aofu i ē lē lavalavā, tautua se fafine ua oti lana tane ma ē ua mātua oti, ia fesoasoani i ē pagātia ma sauāina. E le'i fuafua le Atua e i ai ma fa'ateleina puapuagā i le lalolagi. Na te le'i fuafua ia maua e se tagata to'atasi manuia uma o le olaga, a o lo'o tagi mai fanau a isi mo sina fasi mea e 'ai. O mea e sili ma tele atu i lo o mea e mana'omia o le olaga ua tu'u mai i le tagata ia fa'aaogā mo se lelei, ia fa'amanuia ai le fanau a tagata. Ua fetalai mai le Ali'i, "Ia outou fa'atau atu i a outou mea, tou te avatu ai e fai ma mea alofa" (Luka 12:33). Ma "ia mataalofo, ia latou avatu fua a latou mea" (I Timoteo 6:18). "Pe a e sauni le faiga'ai, inā tala'i ia i ē matitiva, i ē mumutu, i ē pipili, ma ē tauaso" (Luka 14:13). "Ia tatalaina fusi na faia i le amio leaga, e tatala fusi o le amo, e tu'uina atu ia sa'oloto ē ua fa'asauāina, ma ia outou gausia amo uma lava." "Ia tofitofi au mea e 'ai i lē ua fia 'ai, ia 'au mai i lou fale ē ua matitiva ma fa'asauāina;... fafaga ia ma'ona o lē ua tigā" (Isaia 58:6, 7, 10). Ma ia "Ō atu ia outou i le lalolagi uma, inā tala'i atu ai le tala lelei i tagata uma lava" (Mareko 16:15). O fa'atonuga uma lava nei a le Ali'i. O faia ea lenei galuega e fa'apopotoga tetele o tagata o lo'o ta'u mai o Kerisiano?

Pagā, e to'afia o lo'o faia mo latou lava ia meaalofo a le Atua? E to'afia o lo'o fa'aputu atu fale i isi fale ma fanua i isi fanua. E to'afia o lo'o fa'aalu a latou tupe mo fa'afiafiāga, mo le fa'amalieina o tu'inanau

'ese'ese o le tino, o fale tetele mo le fa'alialia, o meāfale ma lavalava taugatā. O a latou uso ā tagata o lo'o tu'u ia mafatia ma o'o ai i olaga so'onafai ma le lē fa'autauta, ma i'u ai i le fa'ama'i ma le oti; e to'atele o lo'o uma atu a e leai se isi e va'ai pe fai atu se 'upu tigālofa, pe fa'aali se agalelei mo i latou.

E sala tagata ona o le gaioi ua fai aga'i i le Atua. O le fai fa'apito mo i latou lava ia, o mea ua gaioia ai le mamalu o le Ali'i lea na tatau ona toe fa'afo'i iā te Ia e fesoasoani ai i ē o lo'o mafatia ma le fa'asaoina o agaga. Ua latou fa'aaogāvale Āna 'oloo sa fa'atuatuaia iā i latou. Ua fetalai le Ali'i e ala i Lana perofeta, "'Ou te fa'alatalata fo'i iā te outou i le fa'amasinoga; e vave fo'i ona fai o A'u ma molimau i ē... fa'asauā i le tau i o le 'au'auna tauia, o le fafine ua oti lana tane, ma lē ua mātuaoti, atoa ma ē fa'api'oina le fa'amasinoga o le tagata 'ese.... Pe faoa e le tagata mea a le Atua? a o outou, ua outou faoa A'u mea. A ua outou fai mai, Ni ā ea Āu mea ua matou faoa? Ua outou faoa mea e sefulu a'i a outou mea, atoa ma taulaga. Ua matuā fa'afanoia outou, o le nu'u uma lava, auā ua outou faoa A'u mea" (Malaki 3:5, 8, 9). Ma ua fa'aapea mai le aposetolo o Iakopo, "Fa'auta mai ia; outou ē tamao'aiga,.. Ua pala la outou 'oloo, ua 'ati'atia o outou ofu i mogamoga; ua 'elea o outou auro ma ario; e fai fo'i ma molimau iā te outou o latou 'ele,.. ua outou fa'aputu mea i ona aso e gata ai.... Ua outou nonofo i le nu'u ma le sololelei, ma le fiafia i la le tino.... Fa'auta, o le totoi o ē galulue, ē na fa'aputu le fua o outou fanua, ua taofia e outou, ua 'alaga ia; o le 'alaga fo'i o ē na selesele saito ua fa'afogaina lava e le Ali'i o Sapaota" (Iakopo 5:1-3, 5, 4).

O le a fa'aapea ona mana'omia e aumaia e tagata ta'ito'atasi uma se fa'amatalaga e fa'atatau i meaalofo na tu'u atu iā te ia. O le a lē toe i ai se aogā o 'oa sa fa'aputuina e tagata i le aso o le fa'amasinoga mulimuli; e leai se mea o le a toe mafai ona ta'ua o a latou lava mea totino.

O i latou sa alu le olaga atoa o su'e ma fa'aputu 'oloo fa'alelalolagi e fa'ailoa mai e itiiti le poto, e le'i manatu pe i ai se fa'anaunau mo le ola lelei e fa'avavau, a e tusa lava lea ma teumea lē fa'amaoni i lona tu'inaanu i mea fa'alelalolagi. E itiiti atu fo'i i lo o le poto o le fanau a lenei lalolagi i la latou tupulaga, le tulaga o i latou ua ta'u o le fanau o le malamalama. O i latou nei ua tautala mai ai le perofeta, i lana fa'aaliga o le aso o le fa'amasinoga tele, " O lea aso e lafoa'i atu ai e tagata a latou tupua ario ma a latou tupua auro, na latou faia mo i latou e ifo i ai, e lafoa'iina lava i afora ma pe'a; ina ia latou ō atu i mavaevae o papa, atoa ma vā i papa, ona o le mata'utia o leova ma Lona mamalu silisili, pe a tula'i o Ia e lūlūina le lau'ele'ele" (Isaia 2:20, 21).

Ua fetalai Keriso, "'Ou te fai atu fo'i iā te outou, O le mamone o le amiolētonu ia outou fai ai uō mā outou, ina ia latou talia mai outou i fale e fa'avavau, pe a tu'u'eseina outou" (Luka 16:9). O lo'o galulue fa'atasi uma lava le Atua ma Keriso ma agelu mo ē puapuagātia, mafatia, ma ē agasala. Ia e tu'u atu 'oe lava ia i le Atua mo lenei galuega, fa'aaogā Āna meaalofo mo lenei fuafuāga, ona fai lea o 'oe ma soa e galulue fa'atasi ma 'au o le lagi. O le a e loto fa'atasi ma i latou, ma o le a 'avea o latou uiga ma ōu uiga. O ē o lo'o mau i maota o le lagi o le a lē 'avea o tagata iā te 'oe, a e pe a mavae'ese atu mea fa'alelalolagi, o le a fa'afeiloā'ia 'oe e 'au o lo'o tutūla'i mai i faitoto'a o le lagi.

O mea sa fa'aaogā e fa'amanuia ai isi o le a toe tauia mai, auā o 'oe e fa'aaogā tatau o le a maua ai i'uga lelei. O le a maua mai ai agaga mo Keriso. O lē mulimuli i fuafuāga a Keriso mo le olaga, o le a ia va'aia i lotoā a le Atua ē sa ia galue ai i le lalolagi ia fa'asaoina. Ma le loto fa'afetai, o le a manatua e le 'au fa'aolaina ē sa fa'aaogā e le Atua i lo latou fa'aolataga. E pele le lagi iā i latou o ē sa galulue fa'amaoni i le lavea'iga o agaga.

O le a'oa'oga a lenei fa'ata'oto e mo tagata uma lava. O le tiute tau'ave a tagata uma ta'ito'atasi le alofa tunoa o Keriso sa tu'u mai i ai. O le ola e matuā tāua lava, ia lē fa'aalu sesē i mea fa'alelalolagi e lē tumau. E naunau le Ali'i ina ia tatou fa'asoa atu i isi mea o lo'o fa'ailoa mai iā i tatou e Lē e fa'avavau ma e lē mava'aia.

I tausaga ta'itasi uma, e miliona ma miliona agaga o lo'o mavae 'ese atu e fa'avavau a e le'i i ai se lapata'iga ma ua lē fa'asaoina i latou. Mai lea itulā i lea itulā e tele avanoa i o tatou olaga 'ese'ese e tatou te 'a'apa atu ai ma fa'asao mai ni agaga. O nei avanoa o lo'o mātala mai pea, ona o le naunauta'iga a le Atua ia tatou fa'aaogā lelei ia manuia. O lo'o mavae atu pea aso, vaiaso, ma masina; ma ua fa'aitiitia fo'i le aso, vaiaso, ma le masina e tatou te faia ai a tatou galuega. E na o ni nai tausaga o le a totoo o lo tatou ola, ma o le a tatou fa'alogoia le leo e lē mafai ona tatou te'ena, o le a fa'aapea mai, "Tala mai ia le tala i mea na e pule i ai."

O lo'o vala'au Keriso i tagata uma ta'ito'atasi ia mafaufau fa'atatau ma le fa'aeteete, ia fa'amaoni i manatunatuga. Ia fuatia Iesu i se fua e tasi, lona uiga o le 'oa e fa'avavau, o le soifua, 'upu moni, o le lagi, ma le 'oli'olisaga o Keriso i agaga ua fa'aolaina; tu'u i le isi itū fa'afiafiāga ma tu'inaanu uma e ofoina e le lalolagi. Tu'u i le tasi fua fa'atautau lou agaga ua lē iloa ma agaga o i latou semanū e fa'asaoina pe ana fa'aaogāina 'oe; i le isi fua, mo 'oe ma i latou ia, se olaga e tatau ma le ola a le Atua. Ia fuatia mo le taimi ma le gata'aga. A o fai lenei galuega, ua fetalai mai Keriso, "Se ā le aogā i le tagata, pe afai na te maua le lalolagi uma, a e māumau lona ola?" (Mareko 8:36).

E naunau le Atua ia tatou filifili le lagi a e lē o le lalolagi. O lo'o Ia fa'aavanoa mo i tatou 'oa e teuina i le lagi; e Na te fautuaina i tatou e uiga i a tatou fuafuāga, ia saogalemū a tatou 'oloa e sili le tāua. Ua fetalai mai Ia, "'Ou te fa'ato'aitiitia tagata e sili i le auro lelei, o tagata lava e sili ona to'aitiiti i le auro o Ofeira" (Isaia 13:12). Pe a te'a 'ese atu 'oloa e 'aina e mogamoga ma fa'apala e mea 'elea, o le a fa'afiafiaina ē mulimuli iā Keriso i a latou 'oloa fa'alelagi, o 'oa ia e lē mafa'aleagaina.

O le mafutaga fa'auō o le 'au fa'aolaina a Keriso e aupito sili atu lea i fa'auōga uma o le lalolagi. E matuā sili atu le i ai o lou igoa i se maota na afio le Ali'i e sauni mo 'oe i lo o se alalafaga e aupito aloā'ia o i le lalolagi. Ma e aupito sili a'e i lo so'o se vi'iga fa'alelalolagi ia fetalai a le Fa'aola i Āna 'au'auna fa'amaoni, "Ō mai ia, o outou ua fa'amanuiaina e Lo'u Tamā, ia fai mo outou tofi le malō ua saunia mo outou a o le'i fa'avaeina le lalolagi" (Mataio 25:34).

Iā i latou o ē ua fa'amaumau Āna 'oloa, o lo'o tu'u pea e Keriso avanoa iā i latou ia maua ai 'oa e tumau. Ua Ia fetalai mai, "Ia outou foa'i atu, e foa'iina mai ai iā te outou..." (Luka 6:38). Ma "Ia outou fa'atau atu i a outou mea, tou te avatu ai e fai ma mea alofa; ia fai outou ni a outou taga e anagata, o le 'oa i le lagi e lē uma lava, e lē tāitāi ane i ai se gaioi, e lē 'atia fo'i e se mogamoga" (Luka 12:33). Sa fa'apea mai fo'i le aposetolo, "Ia e matuā fai atu i ē mau'oa i lenei olaga,... ina ia latou agalelei atu, ia tamao'aiga i galuega lelei, ia mataalofa, ia latou avatu fua a latou mea, ia latou teua 'oloa mo i latou lava, o le fa'avae lelei mo aso atalī, ina ia latou fetāgofi atu i le ola e fa'avavau" (I Timoteo 6:17-19).

Ia fa'amamua ona teuina āu mea totino i le lagi, ia teu i tafatafa o le nofoāl'i o le Atua. Ia mautinoa e i ai lou igoa i 'oa e lē mafa'alauiloaina a Keriso. "O le mamone o le amiolētonu ia outou fai ai uō mā outou, ina ia latou talia mai outou i fale e fa'avavau, pe a tu'u'escina outou."

"O Ai Lo'u Tuā'oi?"

Matā'upu 27

E fa'avae lenei matā'upu i luga o le Luka 10:25-37.

I le 'au Iutaia, o le fesili, "O ai lo'u tuā'oi?" sa 'avea ma pogai o fefinaua'iga e faifaiepa. Sa leai so latou masalosologa i le tulaga o fa'apaupau ma tagata Samaria; o latou ia o tagata 'ese ma o fili fo'i. A o fea e maua ai le 'ese'esega o tagata o lo latou lava malō ma vasega uma o atunu'u 'ese'ese? O ai e fa'atatau o le tuā'oi a le faitaulaga, le a'oa'o, ma le ta'ita'i? O a latou olaga atoa e alu i le faia o sauniga ia fa'amamā ai lava latou ia. E latou te a'oa'o mai ia 'aua le felāta'i ma le motu o tagata e lē fa'a eteete ma e lē a'oa'ia ona o le a 'ele'elea ai ma e faigatā le fa'amamāina. O le a latou fa'atatauina ea la nei tagata "lē mamā" o tuā'oi?

O lenei fesili sa taliina e Keriso i le fa'ata'oto o le Samaria agalelei. Na Ia fa'aali atu o tatou tuā'oi e lē na o se tasi o se ekalesia po o le fa'atuatuāga tatou te fa'atasi atu i ai. E lē fa'atatauina na o se lanu, atunu'u, po o se vasega o tagata, a e o tatou tuā'oi o so'o se tagata e mana'omia la tatou fesoasoani. O le tatou tuā'oi o agaga ta'ito'atasi o lo'o manu'a ma fa'apupuagātia e le fili. O a tatou tuā'oi o mea totino uma latou a le Atua.

Sa tu'u mai le fa'ata'oto i le Samaria agalelei ina ua fesili se a'oa'o o le tulafono iā Keriso. A o a'oa'o atu Keriso, "ua tula'i le tasi a'oa'o tulafono, ma tofotofo iā te Ia, ua fa'apea mai, Le a'oa'o e, se ā se mea 'ou te faia ina ia 'ou maua ai le ola e fa'avavau?" Sa fa'atū atu e Faresaio lenei fesili i le faitulafono atonu o le a fa'amailei ai Keriso i Āna fetalaiga, ma sa latou fa'alologologo atu mo Sana tali. Peita'i e le'i naunau o Ia i se finauga, a e sa Ia mana'omia se tali mai lē na fesili. Sa Ia fetalai atu iā te ia, "O le ā ea ua tusia i le tulafono? O le ā lau faitau?" I lenei lava taimi o lo'o molia pea Iesu e Iutaia fa'apea o lo'o Ia lē fa'atāuaina le tulafono sa tu'u mai i Sinai, a e peita'i na Ia fa'atū atu le fesili fa'atatau i le fa'aolataga i luga o le tausiga o poloa'iga a le Atua.

Fai mai le faitulafono, "E te alofa atu i le Ali'i lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu fo'i i lē lua te tua'oi, ia pei o 'oe lava iā te 'oe." Ona fa'apea atu lea o Keriso, "Ua tonu lau tali; ia e fa'apea ona fai, e te ola ai."

E le'i malie le faitulafono i le tulaga ma galuega a le 'au Faresaio, auā o lo'o ia su'esu'eina afioga pa'ia ma le naunau ia na iloa o latou uiga moni. Sa mana'o o ia e malamalama lelei i lea matā'upu, ma ua fesili atu, "Se ā se mea 'ou te faia?" I lana tali e uiga i tulaga e mana'omia e le tulafono, na ia lē fa'atatauina tulafono o sauniga ma tapua'iga. Sa ia fa'a'iloa mai nei mea uma e leai se tāua, a e tu'u mai fa'avae tetele e lua e lagolagoina tulafono uma ma le 'au perofeta. Ona ua ta'uleleia e le Fa'aola lenei tali ua fa'atulaga fa'atasi ai Ia ma a'oa'o o le malumalu, ma lē mafai ai ona latou ta'usala o Ia i le fa'atagaina o mea ua uma ona tu'u mai e le fa'amatala tulafono.

Na fetalai Keriso, "Ia e fa'apea ona fai, e te ola ai." I Āna a'oa'oga na Ia tu'u atu ai o le tulafono o se atoāga fa'aleagaga, e fa'a'iloa mai e lē mafai ona tausi na o se tasi a e soli le tasi; peita'i o fa'avae e tutusa i ōna vaega uma. O le fa'ai'uga o le tagata o le a filifilia lea e ala i lona usiusita'i e tausi le tulafono atoa.

Sa silafia e Keriso e lē mafai e se tasi ona tausi le tulafono mai lona ia lava malosi. O Lona fa'anaunau ia ta'ita'ina le fautua e su'esu'e manino mea uma ma ia maua ai le 'upu moni, auā e na o le taliaina o le amiotonu ma le alofa tunoa o Keriso e mafai ai ona tatou tausi le tulafono. O le talitonu i le togiola mo agasala e mafai ai e le tagata ua pa'ū ona alofa i le Atua ma lona loto atoa fa'apea ma lona tuā'oi e pei lava o ia iā te ia.

Sa iloa e le fautua na te le'i tausia ulua'i poloa'iga e fā fa'apea fo'i poloa'iga mulimuli e ono. Na ta'usala o ia i fetalaiga a Keriso, peita'i e le'i fa'aalia se salamō ma ta'uta'u lana agasala a e ua taumafai e aumai se faitiōga. Na te le'i fa'a'iloa le mea moni, a e sa taumafai e fa'aali mai e faigatā ona fa'ataunu'u le tulafono. O lea ua ia naunau e fa'ate'a'ese le nofosala a ia ta'umamā o ia i le va'aiga a tagata. Sa fa'aalia i

'upu a le Fa'aola e le'i mana'omia lana fesili, ona sa ia mafai lava ona tu'u mai le tali. E ui i lea, na ia toe aumaia se isi fesili, e fa'apea, "O ai lo'u tuā'oi?"

E le'i finagalo fo'i Keriso i se finauga. Na IA tali le fesili e ala i le fa'amatalaga o se mea na tupu, se mea o lo'o fou i mafaufau o Lana 'au fa'alologologo. Ua fetalai o Ia, "O le tasi tagata na alu ifo mai Ierusalem i Ieriko, ua maua o ia e tagata fao mea; ua latou to'eseina ona ofu, ma fasi iā te ia, ua latou ō, ua tu'ua ia, ua tāli oti" (Luka 10:30).

I le malaga mai Ierusalem i Ieriko, e tataua ona ui atu le tagata alimalaga i le togāvaio o Iutaia. O le alatele e ui i lalo i se vanu loloto e lafulafuā ma ma'ama'ā, e tumu i tagata gaoi, ma o le tele o taimi e tele ai le amio leaga e lē taupulea. O iinei sa osofa'i fa'amalosia ai lenei tagata, ua 'ave uma āna mea tāua, ma ua tu'ulafoa'i lona tino toe a oti i tafatafa o le ala. A o ta'atia o ia, sa ui ane i ai i lea ala se faitaulaga; ua va'ai ia i le tagata manu'a ma le pagātia o lo'o lōpala i lona toto; peita'i na ia ui 'ese a e lē faia i ai se fesoasoani. Sa ia "ui ane lea i le tasi itū ala." Sa ui ane fo'i se Sa Levī. Ua fia iloa pe o le ā le mea ua tupu, sa tū ia ma va'ai atu i le tagata mafatia. Sa iloa e ia le mea e tataua ona fai, a e lē o se tiute lea e tataua mo ia. Na ia manatu e ma'imaui pe ana lē ui mai i lea ala, se manū ua ia lē va'aia ai lea tagata manu'a. O ia fo'i ua "ui ane i le tasi itū ala," ina ua talitonu e lē o se aiā lea a ia.

A e peita'i ua ui ane se tagata Samaria, o lo'o malaga fo'i i lea lava ala, ua va'aia lē o mafatia, ma ua ia faia se galuega alofa sa te'ena e isi. Ma le lotoalofa ma le agamalū, sa ia fa'asaga atu e fai se galuega i le tagata manu'a. "Ua iloa o ia, ona mutimuti vale lea o lona alofa; ua alu atu, ma nonoa i ona manu'a, ua liligi fo'i i ai le suā'u ma le uaina; ua fa'ati'eti'e iā te ia i lana lava manu, ma ta'ita'i iā te ia i le fale e tali ai malō, ma tausi iā te ia. O le ta eao o le a alu ia, ona tō a'e lea o tenari e lua, ma avatu i le matai e ōna le fale, ua fai atu iā te ia. Inā e tausi iā te ia; ai se mea e te toe fa'atau ai, 'ou te tau ai atu iā te 'oe pe a 'ou toe sau" (Luka 10:33-35). O le faitaulaga ma le Sā Levī e ta'uta'u lava amio fa'afiaamiotonu, peita'i ua fa'aalia e le tagata Samaria lona tulaga liua fa'amaoni. E lē fa'apea e sili atu le mafai ona faia e le Samaria lea galuega i lo'o le faitaulaga ma le Sā Levī, a e ua ia fa'amaonia i lana galuega ma le agaga fesoasoani e 'aufa'atasi o ia ma le Atua.

Sa tu'u atu e Keriso i lenei a'oa'oga fa'avae o le tulafono i se ala e sa'otonu ma malosia, ma fa'aali atu ai i Lana 'au fa'alologologo ua latou lē amana'ia nei fa'avae. O Āna fetalaiga sa fa'atūsa'o ma manino lelei, sa leai se avanoa e mafai ai e le 'au fa'alologologo ona faitio. E fa'apea fo'i ona lē maua e le faitulafono i le a'oa'oga se mea e mafai ai ona ia tete'e atu i ai. O āna 'alofaga fa'apito e fa'atatau iā Keriso ua tu'u'esea, peita'i e na te le'i fa'ato'ilaloina lona uiga fa'aleaganu'u ina ia mafai ona fa'atāua le igoa o lenei Samaria na agalelei. Ina ua fesili Keriso, "Pe ni ā fa te oe, o ai so latou nei o le to'atolu ua fai ma tagata la te tua'oi ma lē na maua e tagata fao mea?" sa tali mai ia, "O lē na alofa atu iā te ia."

"Ona fa'apea atu ai lea o Iesu iā te ia. Inā alu ia, ma ia e fa'apea ona fai." Ia fa'aali atu lea lava agalelei iā i latou o lo'o mana'omia se fesoasoani. O le a fa'apea ona tu'u atu ai fa'amaoniga o lo'o e tausia le atoa o le tulafono.

O le 'ese'esega tele i le vā o tagata Iutaia ma Samaria o se 'ese'esega lea i le talitonuga fa'aleagaga, o le fesili pe o le ā le tapua'iga moni. E leai ni 'upu lelei e faia e Faresaio e fa'atatau i tagata Samaria, a e na o le fetu'u e avatu iā te i latou. O le faitaga'i i le vā o tagata Iutaia ma Samaria e matuā malosia lea, ma ua manatu ai le fafine Samaria o se mea 'ese ua faia e Keriso ina ua talosaga atu ia mo se vai. Ona ia fa'apea atu lea, "Pe fa'apefea ona e fai mai i se mea e inu iā te a'u, o le fafine o Samaria, a o 'Oe o le Iutaia?" O le fa'aopoopo a le evagalia, "auā e leai ni mea e fe'avea'i a Iutaia ma Samaria" (Ioane 4:9).

Sa fa'ataunu'u e le tagata Samaria le poloa'iga, "Ia e alofa atu i lē lua te tua'oi ia pei o 'oe lava iā te 'oe," ma na fa'aalia ai e sili atu lona amiotonu i lo'o latou o lo'o ta'uileaga iā te ia. E le'i fa'atāuaina e ia lona lava ola, a e na ia tausi le tagata manu'a e pei o sona uso. O lenei Samaria e fa'asino lea iā Keriso. Ua fa'aalitinoina e lo tatou Fa'aola se alofa mo i tatou e lē mafai ona fa'atusaina i se alofa fa'aletagata. A o manu'a ma toe a oti i tatou, ua silasila ifo ma le tigāalofa o Ia; Na te le'i ui ane i le tasi itūala, ma tu'ulafoa'i i tatou ia fano, e leai se fesoasoani ma se fa'amoemoe. E le'i nofomau o Ia i lona aiga pa'ia ma le fiafia, e fa'amamaluina ma alofagia e 'au uma o le lagi. Ua Ia silafia o tatou mana'oga, tau'ave o tatou tigā, ma tu'u Ia i le tulaga e fa'atasi ai ma i latou o le aigātagata. Na maliu o Ia e fa'asaina ai Ōna fili; ma tatalo mo ē sa fasiotia o Ia. A o fa'asino i Lana lava fa'aa'oa'o, sa Ia fetalai atu i Ōna so'o, "'Ou te fai atu ia

te outou ia mea, ina ia outou fealofani;" ma "fa'apei ona 'Ou alofa atu iā te outou, ia fealofani fo'i outou" (Ioane 15:17; 13:34).

O le faitaulaga ma le Sā Levī sa aumaia mo tapua'iga o le malumulu, o le galuega na filifilia e le Atua lava ia. O le 'auai i lea galuega o se avanoa e maoa'e ma e sili le tāua; a e ua manatu le faitaulaga ma le Sā Levī, ona ua fa'amamaluina, e fa'apea ai o le a maulalo ifo lo latou tulaga pe a galue e fesoasoani i se tasi o lo'o puapuagātia i tafatafa o le ala. O lea ua latou lē amana'ia ai le avanoa fa'apitoa sa tu'u atu e le Atua iā i latou e 'avea ai ma Ōna sui e fa'amanuia ai se uso ā tagata.

E to'atele o lo'o faia fo'i lea sesē i le asō; ua latou vāea i ni vasega manino e lua o latou tiute tau'ave. O le tasi vasega ua tu'u i ai mea tāua tetele, e pulea e le tulafono a le Atua; o le isi vasega e a'afia ai mea itiiti uma, o lo'o lē amana'ia ai le poloa'iga "Ia e alofa i lē lua te tua'oi pei o 'oe lava iā te 'oe." O le itu'aiga galuega lenei e fa'atatau i le tulaga o le mafaufau, o se naunauta'iga po o se u'una'iga e fa'afuase'i. O le a fa'aleaga le uiga o le galuega, ma o le a fa'auigasesē le tapua'iga a Keriso.

E i ai ē manatu o le a fa'amaulaloina lo latou tulaga i le galue mo le fanau a tagata o lo'o mafatia, ma ua va'ai ma le 'ino'ino i ē ua fa'aleaga i le malumalu o le agaga. O isi ua lē amana'ia tagata matitiva ona o nisi mafuāga. E galulue i latou mo Keriso ona e talitonu o le a atina'e ai lo latou tulaga tāua. Latou te manatu o lo'o latou faia se galuega lelei, ma ua lē mafai ai ona tū ma se'i va'ai i mana'oga a ē o lo'o mana'omia se fesoasoani ma o pagātia. Ona o le naunau e fa'ateleina galuega lelei, atonu o le a atili ai le latou fa'atigā i ē matitiva; atonu o le a tu'u ai i latou i tulaga e sili atu le faigatā, ma 'ave'ese ai le aiā e pulea ai e le tagata ia lava, po o le lē amana'ia o mea latou te mana'omia. Peita'i e manatu nei ta'ita'i e tonu mea uma latou te faia ona ua manatu o lo'o latou fa'ataunu'u fuafuāga a Keriso.

E to'atele o le a tu'u atu se uso po o se tua'oi ia mafatia i lalo o tulaga faigatā ma le leai o se fesoasoani. Atonu e manatu ona ua ta'ua i latou o Kerisiano ua avea ai latou o sui o Keriso, a e o lo'o fa'aali lo latou loto fa'apito. Ona o ē o lo'o ta'ua o 'au'auna a le Atua a e lē o 'au'aumea fa'atasi ma Ia, o le alofa o le Atua sa tatau ona fa'atafe mai iā i latou ua 'ave'esea mai o latou uso ā tagata. Ma o le a lē mafai ona si'i a'e i le Atua le tele o vi'iga ma fa'afetai mai loto o tagata; ua fa'apea fo'i ona gaoia mai iā te Ia o fa'ane'ene'ega i Lona suafa pa'ia. O agaga na malū ai Keriso ua Ia lē maua, o agaga ia o lo'o naunau o Ia e aumai i Lona malō ia mau ai ma Ia e o'o i le fa'avavau.

E itiiti le a'afiāga i luga o le lalolagi mai 'upu moni fa'aleagaga, ona e tatau ona fa'aalia le aogā e ala i a tatou gaoioiga. E itiiti le mamafa pe a na o le tele o le ta'uta'u atu o lo tatou tulaga fa'aleagaga. Atonu e tatou te ta'u atu o tatou o so'o o Keriso, atonu fo'i tatou te fa'ailoa atu e talitonu i 'upu moni uma o le afioga a le Atua; peita'i e lē maua se lelei e o tatou tua'oi se'i vaganā ua fa'atinoina i o tatou olaga i aso ta'itasi. Atonu e o'o i le lagi le maualuga o lo tatou lelei, peita'i e lē fa'asaoina ai tatou po o se tasi o tatou uso a tagata se'i vaganā pe a o tatou o Kerisiano moni. O le a tele atu le lelei e maua e le lalolagi mai le fa'aa'oa'oga sa'o i lo o molimau uma e tu'u atu.

E leai ni gaoioiga e faia fa'apito o le a mafai ona aogā i le fuafuāga a Keriso, ona o Lana galuega e faia lea mo ē matitiva ma puapuagātia. E mana'omia le tigāalofa o Keriso i loto o ē ta'ua o Ōna so'o - se alofa e loloto mo ē sa matuā tāua iā te Ia, na tu'uina ai Lona lava soifua mo lo latou fa'aolataga. O nei agaga e tāua, e aupito sili le tāua i lo se isi taulaga e mafai ona tatou aumaia i le Atua. Pe o le tu'uina o lo tatou malosi atoa e fai ai se galuega tele, a e o le a tatou lē amana'ia ai lē o mafatia pe talu'ese mai mana'oga o le tagata 'ese, e lē o se galuega lea o le a Ia fa'amanuia.

O le fa'apa'iaina o le agaga e ala i le galuega a le Agaga Pa'ia, o le tu'uina lea e Keriso o Lona uiga moni i le fanau a tagata. O le tapua'iga a le tala lelei o Keriso lea i le olaga - o le fa'avae ola lea. O le alofa tunoa o Keriso e fa'aalia i le uiga ua fa'atinoina i galuega lelei. E lē mafai ona motusia mai so'o se vaega e fa'avae i le tala lelei, auā o itū uma o le olaga ma galuega a le Kersiano e fa'asino lea i le soifuāga o Keriso.

O le alofa o le fa'avae o le ola fa'a-Atua. Pe o le ā le galuega, e leai se tagata e ato'atoa le alofa i le Atua vaganā le i ai iā te ia o le alofa mo lona uso a e lē o le loto fa'apito. Peita'i e lē mafai ona tatou maua lenei agaga pe a na o na tatou taumafai e alofa i isi. O le mea e mana'omia o le alofa o Keriso ia i ai i le loto. Pe a so'ofatasi 'oe ma Keriso, o le a mānu a'e ai le alofa. E maua le ato'atoa o le uiga fa'a-Kerisiano ina ua oso a'e pea mai totonu le fa'anaunau e fesoasoani ma fa'amanuia i isi - pe a fa'atumulia le loto i le malamalama o le lagi ma e fa'aalia mai lea i foliga.

E lē mafai e le loto o lo'o fa'atasi ai Keriso ona aunoa ma se alofa. Pe afai e tatou te alolofa i le Atua ona o Ia na muamua alofa iā i tatou, o le a tatou alolofa i tagata uma o ē sa ala ona maliu ai Keriso. E lē mafai ona tatou feso'ota'i ma le itū Atua a e lē feso'ota'i atu ma le aigā tagata; o Ia Lē o lo'o nofo'ia le nofoāli'i o le atulaulau, o lo'o tu'u fa'atasi ai le itū Atua ma le fanau a tagata. A tatou so'ofa'atasi ma Keriso, o la tatou so'otaga ma o tatou uso a tagata o le a fusimauina i le ma ea auro o le alofa. O le a fa'aalitinoina i o tatou olaga le tigāalofa ma le alofa mutimutivale o Keriso. Tatou te lē fa'atali se'i aumaia iā i tatou ē o lo'o mafatia ma mana'omia le fesoasoani. E lē se'iloga e tatou te lagona le tigā o isi, a e o le a tatou iloa la tatou galuega e fesoasoani ai iē o puapuagātia ma ē matitiva, fa'apei ona femalagaa'i Keriso ma fai galuega lelei.

Pe a osofa'ia le agaga i le alofa ma le tigāalofa, pe so'o se mea e 'a'apa atu i ai ma le loto e fa'amanuia ma si'itia i luga isi, e fa'aali mai ai lava o lo'o galue le Agaga Pa'ia o le Atua. I le loloto o le lalolagi fa'apaupau, e i ai tagata e latou te lē iloa tusiga o le tulafono a le Atua, e le'i fa'aloge lava latou i le suafa o Keriso, a e sa agalelei i Āna 'au'auna ma puipua i latou mai faigatā. Sa tu'u o latou lava ola i se tulaga faigatā; o a latou gaoioiga ua fa'a'iloa ai le galuega a le mana o le Atua. Ua tu'u e le Agaga Pa'ia le alofa tunoa o Keriso i loto o nei tagata 'ese, ma fa'ate'ia le agaga alofa e 'ese mai lo latou uiga moni, e 'ese mai a'oa'oga ma o latou tū masani. O le "Malamalama...na te fa'amalamalamaina tagata uma lava i Lona maliu mai i le lalolagi" (Ioane 1:9) o lo'o susulu i le agaga lea; ma o lenei malamalama, pe a usita'i i ai, o le a ta'ita'iina o ia i le malō o le Atua. O le mamalu o le lagi o lo'o si'itia i luga ē ua pa'u'ū, ma fa'amafanafana i ē o mafatia. So'o se mea pe a afio Keriso i loto o tagata, o le a fa'aalia ai fo'i o IA fa'apea. So'o se mea e galue ai, o le a i ai le malamalama ma o le a fa'amanuiaina e le tapua'iga a Keriso.

E leai se 'ese'esega i le silafaga a le Atua e tusa ai ma le atunu'u, lanu, po o le tulaga o le tagata. O Ia na faia uma le aigā tagata; e tasi le fanau a tagata e ala i le foafoāga, ma e tasi tagata uma e ala i le fuafuāga o le fa'aolataga. Na afio Keriso e lepeti i lalo 'aupā uma o lo'o va eva e ai, e fa'amatala vaega uma o le malumalu, ina ia sa'oloto agaga uma ia ō atu i e Atua. O Lona alofa e matuā loloto lava, e matuā lautele, e matuā tumu saisi, ma e maāti i so'o se mea. E si'itia i fafo agaga mafatia mai le si'omaga a Satani, o ē sa fa'avālea e āna tau fa'asesē. E tu'uina i latou ina ia tau latalata i le nofoāli'i o le Atua, lea e si'omia e le nuanua o le fa'amoemoe.

Ona o Keriso, e lē i ai se Iutaia po o se Eleni, se pologa po o se tagata sa'oloto. O tagata uma ua fa'alatalata atu iā te Ia e ala i Lona toto tāua (Kalatia 3:28; Efeso 2:13).

Pe o le ā le 'ese'esega o talitonuga fa'aletapua'iga, e tatau ona fa'aloge ma taliina le vala'au mai le fanau a tagata o lo'o mafatia. Pe a o i ai se faitaga'i ona o le 'ese'ese o tapua'iga, e tele mea lelei e mafai ona faia i le galulue mo tagata uma ta'ito'atasi. O galuega alofa e 'ave'esea ai le fa'a'iloga tagata ma tosina ai agaga i le Atua.

E tatau ona tatou tau'aloaina fa'anoanoāga, faigatā, ma fa'afitauli a isi. E tatau ona tatou 'aufa'atasi ai i fiafiāga ma mea e afāina ai ē tulaga maualuga ma ē maualalo, o ē mau'oa ma ē matitiva. Ua fetalai mai Keriso, "Ua maua fua e outou, ia outou foa'ifuaina atu" (Mataio 10:8). E i ai pea i o tatou tafatafa agaga o lo'o pagātia e mana'omia se 'upu tigāalofa ma galuega fesoasoani. E i ai fafine ua oti a latou tane, ma ē ua mātua oti o lo'o vala'au Keriso i Ōna so'o ia talia lelei i latou, ona o i latou o mea fa'atuatua mai le Atua. E tele taimi ua lē amana'ia ai nei agaga; atonu o latou ua lē lavalavā, lē taupulea, lē a'oa'ia, ma foliga mai e lē 'aulelei i itū uma; a e peita'i o latou o mea totino a le Atua. Ua fa'atauina i latou ii se tautele, ma e tāua fo'i i latou i Lana silafaga fa'apei o tatou. O itūtino i latou o le aiga a le Atua, ma o i latou o tiute tau'ave a le Kerisiano, o Āna tausimea ia. **Ua fetalai o Ia, "'Ou te mana'omia e maua mai e ōu lima o latou agaga."**

O le agasala e aupito mata'utia i mea leaga uma, ma e tatau iā i tatou ona agaaloa ma fesoasoani i le tagata agasala. E lē mafai ona tatou maua mai tagata uma i se ala e tasi, auā e to'atele e fa'alilo le matelāina o latou agaga. O i latou ia e maua le fesoasoani mai 'upu malū po o se agalelei. E i ai isi e matuā tele lava mana'oga a e latou te lē o iloa; latou te lē o iloa le tulaga pagātia o le agaga. E to'atele ua matuā magoto i le agasala, ua lē iloa mea mautū e fa'avavau, ua lē iloa e fa'atusaina i le Atua, ma ua lē iloa pe o i ai ni o latou agaga e tatau ona fa'asao pe leai. Ua lē iā i latou se fa'atuatua i le Atua pe o le talitonu i tagata, a e to'atele e na o galuega alofa e maua ai se feso'ota'iga ma i latou. O le tausiga o

mana'oga fa'aletino e tatau ona faia muamua lea; e tatau ona fafaga, fa'amamā, ma fa'alavalava. A o latou va'aia fa'amaoniga o āu galuega alofa, o le a faigofie ona latou talitonu i le alofa tunoa o Keriso.

E to'atele ua ō sesē ma ua latou lagona le māsiasi ma lo latou leaga. Ua latou va'ai i o latou sesē ma 'aleu se'ia o'o ina ua tau leai se fa'amoemoe, a e o agaga nei ia tatou lē fa'atalalē i ai. Ia fa'aloloa atu iā te ia se lima fesoasoani fa'apei ona tu'u atu e le Uso Matua Lona 'a'ao iā Peteru ina o le a magoto ifo. Ia tautala iā te ia i ni 'upu agamalū, e i ai le fa'amoemoe ina ia atina'e ai le fa'atuatua ma fafaguina ai le alofa.

E mana'omia 'oe e lou uso, lea ua fa'alētonu le agaga, fa'apei fo'i o 'oe a o e mana'omia se alofa fa'aleuso. A e maise fo'i e na te mana'omia se tasi e tulaga vaivai pei o ia, se tasi e i ai le tigāalofa ma e mafai ona fesoasoani iā te ia. Pe a tatou iloa lo tatou lava vaivaiga o le a mafai ai ona tatou avatu le fesoasoani mo se isi ua matuā mana'omia lava. Ia tatou lē ui 'ese mai se agaga o lo'o mafatia, a ia tu'u iā te ia le fa'amafanafanaga o lo'o fa'amafanafana ai i tatou e le Atua.

O le mafutaga ma Keriso, o le so'otaga ma le Fa'aola e mafai ai e le mafaufau ma le loto ma le agaga ona manumalō mai le uiga maulalo. Ta'u atu i lē o lo'o sē fa'atatau i le 'a'ao malosi o le a 'u'umauina o ia i luga, ma le itū tagata o Keriso e alofa mutimutivale mo ia. Ia lē na o lona talitonu i le tulafono ma le mana, o mea ia e leai se tigāalofa ma e lē lagona se tagi mai mo se fesoasoani. E mana'omia pe a 'a'apa mai, ia maua se lima e mafanafana, ia talitonu i se loto e tumu i le agalelei. Ia tumau pea i lona mafaufau le fa'atasi ma ia o le Agaga o le Atua, o lo'o silasila ifo ma le tigāalofa. Ta'u iā te ia ia manatu i le finagalo o le Tamā o lo'o mafatia ona o le agasala, i le 'a'ao o le Tamā o lo'o 'a'apa mai pea, ma le si'ufofoga o le Tamā o lo'o fetalai mai, "Pe se'i tago o ia i Lo'u malosi, ia Ma lelei ma ia, e lelei fo'i o ia ma A'u" (Isaia 27:5).

A o e faia lenei galuega e i ai āu fesoasoani e lē mava'aia e mata fa'aletagata. Sa i ai i tafatafa o le Samaria agalelei agelu o le lagi, na tausi i le tagata sa puapuagātia. E fa'apea ona tutū o agelu mai maota o le lagi ma i latou uma e faia le galuega a le Atua, o lo'o galulue mo o latou uso ā tagata. E i ai Keriso lava ia, e 'aufa'atasi ma 'oe, auā o Ia o Lē e toe fa'aleleia ma fa'aola, ma o ē e galulue i lalo o Lana ta'ita'iga o le a va'aia i'uga tetele.

Pe a e fa'amaoni i lau galuega, o le a fa'alagolago i ai le manuia o isi, fa'apea ma lou lava i'uga e fa'avavau. O lo'o sa'ili lava Keriso e si'itia i latou uma ia mafuta fa'atasi ma Ia, ia tasi ma Ia fa'apei ona tasi o Ia ma le Tamā. Na te fa'atagaina i tatou ia fa'afeagai ma puapuagā ma malaia, ina ia vala'auina ai ia ō 'ese mai lo tatou loto fa'apito; o lo'o Ia sa'ili e atina'e i totonu o i tatou Ōna uiga - o le tigāalofa, agalelei, ma le alofa. Pe a tatou talia lenei galuega o le 'au'auna atu, ua tatou tu'u tatou lava ia i Lana a'oga, ia saunia ai mo lotoā o le Atua. Pe a lē taliaina, ua tatou te'ena Āna a'oa'oga, a e filifili e vavae'ese e fa'avavau mai Lona fa'atasi ai.

Ua fetalai le Ali'i, "Afai e te savali i O'u ala,...Ou te tu'u atu fo'i iā te 'oe ta'ita'i mai iā te i latou nei o ē tutū mai" - e o'o lava i agelu o lo'o si'omia Lona nofoāli'i (Sakaria 3:7). Pe a 'aufa'atasi ma 'au fa'alelagi i a latou galuega i le lalolagi, ua tatou sauni loa mo la tatou mafutaga fa'atasi ma i latou i le lagi. "E lē o agaga e 'au'auna ea i latou uma, ua 'a'auina e 'au'auna ona o i latou o ē a maua le ola?" (Eperu 1:14), o le a fa'afeiloā'i e agelu i le lagi i latou uma e le'i ola i le lalolagi "ina ia 'au'auna mai tagata... a ia 'au'auna atu" (Mataio 20:28). I lenei mafutaga manuia o le a tatou iloa ai ma le fialia, o nei mea uma ua ta'aia fa'atasi i totonu o le fesili, "O ai lo'u tuā'oi?"

O le Tau'i o le Alofa Tunoa

Matā'upu 28

E fa'avae lenei matā'upu i luga o tusi o le Mataio 19:16-30; 20:1-16; Mareko 10:17-31; Luka 18:18-30.

O le 'upu moni e fa'atatau i le alofa tunoa e maua fua a le Atua ua toe ina lē iloa i le va'aiga a Iutaia, ma sa a'oa'o atu e faia'oga fa'aleagaga e tatau ona galuea'iina e fa'amalie ai le Atua. O lona uiga e fa'amoemoe ia tauia i latou ē amiotonu e ala i a latou lava galuega. O la latou tapuā'iga ua 'u'una'iina e se agaga e na o le mana'o i se tau'i. E o'o lava i so'o o Keriso sa iā i latou fo'i lenei agaga, ma o lea na sa'ili le Fa'aola e fa'aali i ai lo latou sesē. A e Na te le'i tu'u atu le fa'ata'oto i le 'aufaigaluega, sa i ai se mea na tupu ua mafai ai ona Ia tu'u atu ni fa'avae e tonu.

A o malaga o Ia i le ala, sa alu ane se tasi ali'i talavou, ua to'otuli ma fesili atu iā te Ia, "Le a'oa'o lelei e, se ā se mea lelei 'ou te faia 'ou te maua ai le ola fa'avavau?" (Mataio 19:16).

Sa fa'ailoa atu e le ta'ita'i taule'ale'a o Keriso e na o se a'oa'o e fa'amamaluina, a e lē o manino o Ia o le Ālo o le Atua. Ua fetalai atu le Fa'aola, "Se ā le mea e te ta'ulelei mai ai A'u? e leai sē lelei, na o le to'atasi, o le Atua lea" (F. 17). O le ā le fa'avae e te ta'u ai A'u e lelei? E na o le Atua to'atasi e lelei; a e afai e te iloa mai o A'u e fa'apea, e tatau ona e talia A'u o Lona Ālo ma le Sui.

Sa Ia fa'aopoopo atu, "Afai e te fia o'o i le ola, ia e tausi i poloa'iga." O lo'o fa'ailoa mai le uiga o le Atua i Lana tulafono; ina ia tatou ō gatasi ma le Atua, e tatau ona fai ma pogai o a tatou gaoioiga uma fa'avae o Lana tulafono.

E lē fa'aitiitia e Keriso le pule a le tulafono. I se gagana faigofie ua Ia fa'ailoa mai o le usiusita'i i ai o le tulaga lea e maua ai le ola e fa'avavau - o le tulaga lava lea sa mana'omia mai iā Atamu a e le'i pa'ū o ia. E mana'omia e le Ali'i le mea lea e tasi mai le agaga i ōna pō nei e pei ona Ia mana'omia mai le tagata i Etena, le usita'i e 'ato'atoa, o le amiotonu e lē ponā. E lautele le mea e mana'omia i lalo o le feagaiga o le alofa tunoa e pei lava o le tulaga mana'omia na faia i Etena - o le ō gatasi ma le tulafono a le Atua, e pa'ia, e fa'amaoni, ma e lelei.

I 'upu sa tu'u mai, "Ia tausi poloa'iga," sa tali atu le taule'ale'a, "O le fea?" Sa manatu ia i nisi tulafono e fa'atatau i sauniga, a e peita'i sa fetalai Keriso e uiga i tulafono na tu'u mai Sinai. Na Ia fa'asino i poloa'iga mulimuli e ono, ona tu'u fa'atasi uma lea i le tulafono, "Ia e alofa atu i lē lua te tuā'oi ia pei o 'oe lava iā te 'oe."

Sa tali vave mai le taule'ale'a, "Ua 'ou tausia na mea uma talu ina 'ou itiiti, se ā se mea o toe 'ou te le'i faia?" O lona manatu i le tulafono e papa'u ma e lē mai le loto; i le fa'atatau fa'aletagata, ua iā te ia se uiga lelei, se amio e leai se pona. O lona olaga e leai se mea leaga i le va'aiga mai fafo; a ua manatu ia e 'ato'atoa lona usiusita'i. Peita'i ona o lona fefe atonu e lē o tonu mea uma i le la vā ma le Atua, o lea ua ia fesili ai, "Se ā se mea o toe 'ou te le'i faia?"

Ua fetalai atu Keriso, "Afai e te mana'o ina ia 'ato'atoa ona lelei o lau amio ia e alu ma e fa'atau atu au mea, i le e avatu ai i ē matitiva; ona iā te oe lea o le faula'igā'oloa i le lagi, i le e sau ma mulimuli mai iā te A'u." Ua fa'alogu le taule'ale'a i lea 'upu, ona alu 'ese ai lea o ia ma le tigā, auā e tele lava ana mea."

O lē e alofa iā te ia lava, ua soli e ia le tulafono. Sa naunau Iesu e fa'aali lenei mea i le taule'ale'a, ma ua Ia tu'u i ai se tofotofoga ina ia fa'atinoina ai le uiga fa'apito o lona loto. Sa Na fa'aali i ai le fa'asoesā i lana amio, ma ia lē toe mana'o ia fa'aopoopo atu se malamalamaga. Ua ia tu'uloto le lalolagi, ua faia ma ōna atua. Sa ia ta'u le tausiga o poloa'iga, peita'i e lē o iā te ia le fa'avae, o le agaga ma le ola lea o nei mea uma. E le'i iā te ia le alofa moni mo le Atua po o le tagata, a e sa mana'omia e ia mea uma e tatau ina ia mafai ai ona ulufale ia i le malō o le lagi. Ona o lona alofa fa'apito ma le tu'inaanau i mea fa'alelalolagi, ua ia lē ō gatasi ai ma fa'avae o le lagi.

Sa fa'atosina mai le Fa'aola ina ua sau lenei taule'ale'a iā Iesu i lona loto fa'amaoni ma le naunauta'i. Ua Ia "silasila atu iā te ia, ua alofa atu iā te ia." Na silasila Iesu i lenei taule'ale'a, atonu o le a

faia e ia se galuega ma 'avea ai o se 'au'auna o le amiotonu. Se manū o le a Ia talia lenei talavou talenia ma ōna uiga fa'aaloalo fa'apei ona Ia talia le 'au faifaiva na mulimuli atu iā te Ia. Pe ana fa'aaogā e le taule'ale'a ana taumafaiga i le galuega o le fa'asaoina o agaga, se manū ua 'avea ia o se faigaluega ma'elegā mo Keriso.

A e peita'i sa tatau iā te ia ona muamua talia tulaga e 'avea ai ma so'o; sa tatau ona ia tu'u atu ma le ato'atoa ia i le Atua. Ina ua vala'au e le Fa'aola o Ioane, Iakopo, Peteru, Mataio, ma isi o le to'asefulu ma le to'alua, sa latou "tu'ua lea o mea uma, ua tula'i ma mulimuli iā te Ia" (Luka 5:28). E fa'apea le ola fa'apa'iaina sa mana'omia mai le taule'ale'a, ma e le'i talosagaina e Keriso se taulaga e sili a'e i lo o le taulaga na faia e Ia lava ia. "Sa tamao'aiga Ia, a ua fa'amativaina ona o outou, ina ia fa'atamaoagaina outou i Lona mativa" (II Korinito 8:9). Sa pau le mea e ono fai e le taule'ale'a o le mulimuli lea i le ala o lo'o ta'ita'i i ai e Keriso.

Na silasila atu Keriso i le taule'ale'a ma le naunauta'i mo lona agaga; sa fa'anaunau e 'auina atu o ia e fai ma 'avefe'au o manuia i tagata. Na ofo atu e Keriso iā te ia le avanoa e so'ofa'atasi ai ma Ia. Na Ia fetalai atu, "Mulimuli mai iā te A'u." O lenei avanoa na talia ma le fiafia e Peteru, Iakopo, ma Ioane, ma sa māta'i ma le fiafia Keriso e le taule'ale'a. E ui ina sa tosina atu lona loto i le Fa'aola, peita'i e le'i sauni o ia e talia le fa'avae mo le tu'u atu atoa o ia i le Fa'aola, ma na ia filifili e fa'amuumua āna 'oa i lo o Iesu. Sa ia mana'o i le ola e fa'avavau, peita'i e le'i sauni e talia i le agaga le alofa e lē fa'apito, o le ola lava lea, ma na taliu'ese ia mai iā Keriso ma le loto fa'anoanoa.

A o taliu'ese atu le taule'ale'a, na fetalai atu Iesu i Ōna so'o, "E matuā faigatā ona sao atu o ē mau'oa i le malō o le Atua." Sa maofa le 'au so'o i nei fetalai. Na a'oa'oina i latou fa'apea e alo'ia ē mau'oa i le lagi; o lea ua naunau ia latou maua le pule ma 'oa fa'alelalolagi pe a o'o mai le malō o le Mesia; pe afai o le a lē mafai ona alu i le malō le mau'oa, o le ā le fa'amoemoe o le a i ai mo isi uma tagata?

"Ua toe tali atu Iesu iā te i latou, ua fa'apea atu, La'u fanau e, e matuā faigatā i ē fa'atuatua i le 'oa ona sao atu i le malō o le Atua. E faigofie i le kamela ona ui atu i le pū o le au, a e faigatā i le mau'oa ona sao i le malō o le Atua. Ona latou matuā taufaiōfo ai lea." Ua latou iloa nei o lo'o aofia ai fo'i latou i le lapata'iga. Mai fetalai a le Fa'aola, ua fa'aalia mai ai a latou lava naunauta'iga lilo mo le pule ma le 'oa. Sa latou fa'apea atu ma o latou loto ua fa'alētonu, "Afai o lea, o ai se tasi e mafai ona fa'aolaina?" (Mareko 10:24-26).

"Ua silasila atu Iesu iā te i latou, ua fa'apea atu, E lē mafaia e tagata, na o le Atua; auā e mafaia mea uma e le Atua" (F. 17).

O se tagata mau'oa fa'apea, e lē mafai ona ūlu ia i le lagi. E lē maua e ia se aiā mai āna 'oa, i le tofi o le 'au pa'ia, ona e na o le alofa tunoa o Keriso e mafai ai e so'o se tagata ona ulufale i totonu o le 'a'ai a le Atua.

O lo'o fetalai pea le Agaga Pa'ia i le tagata mau'oa fa'apea ma lē e mativa, "O lo outou tino o le malumalu lea o le Agaga Pa'ia ua i totonu iā te outou, o lo'o ua iā te outou mai le Atua, e lē aiā fo'i outou iā te outou? Auā ua fa'atauina outou i le tau; o lenei, ia outou vivi'i atu i le Atua i o outou tino ma o outou agaga, o mea a le Atua ia" (I Korinito 6:19, 20). A talitonu tagata i lea mea, o le a tu'u āna mea totino uma ina ia fa'aaogāina i le ta'ita'iga a le Atua, mo le fa'asaoina o ē ua lēiloa, ma le fesoasoani i ē o puapuagātia ma pagātia. E lē mafai e le tagata ona faia lea mea, ona e taofimau e le loto āna 'olua fa'alelalolagi. O le agaga e saisaitia i le galuega a le amiolētonu (le mamone), e lē lagona se tagi mai a ē o lo'o mana'omia se fesoasoani, a e peita'i e mafai mea uma i le fa'atasi ai o le Atua. Pe a iloa le alofa e lē mafa'atusaina o Keriso, o le a gaua'i mai loa ma liu suāvai le loto fa'apito. O le a ta'ita'ina le tagata mau'oa, fa'apei o Saulo le Faresaio, sa fa'apea, "O mea uma sa aogā iā te a'u, ua 'ou manatu ua lē aogā ia mea ona o Keriso. O lenei fo'i e moni lava, o lo'u manatu ua lē aogā mea uma lava ona o le silisili 'ese o le poto i la Keriso Iesu lo'u Ali'i" (Filipi 3:7, 8). O le a lē toe tu'ulotoina se mea mo i latou lava, a e o le a 'oli'oli i le ta'ua o i latou o tausimea o le alofa tunoa e tele na'uā o le Atua, ma 'avea o 'au'auna mo tagata uma ona o Lona suafa.

O Peteru na muamua malamalama i ai i fetalai a le Fa'aola, ma na manatu ai i mea ua tu'u'esea e ia ma ōna uso mo Keriso. Ua fa'apea atu loa ia, "Fa'auta, ua matou tu'ua mea uma, a e matou mulimuli atu iā te 'Oe" (Mataio 19:27). Na ia manatua le tulaga o le folafolaga i le taule'ale'a, "Ona iā te 'oe lea o le

faula'igā'olua i le lagi," ma ua ia fesili nei pe o le ā se tau e maua e ia ma ōna uso mo mea uma ua latou tu'ua.

Sa fa'afiafiaina le 'au faifaiva mai Kalilaia i le tali a le Fa'aola. Ua Ia tu'u mai i o latou luma se ata e fa'ataunu'uina ai o latou mo'omo'oga: "E moni, 'Ou te fai atu iā te outou, o outou ua mulimuli mai iā te A'u, pe a ti'eti'e le Atali'i o le tagata i Lona nofoāli'i mamalu i le toefuata'iga, tou te ti'eti'e ai fo'i i nofoāli'i e sefulu ma le lua, e fa'amasino ai i itū'aiga o Isara'elu e sefulu ma le lua" (Mataio 19:28). Ona Ia toe fa'aopoopo atu lea, "Ai se tasi ua ia tu'ua le fale, po o uso, po o tuafāfine, po o le tamā, po o le tinā, po o le avā, po o le fanau, po o fanua, ona o A'u ma le tala lelei, e maua lava e ia ta'isautuaselau i lenei olaga, o fale, ma uso, ma tuafāfine, ma tinā, ma fanau, ma fanua, atoa fo'i ma sauāga, a o le ola atali e maua ai le ola e fa'avavau" (Mareko 10:29, 30).

A o le fesili a Peteru, "Se ā fo'i se mea e matou te maua?" ua fa'aali mai ai se agaga, a lē fa'aagatonuina, o le a lē tataua ona 'avea o so'o e fai ma 'avefe'au mo Keriso; a e o le agaga lea o se tagata e galue ina ia maua ai se totogi. E ui ina sa tosina mai i latou e le alofa o Iesu, a e sa le'i atoa lo latou sa'oloto mai uiga fa'a-Faresaio, ma o lo'o iā i latou le manatu e tauia i latou fa'atatau i a latou galuega. Ua latou tu'uloto se agaga fiavi'ia ma le lotomalie i le tagata lava ia, ma e fa'atusatusa le tasi i le tasi. A fa'alētonu se tasi i so'o se itū, ona manatu lea o isi ua maua a'e lo latou tulaga i lo lea tagata.

Ina ne'i sē 'ese la latou va'ai mai fa'avae o le talalelei, sa fa'aioa iā i latou e Keriso se fa'ata'oto e fa'amalamalama ai le uiga o faiga a le Atua ma Āna 'au'auna, ma le agaga e fa'anaunau o Ia ia latou galulue ai mo Ia.

Ua fetalai atu o Ia, "E tusa le malō o le lagi ma le tasi matai na alausu atu e tautala ma nisi e faigaluega i lona tovine a e tauia atu" (Mataio 20:1). O le tū masani a tagata o lo'o sa'ili galuega o le fa'atalitali lea i le nofoāga o fefa'ataua'iga, ma o iinei e ō mai i ai ali'i pule e sa'ili ma maua atu ai 'au'auna. Ua fa'aioa mai e le fa'ata'oto sa alu atu le ali'i i itulā 'ese'ese o le aso ma talanoa i tagata faigaluega. Sa malilie ē na fa'aaogā amata mai i itulā muamua o le aso, e galulue mo se totogi na fa'aali i ai; o ē sa ō mai e galulue i itulā mulimuli sa totogi i le malie o le ali'i pule.

"Ua o'o i le afiafi, ona fai atu ai lea o le ali'i e āna le tovine i lana 'au'auna e pule, 'Vala'au ia i ē faigaluega, ma avatu le tauia iā te i latou, ia afua i ē na mulimuli, ia o'o i ē na muamua.' Ua ō mai fo'i o ē na ō ane i le itū aso e sefulu ma le tasi, ua ta'itasi ma latou maua le tenari. Ona ō mai ai lea o ē na muamua, fa te i latou e sili sa latou mea e maua; a ua ta'itasi fo'i o i latou ma maua le tenari."

O le faiga a le pule o le fanua ma ē galulue i lana tovine e fa'asino lea i faiga a le Atua ma le aigā tagata; e lē mafa'atusaina lava lea i tū masani o lo'o malos i faiga fa'aletagata. I gaoioiga fa'alelalolagi, e maua le tauia fa'atatau i le galuega pe a mae'a ona faia. Peita'i ua fa'amalamalamaina e Keriso i le fa'ata'oto fa'avae o Lona malō - se malō e lē mai lenei lalolagi. E lē pulea o Ia e ni tulaga fa'aletagata. Ua fetalai mai le Ali'i, "Auā o O'u manatu e lē o outou manatu, o O'u ala e lē o outou ala,... Auā e pei ona sili ona maua o le lagi i le lalolagi, ua fa'apea ona sili ona maua o O'u ala i o outou ala, ma O'u manatu e sili i o outou manatu" (Isaia 55:8, 9).

I lenei fa'ata'oto, sa malilie le 'au faigaluega e galulue mo se totogi ua tu'uina mai, ma sa latou maua lea aofa'i o le feagaiga, e leai se isi mea na sili atu. Sa talitonu ē na galulue mulimuli i le folafolaga a le ali'i o le tovine, "Ou te avatu iā te outou se mea ua tusa ai" (Mataio 20:4). Latou te le'i fesiligia o ia e fa'atatau i le totogi ma na fa'aalia ai ua latou talitonu iā te ia, i lona amiotonu ma āna faiga e lē fa'apito. Sa tauia i latou e fa'atatau i lana fuafuāga, a e le'i fa'atatau i le 'atoāga o a latou galuega.

E fa'apea ona fa'anaunau le Atua ina ia tatou fa'atuatua iā te Ia, Lē e fa'aagatonuina le tagata e lē amioatua. Na te tu'u mai Lana tau e lē fa'atatau i so tatou lava lelei a e tusa ai ma Lana lava fuafuāga mo i tatou, "na Ia faia e Keriso Iesu lo tatou Ali'i" (Efeso 3:11). "Ona fa'aola mai ai lea o Ia iā i tatou, e lē ona o galuega o i le amiotonu sa tatou faia, a e tusa ma Lona lava alofa." Ma e mo i latou e fa'atuatua iā te Ia, o le a Ia "faia o mea uma e fa'asilisili lava i mea tatou te ole atu ai ma mafau i ai" (Efeso 3:20).

E lē o le tele o le galuega na fai po o le fa'ai'uga e iloa atu, a e peita'i o le agaga sa faia ai le galuega e sili atu ona tāua i le Atua. O ē na ō mai e galulue i le tovine i le itulā mulimuli o le aso sa tumu i le loto fa'afetai mo se avanoa e galulue ai mai lē na talia i latou. Ina ua i'u le aso, sa matuā ofo i latou ina ua maua se totogi mai le pule o le fanua, o le totogi mo le tagata sa galue i le aso atoa. Na iloa e le'i tataua ona latou maua lea totogi, a e sa fa'atumulia i latou i le fiafia ona o le agaaloa i foliga o le pule fanua. Sa

le'i mafai ona fa'agaloia le agalelei o le ali'i po o le loto foa'i mo mea sa latou maua. E fa'apea fo'i i le tagata agasala, e ui ina ua ia iloa lona lē aogā ina ua ulu atu pea i le tovine a le Matai i le itulā fa'ai'u o le aso. E foliga mai e lē umi se taimi o lana 'au'aunaga, ma e manatu o ia e lē tatau ona ia maua se tau; a e peita'i e fa'atumulia o ia i le fiafia ona ua talia lava ia e le Atua. E galue o ia ma se agaga e fa'atuatua ma e loto maulalo, e fa'afetai mo le avanoa e galulue ai fa'atasi ma Keriso. O le agaga lenei e fiafia le Atua e ta'uleleia.

E naunau le Ali'i ina ia tatou maua le malōlōga iā te Ia, ia lē fesiligia pe o le ā le fua o la tatou tau. E lē fa'amamamua le tau i o tatou mafaufau pe a fa'atasi ai Keriso i le agaga; e lē o le ala lea e faia ai sa tatou galuega. E naunau le Atua ia tatou maua ma le agaga fa'afetai Āna fa'amanuiāga na folafola mai, peita'i ia lē na o lo tatou naunautai mo tau po o le manatu e tatau ona tauia tiute ta'itasi uma tatou te faia. Ia lē tatau ona tatou fa'avavave ia maua le tau, a ia fai le mea e tonu ma lelei, ia lē tusa po o ā manuia e maua. Ia 'avea ma una'iga lo tatou alofa i le Atua fa'apea ma o tatou uso ā tagata.

E lē o tu'u mai i lenei fa'ata'oto se 'alofaga i ē ua lagona le ulua'i vala'au e galulue, a e o ē na lē amana'ia e ulufale i le tovine a le Ali'i. Ina ua alu atu le pule o le fanua i le nofoāga o fefa'ataua'iga i le itulā e sefulu ma le tasi ma ua va'aia tagata lē faigaluega, sa ia fai atu, "Se ā le mea tou te tutū mai ai iinei i le aso uma e leai se galuega?" Fai mai le tali, "E leai sē na fai mai iā te i matou." O ē na vala'auina mulimuli e le'i i ai i latou i le taeao; latou te le'i tete'e i le vala'au. O i latou na tete'e a e mulimuli ane ua toe salamō, sa latou faia le mea sa'o; peita'i e lē saogalemū le fa'atamala i le ulua'i vala'au o le alofa tunoa.

Ina ua maua e le 'aufaigaluega o le tovine "se mea ua tusa," sa lē malilie i latou na amata galulue mai i le taeao pō. Ua manatu i latou e lē tatau ea ona tele atu le mea e latou te maua mo le sefululua itulā sa galulue ai, i lo o i latou na galulue na o le tasi o le itulā i le taimi e aupito mālū o le aso? Ua latou fai mai, "E tasi lava le itu aso na galulue ai i latou nei na mulimuli, a ua e fa'atusaina i latou ma i matou o ē na tigāina i le galuega ma le vela o le aso" (Mataio 20:12).

Sa tali atu le pule o le tovine i se tasi o i latou, "Sole, e leai sa'u agaleaga iā te oe; ta te le'i tautala ea i le tenari e tasi? Inā tago ia i lau mea, ma alu; o la'u pule lea e avatu lava i lenei na mulimuli e pei o a oe lava. E lē faitalia ea a'u ona pule i a'u lava mea? e te fa'aū'ū mai ea ina ua 'ou agalelei?"

"E fa'apea ona muamua o ē na mulimuli, e mulimuli fo'i ē na muamua; auā e to'atele ē ua tala'iina, a e to'aititi ē ua filifilia" (Mataio 20:16).

I lenei fa'ata'oto, o ē sa muamua galulue ua fa'asino iā i latou ua fa'apea mai e tatau ona fa'asilia i latou i lo o isi ona o la latou 'au'aunaga. E i a i latou le agaga e faia ai se galuega ia fa'amalieina ai i latou lava ia, a e lē o le faia ia fesoasoani atu ai i se isi ma e lē tauia. Atonu e latou te fa'a'ailoa mai sa latou galulue mo le Atua i o latou olaga atoa; atonu sa feagai latou ma faigatā, fa'amativaina, ma tofotofoina, ma ua manatu ai e tatau ona latou maua o se tau tele. I le taimi nei ua sili atu le tāua o le tau i lo o le avanoa e 'au'auna ai mo Keriso. I la latou lava va'ai o la latou galuega ma le faifa'ataulaga ofo ua tatau ai ona latou maua le fa'aaloaloga i luga a'e o isi, a e a lē fa'a'ailoa atu le tāua ua lē fiafia ai loa. Pe ana latou aumaia i le galuega se agaga alofa ma le fa'atuatuaina, se manū o le a fa'amamamua pea latou; peita'i ona o latou uiga e na o le faitio ma le taumuimui a e lē pei o Keriso, ua fa'amautinoa ai o latou e lē mafa'atuatuaina. E fa'a'ailoa mai ai lo latou naunau i le fa'amamamua o latou lava ia, le latou lē talitonu i le Atua, ma lo latou mataū'a ma le lotoleaga e fa'atatau i ōna uso. I a i latou, o le agalelei ma le lotofa'ifua o le Ali'i e na o se mafuāga mo muimuīga, ma e fa'aalia atu ai e leai se so'otaga i o latou agaga ma le Atua. Latou te lē iloa le fiafia o le loto i le 'au'aumea fa'atasi ma le Ali'i Pule.

E matuā lē fiafia le Aua i lenei agaga manatu fa'apito, ma e lē mafai e Ia ona galue ma se tasi e i ai nei uiga. E lē manino iā i latou galue'iina a Lona Agaga.

Sa mua'i vala'au Iutaia iā ō mai i le tovine a le Ali'i, ma ona o lea, sa maua i latou i le loto mimita ma le fa'afiaamitonu. Ona o le umi o tausaga o la latou 'au'aunaga, sa latou fa'atatau ai o le a latou maua se tau e tele atu i lo isi. Sa matuā fa'atigā i o latou loto le fa'aaliga e fa'atatau i mea a le Atua, auā e tutusa lava avanoa e maua e tagata fa'apaupau ma i latou uma.

Na lapata'i atu Keriso i le 'au so'o, o ē sa mua'i vala'au e mulimuli iā te Ia, ina ne'i o latou tu'uloto fo'i ia itu'aiga manatu leaga. Na Ia silafia o le vaivaiga o le ekalesia, o le agaga lea o le fa'afiaamitonu. O le a manatu tagata e latou te mafai ona fai se mea ia ulu atu ai i le malō o le lagi; e manatu pe a o'o i latou i se fa'asologa e aga'i ai i luma, o le a afio mai le Ali'i e aumai se fesoasoani na o i latou. O lea o le a i le

mātele o le loto fa'apito a e itiiti le manatu iā Iesu. E to'aitiiti le fa'asolo i le lelei ona ua tele le mitamitavale ma ua manatu e maua luga atu lo latou tulaga i lo isi. O le a oso le matau'a pe a lē fa'asili atu lo latou tāua. O le faigatā lenei na sa'ili Keriso ia puipuia mai ai Ōna so'o.

Ia leai lava iā i tatou se mitamitāga ona o so tatou lava lelei. "'Aua ne'i mitamita le tagata poto i lona poto, 'aua ne'i mitamita le tagata malos i lona malos, 'aua ne'i mitamita fo'i le mau'oa i ana 'oloa; a o lē mitamita, inā mitamita ia o ia i lenei mea, ina ua mafaufau o ia, ma ua iloa A'u, o A'u lava o Ieova, o Lē faia le alofa, ma le fa'amasinoga, ma le amiotonu i le lalolagi; auā o mea ia 'Ou te fiafia i ai,' o lo'o fetalai mai ai Ieova" (Jeremia 9:23, 24).

O le tau i lē ona o galuega, ina ne'i fia logovi'i se tasi; peita'i ona o le alofa tunoa. "O lenei, pe se ā sa tatou 'upu i mea na maua i la le tino e lo tatou tamā o Aperamo? Auā ana ta'uamiotonuina Aperamo i galuega, po ua iā te ia se mea e mitamita ai; a ua leai i luma o le Atua. Auā se ā ea ua fai mai ai le Tusi? Na fa'atuatua Aperamo i le Atua, ona ta'ua ai lea iā te ia e fai ma amiotonu. A o le totogi o le faigaluega, e lē ta'ua lea o le alofa tunoa, a o le tau lava. A o lē ua lē galue, a e fa'atuatua i Lē na te ta'uamiotonuina lē ua fa'alēmata'u, ua ta'ua lona fa'atuatua o le amiotonu" (Roma 4:1-5). O le mea lea e leai se mafuaga e fia vi'i ai se tasi i luga o se isi, po o le taumuimui i le isi. E leai se avanoa e tu'u fa'apitoa mo se tasi, pe fa'apea se tasi o le tau i tatau lea na o ia.

O lē muamua fa'apea ma lē sa mulimuli o le a tofusia fa'atasi i le tau tele e fa'avavau, ma o le a fa'afiafiaina lē na muamua e fa'afeiloa'i lē e mulimuli mai. O le tagata e faitio i le tau i le isi ua galo iā te ia e na o le alofa tunoa e mafai ona fa'asaoia ai o ia. O le fa'ata'oto i le 'aufaigaluega o lo'o tu'u mai ai le a'oa'iga i le matau'a ma le masalosalo. E fiafia le alofa i le 'upu moni ma e lē mafa'atusatusaina i ai le matau'a. O lē e i ai le alofa e na te fa'atusaina na o le matagofie o Keriso ma lona ia lava uiga lē ato'atoa.

O lenei fa'ata'oto o se lapata'iga i tagata faigaluega uma, e tusa pe o le ā le umi sa galulue ai, pe o le ā le lelei o le tulaga o la latou galuega, a leai se alofa i o latou uso ā tagata, leai se agaga fa'amaulalo i luma o le Atua, o le a leai so latou aogā. E leai se manuia fa'aleagaga pe a fa'atāuaina le loto fa'apitoa mo 'oe lava ia. A e fa'amamaluina 'oe lava ia o le a lē maua le alofa tunoa lea e mana'omia ia manuia ai lau 'aunaga i le galuega a Keriso. E fa'aleagaina le galuega pe a i ai le loto mimita ma le fiasili.

E lē o le umi o le taimi e tatou te galulue ai a e o lo tatou loto ma'elegā ma le 'ana'ana i le galuega o le a ōnotalia lelei ai e le Atua. I galuega uma e tatou te faia, e mana'omia le faia ma le loto atoa. E o'o i sina galuega itiiti e faia ma le fa'amaoni, e matuā fiafia i ai le Atua i lo o le galuega e aupito telē ma tāua a e fa'aleagaina e le fai fa'apitoa mo lou lava lelei. E silasila le Atua po o iā i tatou le Agaga o Keriso, ma pe o fa'aalia ai Keriso i la tatou galuega. E sili atu i Lana fa'atatau le alofa ma le fa'amaoni i le faia o la tatou galuega, i lo o le tele o le galuega e tatou te faia.

Se'iloa ua fa'aumatia le manatu fa'apito, pe a tu'u'esea le fa'amaualuga, pe a fa'atumulia le loto i le fia fa'afetai, ma fa'aleia le olaga e le alofa - ona pau lea o le tulaga o le a fa'atasi mai ai loa Keriso i le agaga, ma o le a iloa o tatou o le 'au faigaluega fa'atasi ma le Atua.

Pe o le ā le tau fa'a'ono'ono o le galuega, o le 'au galulue fa'amaoni e lē manatu latou o se mea faigatā ma lē tāua. E sauni pea i latou e taumafai ma fa'aogā; a o le galuega, ia faia ma le loto fiafia ona o se galuega e lelei. O le fiafia i le Atua e fa'ailoa mai lea e ala iā Iesu Keriso; o le 'oli'oli lea ua tu'u mai i luma e Keriso - "ia 'Ou faia le finagalo o Lē na 'auina mai A'u, ma fa'ai'u Lana galuega." O mea uma e ō gatasi ma le Ali'i o le mamalu, ma o lenei manatu e fa'afaigofie ai galuega uma, e fa'atuma ai le loto, ma e fa'amalosia ai le agaga mo so'o se mea e o'o mai. Pe a galue ma le loto e lē fa'apito, fa'aaloalogia i le 'avea ma paaga ma Keriso i Ōna puapuagā, tofusia i Ōna tigāalofa, ma 'au'aumea fa'atasi ma Ia i Lana galuega, ua latou fa'ateleina Lona fiafia ma aumaia le vi'iga ma le mamalu i Lona suafa fa'aeaina.

O lea le agaga o 'au'aunaga uma ua faia mo le Atua. Pe a leai lea agaga, o le to'atele e foliga mai e tulaga muamua o le a i'u i le fa'amulimuli, a o i latou e i ai lea agaga, e ui ina faitauina fa'amulimuli a e o le a fa'amamuaina.

E to'atele i latou ua tu'u i latou lava ia iā Keriso, a e latou te lē o va'aia ni avanoa e faia ai ni galuega tetele, po o le ofo atu o i latou mo Lana galuega. O latou ia atonu o le a fa'amalosia i le iloa e lē o le tagata e tu'u atu lona ola ia oti ai, o le a talia lea e le Atua; atonu e lē o le misionare o lo'o fesāga'i i aso ta'itasi ma faigatā po o le oti fo'i o le a tū aupito maua luga i tusi o le lagi. O le Kerisiano e fa'apea i lona olaga i aso ta'itasi, i le tu'u'ese o le fa'apito iā te ia lava i aso uma, i le fa'amaoni o āna fuafuaga ma e

mamā manatunatuga, i le loto maulalo pe a fa'aita mai, i le fa'atuatua ma le usiusita'i, i le fa'amaoni i mea itiiti, o le tagata lea e fa'aalia le uiga o Keriso i le olaga o le aiga - o ia lea atonu e aupito sili ona tāua i le silafaga a le Atua i lo o se misionare e aupito i ta'uta'ua, po o le tagata e fasiotia ona o Keriso.

E matuā tele le 'ese'esega o fa'avae e fuatia ai le amio e le Atua ma le tagata. E silasila le Atua i le tele ma'uā o fa'aosoosoga o lo'o te'ena a e lē o iloa e le lalolagi ma uō pele - fa'aosoosoga i le aiga, i le loto. Na te silafia le agaga ua fa'amaulaloina ina ua va'aia lona ia lava vaivaiga, pe a salamō fa'amaoni ona o se manatu leaga. E silasila o Ia i le loto e ato'atoa le fa'amaoni mo Lana galuega. Ua Ia silafia itulā e tele i le fetaua'iga a le tagata lava ia - le taua e fa'ato'ilaloina ai le loto fa'apito. O nei mea uma e silafia e le Atua ma agelu. O lo'o tusia i Ōna luma i se tusi o mea fa'amanatu mo i latou e matata'u i le Atua ma e mafaufau i Lona suafa.

E lē ona o tatou e a'oa'oina, e lē ona o so tatou tulaga, e lē o se fuainumera po o taleni ua tu'u mai, e lē o i le loto o le tagata, o le a maua ai le pogai lilo o le olaga manuia. Ona ua lagona lo tatou lē aogā, e tatau ai ona tatou tu'ualoto Keriso, auā o Ia o le malosi o malosi uma, o manatunatuga o manatu uma, o le loto naunau ma le usiusita'i o le a manumalō ai pea lava pea.

Ma e tusa pe o le ā le pu'upu'u o la tatou 'au'aunaga po o le maulalo o le tulaga o la tatou galuega, a e a tatou mulimuli iā Keriso ma le fa'atuatua e faigofie, o le a tatou fiafia i le tau. O le mea e lē mafai ona maua e le tagata aupito maua ma lē e sili le poto, atonu o le a maua lea e lē e aupito vaivai ma e sili le lotomaulalo. E lē tatalaina mai faitoto'a o le lagi mo ē fa'aeaina i latou lava ia; ma o le a lē si'itiaina a'e i luga mo ē loto mimita. Peita'i o le a fa'amatala lautele e fa'avavau mo le tago mai o le lima vaivai o se tamaitiiti. O le a aumaia le tau i le alofa tunoa i ē sa galulue mo le Atua i uiga faigofie o le fa'atuatua ma le alofa.

"E Fa'afetaia'i i le Fa'ato'āfaiavā"

Matā'upu 29

O lenei matā'upu e fa'avae i luga o le Mataio 25:1-13.

Sa fa'atasi Keriso ma Ōna so'o i luga o le Mauga o Olive. Ua goto atu le lā i tua o mauga, ma ua fa'apaologia le lagi i ata o le afiafi pō. Sa va'aia se fale ua fa'amalamalamaina fa'apei o le a fai ai se fa'atasiga fialia; o lo'o fa'atali mai ai i totonu o lea fale tagata e to'atele, e fa'ailoa mai ai ua lata ona taunu'u le solo o se fa'aipoipoga. I le tele o nu'u o le itū i Sasa'e, e faia fa'afiafiāga o fa'aipoipoga i le afiafi pō. E alu atu le fa'ato'āfaiavā e fetaiā'i i le fa'ato'ānofotane ma aumai o ia i lona aiga. E tutu molī ona amata lea o le solo mai le fale o le tamā o le avā ma aga'i i le fale o le tane, o lea o lo'o fa'atali mai ai le taumafataga mo malō vala'aulia. Ua silasila Keriso i le va'aiga fa'apea, o tagata o lo'o fa'atali mo le vaega a le fa'ato'ānofotane, ua lata mai le fetaiā'iga mo le solo o le fa'aipoipoga

I tafatafa o le fale o le fa'ato'ānofotane o lo'o fa'atalitali ai taupou e to'asefulu, sa sauni mai ma a latou molī ma fagu e i ai suāu'u. O o latou foliga ua sauni mo le ulufale mai o le fa'ato'āfaiavā, a e pagā, ua i ai se fa'atuai. Ua mavae itulā e tele, ua vaivai ma ua momoe le a'u fa'atalitali. I le vaeluagāpō sa fa'alogoia loa le 'alaga, "Fa'auta, ua sau le fa'ato'āfaiavā; inā ō ia outou e fa'afetaia'i iā te ia." Ua ala mai ē sa momoe ma ua tutū i luga, a o va'aia le solo fialia, o lo'o fa'amalamalamaina e lamepa, ua gasolo ifo. Sa latou fa'alogo i leo fialia o le fa'ato'āfaiavā ma le fa'ato'ānofotane. Sa tago atu taupou e to'asefulu e sauni a latou molī ma fa'atasi atu i le solo, peita'i e le'i ō mai sauni le to'alima, ua leai se suāu'u mo a latou molī. E le'i ō mai sauni latou mo se mea e tupu fa'afuase'i ma ua talosaga atu i le 'au popoto e to'alima, "Au mai ni a outou suāu'u mā matou; auā o le a mamate a matou lamepa." A e ua uma fo'i ona fa'atutumu lamepa a taupou popoto e to'alima ma ua leai se suāu'u ua totoe, ona latou tali ane lea, "Ne'i lē lava ia i matou ma outou; a e lelei ona outou ō i ē fa'atau ma fa'atau mai ai ni a outou" (Mataio 25:9).

A o ō atu latou e fa'atau, ua sau le solo ma aga'i atu pea i luma, a e ua lē fa'atasi atu i ai. Sa ulufale fa'atasi ma le solo le to'alima sa ō mai sauni, ma sa tapunia loa le faitoto'a. Ina ua fo'i mai taupou valea e to'alima, sa te'ena i latou, ma ua tali atu le ali'i o le tausamiga i la latou tagi mai, "Ou te lē iloa outou." Sa tutū pea latou i fafo, i le ala gaogao, i le pogisā o le pō.

A o silasila atu Keriso i tagata o lo'o fa'atalitali mo le fa'ato'āfaiavā, na la fetalai atu i Ōna so'o i le tala i taupou e to'asefulu, e ala i a latou fa'agaioiga, e fa'amalamalamaina ai le mea e o'o i le ekalesia i le taimi a o le a lata i Lona afio fa'alua mai.

O vasega e lua o le 'au maimoa e fa'asino i vasega e lua o ē ta'u mai o lo'o fa'atalitali i le Ali'i. E ta'ua o taupou ona ua ta'u mai e ato'atoa lo latou fa'atuatua. O lamepa e fa'asino i le afioga a le Atua. Ua fa'apea mai le faipese, "O Lau afioga o le sulu lea i o'u vae, ma le malamalama i lo'u ala" (Salamo 119:105). O le suāu'u o se fa'ailoga o le Agaga Pa'ia, ma o lo'o fa'asinoia mai i le valo'aga a Sakaria. Ua fa'apea mai ia, "Ua fo'i mai le agelu na ma tautala, ua ia fafagu mai iā te a'u, e pei o le tagata ua fagua na moe. Ona fai mai lea o ia iā te a'u, O le ā ea ua e va'aia? Ona 'ou fai atu lea, Ua 'ou iloa, fa'auta, o le lamepa ua auro ato'atoa, ma lona tu'ugāsuāu'u i ōna luga, mona tu'ugālamepa e fitu i ōna luga, ma ala e ta'ifitu i tu'ugālamepa o lo'o i ōna luga; ma olive e lua i ōna tafatafa, o le tasi i le itū taumatau o le tu'ugāsuāu'u, ma le tasi i lona itū tauagavale. Ua 'ou toe fai atu i le agelu na ma tautala, ua fa'apea atu, Le ali'i e, o ā ea ia mea?... Ua tali mai o ia, ua fai mai iā te a'u, o lo'o fa'apea mai, O le afioga lenei a Ieova iā Serupapelu, o lo'o fa'apea mai, E lē o le fitafita, e lē o le malosi, a o Lo'u Agaga, ua fetalai mai ai Ieova o 'au.... Ona 'ou fai atu fa'alua lea iā te ia, o lo'o fa'apea atu, O ā ea magāolive e lua, o lo'o liligi mai iā te i la'ua lava le u'u auro i ala auro e lua?... Ona fai mai lea o ia. O tagata fa'au'uina i la'ua nei, o lo'o tutū i luma o le Ali'i o le lalolagi uma" (Sakaria 4:1-14).

Sa sasa'a ifo le suāu'u mai la'au olive e lua i ala auro, i totonu o le tu'ugalamepa, ma ua alu atu i le lamepa auro e fa'amalamalamaina ai le malumalu. Mai le 'au pa'ia o lo'o tutū i le afio'aga o le Atua, ua tu'u atu e Lona Agaga mea faigaluega fa'aletagata i ē ua fa'apa'iaina mo Lana fe'au. O le galuega a le to'alua ua

fa'au'uina o le fa'ailoa atu i tagata o le Atua e na o le alofa tunoa fa'alelagi e mafai ona 'avea ai Lana afioga ma sulu i vac ma se malamalama i le ala. "E lē o le fitafita, e lē o le malosi, a o Lo'u Agaga, ua fetalai mai ai Ieova o 'au" (Sakaria 4:6).

I le fa'ata'oto, sa ō atu taupou e to'asefulu e fetaia'i ma le fa'ato'āfaiavā, ma sa tofu uma i latou ma lamepa fa'apea fagu mo suāu'u. Mo sina taimi e le'i va'ia se 'ese'esega mai iā i latou. E fa'apea fo'i le ekalesia pe a ua lata i le afio fa'alua mai o Keriso. O i latou uma ia ua iloa le afioga a le Atua; ua latou fa'alogo i le fe'au i le latalata o Lona afio mai, ua talitonu ma le mautinoa i Lona fa'aali mai. Peita'i e pei lava o le fa'ata'oto, e fa'apea fo'i le tulaga i le asō. E o'o mai le taimi o fa'atalitaliga, o le a tofotofoina le fa'atuatua; ma a fa'alogoia loa le 'alaga, "Fa'auta, ua sau le fa'ato'āfaiavā, inā ō ia outou e fa'afetaia'i iā te ia," e to'atele o le a lē sauni. E leai se suāu'u i fagu mo a latou lamepa, ua lē iā i latou le Agaga Pa'ia.

Pe a leai le Agaga o le Atua, o le a lē aogā le na o le iloa o Lana afioga. O le 'upu moni, a lē fesoaa'i ma le Agaga Pa'ia, o le a lē mafai ona saunia le agaga pe fa'apa'iaina le loto. Atonu e iloa lelei e se tasi fa'atonuga ma folafolaga a le Tusi Pa'ia; peita'i pe a lē fa'atumauiina le 'upu moni i totonu e le Agaga o le Atua, o le a lē suia le amio. A leai se fa'amalamalama e le Agaga, o le a lē mafai ona tu'u'ese'ese e tagata le 'upu moni mai le mea sesē, ma o le a latou pa'u'ū ifo ai i lalo o fa'aosoosoga poto a Satani.

E lē o ni tagata fa'atagālelei le vasega o lo'o fa'asino i taupou vālea. E fa'atatauina e latou le 'upu moni, e latou te molimau atu mo le 'upu moni, e tosina i latou i ē talitonu i le 'upu moni; a e peita'i latou te lē gaua'i atu ina ua galuea'iina e le Agaga Pa'ia. Latou te le'i pa'u'ū i luga o le Ma'a, o Keriso Iesu lea, ma fa'aumatia ai le uiga tuai. O lenei vasega e fa'asino fo'i i le 'au fa'alologologo o le fanua ma'amaā. Sa latou sauni ma na maua le 'upu, peita'i latou te le'i tu'uloto ōna fa'avae, ma e le'i tumau iā te i latou lona tāua. E galue le Agaga i le loto o le tagata, e fa'ataui i lona naunauta'iga ma fa'ataga ai e tu'u iā te ia se uiga fou; a e peita'i o le vasega sa fa'asino i taupou vālea ua fa'amalieina i galuega e so'onafai ona e latou te lē iloa le Atua. Latou te le'i su'esu'e i Ōna uiga; e le'i feso'ota'i latou ma Ia; o lea ua latou lē iloa ai pe fa'apefa ona talitonu, fa'apefa ona va'ai atu ina ia ola ai. O la latou 'au'aunaga i le Atua e na o se fa'afoliga, "Latou te ō mai fo'i iā te 'Oe pei ona ō mai o lo'u nu'u, latou te nonofo fo'i i Ōu luma e pei o lo'u nu'u, latou te fa'alologologo fo'i i Āu 'upu, a e latou te lē mafafai ona 'ana'ana i ai; auā ua latou alolofa fua i o latou gutu, a ua mafuli o latou loto i lo latou manumanu" (Esekielu 33:31). Ua fa'ailoa mai e le aposetolo o Paulo, o le a fa'apea le uiga fa'apitoa o i latou e ola i le taimi a e ua lata le afio fa'alua mai o Keriso. Ua fai mai o ia, "A e ia e iloa e oe lenei mea, o ōna aso e gata ai e o'o mai ai aso faigatā; auā e 'avea tagata ma ē alolofa i latou iā i latou, o ē manana'o i tupe, o ē loto vi'i, o ē fa'amauualuga, o ē 'upu leaga, o ē lē fa'alogo i mātua, o ē lē fa'afetai, o ē amio leaga,... o ē fa'alata, o ē so'ona fai, o ē ua fa'afefeteina, o ē ua tele le mana'o i mea fa'afiafia a e leai se mana'o i le Atua; o ē ua peisea'i ua amio Atua, a o le mana ua i lea mea ua latou te'ena; ia e 'alo 'ese lava i tagata fa'apenā" (II Timoteo 3:1, 2, 4, 5).

O le vasega lenei o le a fa'alogoia ai i le taimi o fa'afitauli le 'alaga, Ua filemū ma saogalemū; latou te lē manatu i faigatā a e fa'afilemūina o latou loto ia sao ai. Latou te iloa ua i le malaia ina ua ala mai le tulimomoe ma feōlea'i mo mea e latou te mana'omia; peita'i e lē mafai e se tagata ona foa'i atu i se isi mea fa'aleagaga. Ua ofo fua mai e le Atua le alofa tunoa i agaga uma ta'ito'atasi. Ua uma ona tala'iina le fe'au o le tala lelei, "O lē fia inu, inā sau ia, atoa ma lē mana'o i ai, inā ave fua ia le vai o le ola" (Fa'aaliga 22:17). A e peita'i e lē mafesua'ia le amio; e lē mafai ona talitonu se tagata mo se isi. E leai se tagata e mafai ona talia le Agaga mo se isi tagata. E lē mafai e se tagata ona tu'u atu i se isi le uiga moni, o le fua lea o le galuega a le Agaga. "Ana i ai o Noa, ma Tanielu, ma Iopu, ua fetalai mai ai le Ali'i o Ieova, o lo'o ola A'u, e lē lavea'iina e i latou se atali'i, po o se afafine; latou te lavea'iina na o latou lava ola i la latou amiotonu" (Esekielu 14:20).

E fa'ailoa le uiga moni pe a i ai faigatā. Pe a fa'alogoia le 'alaga i le tulua o pō, "Fa'auta, ua sau le fa'ato'āfaiavā; inā ō ia outou e fa'afetaia'i iā te ia," ma ua ala mai taupou sa momoe, ma sa iloa ai ē na sauni mo le alumaga. Sa fa'ate'ia uma i latou; peita'i e to'alima taupou na ō mai sauni mo se mea e tupu fa'afuase'i, a o le isi to'alima e le'i i ai se sauniuniga. O lenei ua i ai se fa'afitauli, o se mea e le'i fuafuaina ma o le a fa'ailoa ai pe e i ai se fa'atuatua moni i folafolaga a le Atua. O le a fa'ailoa mai ai pe fa'atumauiina le agaga e le alofa tunoa. O le tofotofofa tele mulimuli e o'o mai lea pe a fa'ai'uina le alofa tunoa mo le tagata, pe a o'o i le taimi o le a lē toe maua ai mea o lo'o mana'omia e le agaga.

O taupou e to'asefulu ua ta'ua latou uma o Kerisiano, ma o lo'o vā'ai latou i le afiafi o le talafa'asolopito o le lalolagi. E i a i latou uma se vala'au, se igoa, se lamepa, ma ua ta'u mai o i latou uma o lo'o faia le galuega a le Atua. O lo'o latou fa'atalitali mo le fa'aali mai o Keriso, peita'i e to'alima e lē o sauni. O le to'alima lea o le a fa'ate'ia, fa'apopoleina, ma o le a i fafo mai le fale o le tausama'aga.

I le toe aso, e to'atele o le a ta'u mai e latou te ulufale i le malō o Keriso; fai mai, "Na matou 'a'ai ma inu i Ōu luma; na e a'oa'o fo'i i o matou ala" (Luka 13:26). "Le Ali'i e, le Ali'i e, matou te le'i perofeta ane ea i Lou igoa, o Lou igoa fo'i na matou tulia ai temoni, o Lou igoa fo'i na matou fai ai vavega e tele?" (Mataio 7:22). A e o le tali, "Ou te fai atu iā te outou, 'Ou te le'i iloa outou pe maifea; inā ō 'ese ia outou iā te A'u" (Luka 13:27). I lenei olaga e latou te le'i ulu atu ia so'ofa'atasi ma Keriso; e latou te lē iloa le gagana o le lagi, ma e lē iloa ōna oli'olisaga. "Po o ai fo'i se tagata ua iloa mea a le tagata, ua na o le agaga o le tagata o lo'o i totonu iā te ia? E fa'apea fo'i ona lē iloa e se tasi mea a le Atua, ua na o le Agaga o le Atua" (I Korinito 2:11).

O 'upu e aupito sili ona fa'anoanoa ai i 'upu uma ua fa'alogi i ai taliga o tagata, o 'upu fa'ai'u ia, "'Ou te lē iloa outou." O le fa'atasi mai o le Agaga Pa'ia, lea sa e lē amana'ia, se manū e fai ai 'oe ma se tasi o ē o le a fa'afiafiaina i le tausama'aga o le fa'aipoipoga. A e i lenā va'aiga, e le'i mafai ona e 'aufa'atasi ai. O lona malamalama o le a i luga o mata sa fa'atauasoia, ma pesega i luga o taliga na tutuli. Ua lē mafai e lenei alofa ona aumaia se oli'olisaga i le loto ua fa'asesēina e le lalolagi. Ua tapunia le lagi mai iā te 'oe ona ua e lē talafeagai mo ōna mafutaga.

E lē mafai ona tatou sauni e fetaia'i ma le Ali'i pe a fa'ato'ā ala a'e ina ua fa'alogoina le 'alaga, "Fa'auta, le Fa'ato'āfaiaivā!" ona fa'aputupu mai lea o lamepa ua leai ni suā'u ina ia toe fa'atumulia. Tatou te lē mafai ona tu'u fa'amamao Keriso mai o tatou olaga, a e manatu e talafeagai pea mo Lona fa'atasi ai ma i tatou i le lagi.

I lenei fa'ata'oto sa i ai suā'u i fagu fa'atasi ma lamepa a taupou popoto; sa mumū malamalama pea i le pō a o fa'atali. Sa susulu lenei malamalama mai le pogisā, ma sa fesoasoani e fa'amalamalamaina ai le ala i le nofoāga o le fa'ato'āfaiaivā, i le tausama'aga o le fa'aipoipoga. Ia fa'apea fo'i so'o o Keriso le tatau ona fa'asusulu atu le malamalama i le pouliuli o le lalolagi. E ala i le Agaga Pa'ia, o le a faia le Afioga a le Atua ma malamalama a o 'avea o se mana fa'aliua i le olaga o lē e taliaina. Pe a tu'uina fa'avae o Lana afioga i o latou loto, o le a fa'atupuina e le Agaga Pa'ia uiga o le Atua i tagata; o le a fa'apupulaina i Ōna so'o le malamalama o Lona mamalu - o Lona uiga moni lea. O le a latou fa'amamaluina le Atua, ina ia fa'amalamalamaina le ala i le fale o le Fa'ato'āfaiaivā, i le 'a'ai o le Atua, i le tausama'aga o le fa'aipoipoga a le Tama'i Mamoe.

Sa taunu'u mai le fa'ato'āfaiaivā i le tulua o pō - le itulā e aupito sili ona pogisā. E fa'apea fo'i le afio mai o Keriso i le taimi e aupito pouliuli o le talafa'asolopito o lenei lalolagi. Ua fa'aalia mai i le ata o aso o Noa ma Lota le tulaga o le lalolagi a e le'i afio mai le Atali'i o le tagata. Ua ta'u mai e le Tusi Pa'ia ina ua fa'asino i luma i lenei taimi e galuea'iina ai e Satani ma le malosi uma ma "mea fa'asesē uma o le amioleaga." E fa'aali manino mai lana galuega e ala i le tupu vave o le pogisā, o mea sesē e tele na'uā, o manatu 'ese i le masaniga fa'aletapua'iga, o taofigasesē o nei aso o le i'uga. I lenei taimi e lē na o le ta'ita'iina fa'apagotā o le lalolagi e Satani, a e o āna tau fa'asesē o lo'o fa'afefetea'i fa'apotopotoga e ta'u o ekalesia a lo tatou Ali'i o Iesu Keriso. O lenei fulituāga o le a i'u ai i se pogisā mata'utia e pei o le vaeluāgapō, e lē mafai ona ātia. Mo tagata o le Atua, o le a 'avea lea o se pō o tofotofoga, o se pō o auēga, o sauāga ona o le 'upu moni. Peita'i o le a fa'asusuluina le malamalama o le Atua mai lenei pō pouliuli.

Fai mai le aposetolo, o le Atua Lē na fetalai atu, "Ia pupula mai le malamalama mai le pouliuli" (II Korinito 4:6). A o "so'ona nunumi le lalolagi ma ua gaogao, sa ufitia fo'i le moana i le pouliuli; na fegaoioia'i fo'i le Agaga o le Atua i le fogātai. Ua fetalai mai le Atua, Ia malamalama; ona malamalama ai lea" (Kenese 1:2, 3). E fa'apea le pogisā o le pouliuli fa'aleagaga, ua alu a'e ai le fetalai a le Atua, "Ia malamalama." Ua Ia fetalai atu i Ōna tagata, "Tula'i ia, inā malamalama ia, auā ua o'o mai lou malamalama; ua alu a'e fo'i le pupula o Ieova i ōu luga" (Isaia 60:1).

Ua fa'apea mai le Afioga a le Atua, "Auā fa'auta mai, e ufitia le lalolagi i le pouliuli, e ufitia fo'i nu'u i le pogisā; a e afio a'e Ieova i ōu luga, ma le pupula o Ieova e aliali mai lea i ōu luga" (Isaia 60:2).

O le pouliuli o le lē malamalama i le Atua o lo'o ufitia ai le lalolagi; ua lē iloa e tagata Lona uiga moni ona ua lē malamalama i ai ma ua fa'auigasesē. I lenei taimi o le a aumaia se fe'au mai le Atua, se

fe'au e fa'atosina lona susulu ma o lona mana e fa'asaoina ai. O le a fa'ailoa mai ai Lona uiga. O le a fa'asusuluina le malamalama o Lona mamalu i le pouliuli o le lalolagi, le malamalama o Lona agalelei, alofa tunoa, ma le 'upu moni.

O le galuega lenei na tu'u mai i 'upu a le perofeta o Isaia, "Alu a'e i le mauga maualuga, o 'oe lē aumai le tala lelei iā Siona; ia matuā leo tele, o 'oe lē aumai le tala lelei iā Ierusalem; ia leo tele, 'aia le fefe; fai atu i 'a'ai o Iuta, Fa'auta i lo outou Atua. Fa'auta, e afio mai le Ali'i o Ieova ma le malosi, e pule Lona 'a'ao mo ia; fa'auta, ua iā te Ia Lana tau'i, ua i Ōna luma le totoi o Lana galuega" (Isaia 40:9, 10).

O i latou o lo'o fa'atalitali mo le ulufale mai o le Fa'ato'āfaiaivā o le a fai atu i tagata, "Fa'auta, o lou Atua." O 'ave mulimuli o le malamalama, o le fe'au mulimuli o le alofa tunoa e tu'u atu i le lalolagi, o se fa'aaliga lea o Lona uiga alofa. E tatau ona fa'atinoina e le fanau a le Atua Lona mamalu. E tatau iā i latou ona fa'aali atu i o latou lava olaga ma amioga le mea ua faia mo i latou e le alofa tunoa o le Atua.

O le malamalama o le Lā o le Amiotonu o le a fa'asusuluina mai i galuega lelei - i 'upu e fa'amaoni ma galuega e fa'apa'iaina.

O Iesu, le fa'aaliga o le mamalu o le Tamā, na afio mai i le lalolagi e 'avea ma ōna malamalama. Na afio mai e fai ma sui o le Atua i tagata, ma e pei ona tusia, o Ia sa fa'au'uina "i le Agaga Pa'ia ma le mana," ma "sa femaliua'i ma agalelei ma fa'amalōlō atu" (Galuega 10:38). I le sunako i Nasareta sa fetalai ai Ia, "Ua i O'u luga le Agaga o le Ali'i, auā ua na fa'au'u mai iā te A'u e folafola le tala lelei i ē matitiva; ua 'auina mai A'u e Ia e fa'amalōlō i ē loto momomo, e tala'i le sa'olotoga i le tafeāga, ma ia pupula mata o ē tauaso, e tu'u sa'oloto i ē ua fa'asauāina, tala'i le tausaga e finagalo malie mai ai le Ali'i." (Luka 4:18, 19). O lea le galuega sa Ia tu'u i Ōna so'o ia latou faia. Ua fetalai o Ia, "O outou, o le malamalama o le lalolagi outou.... Ia fa'apea ona pupula atu lo outou malamalama i luma o tagata, ina ia latou iloa la outou amio lelei, latou te vivi'i atu ai i lo outou Tamā o i le lagi" (Mataio 5:14, 16).

O le galuega lenei sa fa'amatalaina e le perofeta o Isaia ina ua fa'apea mai, "Ona ia tofitofi au mea e 'ai i lē ua fia 'ai, ia au mai i lou fale ē ua matitiva ma fa'asauāina; a e iloa lē ua lē lavalavā e te fa'aofuina o ia, 'aia fo'i e te lafi iā i latou o lou lava aiga. Ona gafoa mai ai lea o lou malamalama e pei o le tafa o ata, e ta'alise ona tupu mai fo'i o lou malōlō; e alu atu fo'i lau amiotonu i ōu luma, e muli'au mai le pupula o Ieova iā te oe" (Isaia 58:7, 8).

O le mea lea o le a fa'asusuluina ai le mamalu o le Atua i le pogisā o le pouliuli fa'aleagaga ia si'itia ai i luga, e ala i Lana ekalesia, ē ua fa'ano'uno'u i lalo ma fa'amafanafana ē o fa'anoanoa.

O lo'o si'omia pea tatou i auēga mai fa'anoanoāga a le lalolagi. E i ai i itū 'ese'ese ē o mafatia ma o lo'o mana'omia le fesoasoani. O la tatou galuega o le avatu o le fesoasoani e fa'amāmā ma fa'amālū ai faigatā o le olaga ma mafatiāga.

E sili le faia o se galuega i lo o le na o le lauga atu. E tatau ona tatou fafaga i ē o fia 'a'ai, fa'aofu ē lē o lavalavā, ma fa'amalumalu le tagata e leai se aiga. O lo'o vala'auina i tatou ia faia mea e sili atu i lo nei mea. E tele mana'oga o le agaga e na o le alofa o Keriso e mafai ona fa'amalieina. A e a fa'atasi Keriso ma i tatou, o le a fa'atumulua o tatou loto i le tigāalofa fa'aleAtua, ma o le a tatalaina puna o le alofa fa'amaoni e pei o le alofa o Keriso.

O lo'o vala'au le Atua e lē mo na o a tatou mea alofa mo ē o mana'omia le fesoasoani, a e mo a tatou foliga fiafia, o a tatou 'upu e tumu i le fa'amoemoe, o tatou lima mafola. Ina ua fa'amalōlō ma'i e Keriso, sa Ia tu'u Ōna 'a'ao i o latou luga; ia fa'apea ona tatou feso'ota'i atu ma i latou o lo'o tatou sa'ili e avatu i ai se fesoasoani.

E to'atele ua leai se fa'amoemoe; ia tatou fa'asusulu atu 'ave o le lā iā i latou. E to'atele fo'i ua leai se malosi e taumafai ai, a ia tautala atu iā i latou i 'upu fa'afiafia. Ia tatalo mo i latou o lo'o mana'omia le areto o le ola. Faitau atu i ai 'upu mai le Afioga a le Atua. O lo'o i luga o le to'atele se fa'ama'i o le agaga e leai se togafiti fa'alelalolagi o le a mafai ona togafitia ma e leai se foma'i e mafai ona fa'amalōlōina. Ia tatalo mo nei agaga ma aumai i latou iā Iesu. Ta'u iā te i latou o lo'o i ai se vaila'au i Kiliata ma o lo'o i ai fo'i ma se Foma'i i inā.

O le malamalama o se manuia lea mo le lalolagi atoa, o lo'o sasa'a mai ōna 'oloa i se lalolagi lē fa'afetai, e lē pa'ia, ma agaga ua fa'avaivai. E fa'apea le Lā o le Amiotonu ona si'omia o le lalolagi atoa, o lo'o ta'ia i le pouliuli o le agasala, ma fa'anoanoāga, ma mafatiāga, a e fa'amalamalamaina i le iloa o le

alofa o le Atua. E lē fa'ailogaina se talitonuga, tulaga, po o se vasega o tagata, a e o le a lē fa'asusuluina i ai le malamalama mai le nofoali'i i le lagi.

O le a 'aveina i tulū'iga o le lalolagi le fe'au o le fa'amoemoe ma le alofa tunoa, ma o so'o se tasi e loto i ai e mafai ona 'a'apa atu ma u'umia le malosi o le Atua ma ina ia lelei ma Ia, ona fa'afilemūina ai lea o ia. O le a lē toe si'omia ē fa'apaupau i le pogisā o le tulua o pō, a e o le a alu 'ese lenei pouliuli i luma o 'ave sususlu o le Lā o le Amiotonu. Ua fa'ato'ilaloina nei le pule a le ti'apolo.

Peita'i e lē mafai e se tagata ona tu'u atu o se mea a e na te le'i mua'i taliaina. I le galuega a le Atua, e lē mafai e le aiga tagata ona amataina se mea; e leai se tagata e mafai i āna ia lava taumafaiga ona 'avea ia ma 'ave susulu mo le Atua. O le suāu'u na sasa'aina e 'avefe'au fa'alelagi i ala auro ma fa'atafeina mai tu'ugalamepa auro i lamepa o le malumalu, lea e susulu ma fa'apupulaina ai pea le malamalama. O le alofa fo'i o le Atua o lo'o fa'aalu atu pea i le tagata ia mafai ai e ia ona toe fa'asusulu atu le malamalama. I loto o tagata o ē o lo'o so'ofa'atasi ma le Atua e ala i le fa'atuatua, o lo'o tafefua mai i ai le suāu'u o le alofa, ina ia toe fa'asusulu atu i galuega lelei, ia 'au'auna i le Atua ma le loto fa'amaoni.

O lo'o aofia ai 'oa uma o le lagi i le meaalofo ofoofogia ma e lē mafuatiaina a le Agaga Pa'ia. E lē ona o lo'o puipua e le Atua 'olua o Lona alofa tunoa ia 'aia le masa'a ifo i tagata i le lalolagi. Pe a ua naunau tagata uma e talia, o le a mafai loa ona fa'atumulia tagata uma lava e Lona Agaga.

E mafai e so'o se agaga ona 'avea ma auala ola o le a feso'ota'i mai ai le Atua i le lalolagi ma 'olua o Lona alofa tunoa, o 'oa a Keriso e lē tau sa'ilia. E leai se fa'anaunaga a Keriso, vaganā ia faia tatou ma sui e fa'aioa i le lalolagi Lona Agaga ma Lona uiga. E leai se mea e sili le mana'omia e le lalolagi i lo'o le fa'aalitinoina o le alofa o le Fa'aola e ala i le fanau a tagata. O lo'o fa'atalitali le lagi mo auala ia mafai ai ona sasa'a mai le suāu'u pa'ia e fa'afiafia ma fa'amanuiaina ai loto o tagata.

Ua tu'u mai e Keriso mea uma e mana'omia ina ia fesua'i ai le tino o Lana ekalesia, e fa'apupulaina i le malamalama o le lalolagi, e i ai le mamalu o Emanuelu. O Lana fuafuāga ia si'osi'omia Kerisiano ta'ito'atasi uma ma se mana fa'aleagaga o le malamalama ma le filemū, ma e naunau o Ia ina ia tatou fa'aalia Lona Ia lava 'oli'oli i o tatou olaga.

O le a fa'aalia le fa'atasi ai o le Agaga e ala i le fa'atafe atu o le alofa fa'alelagi. O le a tafe atu le 'ato'atoaga o le uiga fa'aAtua e ala i tagata ua fa'apa'iaina, ma o le a alu atu i isi.

O le Lā o le Amiotonu e i ai "le mea e malōlō ai i Ōna 'apa'au" (Malaki 4:2). O lea o le a fa'asalalau atu e nei so'o fa'amaoni uma se lelei mo le olaga, o le lototele, o le lima fiafesoasoani, ma le fa'amalōlōga moni.

O le uiga o le ekalesia a Keriso e sili atu i lo'o le fa'amagaloina o agasala; o le uiga o le tu'u'esea o agasala, ma toe fa'atumulia le gaogao i le alofa tunoa o le Agaga Pa'ia. O lona uiga o le malamalama fa'ale-Atua, o le 'oli'olisaga i le Atua. O le uiga o le loto ua 'ave'esea le fa'apito, ma ua fa'amanuiaina i le fa'atasi mai o Keriso. Pe a afio Keriso i le agaga, ona mamā lea, ua sa'oloto mai le agasala. O le mamalu, o le tumua'iga, o le ato'atoaga o le fuafuāga o le fa'aolataga ua fa'ataunu'uina i le olaga. O le taliaina o le Fa'aola o le a aumai ai se pupula o le filemū e ato'atoa, alofa e ato'atoa, ma le talitonuga e mautū. O le matagofie ma le manogi o le uiga o Keriso e fa'aalia i le olaga o le a molimau mai ai na 'auina mai e le Atua Lona Ālo i le lalolagi e 'avea ma lana Fa'aola.

E le'i fa'atonu e Keriso Ōna so'o ia taumafai e susulu atu, a e sa fetalai o Ia, Ia fa'asusulu atu lo outou malamalama. E i totonu iā te 'oe le malamalama pe a ua e maua le alofa tunoa o le Atua. Ia tu'u'ese mea fa'asoesā ona fa'aali mai lea o le mamalu o le Ali'i. O le a susulu mai le malamalama e ātia ma 'ave'esea ai le pogisā.

O le fa'aaliga o Lona lava mamalu i le aigātagata o le a aumaia ai le lagi ia lata i le tagata, ma o le a va'aia le matagofie o le malumalu i totonu o agaga uma o lo'o afio ai le Fa'aola. O le a fa'atosina mai tagata e ala i le mamalu o le afio'aga o Keriso, o le a fa'atumulia i vi'iga ma fa'afetai mai agaga e to'atele ua manumalō mo le Atua, ma o le a toe fa'afō'i atu ai le fa'ane'ene'ega i Lē na aumaia ia mea uma.

"Tula'i ia, inā malamalama ia, auā ua o'o mai lou malamalama; ua alu a'e fo'i le pupula o Ieova i ōu luga" (Isaia 60:1). O le fe'au lenei ua tu'uina mai iā i latou o ē ō atu e fa'afetaia'i le Fa'ato'āfaiaivā. E afio mai Keriso ma le mana ma le mamalu tele; e afio mai o Ia i Lona lava mamalu ma le mamalu o le Tamā. E afio mai o Ia fa'atasi ma agelu pa'ia uma. A o fa'apouliuligia le lalolagi atoa, o le a i ai le malamalama i alalafaga ta'ito'atasi o le 'au pa'ia, ma o le a latou maua le ulua'i malamalama o Lona afio

fa'alua mai. O le a susulu manino le malamalama mai Lona matagofie, ma o Keriso le Fa'aola o le a fa'aaloalogia e i latou uma o ē na galulue mo Ia. A o sosola 'ese le 'au amioleaga mai Ōna luma, o le a fa'afiafiaina i latou na mulimuli iā Keriso. Sa fa'apea mai le tamā aloa'ia o Iopu a o tepataula'i o ia i le taimi o le afio fa'alua mai o Keriso, "'Ou te iloa atu iā te ia mo a'u lava, e va'ai atu fo'i o'u mata iā te Ia, a e lē o se tasi..." (Iopu 19:27). O lo'o fa'atasi pea Keriso ma so'o fa'amaoni i aso ta'itasi, o se soa ma se uō masani, ma e mafuta ma le Atua i taimi uma. Ua fa'ae'e i o latou luga le mamalu o le Ali'i, ma ua fa'aātaina iā i latou le malamalama i le iloa ua fa'aalia i fofoga o Keriso le mamalu o le Atua. I le taimi nei ua fa'afiafiaina i latou e 'ave manino o le pupula o le Tupu i Lona mamalu. Ua saunia i latou mo le mafutaga ma le lagi, auā ua i ai pea le lagi i o latou loto.

O le a fa'aea i luga o latou ūlu, a o fa'asusuluina i o latou luga 'ave malamalama o le Lā o le Amiotonu, ma le 'oli'olisaga ina ua lata mai lo latou fa'aolataga, ona latou ō atu lea e fetaia'i ma le Fa'ato'āfaiaivā, ma ua fa'apea atu, "Fa'auta, o lo tatou Atua lenei; sa tatou fa'atalitali iā te Ia, ua ia fa'aolaina fo'i i tatou" (Isaia 25:9).

"Ua 'ou fa'alogi fo'i e peiseā'i o le leo o le motu o tagata e to'atele, e peiseā'i o le ta'alili o vai e tele, e peiseā'i o le ta'alili fo'i o faititili tetele, ua fa'apea atu, Aleluia; auā ua fai ma tupu le Ali'i le Atua e ōna le malosī uma lava. Ia tatou fīafia ma 'oli'oli, ma tu'u atu le vi'iga iā te Ia; auā ua o'o mai le tausama'aga o le Tama'i mamoe, o Lona felutua fo'i ua saunia o ia e Ia.... Ua fai mai fo'i o ia iā te a'u, Ia e tusi, Amu'ia ē ua tala'iina i le tausama'aga o le Tama'i mamoe" (Fa'aaliga 19:6-9). "O le Ali'i ia o ali'i ma le Tupu o tupu; o ē ua iā te Ia fo'i ua vala'auina i latou, ma filifilia, ma fa'amaoni" (Fa'aaliga 17:14).

